



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines


Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search


Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



V. 7.

✓. 7

(Vanderbilt)



23. SZ.

267715

MONUMENTA HUNGARIAE HISTORICA.

MAGYAR
TÖRTÉNELMI EMLÉKEK.

Kiadja

A MAGYAR TUDOMÁNYOS AKADEMIA
TÖRTÉNELMI BIZOTTSÁGA.


MÁSODIK OSZTÁLY: ÍRÓK.

TIZEDIK KÖTET.

PEST,
KÖNIGHEIMER VERDINÁND
& KÖLCH. KÖNYVIARÁNY.
1882.

F0A





MONUMENTA
HUNGARIAE HISTORICA.

SCRIPTORES.

X.

NEW YORK
PUBLIC
LIBRARY

MONUMENTA HUNGARIAE HISTORICA.

MAGYAR
TÖRTÉNELMI EMLÉKEK.

K I A D J A

A MAGYAR TUDOMÁNYOS AKADEMIA
TÖRTÉNELMI BIZOTTSÁGA.

MÁSODIK OSZTÁLY: ÍRÓK.

10

TIZEDIK KÖTET.

III. ÉVF. 3. KÖT.

PEST, 1865.
EGGENBERGER FERDINÁND MAGYAR AKAD. KÖNYVÁRUSNÁL.

VERANCSICS ANTAL

M. KIR. HELYTARTÓ, ESZTERGOMI ÉRSEK

ÖSSZES MUNKÁI.

KÖZLI

SZALAY LÁSZLÓ

M. AKAD. R. T.

57th

HETEDIK KÖTET.


VEGYES LEVELEK.

1549-1559
NEW YORK
PUBLIC
LIBRARY

PEST, 1865.

EGGENBERGER FERDINÁND MAGYAR AKAD. KÖNYVÁRUSNÁL.

AN



HOY VON
DUBN
VIA BRU

ELŐSZÓ.

Verancsics Antal Összes Munkáinak jelen hetedik kötete a nagyjelességű tudós és államférfiú egyes leveleinek második részét foglalja magában, mely 1549. november 13-kától 1559. martius 7-keig terjed; kihagyása mellett természetesen azon 1553-tól 1557-ig irottoknak, melyek első portai követsége idejében kelvén, az e követséget közlő III. és IV. kötetben állanak.

A jelen kötet tartalma is, mint a hatodiké, öt levél kivételével, Verancsicsnak a nemzeti muzeum kéziratai közt „1681. fol. lat.“ könyvtárjegy alatt őrzött négykötetes levélgyűjteményéből; kettő, ú. m. LXXV, és XCIII. számúak, a győri káptalan codexéből, vétetett. Hármát, ú. m. a XCVII. CXXI. és CXXII. számmal jegyzeteket; sem a muzeum ezen és egyéb Verancsicsféle codexekben, sem Katonánál, Praynál, s más a holt közlő által használt gyűjteményekben nem sikerült megtalálom.

Az itt közlött levelek közül is nem keveset iktatott be Katona István Historia Criticájába, Pray is egyet az Epistolae Procerum közzé; de majd mindig kihagyásokkal. Másfelül a XC. b. alattit én vetettem ide (a 346. lapra) Prayból, mely kétségtelenül csak elnézésből maradt el.

Az ívek futólagos átnézése alkalmával csak néhány sajtóhibát találtam, melyeket előleges kiigazíthatás végett itt feljegyzek. A 72. l. 1. sorában *adt*: olvasandó edate helyett; a 145. l. glossájában oct. 23. teendő; a 153. l. 11. sorában: *condescendendum*; a 189. lapon a levélszám LXXIX; a 207. l. Torda Zsigmond kell István helyett; a 239. l. 8. s. *Nostra* kell; a 290. l. a levél felirata helyesben: „Verancsics Antalnak, testvére Mihály.“ A többi még ezeknél is csekélyebb. Arra, hogy a LXII. és LXIII. levelek sora felcserélendő, a LXX. pedig a LXIII. után olvasandó az időrend tekintetéből, elég figyelmeztetni.

A Történelmi Bizottság e publicatio nagy fontosságától áthatva — miután különösen Verancsics levelei nem csak a kor történetére, hanem ennek erkölcsire is fényes világot vetnek, és számos érdekes adatot szolgáltatnak a levélíró s a levélvevők magán viszonyaira egyszersmind — nehogy az történetünk nagy kárával abba maradjon, folytatásával Wenzel Gusztáv akadémiai rendestagot bízta meg, kinek gondjai alatt fognak a következő kötetek világot látni.

NYOVSZ

Toldy Ferencz,

mint a Történelmi Bizottság előadója.

VSASZLL

ANTONII VERANCII EPISTOLAE.

II.

ANTONII VERANCII
EPISTOLAE
LIBER II.

XXOY W3M
OUBN
VRA89L

I.

Bornemisza Gergelynek Verancsics Antal.

Antonius Wrancius Gregorio Bornemizae S.

Rediens Viennam ex Transsylvania, omnino 1549. nov. 13. credebam, quod hic te invenire debuisssem. Tua enim et opera et consilio, auxilioque, compater amantissime, in rebus novi hujus mei propositi potissimum apud regni nostri optimates eram usurus. Sed postquam intellexissem, quod abesses, praecessesque arci cuidam optimae, utilique atque honesta fruereris conditione beneficio principis, longe profecto majorem coepi voluntatem et ista accessione fortunae tuae, dudum jam promerita, quam displicentiam, quod id temporis praesentia atque opera tua caruerim.

Laudetur itaque Dominus Deus, laudetur et princeps optimus, qui tandem ad longa et maxima servitia meritaque tua haud quaquam exigua resperxit. Ego autem tibi etiam mirifice, *) si modo quicquid hoc est, quod collatum est, pro voto sit et ex sententia. Nam quod ad meas res attinet, de quibus postea plura tractabimus, his quidem etiam absens poteris suffragari atque adesse, quippe quem, quum

*) Kimaradt: „gratulor.“

et voluntate in me propensum esse non ambigam, tum et amicorum suorum myriadas accomodaturum usibus meis non diffidam.

Proinde dies hodiernus, quod Viennam appuli sextus est. Ubi vel tantisper decrevi subsistere, donec equi ex itinere respirarint, et parem mihi ad hie mem arcendam neccssaria; postea Sarvarium ad illustrem virum Thomam Nadasdinum proficiscar, cui ob exploratam diu jam ejus erga me benevolentiam, cognitamque in gerendis rebus industriam, et in juvandis oppressis integritatem ac studium primordia hujus fortunae meae commisi. Caeterum eundem quoque et portum et auram puppi meae variis ventis et incerto cursu a quinquennio agitatae constitui. Pene quem si et compatris mei charissimi ejusque amicorum patrocinia accesserint nostris conatibus, omnia, Christo et duce et comite, sperabo in rebus meis meliora.

Praeceptoribus fratris mei persolvi ad quadrantem, et visus sum illis peroptime satisfacisse; tamen ago tibi ingentes gratias, quod et puerum paterne complexus es, et novo ejus praeceptori feceris de me fidem, confirmaris utrumque, ne tum de reditu meo, tum de aeris satisfactione desperarint.

Haec officia certe nobilissima sunt, habebunturque apud me immortalia et rependentur, si quae facultas affulserit, non indigna gratitudine. Vale. XIII. Novembris 1549. Viennae.

II.

Slavicus Lukácsnak Verancsics Antal.

Antonius Wrancius Lucae Slavico S.

Quod de statu meo, Slavice, scire desideras :^{1549. nov. 20.} mutavi conditionem et locum et principem. Reliqui Heremitam et ejus causam, Reginam quoque ac ejus filium. Ad Ferdinandum vero regem transeo. Quod felix faustumque Deus faxit.

Defessus equidem eram vane sperando, et colendo numen, quod ne Thraciis quidem hostiis unquam placari posset. Reliqua nunc non requiras. Nihil inconsulte, nihil sine causa, nihil ambitu factum est. Unius me exemi imposturis, adjungam vero viro regi et virtutum contemplatori. Ejus gratiae offeruntur, nostri consilii successus non desperantur. Ad sunt autem et amici sine larva, et privati jugo non prememur, neque pavescemus injurias. Vale. XX. Novembris 1549. Viennae.

III.

Verancsics Antalnak Slavicus Lukács.

Lucas Slavicus Wrancio S.

1549. nov. 27.

Te ad nobilissimum et legitimum regem ab homine privato, minimeque tibi favorabili transire instituisse, mirifice laetor, modo succedat feliciter et faveat princeps, ut speras; commodis enim tuis aequae ac meis semper sum delectatus. Verum jam si spreteus es, a quo dicis, mutuoque spreveris etiam tum hominem inimicum: sat erat, mea quidem sententia, par pari reddidisse, et reliquisse insuper, quem amare nequiveras, quod non redamabat. At, quod reginam quoque ejusque filium, brevi, ut opinio multorum est, regnaturum, dimiseris, quibus ambobus non ingratus eras, quomodo probem non video; timeoque plurimum, ne fortunae facta jactura, transfugae etiam nomen obtineas, et in honore minuaris, cui tuendo quum aetati omni, tum isti maxime, quae jam tibi in senium vergit, incumbendum duco. Plura de his nuncius. Vale. XXVII. Novembris 1549. Slavicae.

IV.

Slavicusnak Verancesics.

Antonius Wrancius Slavico S.

Recte sane sentis, Slavice. Favit quidem mihi 1849. dec. 1.
 Regina, pro magnitudine sua regia et iudicio singulari, quod habet in delectu hominum, affectione non postrema. Amavit filius, quantum per eam aetatem licuit, non inconstanter, tamquam jam vellet noscitate, qua fide, quamdiu parenti inservierim. Complexus est et Petrovius non vulgariter. Heremita quoque publice honoravit et affecit muneribus, omniaque mecum coram peramanter. Nec nobilitas ipsa atque urbanae plebes me non amavere, quum publicis salutationibus declararint, laetos se de reditu meo existisse.

Praeclara quidem haec, et ad reparandum statum mire apposita. Fateor id quidem certe. Sed expende caetera.

Spernebat latenter suo modo Heremita, vindictae illius studio, quam non ignoras, oppido cupidus. Palam negligebat Petrovius, ut praeter thesauros suos, solet omnia. Regina foemina, exuta autoritate regia, et Heremitae arbitrio gubernata. Filius nimium puer, et diu futurus nutriciorum imperiis vel potius intemperis obnoxius. Reliqui, ut vulgus, unius potentia et largitione hausti, nutuque recti oppressoris mei. Tu vero mihi quippiam fortunati inter hos spe-

randum censes, ubi tam graphice ista respondeant superioribus? Verum me nemo amentior unquam exstisset, si diutius ad eam anchoram desedissem, quae me jam pridem fefellerat, pauloque post in talem scopulum tempestate, si vel minima ingruerat, devehebar, ut in ludionem Heremitaë evadebam.

Porro, ut praeteream scommata, quae jam in me, adducto supercilio multos ex assecclis ejus passim torquere subcernebam, amici quoque praetereuntem declinabant, tanquam Timonem illum Lucianicum, qui alioqui quum id malorum mihi parturiebam, mecum sane sentiebant; — o sacram auri famem — et nemo prorsus inveniebatur, qui juvaret consilio, oratione solaretur, periculorum commoneret, aut spem vel tantillam cujuspiam portus faceret, nedum demonstraret.

Quod ad honorem spectat: salva sunt hujus omnia. Sine consilio nihil est actum, quod utique ad abeundum non defuit, quum illinc plures id velle possent. Provisum etiam de patrociniò apud regem, et transfugae sive desertoris nomen summotum publica justissimi commeatus petitione, et diplomatibus tam Reginae ac Petrovii, quam ipsius Heremitaë, quibus meae aequitati atque candori perhibuere testimonium. Vale. Prima Decembris 1549. Viennae.

V.

N.-nek Verancsics Antal.

Antonius Wrancius N. S.

Quaeris a me, ut de statu meo aliquid ad te scribam; nec ignoro, quo id quidem nitore animi. Quare respondeo quod maxime cupis et procuraris : ambigua sumus adhuc fortuna, tenuique quadriga vehimur. Paulo post habebis alia et dolebis secus. Rogo te, exue personam, aut aeternum nihil mecum. Non enim delector dybapho. Vale ut velim. Prima Decembris 1549. Viennae.

VI.

Perneszi Györgynek Verancsics Antal.

Antonius Wrancius Georgio Prinessio S.

Raras quidem tam ad te, quam ad herum tuum, per hosce IX. menses, quibus in Transsylvania fui, dedi epistolas, quas ex officio debebam sane crebriores. Sic enim receperam me facturum, et amor tuus erga me singularis exigebat. Verum quoniam secus comperi animum illius hominis, quam sperabam, quum eo pervenissem: quanto virium mihi pristinaeque di-

nitatis minus erat, tanto, rejecta audacia, majore ingenio utendum fuit, coactusque sum et Argum agere et auritius caput mihi affingere, quam nunquam alias, ut delatorum turbam evitarem, propter quos, quod mihi parces, vix etiam ea loca libere accedebam, quae honeste nominari non possunt; quum alioqui sponte, profecto, sua nullis officiis, nulla ratione in me convertebatur, et credebat quicquid vel sceleratissimi retulerant, quorum opera frequentissime utitur etiam in privatissimis consiliis.

Hoc totum itaque tempus, quo tecum silui, mecum mihi fuit habitandum, ut limaci cuiquam aut ericio, semperque summa intentione cautissimeque pependi ex ea causa, quae tibi non ignoratur, dans omnem operam, ut illam ea dexteritate eum ad finem perducerem, qui honori meo nihil detrudere, nihil futurae fortunae officere quandoque potuisset, in utramvis partem res mea inclinasset, uti cum hero tuo tecumque constitueram, nolens sedes illas commutare, nisi si recuperare nequivissem.

Nunc, ubi post multam et accuratissimam sollicitudinem vidi illic pedem mihi solius Heremitae causa esse non posse, scito, scenam hanc ad catastrophem perductam, me jam Viennae esse, et prope diem Saarvarii futurum hospitem tuum.

Hero tuo, immo jam certe nostro, nihil scribo, quod audio illum in Croatia magnis rebus detineri. Tu, si videbitur et erit per quem, fac de adventu meo certiore. Offeras illi omnem operam, omne officium, omnem industriam meam in omnes usus, ad quos ero idoneus, petesque meo nomine, ut me utatur, pro arbitrato suo, tam in suis, quam in quorum rebus voluerit, sibi que persuadeat, nihili me pericula,

nihili labores, nihili omnia incommoda facturum, ut honori, ut voluntati ejus et me et mores et virtutem meam accomodem.

Ad eum autem tenues fortasse afferam vires, ea tamen fide sociatas, quae erit integra et viro nobili non indigna. Vale. IV. Decembris 1549. Viennae.

VII.

Testvérének, Jánosnak, Verancsics Antal.

Antonius Wrancius Joanni fratri S.

Quo loco sim, quod recte valeam et quod brevi^{1549. dec. 10.} Viennae me futurum augurer, ex Nicolao Colosvarino intelliges. Interim tu incumbe litteris, ea omni cura, studio, vigilantia, qua te magnopere decere, me supra modum optare non ignoras.

Neque committas, ut interdum segetes, quae principio optima de se spe demonstrata, nullos in messe afferant fructus. Fac igitur, ut initia studiorum tuorum laeta optato fini respondeant. Mei conatus in te fovendo nunquam deerunt, modo tu non desis tibi ipsi. Deesse autem non poteris, si, ut hoc primo anno mihi placueris, reliquis quoque satisfacere eniteris.

Illud postremo scito, habetoque semper in memoria, quod illiterati homines semihomines sunt, literati vero semidei. Vale. X. Decembris 1549. Sarvarii.

VIII.

N. Lőrincznek Verancsics Antal.

Antonius Wrancius Laurentio N. S.

1549. dec. 10.

Nunc me quo loco habeam, Saarvarium dicitur. Ea est arx Thomae Nadasdini, optimatis Hungariae summi ordinis, in sexto milliario ultra Sopronium, ad Rabam flumen sita. Valetudine ac statu bono sum, et ne tui puerique mei videar esse oblitus ad utrumque scripsi. Nec aliud erat, quod ad te oportebat, quam ut saepius rogem, velis institutionem pueri diligenter et accurate prosequi vel etiam urgere, in eoque praecipue intendere, ut cum litteris addiscat et bonos mores, et cultum politicum. Nam, ut cum Cicerone dicam: qui orator bonus esse vult, (addam ego: etiam philosophus atque theologus) vir bonus esse debet.

Igitur quicquid aliquando deliquerit, nihil unquam ei condonato. Si vero ad hoc litteras quoque refugerit, scutica et improperiis revocato. Virga enim sanabit animam pueri. Erit hoc illi saluberrimum, tibi honorificum, mihi autem quam gratissimum. Observandae etenim sunt viae adolescentum summa diligentia, ne in deteriore partem vertant, vel sapientis sententia, cujus aetatis exitum dicebat sese maxime ignorare. Vale. X. Decembris 1549. Sarvarii.

IX.

Pesti Gáspárnak Verancsics Antal.

Antonius Wrancius Gaspari Pesthio salutem.

Noli succensere, quod a discessu meo saepius^{1549. dec. 18.} ad te non scripserim. Scio enim, quam sis curiosus amicorum tuorum, mei certe etiam amantissimum esse ita mihi persuadeo, ut magis te facere nihil putem.

Dederam unas ad te Cracovia, quibus indicavi, me Bonfinianae historiae V. libros decadis quintae reperisse. Postea scripsi nihil, quod otium non habui, dum Saarvarium festinarem. Nunc scito, me jam Rabonem potare, et cum Josepho fratre tuo eadem aura vesci et frui loco. Magnificus vir Thomas Nadasdinus excepit adventum meum, ut speravi; tractat me, ut velim; et opinionem demum eam mihi de se quotidie confirmat, ut jam plane videam, non esse sine parente orbitatem meam. Reliquae spes ad adventum Regis differuntur, qui cum kalendis Januariis ex Bohemia veniet, Posonii que conventum habebit circa epiphaniarum diem.

De statu fratris tui adversi nihil est, praeterquam quod hic invitatus agit. Videre te, complecti matrem mirifice cupit. Deinde in Italiam vellet tuis auspiciis. Secretiora ejus nescio. Haec tantum nota, de quibus pene quotidie sermocinamus. Nec se hinc fa-

cile extricabit, quod probitatis atque eruditionis non contemnendae gratia et diligitur et detinetur. Dabit tamen adhuc hanc brumam huic officio; vere ineunte toto conatu enixurum pro commeatu scias.

Eum tibi commendo, ut communem fratrem, tibi, inquam et partibus corporis et virtutibus modestiaque, tum etiam reliquo morum candore perquam simillimum. Sed quod caput est, dignum quidem duco, immo testificor, ut ejus studiis opituleris et quieti consulas, quae duo tam incredibili voto desiderat, ut quod nunc vivit, vitam non existimet.

Plura scribam epistola proxima, vel unum quiddam potius, quod demirabere, ne stupere dicam. Per hunc tabellarium vix etiam ista potui, quod ille maturabat, ego sero abiturum cognoveram. Vale. XIII. Decembris 1549. Saarvarii.

X.

Antonius Wrancius Gaspari Pesthio S.

Pesti Gáspárnak Verancsics Antal.

Laeta nonnihil de rebus meis scripsi ad te su-^{1549. dec. 19}
periore epistola, eaque, ni fallor, digna gratulatione
amicorum. At quae ex hac praesen/i intelliges, uti
eram pollicitus, longe etiam dignissima existimabis,
quod superarim factorum meorum non exile punctum,
meque adhuc Christi beneficio, mi Gaspar, supersti-
tem sis habiturus.

Discedens Varadino praeter fratrem et Dalma-
tam illum exulem, quem adhuc apud me foveo patriae
charitate, quod receptum nusquam habeat, V. servos
mecum deduxeram ex Transsylvania, quorum aurigae
duo, reliqui tres erant.

Inter hos Joannes cognomento Mihalfy, ortus in
thermis Giogensibus, quem mihi familiares Michaelis
Croatae commendaverant, nescio quo cacodae-
mone instigatus in meam necem, cum adhuc essem
Cracoviae, aurigam inprimis majorem, quem temonis
magistrum appellamus, deinde Martinum, de quo nu-
per apud te non perinde laude digna, postremo
omnes alios pertraxit.

Disceptavere postea inter se diebus pluribus de
modo rei peragendae, et decrevere primum, ut junior

auriga, felaitar vulgo nominatus, quum ipse in urbem abiissem, quod in suburbio hospitabar, puerum fratrem, quem domi aegritudinis et rerum custodiendarum gratia relinquebam, suffocaret; interimque supervenientes caeteri, scriniolum dirumperent, et cum pecunia, cum equis suppellectilique meliore auffugerent in vicinos montes, ad Hungariam spectantes.

Id felaitar cum perpetrare solus vereretur, et diceret, facilius una et puerum exstingui et reliqua perfici posse, modus hic intermissus, quod revera videbatur esse periculosus, nec adeo clandestinum fore sperabant, quin ab aliquo domesticorum perciperetur.

Initum itaque, ut, ubi Cracovia discessum fuerit, in prima silva, quae vastior apparebit, auriga de industria currum evertat, eoque casu implicitum tam me et fratrem, quam Dalmatam occidant, et infossis ibidem cadaveribus nostris, curru rebusque omnibus potiantur. Perfacile id futurum, quod in solitudine trepidaturi nihil essent.

Vide scelestorum audaciam, vide facinus, non inepte quidem, quamvis a pecudibus magis, quam ab hominibus ordinatum; facileque sane succedebat nefariis, nisi felaitar, metu ne, an probitatis, an avaritiae gratia, destitisset ab incepto. Is enim meliore monitus angelo, quam Joannes stimulatus, voluntatem sociorum ad me detulit, et monuit mira instantia, ut caverem. In hoc prorsus, obstricta fide, mutuo conjurasse et edixisse, hostem futurum caeteris, qui facinori ex eis defuisset, vel cuipiam enunciasset.

Ego rem primo parvifacere, timere nihil, nihil cuiquam eorum indulgere, caeterum et difficiliorem me omnibus ostentare, ac singillatim, uti quisquis quid commiserat, praeter solitum conviciari, porrectis

nihilominus pecuniis, et si quae alia in usum seu vestium seu armorum, quum ad me nudi atque inermes venerant, poposcerunt.

Proinde, si quaeris : negligebas ne sicariorum insidias? minime gentium. Expendebam siquidem cuncta, quae agebant, quibuscum loquebantur, quo vultu erant, et magis jam manus eorum (quod est verum proverbium) quam oculos observabam. Et tamen si magna ex parte videbar contemnere quicquid molirentur, tanquam non essent ii, qui tantum committere auderent, quum alioqui nec famulatu Hungarorum facile carere poteram: egregie tamen dissimulabam, quicquid de his cognoveram, sperans discessuros ab insania spatio temporis; tantoque interim mentis angore laborabam, rememorando, in quae discrimina devenissem, ut majorem nunquam cognoverim ab infantia.

Sic aliquot diebus actis ingressus iter, et biduum progressus, coepere et in via et in hospitiiis saepius a me digredi, et una colloquia frequentare, minus etiam mihi inservire, aliusque modo, modo alius valetudinem fingere, ad omnia jussa mea intemperantius respondere, et nihil aequo animo ferre, quicquid ipse protulissem, forte ut audendo sceleri pectus firmarent. Eramus tunc in oppido Psczcina, quod est confinium Poloniae et Slesiae, postridieque erat nobis ingens et vastissima silva transeunda, quae bene etiam comitato et armato homini perhorrenda esse consuevit, eo praesertim quod in limitibus est. Quare sollicitus mecum non mediocriter, quonam pacto sine metu eam silvam transmitterem, et forte quum irem cubitum, ingressus ad me felaitar, similisque arguenti : Quid, inquit, obaudis? quid vitam negligis? haec

silva tibi sepulcrum erit, nisi provideris; conceptum scelus collegae mei sine dubio prosequuntur, et diris sese omnes devoverunt execrationibus, nisi te die insequenti animose confecerint.

Paulo post, quum jam somnum captarem, nec tamen dormire possem propter sollicitudinem, ecce Cracovia litterae ab homine amico magna celeritate afferuntur, quibus de his ipsis sedulo admonebar, quae his jam felaitar indicaverat, jubebarque omnino, ne, si velim vivere, ulterius cum hoc famulatio progredere, quocunque loco ejus litterae fuissent me incolumem assequutae.

Quas quidem litteras ubi perlegi, tute consideres, mi Gaspar, quantus me stupor, quantus furor corripuit, facileque omnes ibidem vel eo momento agebam in furcas, nisi me religionis observantia et fortunae tam labefactata conditio prohibuisset.

Tota igitur nocte consumpta in considerando, quid agere debeam, placuit tandem, ut societatem eorum dirimerem, validiores relegando, Joannemque statim mane insequenti et Valentinum aurigam, dato viatico, et permissis rebus omnibus, quas interim a me acceperant, abegi alio patibulum quaerere, quod apud me vitaverant; tertium, cui Nicoloo nomen est, dudum summoeram, quod molestius omnibus latrocinabatur; Martinus mecum adhuc est, quem de industria mulceo, ut et sui peculiariter et cum felaitaro una quandoque collegarum facinoris testes sistantur.

Habes tragoediam itineris mei, cujus quidem loco libentius egissem comoediam, quod securius cum Demea vel cum Phormione quopiam jurgassem.

Verum enimvero plane ego jam video, quod nunc demum fortuna, ademptis rebus, consenserit in

exitium meum; nisi fortasse hunc conatum ultimum sibi esse voluerit, quod maximum intenderat. Quamquam adhuc mihi nihil tale audeo de illius gratia polliceri, donec sic distrahat incerto statu. Ab annis ferme duobus de XXX. assiduus usus sum legationibus ad diversos principes Christianos et Turcas, quod tu optime nosti. Suscepi praeterea privato studio tot itinera et tam longinqua, ut exceptis Hispaniis, Thracia, Macedonia, utraque Moesia, et quae Tanais, Pontus, mons Cárpatus a Ruthenis, et Vistula flumen a Masoviis intercludit, parum quiddam restat, quod in Europa non viderim. Et interea temporis fuere mihi tam domi quam foris servi honesto numero, diversis moribus et ex varia gente recepti, egique profecto omnia illa itinera tanta cum incolumitate et tam feliciter, ut, quum mihi nullius unquam servi culpa vel denarius periisset, tum ne suspicione quidem de hujusmodi scelere in me admittendo, vel propter fortunas vel propter odium, cui alioqui saepenumero tum fuste tum convicio ansam praeberim, quispiam illorum sese mihi insinuaverit. Nunc vero quod hoc in hac mea malorum omnium conditione et aetate senio jam propiore experiar, equidem majus quiddam esse existimo, quam quod ab hominibus infligi possit.

Sed hoc, ut insanae deae libuerit. Ego certe servorum etiam vilitati magnam partem imputanda duco, qui quidem nisi prius in aliqua civili familia exuerint et excoluerint agrestium morum feritatem, plerumque crudeles, facinorosi et inhumani evadere consueverunt, mihiq; si candidiores non contigerunt, certe propter obscuritatem fortunae non potuerunt. Valeant (vadant?) igitur ii in malam crucem; ego exemptus tanto discrimini salvus, Christo duce,

Saarvarium evasi et belle habeo. Vale XVIII. Decembris 1549. Sarvarii.

XI.

Csáki Mihálynak Verancsics Antal.

Antonius Wrancius Michaeli Chiacchio S.

1549. d. c. 19.

Jam ego sum in orbe tuo, nec multum absum ab aedibus tuis, estque quod ubique in silvis sim, et in paludibus. Proinde et Rabonem poto quotidie, quem accolunt omnes tui, et fibro vescor, qua parte piscis est. Laudetur Christus, qui me incolumem, quamquam per magnas servorum meorum insidias, quod a Gaspare Pesthino cognosce, ad institutum locum deduxit.

Excepit me Thomas Nadasdinus pro magnitudine sua supra omnem opinionem meam humanissime et liberalissime, et fovet sic, ut Statilii non meminerim. Nec aliud exigas in praesentia. Spero jam orbitatem meam parentem invenisse. Reliqua quae huc faciunt, ad adventum regis ex Bohemia differuntur, quem kalendis Januariis affuturum fama vulgatur propter comitia Posoniensia.

Sed navigationem meam vides jam in cursu esse et principia laeta demonstrari; faxit Christus, ut succedat, et perveniamus in aliquem portum, in quo statum firmare possimus.

Audio tuos omnes recte valere, doque operam sedulo, ut Stephanum fratrem tuum etiam amplecti possim, et secum de te quam plurima et quam optima,

ut tecum colloquar, qui mihi es et fuisti omnium amicorum optimus.

Reginae soli solita observantia commendes me, quia sola casus meos miserata est, sola fortunae condoluit. Tu caute illi esto fidelis, si Heremitaе nolis displicere. Displiceas tamen, vel meo et exemplo et consilio, toti mundo, ut a fide et ab integritate non recedas. Bonum nomen omnes divitias antecellit.

Recens habemus, papam Paulum III. obiisse, Solymanum caesarem Turcarum a Persa ultima clade perculsum, nec plane adhuc quicquam constare de vita ipsius caesaris. Quae nova non sunt multis ingrata, et alterum certe vos melius, alterum nos, quia de papa nullum est dubium. Vale XVIII. Decembris 1549. Sarvarii.

XII.

Testvérének, Jánosnak, Verancsics Antal.

Antonius Wrancius Joanni fratri S.

1549. Dec. 19.

Videris mihi negligentissimus esse mandatorum meorum. Equidem nequeo jam tibi non succensere, nequam et imperite puer. Quamdiu est, quod jusserim, ut praeceptoris tui Laurentii, qui in Scroteri locum est subrogatus, cognomentum ad me perscriberes, ne dum de illo mihi fit mentio, semper Quendam appellem; de quo quantum erubescam, *) quum amici et qui de nobis bene merentur, aliter tractari debeant, neque quidem sic, ut videantur nobis esse ignoti. Quare effice tandem, ut sciam quamprimum, quid habeat cognomenti, neque committas, ut hoc sub muto N. amplius mihi scribatur. Alioqui, quum Viennam rediero, vapulabis, et quidem usque ad ardorem, ut tenacius memineris. Vale. XVIII. Decembris 1549. Sarvarii.

*) Kimaradt, a quantum, által feltételezett mondatrész.

XIII.

Andronicus Tranquillusnak Verancesics Antal.

Antonius Wrancius Tranquillo Andronico S.

Litterae tuae, quas postremo Tragurii dedisti^{1550. Jan. 10.} proximis diebus XV. praeclaro et illustri viro Thomae Nadasdino redditae sunt me praesente. Quibus quidem quantum fuerit gavisus, mirandum est non mediocriter, propterea quod te non valere solum non intellexerat, sed vivere etiam nemo afferebat. Annum prope integrum memorabat esse, quod tuas non acceperat, ideoque non jam de valetudine, sed de vita tua sollicitabatur. Hoc ego ad te scribo, quia quum jam tertium mensem agam apud eum, utorque ejus patrocinio non infeliciter, dies sane nobis abit nullus, quo tui et honeste et amanter non meminerimus. Quare etsi non eges a me, ut te edoceam, quantum ab hoc celeberrimo viro, amicis nato, amaris, commendaris, complecteris, quod quidem tute diu jam et maximis et certissimis argumentis experiris atque cognoscis, tamen ut fungar partibus meis, tibi vero etiam in minimis rebus probem mea officia: scito, te illi rem opido gratam facturum, si praestiteris, ut quam creberrime mittas ad eum epistolas tuas. Tribuit nempe tibi, ut summo viro, non plurimum solum, sed etiam peculiariter quam plurimum. Et si cum quopiam mortalium etiam conjunctissimorum, tecum certe prae caeteris multis una esse peruisse face lopera posset.

Quum itaque jam me quoque tum apud hunc heroem nobilissimum, tum apud hunc regem serenissimum es habiturus, rogo te, da operam, ut saepius litteras tuas legamus, mihi vero etiam pro tuo jure secure impera, quicquid me tua causa obire volueris. Habebis certe Wrancium, ut ex Andronicis quemvis, utrobique ad tuas rationes sine furo et contumacia semper expeditum. Litteras ad Michaellem fratrem meum in tuas manus dedi, quum id temporis via opportuniore non potui. Peto te, cures, ut ad eum quam citissime et quam celerrime perferantur, ubi acceperis; et ignoscas, oro, si quid hinc oneris es subiturus. Ego vicissim pro te, usu tuo postulante, majora ferre non recusabo, etiam occupatissimus. Jacobo fratri tuo tuisque nepotibus, praesertim vero Christophoro, ut mihi notiori, commendes me, velim. Tuo vero aucupio et piscationibus, immo etiam otio, cui te jam tandem tradidisti, feliciter utaris, precor. Vale. X. Januarii 1550. Sarvari ex Pannonia Superiore.

XIV.

Testvérének, Mihálynak, Verancsics Antal.

Antonius Wrancius Michaeli fratri S.

Ego vero tandem reliqui Utissenium, quod bene^{1560. Jan. 10.} vertat Deus utrique nostrum, meque ad Ferdinandum regem inclytum contuli. Praecipuo fautore utor clarissimo viro Thoma Nadasdino, nec id infeliciter quidem. Non desunt et aliorum optimatum patrocinia, sed hujus potissimum in portu, ut in paterno sinu, fidentius conquiescimus. Tu sis animo bono, et speres posthac meliora, Deo adjuvante. De his plura nunc non scribo, quae alioqui quamquam sint pauca, sat tamen erunt pro mutatae fortunae degustamento. Cura tantum, ut recte valeas, et domum sustentens, uti potes. Et si quid durius tibi incubuerit propter haec mea tempora, ut incumbit, (neque enim nescio aut nolim credere) quaeso, fer adhuc pauxillum forti animo divinam hanc in rebus meis voluntatem, neque factorum meorum necessitate consterneris, quae brevi, favente omnium liberatore Christo, videbis in me aequiora. Hortor autem quam maxime possum, ut nulla interim cogitatione abducaris a te ipso, immo a ratione ipsa, qua, scio, te semper excelluisse, donec aliud a me intellexeris. Jam enim viciniores erimus. Nec ipse oblitus sum mearum partium et propositae pietatis. Vigilo nempe, mihi crede, quibus est vigilandum. Aspiret tantum votis atque industriae suffragetur, qui

cuncta gubernat et omnium miseretur. Parenti dic salutem et cognatae. Reliquos ut vis. Vale. X. Januarii 1550. Sarvari ex Pannonia Superiore.

XV.

Testvérének, Mihálynak, Verancsics Antal.

Antonius Wrancius Michaeli fratri S.

1550. Jan. 18.

Praeterierat me, festinante tabellario, proximis litteris ad te de Francisco Butrisio, optimo inquam illo nostro Francisco, immerito ab avunculo suo patria proturbato, et de pueris scribere. Quare scito, eum adhuc mecum esse, futurumque, dum voluerit; quamquam etiam si volet, errare tamen eum non permittam. Habet in me talem fratrem, absit verbo jactantia, ut suum non desideret, nisi in quantum patria caret, et tam calamitoso exilio maceratur. Tussi quodam admodum sicca vexatur, ita ut aliquando magnopere verear, ne noctu suffocetur. Remediis et medicorum cura non illi desumus; parum tamen adhuc proficitur. Ima pectoris frigore quodam prope scythico ei obriguere, et arteriae faucium, dum excreat, disrumpi potius tumore, quam catarrhum ejicere videntur. Si plura de illo scire desideras, ad eam gracilitatem corporis redactus est, ne prorsus aruisse dicam, ut habitudinem, qua olim erat, in trireme Dionica in eo non agnosceres. Puto id ei accidisse ex meditatione tristissimi sui casus et dolore injuriae, quam a suo sanguine perferre cogatur. Si censebis

convenire, minimeque frustra fore perspicies, rogo te, mi frater, coneris meo nomine ejus avunculum inducere ad capessendam illius restitutionis voluntatem. Sit satis bienni exilio juvenilem errorem castigasse, triennium quod superest exantlandum, donet pietati, donet amicis, memineritque illius proverbii: Lupinum lupos non esse; misericordiamque magis homines quam crudelitatem decere, ne de affinitate quicquam dicam, qua etiam ferae utuntur, indulgentes suis. Id ex me pro amore, quo sum in Franciscum, et pro ea consuetudine, quae tibi quoque cum eo vel a teneris semper constantissima intercessit, ad te scribo, ad avunculum ejus nuncio. Adnitere igitur, ut amico operam naves.

Pueri ambo recte valent. Joannes jam epistolas scribit suo marte, loquitur germanicam linguam ita exacte, ut Viennae proximis diebus usus sim eo interprete non jejuno. Quum dalmatice loquitur, mirifice balbutit, et Styrum quemdam aut Carinthium potius quam Dalmatam diceret esse. Fit hoc, quod ejus schola uberius his nationibus frequentatur, quod non ignoras. Hieronymus hungarice tantum novit, nec id inepte; sed miro affectu invidet fratris studiis, quod mihi plurimum placet in puero. Parentes hoc filiorum profectu diligenter consoleris, meoque nomine eosdem salutes. Patri praesertim non desis, neque pecces. Senectutem ejus, fac, ut sic cures, ut vitam tuam. Dei praecepti memineris et tuum officium non praetereas. XVI. Januarii 1550. Sarvari. Ex Pannonia Superiore.

XVI.

Dániel képirónak (?) Verancsics Antal.

Antonius Wrancius Danieli pictori.

1550 Jan. 17.

Versus tuos et elegantes et doctos et vere poetico lepore factos, geniumque spirare, et ipsas Musas omnes cum Apolline suo redolere, nemo est sane, qui non fateri debeat, nemo est etiam, qui in ista aetate ingenium tuum non ita magni faciat et complectatur, ut in posterum ex eo maxima, praeclarissima et luce quam dignissima sperare possit. Unde, mi Daniel, humanissimus et illustrissimus vir, dominus noster, unicus in Hungaria studiosorum et virtute praestantium hominum maecenas, quum in te vel ex primo congressu statim cognovisset, quid ingenii, quid bonarum artium, quid in toto genere valoris natura parturiret, non immerito sibi adjunxit, sperans, quum ex ista indole et eruditione multa, tum ex ipsius nominis occasione, quod in te videatur non mediocriter cum virtutibus claris convenire, exemplo illius magni prophetae Danielis etiam maximo, idque tuo et commodo et ornamento non vulgari. Confide igitur et perge, ut coepisti. Felicissima aura in eum portum delatus es, in quo non dubites te fundamentum futurae fortunae tuae reperturum.

Ad rationem syllabarum carminis tui quod attinet, ad quas censuram nostram extendimus, amici-

tiae tribuas, non mediteris calumniam. Multa sunt, quae te excusant, sed solam celeritatem attigero, cui quoniam examinatio adhiberi non potest, raro quid in ea perfectum fieri solet. Quod etiam ante prandium, maturans hero obtemperandi studio, dicis te errores non perspexisse, (jocemur, amabo) concedo. Nam et Musae tuae assuetae in Helicone et Parnasso aquis melioribus, fortasse non admodum ad stomachum fuere illis Narabonis fluvii latices. Verum quoniam nemo scit, qui aliquando nescivit, et seges nulla est sine malo loligine, quantumvis sit laetissima, donec maturescat, nihil ducas referendum, si quando ejusmodi lapsus incurrant tibi. Illud est improbandum, si censuram amicorum repudiarimus, et Apellis pictoris instar non fecerimus, qui emendandas tabellas suas in publicum proponebat, audiebatque et vulgares patienter, soli sutori indignatus, qui ultra crepidam sapere voluerat. Pluribus ad hanc rem non est opus. Nos ut optimum et maximum herum consequuti sumus, ita unum simus, demusque omnem operam, ut eidem et studiis et officiis placere possimus. Vale.

XVII. Januarii 1550. Sarvari. Ex Pannonia Superiore.

XVII.

Petrinus Mihálynek Verancsics Antal.

Antonius Wrancius Michaeli Petrino S.

1550. jan. 20.

Ero Asconio Pediano mitto tibi Anti-Interim Joannis Calvini. Nec existimes, velim, hoc libello tantum putare me tibi esse satisfactum. Promissum curo comparandum, quem ubi primum in manu habuero, exsolvam me debito. Quod si quis alius intra hoc tempus occurrerit hujusce epuli, quo te vesci et delectari intelligo, hunc quoque tuum fore polliceor. Et demum omnibus in rebus, in quibus amicitia mea uti voles, dabo operam, ut invenias me tibi esse amicissimum.

Quod de paroemia : ‚Bovem ad ceroma‘ scire voluisti, significare ait Erasmus, indocilem docere, ad id muneris quempiam asciscere, ad quod obeundum minime sit idoneus, ingenio repugnante. Nam ceroma unguentum quoddam erat olim apud veteres ex oleo et certis terrae generibus, quo athletae certaturi ungebantur, putabantque eo unguento corpora eorum fortiora et firmiora reddi adversariis. Quod autem ad certamen attinet, quid ineptius aut pigrius bove? Is igitur mittit bovem ad ceroma, qui stipitem philosophiam docet. Huc pertinent : Opera et impensa periit. Oleum et operam perdidi. Et : Apud fimum vapores odorum spargis. Habes, quam rogaras, plura,

quod feci propter penuriam, quae tibi est Chiliadum Erasmi. Si quando alii similes nodi tibi inciderint, opera mea uti non pigeat, libenter eorum explicationem, quorum optaveris, ad te vel occupatissimus perscribam. Bene vale. XX. Januarii 1550. Sarvari ex Pannonia Superiore.

XVIII.

Dániel képirónak Verancsics Antal.

Antonius Wrancius Danieli pictori S.

Quod tamdiu nihil litterarum tuarum acceperim,^{1550. febr. 1.} magnopere miror. Nam, quum abhinc discedebas, ita te crebro scripturum prior obtuleras, ut etiam demirer, quod ex eo tempore, me nonobrueris litteris tuis. Multa mihi sane de ista tua taciturnitate in mentem veniunt, scis enim, qui amant, sollicitos esse solere, sed ea nunc non commemoro. Fortasse tales intercessere causae quae te affatim excusabunt. Ego certe, et si sciam, te malo animo non tacuisse, meliore tamen facturum dicam, si vel in fine Comitiorum proloqueris, et scribes aliquid, quum ad me, tum ad Georgium nostrum Pernesium de rebus comitiorum, aut quippiam ejusmodi, quo absentiam suam absentes aequiore animo ferre consueverunt. Interim vero, ne tu quoque hoc ipsum in me jure culpae possis, quod in te ipse desidero, (ambo enim aequae tacuimus), en jam ego occupo officium. Tu si provocatus, adhuc ages Harpocratem, consta-

bit aut amicitiam nostram alte radices non fixisse, aut te Musarum tuarum adeo haustum esse commercio, ut humanas consuetudines non cures, quamquam adduci nequeo, ut id credam, praesertim, quum ad altrices tuas, humanitatis et virtutum deas, mentem conferam. Si itaque amas amicum et omni culpa vaces, quaeso, hunc mihi exime scrupulum.

Ad clarissimum herum nostrum libens scripsissem aliquid somniorum Lucianice, quum Danielelem habeat domi, ut ex his remissione aliqua publicis curis, quibus nunc cum patribus in constituenda salute patriae distinetur, praebita, in athletarum morem refici et recreari posset. Verum quoniam nunc vita mea vigilia est, nihil omnino somnio, praeterquam quae interdiu cogito. Ea autem adeo nota sunt ejus amplitudini, ut in facetiarum et jocorum partem eadem ad illum scribere esset profecto absurdius, quam in sole lumen accendere. Tu igitur, candidissime Daniel, offèras claritudini ejus obsequia; et si prorsus tibi nullum scribendi argumentum occurrerit, (quamquam quis unquam vidit luscinae cantus defuisse) hoc saltem expleas epistolam, quod herus noster belle habeat, quodque tu in ejus gratia quotidie confirmaris. Faveo equidem tuis rationibus juxta ac rebus meis. Georgius Pernessius jubet te salvum esse. Ego vero etiam beatum fieri precor. Bene vale. Calendis Februarii 1550. Sarvari ex Pannonia Superiore.

XIX.

Csáki Mihálynak Verancesics Antal.

Antonius Wrancius Michaeli Chiakio S.

De statu meo nihil est adhuc constitutum; ubi^{1550. febr. 8.} erit, scies tu multis celerius. Nadasdini autem animus erga me diu te sane atque optime cognovisse existimo, si jam binas meas accepisti. Quare is ita rem meam movendam promovendamque his comitiis instituit, ut quicquid de ea fieri debeat, non afflictæ solum fortunæ meæ, sed etiam existimationi atque decori meo consulatur. Ejus itaque consilio me adhuc Sarvari contineo, et in horas nuncio prospecto, qui me Posonium aut Viennam jubeat. Discedentem ipsum Nadasdinum ad comitia adusque Capuanam arcem eram prosequutus. Inde ad Mihalium pagum, quoniam haud longe aberat, profectus, XIIIIL die Januarii pransus sum cum omnibus tuis et quidem incolumibus. Quid eorum per noctem somniaris aut cogitaris interdiu, non facile divino, lautissimum tamen et laetissimum illud prandium, faciendo salutis et felicitatis tuæ memoriam ac preces ad omne populum, mero etiam reddidimus madentissimum. Tum quanta voluptate affectus fuerim aspectu domus tuæ, non dicam cætera, vix tamen continui me, quin limen ejus osculo salutarim, quod cogitabam te sæpe alias parvulum perreptasse. Omnia enim mihi pulcherri-
ma, suavissima et amoenissima videbantur esse con-

temptatione tui, tametsi turcico furore deformata, nec adhuc eorundem metu restituta forent.

Te et frater et cognata et nepos tertius magno affectu omnes salutant, mox nepos quartus salutaturus, favente Lucina, quo mater, gravissima et modestissima foemina, tota jam in uterum pene excrevit, videturque magnum quendam partum enixura, credo et tui et tibi similem, qui omnes tuos multis nominibus superaris. Faxit Deus, ut te sospite tui quoque omnes sospitemur. Sumus enim hic jam omnes tui, tuque solus a nobis abes, sed a me multo longius, postquam praesente consuetudine atque convictu privatus, studiis etiam quodammodo dirimi videamur. Verum jam tandem quando, quaeso, iterum una, quove loci? Aut ubinam Chiacchium mihi alterum quaeram? quem nusquam terrarum, quas peragravi, nusquam gentium, quibuscum vixi, inveni, et, si credis, ne in paterna quoque domo inter germanos fratres invenire potui. Ineptire dices Wrancium, (ut soles ad affectus impotentiores) gravissimo, severissimo, integerrimo, mihique semper gratissimo supercilio. Immo vero etiam insanire dicas, licebit. Etenim desipio non mediocriter, quoties ad nostram disjunctionem mentem revoco, quae mihi ita indies fit gravior, ut nesciam, an usquam sciam vivere ubi te non videam. Verum enimvero tuarum erit partium, ut, si te ipsum minus potero, tuas des saltem ad me litteras crebriores, et his me sustententes imaginibus, postquam nequeas vultibus. Si commode poteris, fac me de omnibus certiores, quae istic aguntur, praesertim si quas machinas in me strui intelligis; scio nempe adhuc non quieturos adversarios meos. Ideo juva me istinc, quantum potes. Hic ipse mihi non deero, quum

quippe jam in vado sumus. Vale. VIII. Februarii
1550. Sarvari. Ex Pannonia Superiore.

XX.

Macarius Józsefnek Verancesics Antal.

Antonius Wrancius Josepho Macario S.

Charam tibi et pretiosam, ut scribis, esse meam^{1550. febr. 8}
erga te benevolentiam, mirifice laetor, quamquam rem
mihi nec novam nec dubiam declarasti. Coaluisse
enim dudum animos nostros in unam voluntatem, ha-
beo sane compertissimum, teque hoc idem firmissime
sentire, minime dubito. Quare non putes me adeo
subtili trutina considerare amicorum officia, ut ad
amussim usque eorum exactor esse contendam, nec
velim ejusmodi minutiora concedere, quae etiam my-
stis in sacrorum operationibus saepenumero inter-
venire solent. Accidunt etenim haec (ut tute ais) ex
intentiore cura aut studio rerum quarumpiam, quae
nobis interdum ita arduae seu graves oboriuntur, ut
in se tota mente translata, reliquarum tantisper non
meminerimus. Quod quidem ab amicitia discedere mi-
nime putandum duco. Alioqui nec sic amicis perpe-
tuo vacare debemus, ut nihil agamus praeterea, ne-
fasque et capitale esse arbitremur, si ex atrio in ve-
stibulum commeando, iis non valedicamus, et reme-
ando, felix faustumque mane et id genus non prece-
mur. Vulgarium et simulatorum sunt leges istae.
Nostra sane libertas latior est, et vacua debet esse

ab his suspicionibus. Exsolutum itaque facio te ab ista incuriae, quam metuis, sollicitudine; nihil enim praetermisisti, quod hinc discedens, idque non ita longe, valedicendi commeatum a me non acceperis. Scio, quam dulce tunc et optatum erat tibi hinc eximi, ubi aegre morabare, et evolare ad libros tuos; omenque equidem laetus accipio, quod id cerimoniae omiseris, quia futurum brevi spero, ut una iterum simus, fruamurque mutuo solita consuetudine. Interim autem, sat est abs te mihi, quod de me optime sentis, et dicas semper bene. Vale itaque iis dicamus, quoties libet, qui nobis molestiam dabunt; nos in ostentatione et in fori imaginibus non haereamus illorum instar, qui aulicos et populares fucos persequuntur. Nostra amicitia animis possideatur, nec cerussam curet.

Si recte vales et successu potiris, quem optasti, vehementer tibi gratulor laetorque, mi Josephe, ut de rebus meis. Ad me quod attinet, nihil adhuc de statu meo quicquam possum ad te scribere. Consilio heri nostri etiam nunc Sarvarum incolo, incolamque, donec ipse rem meam commode et cum decore promoveat apud Principem, ubi comitiorum aestus con-sederit. Si quid interim novi ex Transsylvania per-ceperis, rogo, non graveris mecum communicare; si quid etiam istic acciderit, fac itidem pro humanitate tua, ut ex te intelligam. Gratius profecto mihi nihil feceris, quam si et hoc officio tibi me devinxeris, ut aliis multis, praesertim autem virtute tua singulari et candore morum summo vendicasti. Vale. VIII. Fe-bruarii 1550. Sarvari. Ex Pannonia Superiore.

XXI.

Verancesics Antalnak Csáki Mihály.

Michael Chiacchius Antonio Wrancio S.

Video veterem amicitiam nostram, heu, nimis ^{(550 f. h. r. 15.}refraxisse, quod meus Wrancius aliis amicis suis, iisque novis etiam scribat de negotiorum suorum statu et fortuna, veteri autem Chiacchio, non tantum amico sed propemodum fratri neque nunciat, neque colloquia familiaria usu litterarum communicat. Mirum quam cito mutari queant ingenia humana, potissimum meliore spirante aura.

Ego tum potero tui oblivisci, quum extremo rogo imponar. Tu vero, mi frater, quam cito memoriam mei abjecisti, etiam stupeo. Sed forte curae, anxietates, moestitiae et vicissitudinum humanarum perplexitates mentem tuam remoratae sunt. Atqui vera amicitia tum praecipue solidi amoris meminit, quum tristes casus huc atque illuc turbatum animum jactare consueverunt.

Ego profecto tui saepe recordor amantissime, et fere defleo absentiam tuam, ex cujus praesentia nunc praesertim uberes fructus decerperem, si mihi adesset. Age igitur, saltem per litteras mecum interdum confabulare et consoleris mea certamina pro vetere nostra consuetudine. Quicquid enim de his scripseris, id mihi semper quam opportunissimum et quam saluberrimum fore non diffidas.

Sed audisti ne, quales et quam acres contra me motus excitaverit is, cum quo tibi non perinde convenire solebat? Ante VI. annos fere in comitiis Vasarheliensibus mirari non poteram, unde illi motus suppularent contra te, unde, inquam, quove authore tot clamores orirentur excitarenturque in te calumniae.

Jam nunc non miror, quum propemodum ipse quoque experientia disco non tantum consimilia, sed illis longe majora. Deus tamen elementer hactenus tutatus est innocentiam meam, speroque inposterum tutam fore. Quod si patiendum est, vel etiam pereundum, malo innocenter et fidelem servitutem serviens, quam nocenter turpiterque perire.

Egregiam historiam possem tibi recitare, si ades, in hoc, ut animadverteres, infirma etiam Dei fortiora esse quolibet robustissimo mundi, et in hac humillima contemptissimaque infirmitate mea disceres potenter triumphasse. Sed de his malo te ab aliis intelligere. Tu ad me, fac, ut interdum scribas. Stephanum fratrem tibi commendo, daque operam, ut per te Nadasdino, viro illustrissimo terraeque nostrae optimati commendetur. Vale. XV. Februarii 1550. Colosvarii ex Transsylvania.

XXII.

Beiesi Ambrusnak Verancesics Antal.

Antonius Wrancius Ambrosio Beicio S.

Romanos maxime omnium gentium sui vel no-1350. febr. 15
 minis vel aliarum rerum posteritati studuisse, credo
 te, Ambrosi, non ignorare. Ait nempe vel Marcus
 Tullius in II. de Oratore : Si barbarorum est in diem
 vivere, nostra consilia sempiternum tempus spectare
 debent. Porro si per eos urbes conditas, si deductas
 colonias, si factos portus, si structos pontes, vias
 stratas, aquas invectas, thermas adornatas, aedes
 aedificatas, patefacta fora, si colossorum, si imagi-
 num, si statuarum, si titulorum studium, si denique
 templa theatraque et id genus alia ad stuporem ex-
 citata diversis in regionibus ac praesertim Romae
 consideres, profecto cognosces, ea materia, his im-
 pendiis, eo artificio soliditateque et consilio demum
 usos esse, ut ea opera semel absoluta nunquam in-
 terirent, neque vetustate labefactarentur, nimirum
 quae marmori aerieque committebant. Et quamquam
 dudum jam spoliati imperio, urbes etiam illorum, ut
 humana opera, excisae jacent in obscuritate telluris,
 ruinae tamen, quas ne hostile quidem solum potest
 consumere, Sybillae, quod dici solet, aevum conse-
 quutae, tanto desiderio ac voluptate, ubicunque ter-
 rarum inveniantur, ab omnium gentium hominibus
 visuntur, admirantur, complectuntur, ut jam prope in

justos libros describantur, novaque quadam industria videatur Roma sibi esse restituta.

His de rebus quum et ipse tenerer studio vetustatum ejusmodi, essemque Romanae magnitudinis cum multis admirator : quoniam legeram apud aucthores de Sabariensi colonia, eamque etiam divi Martini incunabulis celebrari audieram, non potui non temperare, quin id loci cognovissem, praesertim hac propinguitate hospitii Sarvarini invitatus.

Consequutus itaque quod optaveram, teque comite perlustratis nuper istis ruinis, quas inhabitas, jam sane extremis et vix apparentibus propter diuturnam temporum injuriam; ubi quum nihil nec memoria nec visu dignum reperissem, quod longe secus credideram, praeterquam IIII. titulos in marmoribus, sepulchrales III., quartum honorarium, non potui equidem quin indoluerim et exclamarim : Miseram rerum humanarum conditionem, quod nihil in ea perpetuum, nihil firmum, nihil, quod in suo statu, in suo flore, in sua denique gloria perduret! Miratus equidem sum tanti nominis urbem adeo ab illa vetere commutatam et abolitam esse, ut praeter haec pauca monimenta et nomen ipsum, nihil jam habeat praeterea, quo Romanam coloniam aliquando fuisse existimari possit. Verum haec alias doleamus.

In his titulis quoniam erant quaedam notae difficilioris intellectus, ajebasque, quosdam in eis haesitasse, in hac: AN. praesertim, ego quamquam neme ipsum quidem satis futurum putavi tantis, ut ita dicam, aenigmatibus, aggressus tamen sum earum interpretationem majore in te officio, quam aut spe aut fiducia tibi satisfaciendi, quum nec mihi ipsi satisfacerim usquequaque, poteramque sane hoc oblatum, non

quaesitum argumentum vel ea sola ratione praetermittere, quod divinatione potius, quam omnino certa et omni ex parte perspecta ejusmodi notarum cognitione tractandum esse videretur. Quippe quod ad haec vetera opus erat Sphinge et, ut ajunt, Delio quopiam natatore, quum mihi ne Oedipus quidem domi foveretur.

Verum postquam te id optare animadverti, visum est idipsum argumentum novae amicitiae nostrae gratia prosequi et ad te mittere. Quare quicquid id est, et quantulumcunque judicabis, tuo certe nomine factum est, tibi que etiam jure debetur. Accipe igitur, et si quopiam loco scopum rei non attigerimus, boni consulas velim, meque satis ad hanc rem attulisse putes, quum amico eam operam praestiterim, quam ei gratam fore cognoveram. Vale. XV. Februarii 1550. Sarvari.

XXIII.

Arsatius Vitalisnak Veranesics Antal.

Antonius Wrancius Vitali Arsatio S.

1850. febr. 24.

Placuisse tibi meam interpretationem titulorum Sabariensium ad Beicium datam, gratissimum mihi esse scito, tametsi rem non tanti, quanti abs te fit, habendam putem. Verum quum amicorum erga nos affectibus multa concedi solent, et haec, ut sic dicam, laudationum paradoxa benevolentiae excusatione repelli nequeunt: non aegre abs te accipio, quaecunque et sentire et loqui de nostris studiis velis. Nos interim ipsi de nobis longe minora cogitantes, quam quae etiam in minimis vix locum habent.

Propterea tamen non relinquam libros, nec rejiciam calamum, volvamque et ipse dolium, et utar his quae genius habet, ne frustra habere dicar. Itaque postquam tantopere delectaris et tu officiis meis cum amicis meis: ne quadrimestrem jam mansionem hanc meam Sarvarinam muto ac penitus ignavo otio me arbitreris agere, propediem ad te quoque dabo aliquid horarum mearum et quidem descriptionem Narabonis, qui nunc Raba genti appellatur, ex Lapincii et Rinquae et Guingiessii et Rebczae fluviorum, ac lacus Pelsodis, nunc Fertew Hungaris generali lacuum vocabulo, Germanis vero Nausideris dictus, et quicquid interamniorum est in ipso Narabone, et quibus flexionibus plus quam prope Meandricis circumferatur, quaeque loca eo irrigantur a fonte, qui est in No-

ricis montibus, ad Jaurinum usque. Item, quem in modum idem Narabon sub Hannis (glebarum id genus est latiorum, strirpium radicibus et tellure condensatarum, fluctuantiumque in superficie aquarum) dilapsus, terram in Tygris atque Orontis morem illabi creditur, indeque subterraneo meatu in Pelsodim lacum invectus, et ibi pro capacitate sinus ejus, infusis magnis aquis, rursus ad Besarkanum*) pagum, paulo supra arcem Capuanam ditionis Nadasdinae, velut e specu effervescit, redactusque ibidem mox in alveum, Jaurinum versus e septentrione in orientem cursum reflectit, ibique, mutato nomine vel potius duplicato, ut postea intelliges, Danubio copulatur.

Haec omnia a veteribus praetermissa nostri etiam neglexere, tanquam ea parvi momenti forent quae vetustiores non attigissent. Sed falluntur multi vel in hujus ipsius fluminis conditione, de quo non immerito poterant et Strabo et Plinius magnifice meminisse, quemodmodum de Oronte et de aliis multis meminerrunt, quæ in mediis cursibus terram illapsi, denuo in alveos suos regrediuntur.

At certe dignum puto, et Narabonem cum his aliis, quos supramemoravi, et quibus potissimum a septentrione acceptis augetur aluitque cum Giungiessio Sarvarum, qui lumen accipiant, idque, nescio, quo tempore facilius quam hoc, quo sub jure et dominio est Thomae Nadasdini, viri clari ac illustrandae et propagandae patriae intenti. Ne forte ut regni fortuna nunc vacillare et periclitari videatur, brevi in horribiliorem barbariem incidat, quam Gothorum et Vandalorum tempestate.

Injeci tibi hanc expectationem non jactantiae

*) Bő-Sárkány.

aut ostentationis causa, sed ut opem tuam atque industriam afferas meo conatui, mihique adsis Theseus, qui terrae hujus plagam prae multis habes perspectissimam. Vale. XXIV. Februarii 1550. Sarvari.

XXIV.

Verancsics Antalnak Andronicus Tranquillus.

1550. febr. 25.

Reverende domine et amice honorandissime, salve. Ex tuis et illustrissimi domini et patroni mei, domini Nadasdini litteris intellexi, te apud istum virum magnanimum inpraesentiarum agere, illique praecipue ob tuam virtutem acceptum esse; quae sane res delectavit me plurimum, quod forte oblata est illi occasio exercendae suae solitae liberalitatis in hominem conjunctione studiorum mihi perquam charum. Nam quam amans hujusmodi hominum sit, quanta cura provehat bona studia, nemo est, ad quem fama nominis ejus pervenit, qui nesciat. Etsi ego non sum tantae dementiae, ut me inter doctos connumerem, tamen nescio qua opinione vel litterarum vel meae virtutis, semper posteaquam in notitiam ejus perveni, sic complexus est, tot me beneficiis vel absentem ornavit, ut si vel paulum esse gratus velim, illius viri principis tam amantis tamque benefici salutem anteponam meae. Idque tibi pro nostra amicitia consulo, qui nunc primum ingressus es in ipsius amicitiam, ut eam constanter omnibus rationibus tueare.

Litteras tuas extemplo ut accepi, curavi reddendas fratri tuo, a quo exspectabaris hac aestate sum-

mo cum desiderio. Si aliis in rebus putabis me tibi gratificari posse, significes velim: non fallam, ut spero, tuam de me expectationem. Bene vale. Tragurii 25. Februarii 1550. Tui dilectissimus Tranquillus.

XXV.

Verancesics Antalnak Csáki Mihály

Michael Ciacchius Antonio Wrancio S.

Non dubito, quin permulta ad vos de me per^{1550. mart. 2.} amicos eorumque litteras non perinde plausibilia fuerint perlata, quae facile tibi amico meo singulari dolorem et sollicitudinem conciliare potuerunt. Ego tamen salvus sum, neque adhuc concidi. Non inficior, compluribus arietibus et artificiis fuisse oppugnatam humilitatem meam, adeoque binis jam comitiis vehementibus studiis de nobis tractatum est, ut etiam cuivis maximo viro negotium resistendi exstitisset. Sed tamen adhuc vivimus. Nam quum innocentiam meam et ipse agnoverim, et eam publice totum concilium animadverterit, ita ereptus sum nequissimi hominis technis, cujus tu quoque exulas a nobis intemperis, ut ne pilum quidem in ea contentione amiserim. Quod uberius referet tibi Constantinus, qui has meas meo nomine perferet litteras.

Incredibile autem est, quoties tui sum recordatus, qui hic propemodum iisdem malis, quibus nunc ego, ob fidem erga Principem eras obnoxius. Vere nunc viverem, mi et frater et domine, si te collegam

in tanto certamine bene exercitatum, et jam non imperitum, mecum haberem. Magis laetarer de mea victoria, si in tanta palaestra essem adjutus tanti amici beneficiis. Nec desperarem in casibus consimilibus dexteritate et prudentia tua gloriosius emergere.

Haec scribo, ut pernoscas, nondum extinctum esse Daemona, qui insidietur virtutibus, et opprimere bonos atque innocentiam nitatur.

Tu vero, mi frater, redditus es in scribendo segnior, et amoris etiam fortasse mutui obliviscentior, quod unicas ad me post discessum hinc tuum litterulas non transmiseris. Cuperem equidem quum de tua incolumitate tum de statu tuo aliquid intelligere, et illud scire, ubi nam sit meus Wrancius, quid agat, et numquid ei ac rebus ejus a rege Ferdinando consuli possit.

Hic tibi profecto princeps nostra clarissima nunc quoque favet, et dolet tuae sortis tantam mutationem factam, sed restaurare hoc tempore non potest. Non dubito, quin prospiciet Deus. Vale et valetudinem cura. Thordae ex Transsylvania II. Martii 1550.

XXVI.

Révay Ferencznek Verancesics Antal.

Antonius Wrancius Francisco Revay S.

Contigit, me proximis diebus audivisse, quod^{1670. mart. 5.} exstarent apud te reliquiae Historiarum Hungaricalium Antonii Bonfinis, quarta scilicet et quinta decas, quas videndi tantum me incessit desiderium, ut non potuerim me continere, quin eas commodato a te postularem. Quodsi forte fortuna videbor impudenter fecisse, illud existimes, quaeso, me hac libertate fiduciam potius, quae in te mihi est, declarare, quam quod quicquam commiserim, quod reprehendi posse putem. Tacitae autem cuidam accusationi hac excusatione occorro, quae in me fortasse intendi facile posset, quod magnitudine tanti viri tam familiariter uti velim, non ignorans res ejusmodi adeo thesauri cujuspian loco haberi solere, ut penitissime abiantur, facileque illarum copia non cuivis solum amico, verum ne amicissimo quidem praebeatur. Si itaque tantum mihi est in te favoris et gratiae, quantum esse confidam: rogo te quam maxime possum, commodas mihi ipsius Bonfinis reliquias vel tamdiu duntaxat, donec eadem poterunt perlegi, praesertim autem si IV. decadem habeas, qua Matthiae clarissimi regis immo Achillis nostri fortissimi gesta complexus est.

Polliceor, me bona fide eas ipsas reliquias servaturum incolumes, redditurumque ita ad diem, ut

spatium diei intercedere non committam. Quantum vero per me fieri poterit, enitar omni conatu, ut id tuae erga me benevolentiae diligenter et cumulate promerear. V. Martii 1550. Viennae Pannoniae.

XXVII.

Testvérének, Mihálynak, Verancsics Antal.

Antonius Wrancius Michaeli fratri S.

1550. mar. 12.

Omnes vos domi ex sententia valere, quod ex litteris tuis intellexi, quas attulit Vincentius Pisanus concivis noster, mirifice laetor. Nos quoque qui hic sumus, adversi nihil habemus. Solus Joannes puer febribus tertianis torretur et excutitur, sed, ut spero, non adibit periculum.

Afflictiones tuae, de quibus accuratius scribis, aequae mihi in oculis semper sunt atque in animo, nec magis, per Deum, mea, quam tua infelicitate permoveor; quod te, nisi iniquus censor esse velis, et scire et credere non dubito. His fatiis, frater, suscepti sumus, nescioque omnino, in quemnam coelitem gygantes accenderimus; quamquam ea sum fide, quod ille, cujus id de nobis visum est voluntati, non inimicis magis quam dilectis terrena commoda consuevit adimere, quique etiam suo tempore, ubi clementius post correptionem in suos vultum reflexerit, cumulatus et ablata reponet, et quae reddiderit, efficiet notiora.

His ego te non tam imbuere documentis, quibus ea longe me fortasse locupletior, quam monitis quibusdam ad ea agnoscenda revocare saepe jam contendi, sed necquaquam omnia, adeo adversis rebus

succubuisti, animumque ista in tempestate dejecisti, quam nec diu, auspice Christo, spero duraturam, nec tu, mortalium omnium aut civium tuorum dumtaxat solus experiris. Et potes, mea quidem sententia, uberius multis consolari, quod tibi ad reliqua incommoda spes quoque omnes meliores non sint accisae, habeasque qui tui, ut sui curam non indiligenter neque segniter gerat.

Turpe igitur tibi est, quod nec ab alienis exemplis, quorum tibi quotidiani casus vel in patria, ut de alio orbe nihil dicam, ingens copia porrigitur, nec a virtute propria, quam a puero sollicitate coluisti, nec a sapientium hominum praeceptis, quibus es instructissimus, petis in istis difficultatibus consolationem.

Qui praeterea me ipsum in tantis fortunae certaminibus, per exterarum nationes non sine periculis discursantem, adeuntem quotidiana incommoda, et saepenumero etiam servientem servitutem minime libero atque ingenuo dignam, studio resurgendi, deberes hilari fortissimoque animo ad constantiam confirmare, lamentis prope muliebribus perturbas et frangis. Quod, licet perpetuo feceris, nihili certo citius aut revocabis fortunam meam, aut me efficies rerum tuarum magis sollicitum atque studiosum; quippe qui (ita me clementissimus et pietissimus Deus e libro viventium non excludat,) neque studiosior neque amantior esse possum, quam sum. Novere hoc non pauci mortalium, novit altissimus et immortalis omnium pater Deus, eumque testem facio, mihi que jacturam omnium rerum mearum tam coelestium quam terrenarum ab eodem imprecor, si tibi mentior.

Crede itaque jam et conquiesce, in eumque rejice tuum cogitatum, in quo omnia, per quem omnia

et a quo omnia. In me vero vel apud me quicquid est, id tuum est, et erit in tua facultate semper.

Quod de adventu tuo ad me desideras, quum libebit, liberum erit. Tua praesentia et consuetudine nihil mihi nec jucundius nec optatius erit; tantummodo sic domum, sic agros, sic uxorem juvenculam, sic parentem senem dimittas, ne qua ex parte, quum redieris, offendaris alicunde.

De statu et successu meo noli esse sollicitus; evademus, favente Domino, quo aspiramus. Sed hic princeps lente festinat, in quo mihi videtur prudentissime facere.

Tu itidem, quum venies, prudenter iter eligas, ne pericliteris. Scito enim, saltus omnes Croatiae et Carinthiae a martoloszis obsideri. Ideo videris, per Flamonam ne, an per Forum Julii venturus es. Vale.
XII. Martii 1550. Viennae.

XXVIII.

Andronicus Tranquillusnak Verancsies Antal.

Antonius Wrancius Tranquillo Andronico S.

Salvum te et incolumem esse, quod ex litteris^{1350. mart. 12.} tuis intellexi, quas accepi V. die Aprilis,*) magnopere gavisus sum. Nadasdinus noster abest hoc tempore ab aula publici cujusdam negotii partim, partim privata causa. Qui alioqui, si affuisset, occasionem hanc ad tuas rescribendi nulla ratione praetermisisset. Nam quum te mirifico quodam amore prosequatur, eodem quidem certe et tuas legit animo litteras, et ad te dat suas, ultroque tui quam saepissime recordatur; quumque interdum serius tuae ad eum perferuntur litterae, considerato forsitan aetatis tuae statu, mox te obiisse existimat; quod fit in nobis, ut colligo, amoris vehementioris causa, quippe quum, quod magis ac magis timemus amicissimis nostris vulnus, id frequentius in ejusmodi casibus menti nostrae observatur. Facies itaque rem pergratam clarissimo viro, tuique imprimis amantissimo, si semper ad eum, quum dabitur, scribes.

Ego jam sum apud Principem; spes, ut in primordiis, non exigua fit ab amicis et fautoribus regu-

*) Iráshiba: „Martii“ helyett; mért martius 12-én nem lehetett az aprilis 5-én vett levélre felelni.

lis nostris. Fortuna etiam denuo coepit nonnihil respectare et ad me capillum vertere, nisi me fallit infeliciū credulitas, juxta illud: Quod miseri volunt, hoc facile credunt. Nequeo tamen, mihi crede Tranquille, quin felicissimo otio tuo non invideam. Utinam et ipse jam tandem aliquando cum natali solo redeam in gratiam, et experiar eam dulcedinem ac libertatem, quae nullo auro sat bene permutatur. Sed haec fortasse hac nova servitute serius consequemur.

Novi quod ad te possem, nihil est singulare. Proximo Julio caesaribus nostris conventus Augustae Vindelicorum celebrabitur. Regia majestas solito cum majore et splendidiore apparatu tam rerum quam hominum dicitur eo profectura. De bello nulla vox, ne murmur quidem. Pax et otium omnes habet. Emericus Balassa et Stanislavus Lazky recens decesserunt. Gallus cum Anglo concordarunt, alter pecuniam conferendo, alter Bologna reddita. Poloni adhuc cum suo rege contendunt. Rex fruitur suis ad stuporem omnium hominum amoribus, nihilque minus vult, quam eam uxorem dimittere, de qua tanta probra palam circumferuntur, quantis vel quivis ultimae sortis plebeus dudum erubisset. Nunc de his comitia agunt Petricovii.

Res Transsylvanae odiis Heremitaе atque Petrovii fluctuant si unquam magis nunc maxime, et perniciosius nunquam. Ab imo enim etiam vetustissima et quae utrique dudum exciderant, excitata sunt et in medium prodita.

Tu interim, o senex fortunate, exemptus jam hujusmodi perturbationibus atque tragoediis, quaeso, vitae incumbas, tranquilleque, Tranquille, fruaris et musis et aucupiis, piscationibusque tuis; nec des Dal-

matiam pro toto mundo, Tragurium pro urbe quamvis felicissima. Miserum me, quod sero intellexi patriae suavitatem et quietem. Me isti nobilitati Tragurinae, rogo, commendes diligenter et quidem de meliore nota. Tuos autem fratres nepotesque, ut nostros saluta- bis. Vale. XII. Martii 1550. Viennae.

XXIX.

Verancesics Antalnak Csáki Mihály.

Michael Ciacchius Antonio Wrancio S.

Miror quod rerum, quae istic aguntur, quid sci-^{1550. mar. 18} licet de statu et negotiis tuis confectum sit, quid de papatu certi statuitur, quisve hunc ipsum obtinuerit, deque id genus aliis, pectusculum tot fluctibus cura- rum et sollicitudinum obrutum excitans, refocillans- que, ad me veterem amicum tuum, quin potius servi- torem, nihil scribas. Ego tui numquam non recordor, diesque et noctes profecto mihi obversaris. Mei vero memoria apud te, heu, jam pridem videtur esse oblit- terata, et restinctus amor, qui quantus semper fuerit, nullis argumentis potest comprobari. Majorem certe ego ex tuis litteris consolationem caperem, quam ut credis, si sponte tanto solatio Ciacchium non orbare.

Sepone ergo anxietates tuas, quibus scio te etiam non carere, ac suffurare nonnihil otii, et confabulare cum amico saltem per litteras, quando coram non licet.

Ut autem nonnihil calamitatum nostrarum attin- gam, nunc exerior aulicarum theoricarum festiv- as praxes. Teneo, quae agebantur et tentabantur in ne-

gotiis tuis conventu Vasarheliensi, et alibi. Consimilia, immo atrociora nunc, mi frater, ipse video innocentiae meae praetendi et jam duobus comitiis. Tuta tamen semper fuit probitas, et Deum habuit patronum. Me quoque ita illaesum eripuit, ut ne fimbriam quidem vestimentorum meorum ignis tetigerit, adeo ut ipse miratus sit Sylla hic noster saevissimus, qui ejusmodi motuum et fluctuum seminarium fuit. Mecum igitur, mi et domine et frater, consilio divino gratias agito, meoque exemplo discas praecipue Deo fidere.

Haec scripsi, ut si forte locutulei, garrulique sinistri quidpiam de me sparserint apud vos, aut tristia vociferati sint, scias futiliter mentitos. Nam ego ex sententia valeo, neque quicquam, quod nolui, mihi accidit. Regina princeps nostra cum illustrissimo filio suo recte valet.

Adhuc hic Thordae sunt, quod propter exundationem fluminis Arantias, Albam hactenus redire nequiverunt, quae ubi subsidet, confestim eo se conferent.

Quo loco, quave existimatione sit frater meus Stephanus apud clarissimum virum Nadasdinum, rogo te, fac ut ex te cognoscam. Tui autem hic crebra mentio fit et dolent universi absentiam tuam rerumque tuarum tam subitam mutationem, sed omnium, quae tibi contigerunt, causam in tua ipsius consilia transferunt. Vale. XVIII. Martii 1550. Thordae ex Transsylvania.

XXX.

Csáki Mihálynak Verancsics Antal.

Antonius Wrancius Michaeli Chiacchio S.

Binas tuas hiisdem fere de rebus intra triduum, 1550. apr. 24 quod successit idibus majis,*) accepi litteras, easque sane nimis sero. Quapropter mira indignatione execratus sum tabellariorum incuriam ac tarditatem, ve-reorque idem meis quoque accidisse, quas te desiderare scribis, quum jam a meo a te digressu senas ferme de multis rebus diligentissime dederam. O perditissimum genus hominum, o servitia non ferenda, dignissimique mortalium omnium, qui male pereant, postquam sic dormitant in amicorum negotiis.

Verum, nae tu vir magnus es et Hercules, qui Antaeum prope nobis confecisti. Gaudeo equidem, tecumque laetum paeana, atque Io, Io, Triumphe! singulari laetitia decanto, quod evaseris eam, quam scribis, publici furoris tempestatem, vel, ut verius dicam, furiae istius vestrae ardentissimas in te faces innocentia atque modestia tua restinxeris.

Proculdubio virtuti, integritati, aequitatieque omnia improba, iniqua ac vitiosa cedunt, tutelaque optimorum principum fortissimum solet esse munimentum contra perditorum hominum insolentiam. Sed quum et princeps ista integerrima servi sui succubuit dominationi, longeque paret abjectius, quam Claudius

*) Úgy látszik, iráshiba ,aprilibus' helyett.

olim caesar Pallanti aut Narcisso, libertis suis, habeasque dominum adhuc in pueritia latitantem, et tyrannum, qui optimis quibusque inimicatur, et quidem eo nocentius quo tectius ac simulantius: obsecro te, caveas tibi et inhibeas animi tui magnitudinem, nimis fortasse ad gloriam festinantem, donec virium aut tu magis assequaris, aut ille, quicum luctaris, ab alio quopiam Deo frangatur, qui tibi favebit, tuaeque simul et multorum vindictae viam reserabit. Saepe etenim premente Deo fert Deus alter opem. Caeterum, et prudentis erit, minus interdum fortiter loqui, quod rectissime senseris.

Haec ego tibi consulo, ut ostendam, quam te vehementer amem, dum tibi sollicite timeam; non autem quod prudentiam in te desiderem, aut ignorem, quantum consilio praestes; quum et Princeps tua prae te ne Nestora quidem ipsum, aut ipsum Catonem requirat. Novi ego, in quanto incommodorum ejus concursu vel meis temporibus saepe illi affueris, teque etiammet ipse eripueris ejus hominis calumniis, qui et libertati et virtuti multorum apud vos intempestiva sua dominatione insidietur.

Porro, quod ad me attinet: ipse quum vidissem diu me cum ista ipsa hydra sine ullo profectu, gravi-que etiam cum periculo dimicasse, languente Petrovio, pavitante Kendino, sexu Regina laborante, aliisque quibusdam minus nominandis, quod toto animo frigidis, quos una fides, una voluntas, una etiam sors in afflictissimae principis officio jungebant, desperata prorsus victoria, imbecillitate virium, excessi praelio, tibi, ut video, juxta vetus proverbium, non tam voluntate, quam utriusque nostrum fatis, lampada in cursu tradens.

Quod postquam sic evenit, duo tibi proponuntur. Alterum ut aut vincas et serio triumphes, aut successu desperato, mature herbam victori porrigas, serviasque atque sordescas; et verendum insuper, ne de dignitate etiam pericliteris, si ad haec, dato tempori ac fortunae loco, ferales quoque fascēs non declinabis. Jam enim istic nemo alius restat (sic enim est, etiam si jactanter dicitur,) summoto Wrancio, Petro Babio ad insaniam compulso, Urbano vero Bathiano, ingenioso viro, ante mortem inedia, odio et invidia fatigato, post mortem, inaudita Manium injuria, e sepultura in pugnam excitato et novis fatis confecto, — quam tu, cujus liberiore censura vel potius Catoniana et Socratica constantia, ab intemperiiis suis nonnihil frenetur, quamquam et tibi vires nullae suppetant, et, qui in Petrovio esse deberet, Brutum non habetis.

Habes haec ad ea, quae olim mihi, nunc tibi cum Heremita intercedunt. Ad alia vero sic habeto.

De te ad nos nihil affertur, quod tibi et honestum non sit et summe gloriosum. Tuam causam ut omnes probant, ita et certamen quod geris cum homine omnium nefandissimo in coelum ferunt. Nec opus est hic recensere, quid ipse de te praedicem, quum in hominum horum sermonem incidis; equidem nullum locum nonmodo laudandi atque ornandi tui, sed ne excusandi quidem ac defendendi praetermitto. Tu quod mei memineris, et diebus ac noctibus tibi obverser omnibus, veluti praesens, pergratum perque jucundum mihi est, et verum id esse non diffido. Me simili ratione affectum esse, et te in memoria mea ita habere omni tempore tibi persuadeas, ut hora mihi sine meo Chiacchio effluat nulla.

De victoria, de qua, ais, tua quod longe scilicet

ea magis laetare, si me haberes in tuis castris. Foret, fateor, id quidem sic, et libenter tecum ubivis gentium periclitarer, modo ne cum monstris et immanibus brutis pugnaremus. Verum necquicquam cupis, quo te Heremita spoliavit; alioqui te quoque ibidem esse vellem, ubi mecum esses, ubi pace et securitate fruereris, cum homine rem haberes, et mitioribus casibus exerceeris.

De statu rerum mearum puto cognovisti jam literis superioribus, quae acta sunt hactenus. Quum erit, et quicquid erit, non sinam te diu ignorare.

Papatum Joannes Maria cardinalis, modici generis homo a Monte cognominatus obtinuit, mira fortuna, sed potissimum favore Alexandri Farnesii cardinalis, qui collatis in eum suis fere XXV. suffragiis, dum Galli cum Hispanis in sortiendo pertinacius contendunt, negantque Itali, hoc orbis terrarum fastigium in Transalpinos conferendum, primus papam acclamavit, et pro more, ut Romae dicitur, adoravit, quum alioqui Montis mentio nulla moveretur inter fratres. Primis diebus assumptionis ejus optimi papae nomen tulit, verentur tamen multi, ne paulo post felicitate rerum et potentia mutatus, in antecessorum vestigiis consistat. Eo sibi plurimum laudis vendicavit, quod concilium principio omnium actionum ultro edixerit, ejusque potestatem in Carolo imperatore posuerit, de loco nullum discrimen facturum, etiam si illud in Belgio, Bruxellae haberi velit.

Quod in fine adjecisti: magnum istic esse mei desiderium, et casuum meorum fortunaeque mutationis tam adversae meis consiliis ascribi causam, — papae, cur non exsiliam? cur amantissimorum mei benevolentiam non agnoscam? cur non credam tibi?

Ego vero et exsilio, et agnosco, et credo sane plus quam multum, sed si et tu credas. Annos V. post Heremitam officiosissime in Transsylvania discursando exegi supplices, nec potuerunt isti Thrasones exple-re tam ingens desiderium, cum mei tantam, tamque diuturnam, ultroneamque copiam habuerint? Heu quam timendum, ne sit hoc fucus, charissime Chiacchi, et Megaricum commentum, nonnullique, qui hoc desiderii comminiscuntur, morionem me Heremitae fieri voluissent. At interim isti ipsi sint, quibus turpissime jugum imposuit et servituti assuefecit.

De Kendino nostro quid referam? heu dolenter dico, quid, inquam, referam, caeteris praetermissis? qui se scit tam integrum utrisque praestare partibus, quique aliquando nostrae cohortis miles erat. Nonne vidisti, quanta dexteritate solitudinem meam declinabat, quum ipse audirem vituperationem multorum commorantium in circuitu, factus omnibus ut vas perditum et timor notis meis? Nonne qui videbant me, fugiebant a me, et oblivioni dabar tanquam mortuus a corde?

Sed sic humana transiguntur. Et rara quidem in mundo est integritas, rara pietas, rarissima vera amicitia, eaque potissimum, quae utilitate non ducatur. Sic enim et Naso ait:

Rara quidem est virtus, quam non fortuna gubernat,

Quaeque manet stabili, quum fugit illa, pede.

Verum eruditi, moderati, et rationis homines bene compositae, debent, ut sapientes volunt, et in prosperis iidem esse, et in adversis fortes ac generosi.

Quid jam utrique nostrum faciundum sit, neutrum credo ignorare. Et quamquam ego jam in harena

gladiatoria non sum, ut tu es, aequae tamen mihi quidem est ac tibi necessaria fortitudo cum pudore, cum inopia, cumque nova servitute depugnanti. Tibi omnia faciliora sunt, eoque etiam securiora, licet dimicas cum Phalaride, quod res est domi integra et protegaris fortuna Principis.

Frater tuus Stephanus tuique omnes quomodo sese habeant, nescio. Nunquam enim Stephanus ad me scribit. Nadasdinus amat tuos, te vero magni facit. Stephanus autem, quod mihi ignoscas, videtur esse nimis paganus. Raro est apud eum aulici officii gratia, quod in illo plurimum ego improbo, tu vero corrigas. Vale. XXIII. Aprilis MDL. Viennae.

XXXI.

Verancesics Antalnak Csáki Mihály.

Michael Chiacchius Antonio Wrancio S.

1550. apr. 23.

Per Andream Pesthienium mense Martio dedi ad te unam epistolam, et aliquanto ante aliam per servum quemdam Volfangi Bornemyzdae, quas si bona fide perlatas accepisti, facile cognovisti, quae nos fata urgeant, quibus anxietatibus et difficultatibus distrahamur atque distinguamur. Et spero non esse opus litteris, si vel cum iis, qui comitiis Colosvarinis interfuerunt, contulisti, vel nostrorum hominum mores, praesertim vero hujus Nostri, penes quem summa rerum existere censetur, intimius perspexisti. Quid plura? Crede, mi frater, tot me perplexitates in hoc statu meo impetiverunt, et de loco deturbare conten-

derunt, ut ipsi mihi saepenumero fuerit miraculi vice. Nosti humilitatem meam, nosti mores humi repentis. Nosti item hominis hujus potentiam, tenes ambitionem et habendi affectum immensum. Et tamen in contemptissima mea personula voluit Deus vincere, et impetui fastuoso modum facere. Nec tulit fluctus maris transire fines nos.

De his ex animo uberius colloquerer, si coram tecum constitui liceret. Sed video fatalem hostem, qui tibi quoque nunquam bene voluit, quod Transsylvania tota novit et pars Hungariae non exigua, mihi imminere, et prorsus id consolationis ereptum esse.

Regina inter tot aerumnas, quibus distinetur, tuam tamen sortem magnopere commiseratur et dolet casum. Id singulari consolationi ducit, quod ipsa nullius unquam mali aut sinistrae fortunae tuae materiam sumministravit.

Brevi curabo negotio illi tuo ex voto respondere. Sed nunc ob incomparabiles anxietates, quibus circumvallor, tam cito nequeo. Ignosce igitur, et felicissime vale. Secunda feria ante Sophiae 1550. Albae Giulae. Ex Transsylvania.

•

XXXII.

**Hasenberg Jánosnak, a fejdelem gyermekei oktatójának
Verancsics Antal.**

Antonius Wrancius Joanni Hasenbergio institutori filii Principis S.

1550 máj. 1.

Martialis oraturus Jovem pro suo caesare Domitiano, inquit in ejus epigrammatis fine:

**Te pro caesare debeo rogare,
Pro me caesarem debeo rogare.**

Quorum alterum praestare, quo et quanto animo aggressus sim, vides; ab altero quum recenti ac nova servitute prohibeor, quae adhuc ut sine meritis est ita et audacia caret, illud ipsum in amicorum officio etiam tacentibus nobis existimamus esse collocatum.

Verum nobilissimus vates videtur hoc versu vel-
le, meo quidem iudicio, declarare: solos principes omnium divinorum operum, quibus terreni status gubernantur, hominumque moderatur felicitas, vera esse quaedam instrumenta, quum et potestatem omnem a Deo procedere et corda regum in manu Dei existere, tradant litterae sacrae. Unde et pro iis assidue exorandam esse divinam majestatem, evidentissime edocemur, quo nobis fortes, pii et secundum cor ejus instituti concedantur, concessique ab eadem defendantur et feliciter promoveantur. Neque enim ullo alio majore argumento Deum nobis reconciliatum esse debemus cognoscere, quam quum eos principes obtinemus, qui sunt optimi, fortissimi, catholici et for-

tunatissimi; iratum vero quum — vel teste Esaia- mulieres, pueros, imbecilles, infortunatos et tales, quibus cum virtute nihil, nihil cum divina mente communionis intercedit.

Itaque consideranti mihi, jucundissime Hasenbergi, multarum reipublicae nominis christiani partium hinc excidia atque inclinationem, illinc amplissimorum caesarum nostrorum institutionem, religionem, vitam, magnitudinem, potentiam, fortunam, doctes, inquam, quas rari antecessores eorum ab ipso Carolo Magno una omnes complexi sunt: dudum equidem videor mihi in eam opinionem venisse, hos proculdubio nobis divina providentia datos esse, qui, si sanis sensibus perspicere velimus, et damna et injurias suorum ulciscantur, collapsumque genus humanum in abominationes et vitia, ad verum cultum erigant et ad honestatem morum reducant. Ac vereor etiam plurimum, ne res christiana diutissime in posterum gravioribus bellorum difficultatibus affligatur, si eorum ductu eorumque temporibus non reparabitur. Optimorum enim principum temporibus et instituuntur regna et reparantur, quemadmodum contigit etiam Romano imperio, quod non quidem sub Domitiano aut ejus similibus, sed sub Trajano, cognomento et reipsa, Optimo et moderatissimo principe assurrexit feliciter et movit lacertos fortiter.

Haec nuper, aliaque id genus plura dum expendo mecum, subito incensus quodam fervore, nescioque an plane poetico (diu enim tum Musas tum Apollinem ipsum intermisimus,) erupi, atque ea in hos conjeci versiculos, *) in quos Oppolitanus incidens, juvenis sane non exigui genii ad condendum carmen,

*) A versezet nines a levél mellett.

institit apud me magno conatu, ut eos tibi mitterem, vellemque hac rerum ejusmodi communione demonstrare, quanti faciam quum tuam erga me benevolentiam, tum humanitatis ac virtutum tuarum omni celebritate dignissimam conditionem. Quod equidem majore quopiam alio argumento libentius praestitissem-eoque potissimum quod de te haberetur, si occurrisset, quam hoc, neutique etiam tanti, ut prodeat in doctissimi hominis manus.

Verum ut et Oppolitano nostro satisfiat, et ego a parvis officiis, ut sunt omnium rerum principia incipiam cultor esse amicitiae tuae, quae mihi profecto jucundissima est, eosdem ad te mitto versiculos, in quibus quum videbis plus in optimos principes nostros fidei meae et voluntatis quam eruditionis et elegantiae, perferri non desidero, eritque satis, si in optimi amici sinu amice conquiescent. Quandoquidem hoc tempore

Non ita se nobis praebet fortuna secunda,

Ut mihi sit ratio laudis habenda meae.

Vale. Kalendis Maji. MDL. Viennae.

XXXIII.

Csáki Mihálynak Verancsics Antal.

Antonius Wrancius Michaeli Chiacchio S.

Uno me tempore plures obruere coeperunt lit-1550. máj. 16.
 terae tuae, quod quam gratum quamque jucundum mihi est, eloqui nequeo. Sed et hae ita sero, et casu quodam, ordineque pene omnes praepostero redditae sunt, ut a quibus eas acceperim, quia non ab iis, quibus erant datae, scribere omnino nesciam, nullas tamen intercidisce scito. Et vellem, ut posthac certis hominibus litteras tuas dares, unoque eas sigillo, quas in meas manus mittes, omnes communias, quandoquidem et hae postremae, quando sunt redditae, parum abfuit, quin illae ad fratrem tuum perierint, quod meis non erant alligatae; nisque eas triduo post apud eundem virum ex manu tua agnovissem, in neglecto loco prorsus excidebant. Memineris itaque majore imposte-
 rum solertia ad me dare tuas epistolas, circumspecto etiam hoc, ne in istius viri manus incidant. Sed jam ad alia.

Laetari ego, frater amantissime, nequeo satis, quod victoria tua de istius adversarii tui, Heremitae, quem tu non exprimis, tibi procedit ex sententia. Etenim et legi ex tuis litteris multa, et ab iis, qui istinc veniunt, cognovi omnia. Macte igitur, vera virtute vir, sic itur ad astra. Sic et Cieero, ut ipse de se, de Pompejo, et de Catone scribit, cum summis viris contendendo, summo splendore novitatem suam illu-

stravit. Quis enim in vili et imbecilli hoste gloriam invenit. Verum consulerem tibi, si me audires, ut saepius in harenam cum isto gladiatore non descenderes. Scis, quam clandestinis ultionibus delectetur, quamque multos coeco verbere, ut Hungaris est in proverbio, pulsare soleat. Sed haec tu videris, in quo prudentia et consilium non desideratur, quique probe hominem nosti. Ego certe si tecum esse possem, aequae tecum periclitari non refugerem, tueremurque fortasse commodius, quod et tu sentis fortunae nostrae conditionem, communibus consiliis, quaecumque illa esset, quae in nostrum statum incidisset. Sed postquam id extorsit tibi, immo et mihi Heremita, litteris saltem multis disjunctionem nostram solemur.

Angores itaque, quibus et in extremis litteris tuis circumvallaris, hoc solo evitabis, si arte artem deludes, nec aperto Marte cum tam versuto et potente hoste crebro congredieris. Limiti autem et lateri istius optimae principis insistendo, Deo te assidue commendabis, ac illum precabere, ut fluctus istius maris vestri vel ea sola causa fines suos transire patiatur, quo Pharaonem tuum vel etiam nostrum tandem jam aliquando deglutiret. Eo enim nisi coelesti ictu liberabimini, frustra omnes arcus vestros intendetis.

Reginae, quod aerumnas et sortem meam miseratur, habeo ingentes gratias. Nulli certi malo, nulli sinisteriori fortunae meae materiam illa suppeditavit. Alterius vim sentimus, cujus causa utinam non et ipsa infelix ad extremum absorbeatur, ultimaque adeat etiam ista provincia, filiusque Joannis in Turcae manus incidat, vosque omnes in servitutem abigamini. Ejus majestati me etiam atque etiam commendes velim.

Ex Italia scribitur: novum jam pontificem Julium III in impuberes conferre cardinalatus, fratribus ducatus venari et coemere, nepotes vero in principum familias conjugiiis asserere. De concilio fama feliciter procedit. Tria in caesarem fertur pontifex rejecisse: ut curet quo et catholici et lutherani serio ad concilium conveniant; ut reperiatur modum et rationem, qua utrique loquentur et de quibus articulis tractari debebit; tum demum: ut quae ibidem communi consensu patres decreverint, sint toti reipublicae christianae rata, ejusque auctoritate sic firmentur, ut sine ulla inposterum controversia constantissime observentur.

Scribitur etiam, quod in his Augustanis comitiis agetur potissimum de imperii successione, et de ipsius concilii loco, ratione et tempore; hisque confectis caesar Carolus, dimisso filio Philippo in ducatum Mediolanensem, transmittet in Hispanias, quod ei medici consulunt, si vivere et valere velit. Maximilianus revertetur ad suscipiendum Hungariae diadema. De Hungaria vero ab hostibus vindicanda et in pristinam formam asserenda rarus est sermo.

Mihi reverendissimus dominus Nicolaus Olahus, vir clarus et antistes, animoque in me maximo, archidiaconatum in ecclesia sua contulit, cujus possessione per procuratorem accepta, ipse quoque petam Augustam. Tu jam illi negotio, quod te rogaram, respondeas velim, cujus moram si longius proferes, majore me damno afficies. Vale. XVI. Maji MDL. Viennae.

XXXIV.

Nádasdy Tamásnak Verancesics Antal.

Antonius Wrancius Thomae Nadasdino S.

1850. máj. 10

Forense novum est et vulgare, Orozlanum, perfractae temeritatis saevitiaeque inauditae juvenem cum ingenti milite Agriam venire oppugnatum. Is est Mehmeti illius, hungarici nominis perversoris, olim Belgradensis passae filius, et Collociensis Hathvanensisque ditionis sangziacchus, nuncque etiam Agria adjecta est, missaque dona a caesare, framea, arcus, sagitta et tiara turcica, quam tulbentum vocant, et mandatum acriter, ut nisi eodem illo ferro velit cedere, Agriam primo quoque tempore obsideat et in suam potestatem redigat.

Numerant cum eo XV. sangziacchos et LXX. M. hominum; quae copiae ubi et unde tam repente tamque sensim et clam nobis, in his finibus contractae sint, nescitur, nisi si de coelo cecidissent, proptereaque id omnino adhuc ambigitur, certosque aucthores non habemus. Quamquam ajunt etiam, ita eos paratos jam et propinguos esse, ut Agriani nostri dudum expaverint, miserintque his de rebus nuncium ad antiqititem suum in aulam, qui nuncius, hesterno vespere, mutato in hac urbe equo, magna celeritate iter est prosequutus.

Huic rei quanta est fides adhibenda, non satis scio dicere, (solemus enim de Turcis omnia minus

credere, quod cum iis pugnare non vellemus;) si tamen ad perfidiam gentis respiciemus, quae nulla fide nullisque pactionibus teneri consuevit, ea sane ipse sum opinione, quod inducias procul dubio violabunt, atque ita ingruent aut in Transsylvaniam aut in regis nostri ditionem, ut vere de coelo eos cecidisse cognoscemus. Invigilant enim ipsi rebus suis et intendunt successibus. Nos dum alia domi curamus et sociorum regna ambimus, hostes foris nostris augemus, eosdemque minus parati rebus bellicis, tanquam ad Eurotam oscitabundi, desidentes exspectamus.

Omnino mature hortandus esset princeps, nunc praesertim in hoc imperiali conventu Augustae celebrando, ut Hungariae curam et cogitationem capesseret, quae jam quum, quod palam est, ad summam rerum lineam devenerit, verendum est, ne paulo post, ubi Turcae perfecerint, quod conceperunt, sero nos clypeum induemus, nempe jam accepto vulnere, ultimaque demum et patriae et spei sollicitudine exuamur. Bene vale. XX. Maji MDL. Viennae.

XXXV.

Balthus Bonifácznak Verancesics Antal.

Antonius Wrancius Bonifacio Baltho suo salutem.

1550. Jun. 8.

Nudius quartus quum dies festus celebraretur sacratissimi Christi corporis, videram in tua domo, praeteriens, ingentem Viennensium numerum matronarum, quae eam pompam spectatum venerant, nescioque, medius fidius, ipsaene magis spectatae sint, an ipsa pompa, adeo coelestes potius quam Viennenses omnibus esse videbantur.

Porro tanto splendore erant circumfusae, propter tum formae, tum aetatis ornamentorumque praestantiam, ut ea pompa nihil aequae et inspiciebatur et mirabatur. Ego vero quicquid in coelis, quicquid in terris lucis existit, in tuam domum descendisse existimabam. Nam oculi singularum soles esse apparebant. Quid plura? Beatum et felicem multi dicebant esse Bonifacium. Hoc ipse de felicissimo domus tuae momento carmen feci et ad te misi, quod benevolentiae nostrae gratia habeas gratum, velim. Vale. VIII. Junii 1550. Viennae. *)

*) A versezet nincs a levél mellett.

XXXVI.

Selli(?) Eleknek Verancsics Antal.

Antonius Wrancius Alexio Sellio S.

Mira fiunt hoc nostro saeculo; utque alia, quae 1550. jun. 19. his diebus diversis in locis contigerunt, praeteream, unum certe recensebo vel propter viri memoriam, qui in oblivione esse non debet, multarum enim nationum et mores novit et urbes vidit.

Petrus Babay, cognomento Kys, homo ingenii et industriae non contemnendae, Joanni vero regi jam inde a coronatione ejus summa fide atque constantia charissimus, intimaque familiaritate adjunctus, superiore Martio, quum a nobis rediisset in Transsylvaniam, — adhaeret enim Joannis filio — correptus quadam aegritudine, eadem illi in insaniam desierat, adeo ut et familiae et Principi et amicis et omnibus denique obviis conviciaretur, et si quid ad manus habere posset, verbera etiam incutiebat, nec lapidum jactu abstinebat, quapropter ligatus domi tenebatur, summa vigilique tum servorum tum uxoris cura custoditus.

Mirum erat omnibus, unde vir et prudens et consilii non exigui, modestiam professus, tam cito tamque misere insaniret. Multa in eum consumpta sunt remedia, tandemque, horumne auxilio; an divina gratia, quod inculpatissimae vitae semper habitus est, an

etiam suapte naturae beneficio adjutus, utpote in re accidentali et alias semel jam in eo cognita, quum moldavica captivitate teneretur, non facile affirmatur: tamen jam convalescit et mentis compotem fieri afferunt. Sic enim scribit ad me Chiacchius meus: „Petrus Babay compater meus coepit incolumitati pristinae restitui. Non adeo, ut prius, delirat, nec occurrentibus conviciatur. Aequiore etiam in familiam animo est, planeque jam de eo bene spero.“

Ago ingentes gratias Deo Optimo Maximo, quod non privabor tanto amico, quodque illum tanta infelicitate noluerit consopire, suos vero sempiterno moerore afficere atque tristitia. Nisi forte et ipse velit ei similis esse, qui in insania felicitatem reputans, dixerit: Pol, me occidistis, amici, non servastis. Atqui non credo tam alte illum insanisse, ut prorsus oblitus fuerit, quod sapere dulce est, calamitosum rideri coeteris. Vale. XVIII. Junii 1550. Viennae.

XXXVII.

Hasenberg Jánosnak Verancsics Antal.

Antonius Wrancius Joanni Hasenbergio S.

Annus mihi quidem videtur exiisse, quod te non¹⁵⁵⁰ jan. 20 viderim, duo sane jam esse, quod nihil ad te scripserim. Nec me minus hoc, quam torquet illud. In utroque enim est, quod reprehendi potest. Sed, ut ex altero propter justam moram, eamque nondum longam, adhuc omnino nihil in me culpa pervenit, ita in parte altera plurimum etiam criminis adiasse me non inficior, quippe cui quotidiana publicorum tabellariorum facultas non deerat, ac debebam equidem nova etiam quadam ratione mittendarum ad tantum amicum litterarum occasionem mihi comparare et propemodum parere, ne officium meum toties oratione tibi oblatum ac deditum, re minus probaretur. Nihil enim et ineptius committerem, quam si in nudis tantum verbis amicitias collocarem, et inhumanius, si benevolentiam tuam a sola virtute tua ultro erga me excitatam et profectam, jamque magno et certissimo argumento demonstratam non solum agnoscere sed etiam perpetuo tenore colendam, amandam, conservandamque mihi nollem proponere. Verum est quidem, quo me huic culpa eximam, nec praeteribo excusationem, ne omnino incuria videar id officii praetermisisse.

Etenim fui quidem certe satis sollicitus de lit-

teris cū ate interdum dandis, sed quum per meam in hac urbe novitatem, omnium ejus morum, institutum, negociationumque rationes perspicere et pervidere tam repente nequiverim, factum est, ut de facultate etiam cursorum publicorum serius fuerim edoctus. Sic itaque de meo erga te officio judices, sic de animo tibi persuadeas velim. Ac si excusationem meam accipis, veniam quoque securius postulo, oroque ut hac vice neglecti officii culpam mihi, quae tua facilitas est atque humanitas, condones, imposterum diligentiam meam hac in parte non desideraturus.

Tu si et valetudine prospera et optato rerum tuarum cursu frueris, magnopere laetor cupioque id ex tuis litteris cognoscere. Ego enim recte valeo, quamquam in magna sollicitudine ob amicorum meorum, tui praesertim absentiam. Sed spero ad summum intra XII. diem me quoque ad Augustanum iter fore paratum. Nec enim aliud moratur me, quam extrema manus cujusdam familiaris negotii, ad viaticum pertinentis, quod vel unis litteris, quas in horas exspecto, conficietur. Igitur non est tibi dubitandum, quin adhuc me tuae litterae sint hic consequutur, modo vel extremam occupationum tuarum horulam mihi dare non recuses.

Nova si quaeris, Viennae, providentia optimi, pii felicitis principis quieta sunt omnia; de finium etiam tumultibus mitiora, quam quum discedebatis hinc, afferuntur. Ex Transsylvania id habetur. Oratores, quos Heremita ad Turcam miserat, redierunt; iis audiendis publicus Thordae conventus decretus est, et laetane an tristia retulerint, is qui haec mihi referebat, ignorabat. Barbarus tamen imperavit Heremitaee CCCCC. equos Transsylvanos, Petrovio CC., misit-

que pro his utrique pecuniam, ne gratis eos petiisse videretur. Quantum haec res habeat fuci, nescio an poteris perpendere, quod ejus factionis ignoras conditionem. Novo certe vectigali, nisi me fallit opinio, sternit Tyrannus viam, et jugum sensim pergit iis injicere, quos in plagas pellicit. O egregium venatorem, o fallacem Heremitae et Petrovii in Turca fiduciam. Nequit, nequit, mihi crede, turcica perfidia cum iis, quibus imminet, ullis vel aequitatis vel honestatis terminis consistere. Hactenus Valacchorum erat hoc tributi genus, de quorum equitiis meminit Strabo VII. libro; jam et Transsylvanorum erit. Verum eos quantum putas animi habituros, ut vel quadrantem pro his equis accipiant? alioqui mox ingratitudinis arguerentur, ne quid pejus divinem, tamquam parum a Turca acceperint: frui scilicet, ejus beneficio, libertate et patria. Novi equidem ego latronum praxes et insolentiam, vereorque insigniter, mi Hasenberge, ne ad tributum solitum, quod quotannis pendunt Solymano a Valpensi, Soklosiensi, Quinqueecclesiensi et Strigoniensi excidio, appendant jam et equorum pensionem, paulloque post ubi huic quoque oneri clitellam eorum sufficere viderint, cogantur demum et impuberum suorum decumas dare. Sed vivunt augusti, vivunt optimi et fortissimi caesares nostri, vivantque, obsecro, et valeant, idque jam tandem injuriarum, vibrato in orientem gladio, non ferant. Si quae alia occurrerint litteris digna, officiosissime ad te, dum hic ero, perscribam. Tu vero mei memineris et felicissime valeas. 20. Junii 1550. Viennae.

XXXVII.

Verancsics Antalnak Nádasdy Tamás.

Thomas Nadasdinus Antonio Wrancio S.

1550. jún. 27.

Ternas a te accepi litteras, de quibus gratias ago et ad eas breviter respondeo. Laetor et regiam majestatem Lyncio, et caesarem invictissimum Colonia salvos Augustam properare. Deus fortunet omnia et itinera et acta majestatum earum.

Jam pridem intellexeram, comitia indicta esse Thordae, et quidem sic, ut omnes armati convenirent, ac metarentur castra ad Aureum Flumen. In quem finem nescio.

Cur sorori scribam, non est. Nam si quid de marito suo cognoverit, sine etiam admonitione faciet me certiolem.

Illud ex urbe Roma, quod ridendum esse dicebas, non potui equidem non ridere, rideoque etiam num. Verum fruantur suis voluptatibus, modo ne bella serant.

De equis petitis a Turca recte judicas. Nam et dum donant equos, et donantur equis, utrumque in Christianorum perniciem cedit. Comes*) sanus ne sit an aegrotus, vivus an mortuus, nihil refert. Nam ipse nihil aliud curat, quam ut gratificetur suis Rascianis et aurum congerat. Valeat ut meretur. Ego eum plus

(*)Petrovicsot érti.

quam Hrustanum odi, et forte jam incipiam de eo palam loqui ut de albo graeco amicus ille noster. Chyacchium nostrum salutes meo nomine. Vale. XXVII. Junii 1550.

XXXIX.

Nádasdy Tamásnak Verancsics Antal.

Antonius Wrancius Thomae Nadaŕdino S.

Litteras tuas ad Cancellarium et ad me heri ac-^{1550. J in. 29}cepi vesperi. Hodie statim lucis initio curavi alteras Augustam perferendas, alteris, saepius eas perlegendō, valde sum oblectatus, praesertim quod riseris illud muntare (?)

Novi hoc habeo. Hesterno die rediit ex Turcia orator regis nostri cum amica, ut ajunt, expeditione. Ex eo quidam audierunt, vim parari apud Turcas in Transsylvanos propter Heremitae et Petrovii intemperies. Quantum hoc veri habeat, nondum comperi, sed sciscitabor diligentius, donec verum intelligam; quamquam quid ea de re dubitari oporteat, de qua vel inde ab initio nullam unquam habuimus securitatem. Id tamen si omnino verum est, timendum erit, ne deficiat ingenium Heremitae, et in seriis nesciat sese versari Proteus. Facile enim cuivis esset volenti Turcae palpum obtrudere, dum ille interim aliis conivēt, ut alios praeripiat.

Petrovius sanus nunquam fuit, nec vivens vivus est, optimeque illud in eum quadrat: Aut dudum obis

set, aut natus non fuisset. Merito itaque et palam loquendum est de caudice, nocentissimi anguis domicilio; odioque haberi meretur, non quo Hrustanus solum, sed quo Agrigentinus ille Phalaris. Nihil enim quum sit homine frigidius, quis crederet, tam calide nequiterque perniciosum esse in rem praesertim publicam non privatam, in alienam non suam, in multorum denique bonorum non unius avari et servorum suorum servi. Quapropter valeat, ut scribis.

Ad Chyacchium tuam salutationem ascripsi, quem admodum volueras. Bene vale. 28. Junii 1550. Viennae.

XL.

Oláh Miklósnak Verancsics Antal.

Antonius Wrancius Nicolao Olaho praesuli suo S.

1550 jul. 2.

Beneficium quoddam non exile, ut referunt, vacavit per hosce dies Strigonii, cujus causa dudum quidam istuc jam profecti sunt, quod ego serius quidem intellexi, quam res mea postulabat. Quamquam igitur satis verecunde agam pro me ipso in hoc beneficio consequendo, quum adhuc nulla merita me in factione vestra commendent: non desunt tamen causae, quibus id audere non expavescam. Clementia inprimis, bonitas munificentissimi principis tui, deinde singulare iudicium quo polles in hominibus cognoscendis. Non dubitans igitur, certum te jam et persuasum esse de integritate mea, qua in istius optimi principis servitio reliquum id aetatis meae sum exacturus,

te praesul amplissime, majorem in modum peto, ne dedigneris, si licebit, viderisque e dignitate eque re mea futurum, mei apud serenissimum regem meminisse. Nihil volens interea tanto domino, tamque pio parenti meo, de me jam non mediocriter in episcopatu suo merito vel oneris vel molestiarum impondere. Cujus quidem erga me animum tanti facio et facturum sum per omnem vitam, quanti quidvis beneficiorum, quod in homines quam dignissimos conferri possit. Omnia enim optima et felicissima mihi accessisse perspexi, ubi me in gremium benevolentiae tuae vidi pervenisse. Sed ex me quid vicissim velim polliceri aut debeam? equidem practer fidem atque obsequia nihil invenio magnitudini tuae convenientius.

Haec tamen ita jam data, dedita atque addicta tibi sunt, ut nisi morte mea divelli a tuo limine minime queant. Quicquid igitur tua opera tuaque commendatione accedet mihi fortunarum, id tuum censebo semper, nempe in tuum hominem collatum. Vale.
2 julii 1550. Viennae.

XLI.

**Hasenberg János, az ausztriai főherczegek tanítójának
Verancesics Antal.**

**Antonius Wrancius Joanni Hasenbergio archiducum Austriae
praeceptoris S.**

1550. jul 3.

Quoniam saepenumero solent mihi verba deesse in re propria, equidem facilius aliena, quam mea curo propter verecundiam, quae me deterret a temeritate, et inprudencia, quum et amicis nostris vel in mediis periculis deesse non debemus, et in propriis rebus plerumque philautia nobis opponi potest. Si igitur in praesenti meo privato negotio in quo patrocinium tuum requiro, brevior ero et minus apparatus, oro te, ne ideo contemnendum ducas, sed agnita mea in te fiducia, ita rem promovendam aggrediare, ut verborum et praefationis phaleras non expendas. Sacerdotium quoddam non exile, ne dignitatis ultimae vacavit, mihi ut refertur, Strigonii, pro quo obtinendo dudum quidam istac jam avolarunt. Ego, qui adhuc in eo sum, ut prius in obsequia optimi principis perveniam, quam beneficia petam, nondum vel tenuibus subnixus meritis, vereor sane, ne id sero cognoverim alteriusque vulturis, juxta M. Martialem, hoc erit cadaver. Utcunque tamen sero, nolui praetermittere, quin et ad te, et ad praesulem meum erga me propensissimum litteras darem in mei commendationem. Ad praesulem quidem, ut ad parentem et virum eminentem, ad te, ut ad amicum optimum, et qui me nulla

re alia, quam humanitate tua propria, et divino quodam instinctu ductus tum amare, tum complecti prior inceperis. Da igitur operam, ut, cum eodem praesule meo re communicata, consequar hoc sacerdotium, possimque minore molestia aeris regii eidem regi nostro clarissimo, ubi ipse praeceperit, inservire. Quod si minus merebor praeveniri ejus munificentia et gratia, succurrat tantae majestati, Deum etiam, cujus principes in terris vicariam potestatem gerunt, priorem dona sua in humanum genus contulisse, nihilque nos vel cogitare posse, quo et Deo ipsi, et principibus nostris satis pro acceptis unquam gratificari possimus. Non dubitet igitur invictissimus rex Wrancium sublevare, et suis partibus admove. Forsan sicut postremum ab adversa factione cursu fatorum recepit, ita non inutiliorem multis, qui hactenus in hunc modum fortunam mutaverunt, experietur. Et si aliis de rebus cuncta modestius debeam polliceri, illud certe audacter etiam edico, omnem me operam daturum ne ejus majestati impudenter unquam molestus sim, sed id totum in illius assiduis et praesentibus servitiis impendam, quicquid ejusmodi beneficiorum in meam tenuitatem contulerit, gratiam ejusdem majestatis et clementiam pro illo amplissimo et in seros nepotes usque transmittendo opum foenore habiturus. Pluribus amorem erga me tuum non sollicitabo. Scio amas me, quodque tum auctum, tum ornatum velis. Et quum id saepe jam ultro magnis in locis tentaris, nunc certe a me monitus et rogatus deesse mihi minime debes. Sed quid dixi, debes? An accepisti aliquid, et alieno teneris? Nequaquam, Hasenberge mi jucundissime, sed amicitiae nostrae mutuae quum jure, tum fructibus utor. Vale. Julii 1550. Viennae.

XLII.

Hasenberg Jánosnak Verancsis Antal.

Antonius Wrancius Joanni Hasenbergio suo S.

1550. Jul 7

Nocte proxima quum mira nimbi cujusdam vis urbem hanc horribili tonitruum et corruscationum terrore affecisset, sola turris campanarum divi Stephani ter de coelo tacta est, nec eam tribus tantum in locis afflixit, sed in pluribus, dum eam intra et extra violentius fulmen percurrit adeo, ut ad eas fracturas reparandas dicant magna pecunia opus esse. Numerum ejus exprimere non audeo, quum fracturae ipsae videantur esse non perinde grandes, communis tamen omnium vox est, de tribus millibus Rhenensium nummum, ad idque opus peragendum annum requiri.

Caeterum quum aliis nostris de rebus nihil est, quod scribam, scribam externa, ne ullum tempus praetermittam, quo aliquid litterarum mearum accipias. Afferunt, Polonos concessisse tandem regi suo uxorem, cujus causa totum illud regnum hactenus turbabatur. Ea tamen conditione, ut de ea coronanda, deque liberis, si quos ex illa suscepturus esset, ad regnandum eligendis prorsus omnem spem et cogitationem abjiceret. Dura amanti et praesertim principi a subditis conditio. Verum sic bonus juvenis evictus procerum suorum pertinacia et libertate, omnino succubuit, et in concordiam cum iis rediit, quam bono, quamque aequo animo, forsitan melius perspiciemus

cubuit, et in concordiam cum iis rediit, quam bono quamque aequo animo, forsán melius perspicíemus, ubi paulo post evaluerit. Sed ne humanis rebus unquam desit Erynnis aliqua, odia nobilitatis a filio versa sunt in matrem. Insimulant hanc, multa olim dum imbecillitate mariti fracti jam senectutis incommodis regnum moderatur, severius licentiusque, quam pro muliebri sorte conveniebat, praedia et possessiones privatorum usurpasse. Nunc quique sua reposcunt, hisque de rebus eodem comitiorum loci iudicia agitant, regina ipsa non plus a comitiis quam uno milliari distante. A Turca etiam non sunt quieti. Superioribus mensibus non exigua Turcarum, Tartarorum et Valacchorum manus fines eorum ex ea parte Poloniae, qua eas nationes attingunt, per Podoliam, transito flumine Borysthene invaserant. Pretvicius homo slesita, belli gnarus, et in hostiles incursus promptissimus, qui ea loca praesidio tuetur, cognito hostium adventu, et jam de insidiis quoque in vicinia dispositis factus certior, dimisso in arce, cui praeceat, Ochyakovo nuncupata, parvo milite, cum reliquo ipse quoque in insidias e regione hostium perexit, facta prius late apud hostes fama de sua aliorum protectione, simulque mandat arcis praesidio, ut ubi hostes impetum in arcem fecerint, edant ingentem omni ex parte tubarum, tympanorum et bombardarum fremitum, quamque maxime possint, persuadeant hostibus ea specie, milite arcem non esse vacuam. Adveniente itaque designato eruptionis tempore, erumpunt ex insidiis barbari, summaque vi atque alacritate impetum in arcem faciunt. Pretvicius accepto signo oppugnationis, quod suis praeceperat, prodit etiam ipse, bifariamque divisís copiis, accurrit impiger, et in ho-

stium terga, qui longe majore numero erant, quam ipse, irrumpit. Insperata invasione tantum fertur teruisse Barbaros, ut ne vultibus quidem ad imminentes Polonos conversis, extemplo se se in fugam effuderint. Pretvicius eos ad Borysthenem usque continuata victoria insequutus, qui jam ob veris vicinitatem imbecilliore glacie tenebatur, in tantum casum adiecit, ut qui cis amnem substiterant, ruina glacierum in aquis oppressi sunt. Minimo numero fuerunt superstites. His de rebus missi sunt oratores ad Polonum, qui Turcae nomine Pretvicium cum commilitonibus suis ad necem exposcant, quod si minus liberit, CC. M. florenorum exigunt propter foedus violatum. Fuere quidam, qui dedendum hosti Pretvicium censerunt, ne saepius id controversiarum cum Turcis habere cogerentur, viaque hinc patefieret justo bello cum hoste tam potenti atque invicto. Iis pene totus conventus infensus fuit. Major pars et forsitan etiam melior nec Pretvicium strenuum bellatorem dedendum nec tantam pecuniam hosti dandam contenderunt, judicantes, virtutem et honestatem turpitudini esse anteponendam. Haec igitur sententia ab omnibus demum approbata est etiam si bellum erit cum Turca suscipiendum, Pretviciusque in publica Comitiorum celebritate mirifice laudatus est et in praetura confirmatus, quod hostium insultus tam saepe retundat, nec gentis Polonae dignitatem existimationemque patitur impune vexari. Rarus enim est annus, quo et bis et ter Tartaros Tauricae Chersonesi, quos nunc Praecopenses appellamus, in Polonorum fines excurrentes non aliqua clade afficiat, ob idque indignissime ferunt tam fortem et animosum virum tamdiu superesse, et praeesse finibus illis. Deus bone, quid sum-

mi et potentissimi principes in Turcam non possent, si privati quidam in quibusdam locis possint et praestant. Sed fortasse aliud agunt, ut certe agunt. Me tibi unice commendo, tibi que precor omnia optima. Vale. VII. Julii 1550. Viennae.

XLIII.

Csáki Mihálynak Verancsics Antal.

Antonius Wrancius Michaeli Chiacchio S.

Quod inprimis gratum tibi fore existimavi, hoc ^{1550 aug. 1.} primo loco scribo. Lis tuorum, de qua saepius jam ad me dedisti litteras, cupiens ejus cursum intelligere, quum fratrem, ad quem potissimum id officii pertineret, habeas in scribendo negligentissimum, die XXVIII. Julii per compositionem finem est consequuta. Praedia et possessiones cum colonis XV. dierum spatio a compositione inter partes ex aequo dividuntur. Proventus percepti hactenus concessi sunt possessoribus. Impensae vero ab utrisque factae, damnaque tum illata tum accepta remissa mutuo. Muleta tantum hominis interempti ex communi ambarum partium collatione persolvetur. Interfuere compositioni, quae coram Thoma Nadasdino comite comitatus Castriferrei facta est, Franciscus Bathianus, Andreas Ciorom, Andreas Tarnocius Praepositus Ciornensis, Ambrosius Beicius, Valentinus Feoldvariensis, Antonius Wrancius, et plerique alii hujus comitatus nobiles viri. Respirabis itaque jam ab hac XVI. an-

norum sollicitudine, nisi alia mox succedat, quae itidem molestiae sit allatura. Praedia enim ad Moriczhelium pertinentia, quae Ciacchios dumtaxat et Bizeredios propinquos tuos concernere intelligo, restant tuis in jus vocanda, nihil tamen aggredientur te inconsulto, et puto reliquorum bonorum recuperationem fore multo faciliorem, priorum et majorum palma obtenta. Familia tua tota est incolumis, et fratri tuo Stephano nata est filiola cui Annae nomen indidit. Secure igitur jam avarus potes esse, qui nunquam fueris, etiam si habitus es. Haec enim duae tantum neptes doctem a te postulabant, accessit nunc et tertia, ob cuius nativitatem puto te etiam priorum molestiam sensurum. Sed quid haec tuae industriae? Stephanum tuum jam non ut hortator, ut monitor, sed ut impulsor, summo interdum etiam stomacho adigo, ad te ut saepius scribat. Non induco tamen, surdior enim est dalmatico littore ac parum profecto tui similis. Excusat negligentiam suam parochorum et litteratorum hominum inopia, quum dicat, nimis se inter agrestes et rudes habitare. Quo fit, ut nequeam non illum parvi facere, et deferre apud te, ut reformes hominem ad ingenii tui formam.

Rex applicuit Augustam IIII. die Julii, Caesar VIII. cui frater ad tertium ab urbe lapidem processit obviam cum sex millibus equitum, et peditum tribus, pulcherrime et ditissime apparatis. Fuere cum Caesare ex principibus Philippus ejus filius, et Joannes Fridericus dux Saxoniae captivus, reliqui per intervalla succedebant. Augustani primum omnium coacti a Caesare restituerunt omnia templa, aras sacraque in pristinum morem, quem ex Martini Lutheri doctrina immutaverant. De annonae in ea urbe caritate

stupenda prope nunciant, eaque causa nondum ipse accinxi me ad sequendam aulam, exspectans subsidium ex sacerdotio Agriensi, quod quoniam serius mihi submittitur, nec enim facile in finibus Turcarum metu laborantibus pecunia comparatur, cogor ipsemet Agriam proficisci itinere expedito, nisi quid aliud intercesserit, quod me impediat. Sarvarinum autem veni consilii petendi gratia a Nadasdino, an omnino proficisci debeam, quum Agriae hoc anno totius praesentis belli ratio vertatur. Qui quidem Nadasdinus etsi multa essent propter quae dissuaderet, ne nunc tam periculosum iter assumerem, plura tamen existere, quibus adductus omnino consuluit, ut vadam. Nec te ea scire opus est. Verum non putes, moram me illic tracturum, quum aulam, velim nolim, sequi debeam, suadentibus et prope urgentibus iis, qui resurgenti fortunae meae student et consulunt. Proinde accepi a te non ita pridem plures epistolas diverso tempore, credoque quod omnes, quas dedisti ab eo die, quo te adversarium Heremitae ostendisti, hasque postremo hic Sarvarii, quibus mortem Michaelis Crovatae significabas, optabasque, quiddam conferre mecum non de trivio, si secure posses; idipsumque etiam alias, nisi me fallit memoria, studiose petieras, quod quidem eo magis scire desidero, quod tam saepius exegeris. Oro itaque te majorem in modum, ut, si citra omnem fucum fiduciam habes in amicitia mea, facias me, fideli nacto nuncio, certiozem, quidnam hoc sit, quod mecum velis tanto studio; quo rationibus tuis praesto adesse possim, si id sit, quod tua exigit necessitas. Salutem hic dixi omnibus tuo nomine, quibus jussisti. Nec defui tibi apud Nadasdinum, qui quidem jam cognoscit te ex me melius, et amat,

ut optasti. Omnes fere litteras quas ad me das, legendas illi porrigo, plurimumque delectatur voluntate tua erga se, quam ex his ipsis litteris tuis intelligit, certusque esse debes, quod officia tua non aversatur, cuius quidem jam et ingenium laudat, et modestiam constantiamque adversus odium et calumnias Heremitae in coelum effert; quodque nec ejus cedis tyrannidi, nec tot malorum concursu frangeris, magnum te aliquando in Hungaria, quae tibi patria est, futurum divinat. Ad eum, quod te magnopere hortor, debebis creberrimas litteras dare curareque summo studio, ut ex te potissimum semper aliquid de statu Mailadi cognati sui cognoscat, quandoquidem nullum ei praestatur gratius officium, quam quum de ipsius Mailadi vita atque carceribus scribatur, quem habet anima sua sane chariorem. Quapropter si saepius uteris secum hoc genere officii, profuturum tibi olim polliceor. Est nempe Nadasdinus quum vir probus, humanus et acceptorum memor, tum in hac factione nemini seu magnitudine seu liberalitate concedens, ne nunc de ejus prudentia, autoritate, potentia, et quod sit Principi charus, commemorem. Redeo ad tuas litteras, quibus prosequere tua duorum Conventuum pericula. Ad eas, puto, multis responderam, et quaedam mordentius de Heremita sub Antaei nomine, adeo ut animum meum de homine isto facinorosissimo facile potuisti cognoscere, si ad iram vires haberemus. Verum quoniam conditio nostra parva est ad afferendum quippiam momenti, utramvis partem complexi fuerimus, ego quoniam subduxi me a bellua ad optimum regem, tibi consulo, ut te tumultibus istis Heremitanis non immisceas totum, qui quidem aliis etsi non paucis jocus esse videantur, in ipsius tamen Heremitae cum

Regina et Petrovio concertatione multum mihi crede inest et publici et privati periculi, vereorque proculdubio, ne nunc demum lucta eorum in luctum tum posteritatis Johannis, tum in istius provinciae desinat eversionem, decipiaturque et Heremita altis suis consiliis, et Regina atque Petrovius Turcae pollicitationibus. Vale. Kalendis Augusti. 1550. Sarvarii.

XLIV.

Slavicusnak Verancsics Antal.

Antonius Wrancius Slavico suo S.

Pirata Dragut cognomento Rais, qui Barbaros- 1550. aug. 5.
sae successit in piratica, videtur nomen hoc tempore non exiguum latrociniis obtinuisse. Cum XXXV. partim triremibus partim biremibus omni militum machinarumque bellicarum apparatu instructis proximo Junio in Hispaniam irruerat, expositoque mature milite, oppidum quoddam Valentiae vicinum fertur vi recepissee et convertisse in praedam. Edita deinde vastitate, quacunque ingressus est, abegit in captivitatem multos homines. Late postremo caeteris afflictis, et terrore in ea regione dimisso, incolumis illaesusque, salvus etiam suis omnibus, ad classem evasit. Illinc in Majoricam insulam secunda navigatione atque uno spiritu statim transvectus, alio oppido positus est, cujus direptis opibus multisque mortalium caesis, vulneratis et in servitutem actis reversus est in Africam. Caesarianum praesidium quod erat in

Sicilia, Neapoli, Genuae et Barchinonae, quum per sese nullum illorum occurrere hosti fuerit ausum, nec omnes in unum tempore coire potuerint, frustra postea conatus suos habuerunt elapso hoste. Andreas Aurius, tutor maris inferi, et summus caesarianae classis imperator male audit, quod inter tot praesidia, et pene sub ejus oculis, tam exiguis fretus pirata viribus penetrarit in viscera Hispaniae, et fere nec animadversus cum praeda et victoria redierit. Quare assidue dicitur sollicitari Andreas a Caesare, ut Dragutum persequatur, et secum manus conserat. Turpe sibi esse, inquiens, si, quum sit tot regnorum ac gentium victor, tot hostium et rebellium domitor, domum suam ac peculiare et avitum regnum latrunculorum injuriis patere sinat, praesertim vicino et se et suae classis praeside, tot rebus saepe alias bene gestis claro. Impulsus igitur Andreas tam ardenti partim stimulo caesariae existimationis partim honoris proprii periculo, in quod insignis cujusdam viri invidia et contentione conjectus est, qui recepit se Dragutum in potestatem Caesaris deducturum, si tanti Andreas Aurius non fuisset, decrevit in omnem eventum et principis voluntati obtemperare, et jactantiae respondere invidi ac detractoris sui jam veteranae virtutis senex, et dux famae non incelebris, quamquam id fortasse discriminis libentius evitaret, ut jam magis quietis indigus quam concertationum militarium cupidus; tentaturum tamen ajunt fatigatum Dareta velut cum Entello fortunam. Idque summa jam in expectatione facinus omnium est. Sed is Andreas Aurius si forte tibi esset ignotus, civis initio fuit Genuensis summi ordinis, qui complexus usus bellicos, eminentiorem claritudinem recepit, praesertim dum

suis primum viribus deinde etiam publicis contendit mari cum Barbarossa pirata turcico, qui et ipse uno fere tempore cum ipso Andrea jecerat suae fortunae et magnitudinis fundamenta. Contendentibus itaque Andrea cum Barbarossa ambo inquam more piratico, publica fama fidem accepit, quod nullam in victoriam ambo, quasi ex condicto pugnabant, quum saepius alter alterum debellare potuisset, sed dedita opera mutuo deferentes et partientes invicem victorias, uterque ex alterutrius virtute privatae gloriae atque potentiae augendae studere deprehensus est. Unde et sugillatione vulgari tam noster is apud nos, quam ille apud suos perstrictus est, quod ambo dolo malo atque improbe creverint in amplitudinem. Quod eis tamen non offecit, quum postmodum bene jam et fortuna et aetate eorum matura, uterque apud suum caesarem principem locum tenuerit. Verum interim dum in hunc modum mari floreret Andreas, transierat in Gallias odio Caroli caesaris ad Franciscum regem. Ubi auctior effectus titulis, opibus et celebritate nominis, denuo ad Caesarem non sine nota levitatis defecit, ab eoque itidem ad longe majora provectus; tutela postremo maris Tyrrheni, supremoque classis suae imperio insignivit, quo etiam num jam ferme decrepitus magna cum authoritate potitur. Is idem, ut majorem habeas viri notitiam, superioribus annis eo bello, quod gestum est a Christianis 15. contra Turcas publicis et communibus auspiciis in Ambracio sinu, qui nunc Praevesa et Larta nuncupatur, patefacto consilio Barbarossae, ut homini vetere amicitia conjunctissimo, qui jam erat inclusus, quod de eo intercipiendo cum caeteris ducibus initum fuerat, evadendi etiam fecit potestatem non sine fraude christia

nae victoriae et commodi, relictæ in ipsius sinus faucibus classe Veneta, quæ se non segniter in prima acie hosti opposuerat, nihil dubitans de victoria. Habes Andream Aurium. Accipe jam de Draguto, in quo fovendo et conservando malis christiani nominis, simili ratione hujus ipsius Andreae enituit industria. Homo est afer, tenuique rerum suarum initio, atque fortuna non majore nixus quam duabus biremibus, quas id temporis vulgo Fustas appellamus, sustentatur; audacia tamen semper fuit memorabili, quod potissimum requirunt latrocinia, animoque ad pericula non inprompto. Igitur quum hac exili manu nimis temere exerceret piraticam, et mare inferum infestaret, incidit abhinc ferme decennio in Andream Aurium, ubi conserto secum praelio vicit, veniensque Dragut in ejus potestatem sex annos catenatus in illius trireme remigem egit. Concessa deinde redimendi sese latroni facultate, recepit ab eo tria milia aureorum nummum, et libertati restituit majore avaritia quam pietate. Sic liberatus barbarus et pirata saevissimus, minime exstitit segnis in ulciscenda servitute tam diuturna. Profectus enim inde in Africam, biremiumque circiter XVI. comparato numero, denuo mare ingreditur, quantoque effectus erat ex captivitate cautior, tanto majorem in eos induit crudelitatem, a quibus libertatem obtinuerat. Opibus enim ac viribus opinione omnium celerius auctus, ad memoratam tandem captivitatis suae ultionem appulit animum, et intra tempus admodum breve tantam reddidit in etrusca atque ligustica ora vastitatem, ut a Tiberini fluminis ostio ad Massiliam usque clausierit prope omnes portus, trepidarintque innumerae et insignes cum ipsa Roma civitates; neve aliâ damna, quæ in-

tulit illis gentibus, enumerem, XXV. M. hominum ajunt in eis regionibus fuisse desiderata, quos partim captivitas latronis exhaustit, partim ferrum absumpsit. Proinde annis proximis faciebat stipendia apud Magnum Turcam Sulimanum, facileque erat evasurus in summum ejus classis moderatorem, si in officio perstitisset. Verum tractus ardore vindictae, quam sciebat se non posse rite proseguere, propter quinquennales inducias, quae sunt id temporis cum Turca regi nostro, si sui juris non fuisset, recessit a fide Solimani, et ad haec latrocinia studium convertit. Hinc igitur Dragut Reis magnus est, hinc piratarum nostra tempestate primus habetur, et alioqui hac etiam ratione non contemnendae potentiae judicandus est, qui Valentiae urbi ex primariis Hispaniarum non ultimae ausus sit tam propinquus insultare. Unde et oratorem suum ferunt nunc esse apud Solimanum, quod Constantinopoli scribitur, secumque agitur de reducendo iterum ad Tyranni munia, remque omnino quaesitam finem sortituram; quo simili modo existimationem Draguti apparet esse in Turcia etiam primo loco. De qua re ipse quoque nihil dubito, credoque quod abeunte Turca in Persiam, relictus fuerit in nostro mari caesari nostro lacessendo, commento Turcico, ne usquequaque conquiesceret, donec ille a Persa rediisset. Cui conjecturae vel haec ipsa facit indicium reconciliatio, rara omnino cum privatis hominibus summis principibus. — Sed jam concludam epistolam. Ego ad te semper do aliquid rerum novarum, tu ad me aut nihil unquam, aut saltem nonnihil aliquando, idque ex trivio desumptum, adeo secretus es et elinguis consiliarius, puto, quod novus sis, vel quod Persas imitari velis inter Cares. Vale. V. Augusti. 1550. Sarvarii.

XLV.

Hasenberg Jánosnak Verancsics Antal.

Antonius Wrancius Joanni Hasenbergio S.

1550. sept. 2.

Quum tuae literae allatae sunt, aberam Vienna, et quamquam studio Oppolitani nostri mature eas habuerim, nulla tamen idonea rescribendi data est facultas. Profectus eram ad Thomam Nadasdinum, privatae rei non parvae causa, apud quem exegi mensem integrum. Inde reversus Viennam, tertianis febribus duos et XX dies torsus, et curatione pro medicorum consiliis summa diligentia usus, tandem convalui. Jam stomachum jam vires instauro, pauloque pristinae habitudini restitutus, Agriam proficiscar, quoniam parvo succinctus peculio, ac bursa quotidiano sumptuum convitio divexata, Viennensis fori voraginem non sustineo. Quod itaque ad humanissimas litteras tuas attinet, curae tibi esse res atque honores meos, meque ita amari abs te, ut scribis, novum hoc apud me jam non habeo. Et ne commemorem, quidnam hoc tempore rogatus tam pro commodo, quam pro dignitate mea egeris apud Olahum meum antistitem, quae ad me dudum summa cum tuae magnitudinis commendatione perscripta sunt, certe jam saepe alias audiui, quanti me ultro feceris apud multos, quaque oratione mihi et morum et virtutum pene omnium praeconia tribueris. Quae quidem omnia eo ex ampliore quodam, ut ita dicam, benevolentiae tabernaculo profecta esse dignoscuntur, quod apud cla-

ros, quod apud graves, quod denique apud eos depraedicaris, a quibus fortunae feliciores largiuntur.*) Haec praestantissimis egere phaleris gratiarum, quis non videt? Campus enim officiorum tuorum, tam ingens tam late patens mihi offusus est, ut vel mea ipsius confessione debeam tibi quam maximas. Verum ne aspiremus ad ea, quae nostrae opis non sunt. Tibi ego, ut amicus modicus, non tamen sordidus, nec incivilis, peramanter, mi Hasenberge, habeo gratias pro his omnibus, quibus me apud episcopum meum promoveris. Cui etiam, siquid aliquando ad referendum facultatis consequar, laetius, libentiusque faciam nihil, quam quo me quam gratissimum tibi fuisse declarem. Sed de sacerdotio Strigoniensi non est cur sollicitemur, aut vel de animo vel de liberalitate praesulis mei erga me dubitemus. Magno quidem est argumento, esse me in ejus gratia, quod ab se non dimittit, dum Agriensem mavult, quam Strigoniensem incolam. Ego vero, utcunque haec mea petitio interpretata est, tantum dico abesse, ut id suspicionis de me haberi debeat, ut ipse archiepiscopatus Strigoniensis me ab eo non divelleret. Non est sane gratitudo ulla, quae Olahi et Nadasdini beneficium in meo casu collatum exaequare posset. Nam fortunam homini dare, vidimus etiam mediocres posse. Fit hoc saepe non difficile, quod casus atque errores plerumque fortunam comitantur. At eam ab ultima, ut sic dicam, Thule, nunc etiam maxime fugientem revocare, collapsoque reddere, hoc opus hic labor est. Verum quicquid nobis Strigonii ambiebatur, fiebat propinqui-

*) Igy, a deponens igének szenvedő hajlításával, mi nála gyakran fordul elő, s mit Katona ehelyt is módosított. Egyébiránt, largió-t is találni a classicusoknál.

tate commodi; sed postquam, ut velimus, non succedit, Deo rem nostram committamus, in quo sitae sunt sortes nostrae. De Oppolitano quod scribis. Diu sane jam et antequam tuas acceperissem, summa diligentia conatus sum illum ab aestu suae profectionis remove, omnia ea recensendo in dissuasione, quae tu ad eum et ad me perscripsisti. Cognoveram enim dudum, quantum id ei per communem antistitem licuisset. Ideo quum viderem, omnino decrevisse proficisci, quodque diceret, mecum velle, nihil rationum praetermisi, quibus eum visus sum posse dimovere a proposito. Nec aliud, ut judico, illum detinuit, quam mea serior profectio. Nolebat enim cum alio. At ego cognito, quod Augustam ipse hoc tempore non essem visurus, quanquam ei deinceps molestius non obstiterim, ducturus tamen illum nullo pacto eram, quum fortunae ipsius gratia, tum honoris mei periculo. Facile enim me et impudentiae Olahus insimulasset, si id eo inscio; et fortasse etiam sempiterna indignatione repulisset, quod pro parente nollem. Hanc cantilenam Oppolitano saepe decantavi subinde monens, ne provincia destitisset omnium illi apud herum suum honestissima; et si quo animo alio inclinaret, mandatum postularet, suo affectui non obtemperaret. Sed quid? scis motus juveniles, scis desideria. Ea tamen illius, etsi sua laude non careant, quoniam lucem litterarum ornamentis affectet, nihilominus quantopere deliquisset, Augustam inexpectatus veniendo, plane jam novit etiam ipse, et accipit animo aequiore monita nostra. De oratiuncula autem et versiculis ejus nihil nunc; sed supra aetatem omnia. Nuper intra diem VIII. plura quam III. M. hexametrorum fecit Sigismundo Hermenstano*) equiti, et viro nobilissi-

*) Herberstein.

mo, quae, qui non viderunt titulum, majoris cujusdam poetae, quam Oppolitani esse judicarunt. Juvenem itaque tibi unice commendo, dignumque offero, cui parens esse velis. De novis Augustensibus habeo gratiam. Ea, uti ascripseras, cum tuis amicis communicata sunt opera Oppolitani. De languore vero Comitiorum non laetus audio. Nam hic multa multi. Sed certe jam deberet principibus Germanis sat esse domesticis Martis incommodorum. O quanta felicitas regnorum est, quanta quies, quanta unitas, quantus consensus, quantae vires, quanta diuturnitas, quibus unus imperat! Exemplorum plenae sunt historiae. Nostra etiam aetas videt. Sed qui numero imperantium gavisii sunt, vel soli succurrant Graeci, quorum civitates dum singulae imperium sibi vendicant, quam misere omnes et imperium et libertatem amisere. At utinam ii jam tandem aliquando desinerent tumultuare, et formam imperii, confirmato sibi imperatore, assumerent. Caeterum et securitate illi facta undique, optimo, inquam, et fortissimo et fortunatissimo caesari, sinerent eum a Turcis orbem vindicare, quibus delendis vix orbis satis est. Carolus solus datus erat, nisi gloriae Dei et ejus triumpho invideretur, maleque quidam optarent generi christiano. De Belo regulo africano a Serypho pulso. Enimvero placet in eum Caesaris pietas. Sed si tale momentum adjunctum est ejus fortunae, quale erat Solimano in Joanne olim, et nunc est in filio, consulerem utendum occasione, ductuque Beli tentarem Africam. Sin minus, equidem nollem caesarem optimum et prudentissimum in Beli levitate experiri, quod in Elcasso regis Persarum fratre non sine et damno et pudore expertus est Solimanus. Nam et votum dicit nuncupasse tam potens

immo tam omnipotens Barbarus, nunquam se posthac bellum in Persiam illaturum. O quanto laudabilius erat nunquam cum Persa pugnasse, quam id voti edidisse, quod specie confessionis non caruit, victorem Persam exstitisse. Sed absit hoc a magnitudine nostri caesaris. Alioqui afflictus princeps non est deserendus, verum timeatur punica fides vel nunc maxime conjuncta turcicae, aliaque via de Africa cogitur. Nova hinc nulla possum, nisi velim solita de Transsylvania. Adhuc nugantur illi duo archontes de alieno, et ita nunc demum serio, ut hactenus nunquam magis. Feruntur adversis signis in castra copias eduxisse, et rem amborum ad praelium spectare. Quid futurum? excidium videlicet, quod ultro nobilissimae illi provinciae, fatis etiam, uti credo, adversantibus, accersitur perditorum duorum audacia. Sed de his plura Olaho antistiti meo. Ad te nequeo fusius, quia jam in verbositatem desiit epistola, vereorque, ne quam tui partem dudum laeserim, quamquam aliqui jure etiam debui esse hac epistola longior, ut usuram consuetudinis nostrae tam diu intermissae resarcirem. Mea officia tibi offero, me ipsum commendo, tibi bene precor. Nauseae episcopo Viennensi, si istic est, dic mea obsequia. Vale. 2. Septembri 1550. Viennae.

XLVI.

Oláh Miklós egri püspöknek Verancsics Antal.

Antonius Wrancius Nicolao Olaho episcopo Agriensi Sal.

Quod jam a duobus ferme mensibus nihil scri- ^{1550. sept. 2.}
pserim, veniam dabis. Acceptis enim a vicario tuo
litteris, quibus de installatione duntaxat mea, et de
cura quartarum, vinearum, molarumque mearum
commissa adolescenti meo rescribebat, cui minime
volueram, ut inhabili tanto oneri: de spe pecuniae,
quam itineri Augustano deputaveram, ne litteram qui-
dem. Sic inita voluntate conferendi me Agriam, pro-
fectus sum, ut par erat, ad Nadasdinum consilii gra-
tia. Qui dum eundum esse consulit jubetque opperiri
saginem equorum meorum, qui ad id tempus in pratis
apud eum fuerant, detinuit me sextilem totum, pan-
cratice tractando in Sarvarinis hortis. Redeunti inde
febris tertiana occurrit in itinere meque Viennam us-
que deduxit. Ubi datis curationi XXII. diebus, resti-
tutus sum pristinae valetudini. Nunc jam hoc triduo
Agriam cogito, ut ipsemet prospiciam rebus meis.
Nec est, ut ingenue dicam, quod de amico conquerar.
Quis enim adeo vel pius vel sanctus est, qui pecunia
his temporibus facile gratificetur, aut subveniat ami-
citiis, quum undique insultet vicinus hostis, et metum
de mutandis sedibus quotidie injiciat? Exempla hu-
jus rei quilibet ex se petat, et in alium aequior erit.

Igitur quicquid est hic mihi incommodi, vicario tuo certe non invitus condonavi. Illud tamen gravius habet, quod in celebritate et frequentia tantorum principum tibi non inserviverim, nec viderim Carolum imperatorem, quo me etiam infortunatiorem puto. At forsán dabitur postea amplior huic desiderio commoditas, et fruemur ejus aspectu luculentius. Caeterum quod ad me perscripseris de sollicitudine et studio tuo ad nos redeundi, clarissimo Principe annuente, meque monueris, te ut Viennae opperiar, humanitati tuae, mitissime praesul, atque amorí, quo es in me, ascribo, agoque tibi et habeo ingentes gratias, faceremque, quod mones, longe certe libentius quam quod institui. Quis enim per impacata loca, perque militum stationes homo aris magis quam armis assuetus libens vagetur? Verum impensis Augustanae caritati, quam ferunt esse immensam, non sufficio. Alioqui expeditissime Agriam proficiscar, eoque animo, ut constitutis rebus meis, pecuniaque aliqua comparata, ad faustissimum reditum tuum Viennam regrediar quam maturrime, Rem nihilominus meam omnem in tuam voluntatem rejicio. Nadasdinus quoque alter meus parens post te, pertulit nonnihil adversae valetudinis ex fluxu, quod ei a capite in tergum descenderat, malumque prope in pleurisi^m eruperat. Mature tamen occursum est, jamque, ut accepi, comsurrexit. De rebus novis referam audita. In Transsylvania dicunt Heremitam et Petrovium mutuo incensis animis in castra cum expeditis copiis descendisse. Huic favere Turcas et Valacchos ambos jussu Solymani; illi adhaerere Transsylvanos, intra-tibiscanam nobilitatem, et quotidie Varadini ac Debrecenii delectus fieri. Proximo conventu missi erant ex Turcia in alterutrum ciansi, eo-

que controversiarum ventum est, ut Heremitanus palam declamitarit: Petrovianum mentitum esse ciausum, nihilque de ejus legatione vel caesari vel passis constare. Hic contra: verum se et caesarianum esse ciausum affirmare, nihil praeterea jactare in adversarium injuriarum, et subinde dicere, caesarianum sese esse nuncium, a quocunque ille venisset nihil sibi curae esse, et Solymanum ita esse potentem, ita regnorum abundantem, ut uno duntaxat nuncio non uteretur, multos quotidie ad diversas gentes ablegare. Sic Transsylvaniae Amphytrionem Plautinum egisse de mentito Sosia. Sed o nostrorum coecitatem et stupiditatem plus quam bubalinam, ne de avaritia quorundam gravius commemorem, qui patriae libertatem parvo aeri subdiderint, seque in bubalorum morem annulo naribus indito huc illuc rapi patiuntur. De Transsylvanis miseris loquor, qui et vident et palpant pestes suas, et scientes quod his evertentur, ferunt eas nec volunt rebus suis consulere, recentibusque et domesticis uti exemplis, quorum referam unum. Proximis annis Mailadus noster, homo et vita et libertate non indignus, hoc prope modo contendebat cum Balthasare Bornemisza in eadem Transsylvania. Sed ille dudum jam in lucem et optimatum ordinem relatus virtute duce, hic Joannis regni licentia rapinisque paulo supra gregarium militem potitus nominibus, et inter veteranos Joannis habitus, cura Heremitae opponitur conatibus Mailadi, missusque Buda in Transsylvaniam cum imperio sub Capitanei titulo, mox ambo eo animos ambitionis erexerunt, ut alter principatum provinciae usurpare, alter voivodatum appetere non dubitarit. Verum Mailadus exemplo divi Julii, qui legiones dimittere aemulorum conjuratione non au-

debat, justiore causa monebatur. Aut enim sic superanda erat vetus Heremitae hostilitas, provinciaeque regi christiano conservanda, aut evitanda indignitas, ne homini obscuro, et omni pietate atque humanitate carenti casu concedere cogeretur, quum jam et rerum omnium a Joannis morte potiri anhelabat. Balthasar sub ministri imagine, et in temporaria praefectura constitutus, rapta occasione ex periculo Budae, quae obsidione primum germanica, deinde perfidia turcica excepta erat, speravit etiam sese posse esse aliquid. Sic inito spiritu perpetuum voivodinatum consequendi, intendit omnes vires, ut clandestinis praxibus tum fortunam tum auspicia Heremitae in Transsylvania occuparet. Tanta rei moles neutri sine Turcae patrocinio poterat succedere. Ad utrumque itaque a passis caesaris nomine missi sunt ciansi utriusque voluntati graphice accomodati, actaque per Transsylvanos vel me praesente hic illic crebra comitia, mutuoque inter sese adversantia, distracta in diversum nobilitas, populi, quocunque contenditibus libebat, in effascinatorum modum circumducti. Quid demum actum! Delusus est Bornemisza calliditate Heremitae, et a spe voivodatus pecunia abductus. Mailadus Turcae et Moldavi perfidia in captivitatem tractus. Sed an eadem tragoedia nunc quoque agatur, quae tunc, vides. Utinam non eundem finem sortiatur. De vicinis nostris aliae sunt rationes. Mire ludunt in Zolnoccho erigendo. Modo intendunt sui metum, modo remittunt. Nec aliud puto, faciunt, quam, ut nos distineant ab his providendis, quibus eis et resistere et officere possemus. Atsi cui compertum est, quantum eis credi debeat, ego ne mininum quidem dicerem, etenim nec suam Turcae fidem habent, nec alienae

quicquam tribuunt, et qui se ab iis amicitia, foederibus atque pecunia tutos fore existimant, oleum et operam perdunt. Ingratum est, parum est, vile est, et contemnitur quicquid porrexeris, nisi et rapinas et captivitates in tuo fieri patieris. Amicitiam si secum collis, timeri se certo, non amari ait, et sic fallere foederatum, ne fidei quidem jacturam se facere arbitratur. Verbose de his ad te quam fortasse decuisset. Nequeo tamen non dilatare quasi dolore incensus, quum in pericula Transsylvaniae incido. Igitur te magnopere peto, ut ignoscas mihi, tibi ac similibus tui de his scribendum esse censeas, non iis, qui ad nulla mortalium commoda nati sunt, nec publicorum cura tanguntur. De domo tua, quo in statu sint nova ejus aedificia, apparatus, cultus, pictura, ornamenta, quoniam adhuc ipse lectum urgeo, scribere nihil possum, ut quae non viderim. Hortatus tamen sum Georgium Bonam et Oppolitanum tuos, ut eo fungantur officio, quo prae caeteris omnibus tibi hoc tempore maxime gratificari possunt, quod aliud hinc nihil nunc magis scire desideras. Non praeteribo etiam de petitione sacerdotii Strigoniensis. Te etiam atque etiam rogo, mi praesul, ne velis gravate id a me, nescio, insatiabilitatis ne, an ambitionis, an quiddam tertium dicam, accipere, quoniam certe et parvo potui semper esse contentus, et praesens fortuna mea finem jam fecit meis cupiditatibus. Tantum autem abest, ut illud tertium in me suspectum esse possit, ut monarchatu etiam quopiam maximo divelli abs te nunquam velim, immo insuper ita tibi inhaerere atque inniti perpetuo decrevi, ut me habeas semper pedisequum obsequentissimum. Quicquid autem visus sum ambire Strigonii, alliciebar propinqui commodi facultate, quo tibi

expeditius inservire potuissem, nec emissem alioqui e manu Agriensem meam fortunam primigeniam, eo-que etiam haberem charissimam, donantis persona contemplata. Vale. 2. Septembris 1550. Viennae.

XLVII.

Armpruster Kristófnak Verancsics Antal.

Antonius Wrancius Christophoro Arumprusto S.

1550. sept. 2

Nullum tuum erga me officium est, eoque magis, quod probe sciam, quanto muneri praesis, quantis rerum occupationibus apud antistitem nostrum distine-
ris. Quare non erat opus excusatione tam accurata, quod serius ad me scripseris Augusta. Utcunque fe-
ceris, id abs te non laetanter modo, sed etiam per-
amanter accipio, quoniam certe scio, me a te unice di-
ligi et aestimari longe pluris, quam pro mediocritate
et fortuna mea. Ego si cupit animus, gratias tibi re-
ferre nequivero, vicissim diligo, ut jam dudum diligo,
et supplebo officiis quod facultati defuerit. Verum per-
acta et absoluta jam causa tua, en ipse quoque eodem
pene laboro crimine. Dudum enim acceptis litteris
tuis, mihi quidem certe jucundissimis, vix nunc tan-
dem rescribo. Quoniam tamen hac parte nec antisti-
ti nostro, nec Joanni Hasenbergio doctissimo viro
satisfecerim, causa impeditus non exigua, spero me
etiam abs te veniam relaturum, ut ab iis non diffidam.
Profectus eram ad Nadasdinum, inde rediens Vien-
nam, in febrim incidi, postea valetudine recuperata,

iter Agriam coepi adornare. Et dum indies commeatum a Nadasdino Viennam regrediendi opperior, differoque rescriptionem ad otium, cupiens, ad te accuratius scribere, ut ad amicos soleo, qui longius a me degunt: ultra quam fuit par, defui officio. Habes silentii mei rationem, habes tui veniam. De hospitii Augustae mihi comparandi cura, et quidem toties iterata, habeo gratiam, de novis item; sed de nostris vellem ego quidem ad te laetiora, praesertim, quum et patria et domus tua gravi periculo conflictetur. Afferunt crebri nuncii Heremitam cum Petrovio Marte intestino contendere, sumpsisseque arma utrumque in mutuam perniciem, illumque esse Meggiessii cum suo milite, hunc Albae Giulae, adessequae Heremitaе Transsylvanos et nobilitatem intratibiscanam; Petrovio Rascianos, affuturos et Turcas et Valacchos ambos. Addunt etiam, venisse ad Transsylvanos Turcae nuncium, qui jubebat deserere Heremitam, sequi Petrovium; Pupillum Belgradum mitti, arces Bechie et Bechkerek reddi, tributum augeri, et in qualibet civitate Saxonum hominem caesarianum recipi. Respondisse Transsylvanos omnia fortia atque aliena, si consulte modo. Malle se, occisis prius domi uxoribus et liberis, in aciem unam prodire, et omnem fortunam, omne periculum experiri, quam ea Turcae imperata facere. Nunciumque cum his rediisse. Haec, ut relata sunt nobis, sic ad te perscribuntur. Puto non omnia esse ex Apolline, magna tamen ex parte vera esse credito. Quod Augustana frigent comitia valde doleo, magis tamen, quod nos algemus, et jam in malis ob-rigescimus. Verum Deo omnia, qui sua providentia semper melius prospicit rebus humanis, quam ipsi nos, quorum consiliis nunquam non adhaeret comes

malitia. Hasenbergio me commendes studio singulari et de meliore nota. Dignus est, edepol, qui tanti regis et mox caesaris liberos erudiat. Quantum viro afficiar, quantum tribuo, quantum eundem amem et colam, et colendum esse judicem, eloqui ipse non valeo. Joanni Albilaco et Matthaeo Zerdahelio dic salutem meo nomine. Officia vero sic offeras, ut intelligant eos me et amare et magnificere. Vale. 2. Septembris 1550. Viennae.

XLVIII.

Csáki Mihálynek Verancsics Antal.

Antonius Wrancius Michaeli Cicacchio S.

1550. sept. 18.

Fama tumultuum vestrorum totus mundus hoc tempore occupatur. Videntur enim in Transsylvania Punica bella geri, utinam non Thebana aut Trojana. Sed, dii boni, quid ab utroque isto Paride vestro intempestivius? Equidem ego Transsylvaniam haud ita pridem eluxeram, mirorque unde ei adhuc tanti spiritus, tanta audacia, tantus armorum ardor? Aut animae instar e corpore excedentis, ultimo excidio acrius conflictatur? Tibi ego, mi Ciacchi, metuo, ne isto malorum immo furiarum aestu involvaris. Quare cures, oro, ut absis a periculo. Aberis autem facile, si Heremitam devitabis. Ista autem quae imminent mala Transsylvanis, nonne saepe ipse in conventibus, saepius in consiliis, et pene quotidie in privatis procerum congressibus praedixerim? Nonne mea consi-

lia, mei conatus, mea denique dicta omnia in eo ver-
tebantur, ut Regina authoritate rerum non spoliare-
tur, non omnia regni jura non tota dominatio in unum
conferretur? Episcopi persona existeret, quilibet opti-
matum dignitate et officio aliquo insigniretur, ex iis-
que conflaretur consilium, quod vestrum istud interre-
gnum moderaretur, donec meliora fata certiores viam
rerum ostendissent. Heremitam autem fatalem fore
Transsylvaniae, vobisque omnibus, ut fuit Budae, si
ejus ambitionis ingluviem satiassetis dignitatibus at-
que potentia, nonne semper in ore habui? Sed haec
frustra omnia, mihi non prius credita, quam com-
muni ruina fuerint comprobata. At haec fortasse da-
bis privato dolori; licet, feram, non contendo. Quis e-
nim aequo animo unquam hostem laudavit? Verum per
Deum, nihil minus nunc recordor, quam ejus offensa-
rum. Quod enim perditum est, perditum duco. Video
tamen nimis prope ea adesse, quae paulo ante longe
ostendebam. Faxit Deus, ut haec omnia secus eve-
niant, nobilissimaque provincia Transsylvania Hun-
gariae reliquiis non adimatur, quae vel sola adhuc, a-
demptis suis partibus, facile suo tempore poterit esse
adjumento. Te ego plurimum peto, ut, si vacabit, res
istas vestras omnes ab initio ad me historice perscri-
bas, facturus mihi nihil gratius. Interim vero si quis
te casus impulerit, quem hosti tuo imprecor, fac ad me
recta. Hic tibi domus, hic res, hic vetus erit amicus.
De nostris rebus quid ascribam? Zolnocchum ma-
gnis conflatis copiis duce comite Nicolao Salmo erigi-
mus munimusque contra Turcarum vim summa vi at-
que industria. Scis eum limitem eo loci esse, quo jam
et Tibiscus fluvius et Agria omni sollicitudine care-
bunt. Hoc castello constituto et firmato praesidiis eae-

dem copiae ferent Heremitae suppetias, quamquam non affirmo, quia nondum constitit tantae rei deliberatio, multorum tamen opinione ambigitur. Vobis ego adhuc dico cavere a nimia fiducia in Turcas repnenda. Casum Budae et Mailadi et Valentini Turci et multorum veterum prae oculis habetote. Reliqua quoque hiis consiliis firmate, quae vobis nec animorum nec conatum vestrorum afferant poenitudinem, et a christiano populo occidionem et servitutem propulsetis. Vale. XIII. Septembris 1550. Agriae.

XLIX.

Oláh Miklósnak Verancsics Antal.

Antonius Wrancius Nicolao Olaho antistiti suo S.

1550 sept. 26.

Scito me jam Agriam incolumem pervenisse nulloque vel periculo itineris vexatum vel incommodo. Ubi a praefectis tuis humaniter, a canonicis fraterne exceptus archidiaconatum IIII. id. Sept. feliciter occupavi. Domum meam inveni desolatam, hiantem ruinis, possessam milite, oppressamque fere ad culmen fimo equino. Cui purgandae instaurandaeque addixi non mediocrem et curam et pecuniam, multis aliis de suo et de crastino desperantibus. Proventus habeo satis tennes propter belli vicinitatem, quo non Agriensis tractus solum, sed jam, ut videmus, et Hungaria et Transsylvania tota adeo succensa est, ut induciae quae quinquennales erant, vix legitimum finem assequantur. Porro et hic et ubique per omnes

comitatus tanto spiritu omnis ordo, omnis status, omnis conditio, omnis aetas, omne denique pectus in arma ruit et manus hostem petit, ut hujus motus initia maximum quoddam bellum in Turcas polliceri videantur. Nos tamen dabimus operam omni studio atque industria, ut et belli pericula evitemus, et alimentis non careamus. Et si copia defuerit, ad parsimoniam accurremus. Sed de privatis alias. Vocor ad publica, quae nunc ubique ab imo late commoventur. Castellum Zolnocchi, quod dudum etiam praeripiendum erat hostibus, jam exstructum et firmatum sic habemus, ut vim etiam non exiguam sustinere posset. Comes Salmus summus hujus expeditionis dux, nudius tertius habito colloquio cum Andrea Bathoreo in Abád, pago ad Tibiscum posito, profectus est Zolnocchum, ut ei praeficiat Joannem Balassam insignem juvenem, imponatque praesidia et munitiones necessarias cum machinis. Ex parte Turcarum nulli adhuc motus audiuntur, mirandumque est, quod sileant. His hic bene constitutis, quo signa illaturus est Comes, sunt enim tum ei tum Bathoreo, alteri cis, alteri citra flumen ad X. ferme M. hominum, non facile intelligo, res enim secretissime et sine ullo tumultu geritur, tanta et in Comite elucet solertia et scientia rei militaris, tanto et caeteri omnes consensu in rem bene gerendam incubuerunt. Et quanquam vox multitudinis est, quod Heremitae suppetias ibitur, mihi tamen quoniam ignotum est consilium, non audeo quicquam scribere, quum alioqui omnem expeditionis hujus rationem tibi vel ab ipso initio constituisse certum est. De viribus Heremitae omnia maxima et plena spei bonae afferuntur. Dicitur habere XXV. M. hominum copias, sedereque Meggiessii, ac silere non sine admiratione

multorum. Nec id ex metu aut ignavia perhibent illum facere, sed exspectatione regii subsidii, cupientem quum integris tum auctis viribus rem aggredi atque perficere, quam hactenus tanto artificio fabricavit. Ego jam illi nequeo non bene velle, postquam sic induxit animum, ut Christianae reipublicae opera ejus consulatur. Faxit Deus, ut succedat illi, si probe agit, cui si omnino succurrendum erit, succurratur justis auxiliis, quo et Transsylvani rem secure amplecti audeant, quia feruntur id ipsum opperiri. dum adhuc neutri parti accesserunt, (solito enim agunt ingenio, ut etiam Gritto casu egerunt), deturque opera, ut ea provincia fractis seditiosorum conatibus, non obtineri solum, sed etiam possessione occupari tenerique, et imposterum quicquid alicunde ingruerit, paucis castellis in quibusdam semitis constitutis fortiter tueri possit. Rem Petrovii omnes, qui inde veniunt, magis quam Heremitae infirmant, facileque ita esse credo, quod et avaritia laboret, et audere raro solet, nullius magnitudinis appetens. Fertur aliud nihil agere, quam et dies et vires terere in castella quaedam, quae etiam si adimantur, parum sint et illi allatura emolumenti, et Heremitae detrimenti. Vincium deditione accepit, Cianadinum igne vastavit, ab arce repulsus est. Nec Vincii accessionem incruenta victoria obtinuit. Paulus cognomento Bank, cui Heremita Saxosabesum crediderat, facta in eos eruptione, qui Vincium receperant, non exigua caede afficit; ipse vulneratus abcessit. Quid deinceps futurum sit, Deus novit et Rhamnusia Adrastia, quae malos male perdet. Omnino tamen postquam in tantos motus conjecta est Transsylvania, cujus causa etiam reliquiis Hungariae non parum fortasse obo-

rietur sollicitudinis, maturandum esse censerem in recipienda et firmanda validis praesidiis ea provincia, ne postea duobus aut etiam pluribus in tantae molis tantique momenti locis laboretur. Haec mea est de his sententia. Vale. XXVI. Septembris 1550. Agriae.

L.

Nádasdy Tamásnak Verancsics Antal.

Antonius Wrancius Thomae Nadasdino S.

Sept. 96.

Castellum Zolnok a X. die feliciter erigitur jamque firmatum ita est, ut sustinere hostium vim non exiguum possit. Reliquo operi summa sedulitate et cura insistitur, brevique ad institutam perfectionem deducetur. Nunc praesidiariorum habitacula construuntur et fossa e Tibisco fluvio in Zayvam amnem ducitur, ut aquis quoque quaqua versus circumplexum munitius reddatur. Stephanus Dobo, Franciscus Zay, et Bernardus Aldanus dux Hispanorum militum ac magister, ut vocant, campi, praecipui in opere curatores. Gentes, quae et hic sunt et Zolnocchi, magno sunt numero, pluresque indies conveniunt. Ex primoribus cum comite Nicolao Salmo, summo expeditionis hujus duce, ii sunt: Augustinus Sbardelatus episcopus Vaciensis, Franciscus Bebecchus, Stephanus Lossoncius, Franciscus Perennius, et Erasmus Teifellus. Primi huc appulere XIII. hujus mensis Comes, Vaciensis et Teifellus; caeteri postea, et seorsum quilibet. Inde habito rei gerendae consilio XXV. die Co-

mes cum Lossoncio et Teifello juncta sibi copiarum parte et aliquot machinis profectus est, ut ad Tibiscum conveniat cum Andrea Bathoreo, qui ad Abád pagum castra habet et tuetur Zolnocchum exstruentes. Hic procomes relictus est Vaciensis; episcopo non huzarones nostri solum, sed et Hispani et nobilitas comitatum parent, resque, quantum judicio complecti possum, tam a duce quam a militibus summa solertia et vigilantia geritur. Zolnoccho praeficietur Joannes Balassa, et Franciscus cognomento Zay. Iis parebunt praesidia, iis machinarum munitionumque et demum totius castelli cura et conservatio incumbet. Sed de Zay nihil loquor; ignoro hominem. At de Balassa laudo equidem judicium, nisi juvenis repente in primam aciem sit productus. Neuter videtur multis probari. Verum felix ac faustum sit quicquid aggredimur, et faxit Deus, ut hi conatus tam regi quam regno ex sententia succedant. Constituto Zolnoccho, quo moturae sunt signa tantae copiae, quae certe magnae sunt et pene incredibiles, quod tam repente tamque silenter coactae sint, prorsus non intelligo. Et quum alii aliud dicant, multi quidem asserunt, quod Heremita subsidio mittentur. Quod quoniam mihi diligenter etiam inquirenti nondum constitit, nihil scribo affirmanter. Illud solum dixerim, quod si revera jam noster est Heremita et Christianitati navaturus est operam tam memorabilem, eundumque sit ei suppetias, de celeritate imprimis statuatur, deinde considerato gentis vetere partim ingenio, partim praesenti necessitate, qua, velint nolint, cogentur etiam imposterum tantam inter malorum varietatem nonnunquam leves esse, et in Protei morem pro temporum statu et fortuna regni

modo hanc, modo illam personam induere, ut conser-
 ventur, tantae copiae illi summittantur, quantis et po-
 puli illi adhaerere non dubitabunt, et eam provinciam,
 fractis adversariorum conatibus, non solum obtinere,
 sed et possidere et in reliquum tempus tenere atque
 tueri possint, cogitantes, Turcam non ita facile illam
 provinciam cuiuspiam permissurum, et Rascianorum
 animos in defendenda Joannis prole, Petrovio duce
 tantos esse, ut Mahometto etiam dedere sese non ve-
 rebuntur, quo vel solam hoc dominatore ditionem, quam
 possident, nobilitati hungaricae a Joanne rege ere-
 ptam, retinere possint. Igitur si exiguae vires mitte-
 rentur, illud forte fortuna sequeretur, quod eo tempo-
 re, quo Moldaviam Solimano subjugante, missae erant
 Joanni longe minores copiae, quam pro pacis cum eo
 factae conditionibus. Visa enim et paucitate subsidii,
 et ingenti potentia hosti nimis jam propinqua, siqui-
 dem, quod quaternis aut quinis castris sine dubio po-
 terat in Transsylvaniam penetrare: quid egit? id, quod
 non ausus in Turcam animos prosequi, magnifice ad
 hoc momentum ostentatos, denuo pecunia et majore
 subjectione rediit secum in gratiam, nec factam pa-
 cem cum adversario, uti ex pacto in calce anni debue-
 rat, promulgavit. Sed in his ipse non ago consiliarium,
 tecum duntaxat pro mea in principem nostrum fide
 colloquor, qui non ignoras, quo de rebus ejus animo
 saepe soleam disserere. De Transsylvanis rebus id
 habemus. Ajunt Petrovianos oppugnare Cianadinum,
 Braniczcam, Vincium et quicquid est ejusmodi Here-
 mitae castellorum, Vinciumque jam ultro, nulla vi
 machinarum accepta, deditum, Braniczcam expugna-
 tum et solo aequatum, Cianadinum oppidum, salva
 arce, igne consumptum, posteaque remissam esse

nonnihil oppugnationem propter caedem, quae ex arce in illos edebatur. Paulum vero Bancum, qui praeest Saxosabeso, veteranus Heremitae miles, facta ex urbe eruptione, eam manum, quae Vincium receperat, graviter perculisse non tamen sine vulnere; Heremitam cum IIII. circiter millibus equitum stipendio suomerentium, et cum nobilium ac plebeorum multitudine Megiessii sedere et silere, circumspectareque quasi mirabundum, quid ageretur. Nec id ex metu sive stupore illum facere, sed consilio, opperientem omnium rerum oportunitatem, multi ambigunt. De Transsylvanorum studiis varie nunciatur. Sunt qui dicant eos neutri adhuc parti adhaesisse, in armis tamen esse; sunt, qui Saxones ferant jam in Reginae et Petrovii partes concessisse, Seculos nutare, et terrore Moldavorum consternatos potius in Saxonum sententiam inclinatu- ros quam ituros in opem Heremitae. Nobilitatem vero pro consilio Daedali seorsum 'ab utrisque agere, de se spem utrisque facere, et Francisco Kendino ac Volfango a Bethlen, summis in ea provincia partium instrumentis, domi desidentibus, meliori fortunae vota sua servare. Hinc itaque est, quod paulo supra dixeram, vereri me, nostros nihil profecturos si pauci fuerint, et Heremitam periculum aditurum, cui jure succurrendum censerem publici boni gratia, si se modo regi nostro probe dediderit, velitque nomini christiano salvam esse Transsylvaniam; quamquam ipsum in cruce laetus aspicerem, aut si malit, in furca vel in culeo. Meministi autem, quanta et Grittus in Transsylvanos prodigebat, qua item fiducia, qua constantia illis vitam etiam suam crediderit; sed quid demum? Nonne, audita a Joanne impunitate inceptae audaciae, immo et novis praemiorum pollicitis si Grit-

tum uti animose in eum conspiraverant, ita fortiter confecissent, momento quasi temporis et dilapsi sunt ab eo, et exequuti quod Joanni placuerat? Sic verendum, ne hoc ipsum Heremitaе quoque contingat juxta illud Tragici: „o funestus multis populi dirusque favor, qui cum flatu vela secundo rates implevit, vexitque procul, languidus idem deserit alto saevoque mari;“ si hinc Turcis inde Valacchis irrumpentibus non habebit a nobis mature justa auxilia, quae Transsylvanis etiam nationibus validum essent allatura ad innitendum, parietem, ansam scilicet audaciae. Nam et filios jam Valentini Turci, qui modo cum Heremita sentiebant, Reginae adhaesisse, et Valacchorum ac Turcarum vim non contemnendam ruere in Transsylvanos vulgatur. Quibus hospitibus saepe ego alias vidi, quantum animi habere soleant Transsylvani, idque vel tum maxime quum Mailadus cognatus tuus perfidia Moldavi in ea ipsa provincia circumventus est et Turcae traditus. Sed de his fortasse nimis multa. Turcae nostri limitis dicuntur sedulo congregari, adhuc tamen nihil movent; aliud putantur majus quiddam moliri, quam ut Zolnocchi erectionem impediant. Omnino parvo numero sunt in his finibus, eaque causa conatus differunt, donec augeantur subsidio, et consilio Caesaris sui edoceantur, quid agere debeant. Plura Paulus de his, de statu meo, deque beneficiorum meorum conditione referet, quod te optare non diffido. Vale. XXVI. Septembris MDL. Agriae.

LI.

Oláh Miklósnak Verancsics Antal.

Antonius Wrancius Nicolao Olaho Antistiti suo S.

1550. sept. 28.

Postquam a me de statu et de jucunditate genii Agriensis scire desideras, nihil sane jucundi est, quod ad te id temporis scribere possum. Minimam partem pristinae faciei non habet reliquam. Omnia sunt horrida, omnia squallida, omnia moesta, omnia, quam erant, longe alia, omnia martialium hominum licentia deformata. Et ne de metu populorum quicquam dicam, ita tamen sese omnes demiserunt et destituere, ut qui vix crastinum sibi polliceantur. Quocunque obtutum vertis, quocunque ingrederis, injuriae, ruinae, milles, metus, rapinae, discrimina, desperatio occurrunt. In arce tectum palatii episcopalis, fenestrae quaedam, et una dumtaxat camera, quae angustior habetur, expleta est, toto operi plurima desunt, templo fere omnia, si tectum excepero, quod jam finitur. Reliqua ejus incrementa in propugnaculum conferuntur, quod e regione occidentis et capituli ex lapidibus campanilium erigitur, opus quidem firmum, insigne et tutelare futurum toti arci ex ea parte magis, quam dici possit. Absoluta est et culina, forma et magnitudine non incelebri, et domus quaedam pede plano posita non sine et genio commendabili et prospectu. Reliqua omnia occupant propugnacula, munitiones, machinae, instrumenta bellica, ruinarum cumuli, stabula,

militum casae et stationes, et id genus infinita, adeo
 nt huc si id temporis veneris, majori usui erit tibi
 cassis quam mitra, gladius quam pedo, thorax quam
 pallium, quam stola clypeus. Ages enim proprie ca-
 strensem, non Agriensem episcopum. Speranda ta-
 men sunt cuncta meliora, si Zolnocchum tuebimur, et
 expeditionis hujus exitus votis respondebit. Ipse me
 hic tamdiu continebo quamdiu tibi aliud de rebus
 meis videbitur statuendum. Tametsi libentius eo loci
 esse vellem, quo tu esses, ut potius tibi, quam otio
 meo inservirem. Igitur tuum erit praecipere, meum
 jussa capessere. Vale. XXVIII. Septembris 1550.
 Agriae.

LII.

Oláh Miklósnak Verancsics Antal.

Antonius Wrancius Nicolao Olaho Antistiti suo Sal.

Erecto jam Zolnoccho, rebusque omnibus neces- 1550. oct. 2.
 sariis instructo et comes Salmus et Andreas Batho-
 reus Agriam venerunt, traductis huc etiam gentibus,
 quae trans Tibiscum erant; puto, ut hic consulant,
 quid agendum erit imposterum, quove bellum promo-
 vendum. Turcae non omnino siluerunt. Proxime in-
 sperati Secienium usque excurrerant, quae est arx
 Stephani Lossoncii, oppidumque vi ingressi, abduxe-
 runt homines L., unum occiderunt, pecora pauca re-
 liquere. Arx etiam ipsa periclitata. Paucis diebus
 post invaserant et Săgh, sed non tam feliciter. Fran-

ciscus Jacossius praesidiorum eius loci praeses congressus cum latronibus, obtinuit victoriam, ultaque Secienii injuria, occidit et vulneravit multos, cepit plures, nescitur tamen adhuc, an et damnum aequae recuperavit. Nunc jam videntur ferocire et majora minitari, quantum nocituri, non divino. Sed si nova vis non supervenerit, hos praedones limitaneos nostrae copiae non pavebunt. Ex Transsylvania adhuc turbulenta afferuntur. Et si quibusdam credi debeat, ajunt et Saxones et Seculos ad Reginae jam auspicia transisse, Seculos etiam mutuo conflixisse in comitiis, quos Reginae et Heremitae studia dividerunt, Petrovium ad Albam castra metasse, ne habere tria M. Rascianorum penes se, quamquam duo excederent, secumque esse Pupillum Joannis, matrem in urbe commorari. Heremitae vires longe majores esse, et posse eum cum Petrovio tuto manum conserere ac victoriam sperare, honore tantum et fide arceri, ne in dominam et filium domini insurrexisse diceretur. Nec alia vi pollere Petrovium quam spe et exspectatione Turcici patrocinii, quo provinciales territi coguntur etiam per fas et nefas ab Heremitaestudiis dimoveri; quum tamen fama non silet, fidem ei omnes de se fecisse, remque propterea cum Moldavis ita transactam, ut ab irruptione illorum non sit impense metuendum. Turcas Petrovius et Valacchos Transalpinos nondum induxit, venturos tamen quum voluerit. Sed fertur non audere adhuc tantum scelus, timens penes putrida etiam sanis partibus, ut sunt mores et perfidia turcica, qui nobis non indulgent, neque commiserentur nostra causa, sed suae tantum servant nos opportunitati atque libidini, simulata pietate et dolosa amicitia. Futurum tamen quidquid est haud longa exspectatione

tenebimur. Utinam autem ea consequantur, quae vellemus; sed vereor ne si hac vice destituetis Heremitam, durior fiat imposterum, ut Joannes olim, quando ei auxilia, quae ex pacto pacis debebantur, Solymano Moldaviam subjugante non fuere missa. Nam quum et illud accepimus, quod oratores, quos in Turciam dimiserat, ex itinere nunciarint, ut esset bono animo, quandoquidem omnia illi laeta Transsylvaniae tuta apportarent, quid quaeso aliud augurandum est, quam quodpiam novum cum Turca foedus, novam necessitatem, qua in pristinam ejus gratiam restitui possit. Quod et Joannes fecit, quum transactam pacem cum rege nostro recusavit promulgare. Ea igitur quae cum Heremita agenda sunt, si agenda modo, mature agi suaderem, quia saepe dilata sublata sunt. Alioqui debebis mihi ignoscere, si quid videor in Areopago consulere, quod minus intelligam minusque deceat praesentem fortunam meam. Saepe tamen alias et in Hungaricis et in Transsylvanicis rebus vaticinia nostra exitus probavere, quum privatarum rerum studia, ubi prius est publicis consulendum, in multis consuevi arguere, nihili faciens odia, quae mihi amor veritatis peperisset. Vale. II. Octobris 1550. Agriae.

LIII.

Nádasdy Tamásnak Verancsics Antal.

Antonius Wrancius Thomae Nadasdino S.

1560, oct. 2. Pridie kalendarum octobrium summo diluculo Stephanus Recinus nuncius tuus Agriam venit. Eodem die rediit et Comes, Zolnoccho praesidiis, munitionibus, commeatu caeterisque rebus necessariis instructo. Advenit secum Andreas quoque Bathoreus, ut una, ni fallor, consulant, quid jam imposterum sit agendum, quove hinc promovendum. Hoc ipso die litterae tuae distributae sunt, hisque intra biduum responsum est. Jam ad ea, quae scire desideras. Zolnocchum absolvimus intra XV. diem nullo hoste obistente, relictis sunt ejus custodiae M. CCCC. bellatores, partim equites, partim pedites et nasadarum certus numerus. Joannes Balassa dudum ad eam praefecturam designatus eodem ductus erat, ut praeficeretur. Nescio tamen quid intercessit impedimenti. Rediit Agriam falsus voto, eique suffectus est Franciscus Zai, qui fungetur eo munere, quamdiu novum de hoc a Principe referetur mandatum. Ferunt, quosdam consuluisse, limitem illum egere duce majoris usus rerum bellicarum, quique jam veteranus esset, et quandoque aliis etiam finibus praeuisset. Andreas Bathoreus cum suis copiis ultra Tibiscum in Abad pago sine ulla cujuspiam vexatione excubavit, donec

exstrueretur Zolnocchum. Comes, ut ille qui summae rei summo cum imperio praesidet, perpetuo vigilat, in assiduis curis versatur, multus est ubique, consultat semper, sedulo operam dat, ut res bene geratur, et careant omni prorsus tumultu copiae, de quo hactenus vel minimo nihil est auditum. Qua ex re et laudem et favorem non parvum videtur sibi apud omnes comparasse, fecisseque spem in omnium animis, felicissimos fore hujus expeditionis exitus. Turcae usque in finem non siluerunt. Oppidum Zecienium VI. kal. Septembrium invaserant ferme quadringenti. Abegerunt supra XLV. homines, uno solo, quod ajunt, interfecto. Pecora pauca reliquere. Arx non mediocre adiit periculum. Non multo post Saghum quoque advenerant, sed adverso sidere. Franciscus Jacusius, praefectus praesidiorum ejus loci afflixit eos. Sic Zecieniensis injuria ulta. Damnum an aequè recuperatum, incertum, quamquam dicitur insignes captivos retulisse. Quid in reliquum tandem cogitat aut facturus est Comes, omnino ipse non intelligo, nisi si descensurus sit in castra, donec a Rege redeant veredarii, quod audisse visus sum, consilia enim miro studio atque consensu omnium supprimuntur. Nudius tamen tertius omnes copiae, quas trahit secum Bathoreus, Tibiscum trajecerunt. Quod indicio est, aliud quippiam futurum quam vulgo circumfertur. De quo non dubito, quin succisivis temporibus tam a Comite quam ab aliis, ad quos dedisti nuper litteras, certior fias. De Petrovio et Heremita varie omnes narrant, qui inde veniunt. Dum enim alii atque alii utrumque vicissim et efferunt et deprimunt, minus vere omnia. Nec apud alium censeam exstare veritatem, quam apud solum Comitem et consilium ejus. Nuper

tamen incidi in Michaellem Somborinum nobilem Transsylvanum, tibi (ut existimo) non ignotum, qui privatae rei causa intra X. dies et venerat et redierat. Is mihi affirmavit, Petrovium ad Albam Giulam castra posuisse, habere Rascianorum penes se II. M., Pupillum Joannis secum esse, et magna cura servari, ne ab Heremitanis suffuretur, Reginam vero Albae manere, Saxones ad eam defecisse, Kendinum et Bethleemum domi sedere, Seculos autem, dum conventum haberent Vasarhelii de concordia et deliberatione, utri parti omnes una subscribere debeant, quod ii Heremitam illi Reginam sequendo contendebant, mutuo confluxisse usque ad multorum hominum caedem et vulnera, face injecta inter eos ab Heremitaie militibus, qui missi erant rebellibus a sententia avocandis. Adjecit etiam inducias inter Petrovium et Heremitam fuisse factas ad festum divi Michaelis, eoque interim comitia molitam Reginam, in quibus erat fidei Transsylvanos commonitura, quam olim sibi ac filio suo publicis juramentis obstrinxerant. Heremita vero interceptis his litteris, easdem circumferri prohibuisse, Megiessio deinde mox Tordam contendisse, et suas mature ad regni incolas dedisse. In quibus erat: Hostem et se et Transsylvanos domi habere, cujus temeritate et contentione multa tam in se quam in illos Regina moliretur, praesertim quum nova quaedam comitia indixerit, quae nihilo laetiora forent allatura publicis commodis, quam ea, quibus jam aliquoties in illa provincia periclitatum est inquietudine praefati hostis et reginae levitate. Et quum neminem alium Transsylvaniae praesidem agnosceret agnosci-que velit, praeterquam se ipsum, jubere late omnibus sub poena capitali et amissione nobilitatis ac bono-

rum, ne quis ad Reginae conventum proficiscatur, ne ejus litteris locum det, nec mandatis obediat. Sed quicumque patriam salvam velint et unitatem amant, armati ad se Thordam maturent. Rogavi et de gentibus, quas haberet. Respondit: eum non admodum multos viros secum circumducere. Passim tamen per opportuna loca cohortes habere distributas, hisque in unum coactis agmen ad IIII. M. hominum posse accedere. De quibus si majora praedicarentur, fidem non habendam. Dixit praeterea, bifariam esse divisam Transsylvaniam. Quicquid urbe Colosvarina, Megiessina et Kiculiensi arce ad oppidum Dees et Samosum amnem, quem magnum appellamus, includitur, Heremitae paret, reliqua omnia Reginae jus amplectuntur. Arcem Almas tenet Franciscus Croata miles clarus et generosis factis notus, nisi jam abdomine premeretur. Summus dux Petroviani exercitus, Nicolaus Crepovius, est Rascianus, homo dives, avarus, timidus et scurra. Valacchus Transalpinus cum Regina sentit. Moldavum Heremita, si Somborino credetur, in suas jam tricas solito ingenio et largitione pellexit, usurumque commentis apud Turcam, dicunt, quibus omnino domi in Heremitae gratiam haerere possit. Ad Petrovium nec Turcas nec Transalpinos venturos, nisi advocatos. Sic transactum cum passis. Renunciatum insuper ab oratoribus suis Heremitae, quos in Turciam miserat, quod jam iter ad redeundum inivissent, quod novum ciausum a caesare adducerent, afferentque tam ipsi, quam genti omnia fausta. Allatum postremo est, Gasparem Perussium gravissime in arce Cianadiensi annona laborare propter multitudinem oppidanorum, qui magno numero intra ejus arcis munitiones confluerant, incenso a

Rascianis oppido, misisseque ad Andream Bathorem pro subsidio, quandoquidem ne adhuc quidem oppugnari a Rascianis, desiisset. Andreas Bathoreus a Somlio non adest. Fertur esse apud Heremitam. Curam litterarum tuarum ad eum solita diligentia, qua utor in tuis rebus, ipse geram, dimisso Paulo, quo jussisti. Quas ad Emericum Homonensem dederas, remisi tibi. Nimis enim a nobis abiit, morte obita. Haec sunt quae de rebus novis habuimus hoc tempore. Quaecunque alia acciderint eaque cognovero magni interesse, ut quam celerrime ad te perferantur, in mortem et equi et servi mei, nulli parcendo pecuniae, curabo, ut ea festinantius scias, quam petas. Vale.
II. Octobris die 1550. Agriae.

LIV.

Nádasdy Tamásnak Verancesics Antal.

Antonius Wrancius Thomae Nadasdino .S.

1550. oct. 4.

Comes tandem in castra copias deducere instituit, quibus campum oppidi Puzta Zikzö nuncupati, quod ab Agria VII. M. passuum abest, designavit. Datum est hoc vindemiae Agriensium, quae, nisi milles removebatur, tota in uvis consumebatur. Potissimum tamen doli hostium fuere suspecti, ne noctu vicis igne indito, per quos divisus agit exercitus, inopinata detrimenta secure quiescentibus intulissent. Idque eo maxime, quod per exploratores habetur, subsidia Turcis advenisse, bene auctos esse et molituros

in fines nostros brevi omnia crudelia. Erecturos etiam Zolnocchum aliud nostro oppositum, dimicatu-
rosque donec aut vitas suis cum finibus amittant,
aut nostris potiantur, deleto Zolnoccho et expugnata
Agria. Queruntur nos violasse inducias, ferturque
Kaszunus passa Budensis in Octavii pene Augusti
morem ob amissas legiones incuria Quintilii Vari,
discruciarī, quod Zolnocchum ei praeipperimus. Co-
mes ad eum miserat ternos nuncios cum his manda-
tis: Nihil agere regem suum contra inducias, amicitia-
am cum eo et cum suo caesare firmam stare, finium
tantum suorum curam habere, Zolnocchum, ut extre-
mum prope ex ea parte ditionis suae terminum, firma-
re voluisse, offensionem in neminem meditari, sed
commodo et securitati suae prospexisse. Renuncia-
vit Turca ferociter: Posthac ad se ne vel nuncios,
vellitteras mittat, satis liquere, quod moliretur, dolis
se per blandimenta ultra non peteret, frueretur Zol-
noccho, jactura fidei intercepto, hostem sese hosti
esse, brevique ultorem affuturum. Demum et in regem
ejaculatus vituperia, nuncios autem, qui ad eum mis-
si fuerant, etsi dedita opera pagani homines missi
sunt, contemplata Turcici furoris ac perfidiae saevi-
tia, ut potius in humiliores eam expleret quam in in-
signes viros, si quid in jus gentium foret peccaturus,
in captivitatemne redegerit, an confecerit illico infe-
lices, etiam num ignoramus. Huc accedit, quod et no-
bilitatis tanta varietas repente sedibus suis excita,
totque et tam sejunctim collocata atque disjecta sta-
tionibus, nec uno ordine facile regebatur, nec omnis
commode tessera militari uti poterat. Quibus ex re-
bus et tumultus et periculum, et dedecus per noctur-
nas insidias timori habitum. Et quo haec omnia vi-

tarentur incommoda magisque rite et pro disciplina militari res gereretur, quilibetque tam ducum, quam militum suis muneribus expeditius fungeretur, de castrorum meditatione statutum. Quorum quidem progressu ac fama opinandum est, non mediocriter et hostes summisuros audaciam, et nostros omnia, quae vel ad sui conservationem, vel ad finium defensionem pertinebunt, vigilantius, et magis pro bellica ratione obituros. Verum haec non omnino sine solitis nostris ineptiis excepta sunt, propter quas saepe Hungaria vulnera et difficultates perpessa est. Nec enim praesentia mala refrico, quibus nemo non premitur, nemo non laborat, nemo non afficitur. Quintani nostri, ex nobilitate pro comitiorum Posoniensium decreto, quae VIII. id. Jan. habita sunt, collati, Pannoniae praesertim superioris, utpote minus communibus periculis exerciti, ad quos nondum turcica rabies penetravit, aegre et in castra migrandi persuasi sunt, coeli injurias refugientes, et ut adhuc non nihil cum stipendiariis in armis perdurarent, adducti; objectabant jus veteris libertatis, qua non ultra XV. diem in bello esse tenerentur. Afferebant et alias causas: Vindemiam, arationem, jurisdictionem, cujus tunc temporis octava, ut nos dicimus, Posonii celebrabatur, et id genus plura, quum praesertim litibus multi revocarentur. Persuasi tamen sunt et permolliti oratione Andreae Bathorei magis, quam cujuspiam alterius ex iis, qui cum comite summae rei praesunt. Placuit mihi clarissimi juvenis ingenium, gravitas, facundia. In quo facile Scipionem illum haberemus, qui in Hispania, et patris et patrui admodum juvenis fortissime necem vindicavit, nisi podagra laboraret. Nihil equidem libentius diu audiui, quam ejus orationem ad quintanos nostros, ea praesertim in parte, qua suc-

currendum esse cadenti patriae suadebat, juraque ac libertates veteres novae regni fortunae accommodandas. Non jam ad eam fortunam respectandum, quae dudum amissa esset; caeterum si tantum ea ipsa jura ac libertates cordi essent, quorum jam falsa dumtaxat nomina restarent, eo magis uno omnes nixu atque conatu virium ad vendicandas incumberent; nec id aliter consequuturos, quam si more majorum pugnarent et vincerent, castrensem vero vitam, campestris casas, tuguria, papiliones et tabernacula urbibus, arcibus et palatiis regum anteponerent. In hoc majores imitarentur, quorum virtute et fortitudine tam ingens et tam dives ac potens regnum obtinuissent. Postremo necessitatem modo imperare, non jura dominari, non vigere leges, nec valere libertates, sed in unitate animorum, in ferro, in voluntate occurrendi communibus periculis salutem patriae staturam. Praeclare quidem Bathoreus, sed inepte, ut semper, quintani nostri. Et nisi alia ratio inibitur de propulsando hoste et restituenda Hungaria, verendum ne indies magis ac magis succumbamus. Mercenario milite opus est, et eo quidem potissimum, qui a crepundiis armis insuevit, qui bello vitam addixerit et in aciem properat, non plumas, non commercia fori, non uxoris sinum meditatur. Ex Transsylvania nihil postea consequutum. Silere tantum adhuc Heremitam, opperiri-que et mente agitare, nescio quae. Illud solum crebro ab eo audiri: nolle se in dominam ac in domini filium ferrum stringere. Ubi ego vereor palynodiam, vereor poenitudinem, postquam hinc nihil auxilii, uti latius paulo supra scripseram. Sed brevi apparebunt omnia. Non cessat tamen totis viribus instare Regina et Petrovius, ut Heremita opprimatur aut saltem Trans-

sylvania proturbetur. Nunc utrisque a Turca venerunt nuncii, ad Reginam Ahmatus, cui male quaedam nuper a rege nostro credita sunt. Ad Heremitam Ally, vetus illius apud passas dominationis ambitusque instrumentum. Qui quantum et huic ac illi adjecturi sunt insaniae, vel pauxillum observemus. Perussius adhuc in arce Cianadiensi IIII. ferme millibus Rascianorum obsidetur, quae arx aequae ac civitas incendium ad ruinam usque propugnaculorum fertur pertulisse, solisque jam hominum pectoribus defenditur. Sed quoniam laborat extrema commeatuum penuria, nunciatum est Andreae Bathoreo X. diem non evasuram, si subsidio caruerit. Vale. IIII. Octobris. 1550. Agriae.

LV.

Nádasdy Tamásnak Verancsics Antal.

Antonius Wrancius Thomae Nadasdino S.

1550. oct. 6.

Oratores Heremitae attulerunt ex Turcia, Valentinum Turcum diem suum obiisse. Nimia carceris impatientia factus passis molestior, Asiae exilio multatus, ea translatione tam iniqua in morbum inciderrat, nec locum assignatum attigit, in itinere vitam posuit. Mailadus tuus adhuc vivit et sperat. Nunc fortasse facilius, quam alias unquam potuit, liberabitur, collegae summo retinaculo, qui quum perpetuae captivitati addictus fuisset, clandestino consilio Mailadi restitutionem impediabat. Sic enim retulere o-

ratores. Tuae igitur partes sunt intendere hoc demum tempore praxim aliquam, ut ex ea captivitate asseratur. Cognatus enim est et amicum praeter te habet neminem. Adjutores autem tanti officii non sunt tibi requirendi; habes Tranquillum, habes Wrancium. Vale. VI. Octobris 1550. Agriae.

LVI.

Nádasdy Tamásnak Verancsics Antal.

Antonius Wrancius Thomae Nadasino S.

Propter diversa, quae ex nocturna trepidatione 1550. oct. in divisas et dispersas copias per hostes immitti potuissent, proxime Comes decreverat gentes in castra deducere (uti aliis meis litteris nudius quartus ad te datis cognoscere potuisti), eaque non procul ab Agria collocare, quum alioqui etiam vindemiae nonnihil consulebatur militum absentia, cui tam magnus exercitus quotidie aliquid detrahebat. Verum intervenientibus imbrum fere inauditis profluviiis, et rebus quibusdam aliis, quas proferre non licuit, adhuc in ea castra non est itum, et hoc interim nostri quintani sensim dilabuntur, milites et pauci et male soluti querulantur, Turcae augentur et insolescunt, nec ab incursionibus abstinere. Secundo die hujus meum oppidum Barsum, quod a Leva IIII. millibus passuum sejungitur, invaserunt, et gravissima plaga affecere. Venerant enim (ut affirmatur) sexingenti; eaque res in hunc modum acta recensetur. Positis loco oppor-

tuno insidiis, pauci oppido insultavere. Oppidani injuriam non ferentes, ratique praeter hos, a quibus ciebantur, non esse plures, irritati mutuo in hostes animos, erupere armati. Illi fugam simulantes, ad insidias usque deduxere insequentes, ibique miseri Barsenses excepti mala fortuna ad unum ceciderunt. Promota inde vis in oppidum, oppido quoque potiti parvo negotio, eoque in praedam verso, abductis impuberibus, pecoreque abacto universo, familiae quoque occisorum radicitus prope excisae. Praesenserat eam hostium incursionem Bartholomaeus Horvathinovius, dux Levensis praesidii, et praemonuerat Barsenses tempore, ut excubarent, oppidum non egrederentur, et tutarent sese eo modo, quo jam pridem eos edocuerat, quandoquidem illis, si quid gravius tunc temporis in eos ingruisset, adesse ipse non posset. Totum suum militem, parvo dimisso, ad exstructionem Zolnocchi Comitem abduxisse, nec suadere rationem, ut arce praesidio spoliata, hostem persequantur. Sparsus etiam apud nos rumor est, Stephanum Lossoncium Zondam cum CL equitibus petiisse, quaesitum occasionem vindicandae injuriae et damni Zecieniensis. In quem quum idem Turcae incurrissent, qui cum praeda regrediebantur Barso, fuisse non sine suorum caede et captivitate fugatum. Verum id fictum fuit. Rem neque attentavit, et heri rediens domo ad comitem, clarius ex eo cognitum. Ejusmodi nova indices jam suppedabit Zolnocchum nobis. Utinam eis tandem excitaremur ad aliquam firmiorem rationem patriae consulendi. Quintanos nostros audio brevi missionem consequuturos (nequeunt enim diutius retineri). Mercenarii milites, qui remanebunt, vix sunt M. D., iique ubi dividuntur per loca, quae tutanda erunt

aut restituentur in ea quibus subducti sunt, timendum est, ne hujus tanti motus opinionem sustinere possimus. Quum alioqui et duces nostri aegerrime ferant hoc otium et desidiam, qua sic detinentur feriat, nec in hostes tanta prae oculis illorum impune audentes grassari dimittantur. Comes vir prudens et belli non ignarus aequè id ipsum secum ingemiscit, jam ni fallor perspicuens, quonam in Turcas Marte, quoque instituto opus esset, sed egregie paret Principi, qui reverentia induciarum temeritati hostium parcendum jubet, vultque de singulis rerum momentis subinde, edoceri, sicque inutiliter omnes actiones differuntur, donec ejus majestatis consilia referantur. Pendemus itaque, non belligeramus, solitoque ipse timore agor, ne idem finibus nostris eveniat, quod Sagunto olim de quo dictum est, Saguntum fuisse expugnatum, dum Carthagine consultatur. Jam enim ab erecto Zolnoccho III nostra loca Turcae incursarunt, neque credimus adhuc, induciarum numen violatum. Sed utinam montes nos non parturiamus. Joannes Balassa missus est tandem Zolnocchum fungeturque ea praefectura cum collega Francisco Zay. Heremita Reginam et Petrovium Albae 4. Septembris obsedit magno milite, nec tamen ulla vi ingeniorum oppugnat. Cupit eos cessare ab insania, seque nolle saevire dicit, deditionem tantum ultroneam postulare publico beneficio. Obsessis adhuc nulla summissa auxilia, annona etiam destituti, ne muniti quidem sunt sufficienter; qui si forte fortuna succubuerint, Iuppiter Optimus Maximus, quanta victoria potietur Heremita, quanto pudore Regina, ignominia Petrovius offundentur. Sed haec merebitur Petrovius ob animi vilitatem et avaritiam. Si vincet Heremita, nec mature statuet perficien-

dum, quod incepit, tunc demum judicate omnium mortalium nequissimum, quem hactenus fucus texit, dolus fovit, sola promovit largitio. Vale. VIII. Octobris 1550. Agriae.

LVII.

Nádasdy Tamásnak Verancsics Antal.

Antonius Wrancius Thomae Nadasdino S.

1550. oct. 10.

Turcae Zolnoccho magnopere offenduntur. Jussum erat Budensi passae Kaszuno, ut, si castellum illud nos essemus erecturi, ille summa celeritate opus praeriperet. Nec etiam a vi aperta si res postulasset, quicquid de induciis futurum esset, abstineret. Is injungit eam provinciam Albensi praesidi, qui quum nihil sibi de castellorum erectione mandatum esse diceret, Albae duntaxat custodienda moenia Caesar tradidisset, non obtemperavit. Reluctationem Albensis satrapae, Zegediensis temeritas aequavit. Captus is ejus gloriae cupiditate, petierat a Caesare, ut sibi ea cura mandaretur. Impetravit, profectionem edicit, facit apparatus tentatque interim per exploratores, an praestare possit, quod jactaverat; sed nequicquam, quia praepostere. Quum enim comperisset, molem sibi esse imparem, ipse quoque destitit. Sic res incuria omnium in plures dies extracta, rex vero noster, dum ea de re diutius contendunt Barbari, factus certior, hostem suum Solimanum omnino esse eo animo, ut opportunitati suae quam primum Zolnocchum occupe-

tur, materiamque jam omnem ad muniendum in promptu esse, et Kaszunum, relictis aliorum operis, totum in eam provinciam personaliter incubuisse, imperat comiti, ut sine mora coacto exercitu, Agriam contendat, et Zolnocchi castellum faciat, tanquam in suo. Nec Turcis ansam calumniandi praebeat. Nolle se ulla ratione quicquam induciis detrahare, sed in foedere constantissime permansurum. In hunc modum elusus Kaszunus magna dicitur inquietudine aestuare ob indignationem caesaris, cui significarat, jam se instituisse ejus auspiciis Zolnocchum. Sed deprehensus est in mendacio, eique jam a caesare missam esse atratam clamydem pro more turcico ferunt, mortis illius nunciam, nisi et Zolnocchum a nobis extorserit, et Agriam usque fines prorogarit. Quare si his nostris limitibus de sufficienti praesidio pro magnitudine periculi non prospicietur, quid hic tractus brevi percepturus est incommodorum, melius te novit nemo. Cura igitur, si est ubi, et apud quem, tu inquam, qui inter primos es optimates non postremus, ut firmior et melior ratio ineatur patriae vindicandae quam hactenus saepenumero factum est. Consistentes milites exigunt confinia non temporarios. Nos autem per intervalla torrentum more, et erumpimus et subsidemus, atque ita res hostes agunt, nos incipimus. De Petrovii atque Heremitae insania nihil est allatum recens, nisi quod in oppugnatione Cianadiensi Turcae quoque adjunxerunt sese Rascianis, quos non alios existimant esse, quam Zegedienses, Syirmienses et Belgradenses. Nam Budensibus, Albensibus et Strigoniensibus hic etiam curae satis est. Sed haec adhuc dubia, brevi tamen aliis nunciis certiora afferentur, quam quae nunc habemus. De Solimano dicitur, quod hoc motu nostro

perturbatur non minus, quam Persico, ob idque in Transsylvaniam nihil copiarum audere mittere Reginae auxilio, veritus insidias. Igitur in insequentem annum omnes dilatae irae. Nos certe, utcumque Turca cogitat, ea, quae ad manum sunt, sic decebit agere, ut futuris periculis occurratur, praesentes motus in concordiam adducantur. Vale. X. Octobris 1550. Agriae.

LVIII.

Oláh Miklósnak Verancsics Antal.

Antonius Wrancius Nicolao Olaho S.

1550. oct. 11.

Nos jam hic egregie armamur, et in armis his longe, puto, diutius erit nobis perseverandum, quam forte fortuna nemo initio existimasset. Quoniam Zolnocchum excitavit huic loco satis cumulate veteres sollicitudines, et attulit novas non pauciores, neque minores. Firmato castello milite et munitionibus, nunc commeatu expletur. In Transsylvania XXX. septimus jam dies est, quod Heremita Albam obsidet. Habet exercitum (ut publica voce audimus) XXIII M. hominum; quamvis longe est secus, et in iis equitum sunt XVI M. peditum VIII. sed qui ejus aere merent IIII sunt dumtaxat equitum millia peditum mille. Reliquus numerus ex Provincialibus et nobilitate diversorum comitatum, collaticius est. Diu obsessos non petiit ulla vi machinarum; ad ultroneam deditionem sollicitavit assidue, Petrovium, ut Tur-

cam et hostem publicum, pupillum, ut ejus gentis dominum, reddi sibi postulando. Regina, ut foemina, quae non capit hostis nomen, cum caeteris ut imbecilles, et indulgentia magis, quam severa pro belli jure animadversione digni, non tanti aestimati sunt, ut in eorum conatibus pondus haberi declararetur. Ad consensum tantum regni publicum et christianam societatem hortati, venia etiam ultro quotidie oblata, si ante vim sententiam mutavissent. Verum quoniam in obstinatione perdurant, bombardis quoque jam admonet et oppugnatione muros sollicitat. Nec prius ad hanc vim dicitur accedere voluisse, quam comperit certo et Reginam et Petrovium Turcas evocasse. Passa enim Budensis jam movit Pesto, et in Transsylvaniam pergit, sed non cum tantis copiis, quas Heremita deberet pertimescere, nisi inter eundem augebit. Dubium etiam est, quonam signa vertat. Nam haesit ferme in medio itineris, quod est inter Zegedinum et Zolnocchum, et Zegedinum versus erit ei declinandum, si in Transsylvaniam animus est, quod quidem firmiore fama fertur. Sed interim et hic suspectus est is ejus motus et haec mora, et hoc anceps iter, ne forte alio via demonstrata, erumpat in Zolnocchum. Seculi Heremitam non destituerunt. Saxonum quidam potiores Reginae adhaeserant, sed cognita plane ejus mente de inducendis Turcarum auxiliis una omnes cum nobilitate et Seculis redierunt ad Heremitam. Francisci Kendini dubius animus, ac (uti nuncii Heremitae afferebant) cum Petrovio sentit, quamvis cum Heremita simulet, hic vicissim secum; et quod enormius de tanto homine publica etiam fama vulgavit, ejus ambitionis scintilla tantum incendium excitavit. Sed verius de hoc postea. Comes summa

vigilantia et dexteritate rebus praest. Nihil certe praetermittit, si quid ego iudicii habeam de alienis actionibus quod audiendum, videndum cognoscendum experiundumque et agendum est optimo maximo et prudentissimo belli ductori. Illud dumtaxat eum quoque perturbat, ut alios omnes, quod comitatus dimittuntur. Qui si omnino missionem tam cito impetrabunt, (ut eis negari nequit,) stipendiarii milites, qui remanebunt, vix sat erunt tanto limiti, hoste praesertim non mediocriter, ut affertur, aucto. Non enim multi supererunt. Turcae autem ad tantum motum qui a nobis factus est, serio videntur esse multiplicati, timendumque, ne tunc ipsi bellum ordiri incipiant, quum nos desierimus. Arx Cianadiensis adhuc resistit sed periculum est, ne succumbat, si Turcae obsidentibus accesserunt, quod ita esse nunciant. Haec a legatis Heremitae, qui hic fuere nudius tertius, magna ex parte cognita. Vale. XI. Octobris 1550. Agriae.

LIX.

Nádasdy Tamásnak Verancsics Antal.

Antonius Wrancius Thomae Nadasdino S.

Mitto tibi Zolnocchum ad veram formam effigia^{-1550 oct. 12.} tum. Utinam pro eo Transsylvaniam non amittamus. Heremita obsedit Albam IIII. die Septembris cum XXIIII M. hominum ut vulgari fama nunciatur, ut veriore vix cum 12. Inclusa est Regina, filius, Petrovius et Rascianorum circiter II M. Nec ulla vi ingeniorum diu urbem oppugnavit; circumsegit tantum, subinde Petrovium ut Turcam et hostem publicum, filium, ut Transsylvanorum dominum efflagitando, caeteris ut inutili et imbecillae turbae omnia tuta pollicens, Pupillo et Petrovio deditis. Verum iis a pertinacibus non obtentis jam et bombardas admovisse, et urbem oppugnare dicitur, quod non prius agere voluit, quam exploratum habuerit, spem obsessos suae salutis in Turcis posuisse, eosque sibi in auxilium evocatos, esse jam in itinere. Hodie novi oratores Heremitae ad Comitem venerunt. Andreas Bathoreus a Somlio et Georgius Croata Tininiensis, qui novarum rerum quid attulerint nondum compertum habeo, paventi tamen Varadino, et periclitanti Cianadino Comitem ad succurrendum hortatur. Postulat etiam sui curam geri non tamquam in praesentia aliquo periculo laboraret sed ne quid illi imposterum praeter exspe-

ctationem accideret. Futurorum enim est sollicitus, quoniam Budensis pasa jam movit e campo Rakos ubi castra habuerat et in Transsylvaniam obsessis auxilio contendit. Esto quod non omnino magnis cum copiis. Habet enim CCCCC-tos circiter equites supra II millia. Viritim tamen provocaturus est quicquid erit Rascianorum, ut a Regina est illis mandatum, jamque, ut fama fertur, non exiguo numero Chianadinum convenerunt. Accedet et Valachorum melior pars, et Turcarum tot ex proximis limitibus, quot licebit sine periculo praesidiorum adimere. Sollicitabatur Comes ne Kaszunus Zolnocchum invasisset, quoniam profectus e campo Rakos recta ad oppidum Nagy-Kewres pervenerat, unde non plura Zolnocchum milliaria restabant, quam tria. Verum revocatus consilio, quod non facile scitur, nisi si induciarum causa, relicto Zolnoccho repetiit Zegedinum, atque ibi substitit, dubium metune Transsylvanorum concursus an exspectatione majorum virium, quod minime latere Heremitam putandum est. Ideo sedulo satagit, ut tempestive futura jacula praevideantur. Sic Comes impraesentia liberatus est cura, et quintani facilius dimittentur. Quamquam tamen Comes, ne Transsylvaniae quidem deerit, si voluntas regis erit et ea cura illi mandabitur. Videtur enim indies, meo iudicio, perspectius habere, quid facto opus sit in Hungaria liberanda. Fungitur sane ipse maxima diligentia suo munere, nos etiam alii arma gestamus et cum Zolnoccho omni fere nocte minime laeta somniamus, dubii interdum vel de magnis rebus, nedum de hoc statu, qui est ultimus et miserrimus, praesertim si sic ut hucusque. Omnino autem nihil facimus, quod majorum pace dictum velim, dum tam probe inducias, jam ab

hoste toties violatas, nostro malo observamus. Rex suo in solo unum erexit castellum, ut in suo Turcae plura; eisque licet jam saepe saepius et dictum et declaratum est, caesari eorum injuriam non fieri, nec vim in eos erectione Zolnocchi intendi, qui limitibus ejus praesunt, nosque inducias servaturos, modo hae servarentur et ab illis: ipsi tamen his obauditis et plane spretis, jam IIII. loca nostra sub erectione Zolnocchi praeda et vastitate affecerunt, neque commovemur. Verum haec fortasse minus vulnerarent, ut exilium pagorum afflictio; at illa illa maxime est pertimescenda plaga, quam induciarum reverentia comminatur. Passa Kaszunus, fretus fidei et integritatis regis nostri fiducia, qua scit servaturum inducias, tuto in Transsylvaniam signa convertit, nihil finibus suis metuens, quos induciarum sacramento tutos fore sibi pollicetur. Si igitur et nos in opinione servandarum induciarum jam suscepta et vulgata perseverabimus et Turca secure in Transsylvaniae fortunam debacchabitur nobis intuentibus, Deus bone, quam pudendae, quam damnosae nobis futurae sunt hae induciae, quarum religione jam dudum ab hostibus violata fratres nostros atque affinem Hungariae provinciam subjugari patiemur. Sed hoc viderint, qui frena moderantur, Tu vale et feliciter vivas. XII. Octobris MDL. Agriae.

LX.

Oppolitanus Jánosnak Verancsics Antal.

Antonius Wrancius Joanni Oppolitano S.

1550, oct. 14.

Nullas me ex eo tempore dedisse ad te litteras, quod nos disjunct, fateor equidem ipsemet ultro et veniam peto, si quid culpa ex hoc, tuo iudicio, incurrissem. Quanquam quid huc aut de culpa aut de venia? si officio nec oblivione nec incuria defuerim, sed sola infirmitate, illa, inquam, viennensi infirmitate, cui non fuit satis, istic me per totum Quintilem quotidianis febrium ignibus pejus omni Aetna torruisse, nisi et Agriam prosequuta, per totum Sextilem quoque novo adjuncta coelo, mihi etiam alias multum insolito, ita torquere et debilitare voluerit, ut prope enecarit, quo longe sane in exitu graviolem initio cognoverim, mecumque nec adhuc rediit in gratiam, quum reliquis malis etiam intestinorum tormina adjecerit, denuoque mihi manuum nervos laxare et dissolvere intendit, quemadmodum anno adhuc VI. dissolverat, quum Transsylvania decesseram. Obstiterunt huic muneri tumultus etiam bellici, caussa Zolnocchi excitati, quibus nunc haec loca tam misere conflictantur, quam qui de ultimis rebus periclitantur. Unde ne nobis quidem qui in litterarum studiis omnem aetatem deterimus, veniunt in mentem litterae, quum assidue Mars est in oculis. Nec mirari debes,

Nam iis hostibus die noctuque territamur, qui non libertati et vitae solum, sed religioni etiam nostrae insidiantur; iis demum praesidiis tutamur, quibus et dissipamur et depascimur. Ignosce igitur et compa-
tere meis periculis. Caeterum quod omnino prior voluisti ad scribendum provocari, haustus forsan Satillae gremio, non indignor tibi, quum jure possem, si promissa tua recenserem. Sed jam responde provocatus, scribasque de omnibus, quae istic aguntur, et ultra. Me, si mei juris fuero et hos tumultus magis augebit Enyo, brevi tuae restituam consuetudini. Verum interim exigo tuas litteras et efflagito, nisi flagitio damnari velis. Vale. XIII. Octobris 1550. Agriae.

LXI.

Nádasdy Tamásnak Verancesics Antal.

Antonius Wrancius Thomae Nadasdino S.

Decimo kal. Novembrium accepi litteras tuas, 1550. oct. 28.
ex quibus quod intellexi, meas quoque utrasque epistolas tibi fuisse redditas, quas postremo famulis tuis dederam, non parva exsolutus sum sollicitudine. Paulo post has dedi et tertiam per hominem Andreae Bathorei a Somlio, qui Posonium usque missus, ad te quoque excursurus erat, si res, quas gerit, postulas-
sent. Scire itaque cupio, an et haec tibi reddita sit, qua incluseram sororis tuae et ipsius Andreae litteras, ex quibus mihi omnino persuasi, te de Mailado tuo cognato aliquid accepturum, quo in tuis de ejus

statu cogitationibus respices. De Transsylvanis motibus id habemus. Inducias mutuo nuper pepigerant ad festum divi Martini pacis tractandae gratia, eaeque inter eos intercesserant conditiones: Ut Heremita subsit et morem gerat Reginae omnibus in rebus ad ejus dignitatem et dominationem pertinentibus. Ut Turcis pendat, quod postularunt. Ut cum Petrovio redeat in gratiam, agantque uno consensu et concordii studio ac fide omnia, quae Pupilli salutem et beneficium concernant, armaque deponat et exercitum dimittat. Regina et Petrovius Turcas e Transsylvania redire faciant, curentque Solymanum provinciae, si id erit ex usu et publico commodo, reconciliandum. Misso itaque nuncio, qui eos nomine Reginae et Petrovii amandaret ac referret Heremitam ad officium rediisse, jus domini et auctoritatem pristinam Reginae restitutam, pacataque omnia esse in Transsylvania propter quae Caesaris opem imploraverat, — ingratis habuere legationem. Caeterum, insessis Lypa, Orodio, Symando, montis Macri radicibus et plerisque aliis in ea regni parte locis, in quae 14. die Septembris advenerant, renunciarunt: se non ita facile redituros, ut Regina atque Petrovius cogitarent. Si ipsi stulti, inepti et leves essent, caesarem suum suosque purpuratos sanos esse nec puerorum more ludere. Sibi autem parendum esse principi suo, resque fortiter peragenda, cujus causa in eam provinciam advenissent. Si praeterea erit omnino redeundum, caesaris mandatum expectaturos, interim tamen persanda sibi a Regina et Petrovio esse tanta illorum pericula, tot labores, tot impensae, et insuper remunerandum beneficium, quod in eos erant locaturi. Et nisi reddiderint satisfactos, praedas vastita-

temque ubique suo more edituros. Petunt autem, ut pro more suo dicunt, singulam sablam (gladii id turcici praecipuum genus est), aureos nummos XXXII* et securum receptum. Huic summae Heremita non subscripsit, ut iniquae et gravi; sed obtulit donativum non contemnendum, si modo exitum maturaverint. De securitate etiam reditus facta fides, si a populatione abstinebunt. Episcopus Vaciensis Sbardelatus missus est per nobilitatem hortatu Comitum, et consilii ejus ad Regem de publicis rebus per veredarios Augustam. Ego rem familiarem curo. Vina et frumenta erunt mihi, quae indiem sufficient, pecuniae per clepsydras veniunt, recedunt plena manu. Quicquid enim nobis est reddituum, partem rapinae optimatum sibi vendicant, multa milites dissipant, plura hostilis metus et vicinitas adimit. Vale. XXVI. Octobris. 1550. Agriae.

* Kimaradt : M.

LXII.

Federigo Badoario velenczei követnek Verancsics Antal.

Antonius Wrancius Federico Baduario Oratori Veneto S.

1550. oct. 28.

Nihil sane unquam indignius a me commissum puto, Federice humanissime, quam quod nullas ad te tam diu litteras dederim, quas quidem crebrius, et pene quotidiano studio debebam dare propter singularem tuam erga me benevolentiam, et eam consuetudinis tuae familiaritatem, cujus quod mihi tam cito, tam largam ac liberam feceras potestatem, facile apparebat, in eorum me relatum esse apud te numerum, quos peculiariter amare consueveras. Igitur etsi sciam, nullum mihi argumentum esse, quo iuste meum tibi silentium excusare possem, quod profecto (ut vel ipsemet in mea prorsus infirma et nec producenda causa feram sententiam) non solum objurgatione verborum, aut severiore epistola reprehendendum est, sed et sensibilibus, quod ex amore dico, quo te complector, castigandum. Tamen ne humanitati et facilitati tuae gradum ad bene merendum intercipiam, qui longe majores culpas aliquando soleas amicis tuis condonare, faciam luctantium more, qui saepenumero jam victi et prostrati quaerunt sibi pudoris suffugia vel in errore manuum vel in lapsu pedum, et id genus in rebus aliis, quo statim deditioem non faciant, omnia fortiora de se in secunda lucta pollicen-

tes. Non me fugit, quanta tibi ad Augustana nuper comitia proficiscenti de officio scribendarum ad te litterarum receperam, quantum et fidem feceram, quod ipse quoque familiari quodam negotio expedito, quam celerrime essem ad eadem comitia festinaturus. Quod negotium ne te omnino celem, pecunia mihi e sacerdotiis meis expectabatur, sine qua, scis, quod incommode omnis dignitas, omnis existimatio, omnis denique status ubivis locorum sustentetur, nedum Augustae in tantorum conventu et celebritate principum, ubi etiamnum merae nunciantur devorari non impendi pecuniae. Hac igitur expectatione sollicitus, dum quotidie profectionem meam meditor, nec interim quicquam affertur Agria, et officio scribendi defui, et in multos dies frustratus amicorum pollicitis cum quibus egeram de pecunia, Augustanum quoque intermisi iter. Sic mecum ipse gravissime perturbatus raptim me Agriam contuli, sperans ita rebus meis prospecturum, apologi illius exemplo de Cassita, ut bene omnibus necessariis provisos, quae tum forensis usus tum aulae status postulabat, eodem me, quo institueram, retulissem. Sed et hic exceptus belli difficultatibus dum Zolnocchum Turcis opponimus, jamque et redituum nostrorum fructus non colligimus, sed aequae cum nostris militibus ipsi quoque diripimus, quae cura multis aliis proponenda esse videbatur, tantum abest, ut vel in mea domo, quieverim, vel faciendae rei partem aliquam promoverim, ut millies huc venisse poenituerim, detestatus et castra, et castrorum causas. At, dices, interim cur vel in cursu aliquid non scripseris, sive nunciaris, ut te sciremus saltem vivere; nec enim omnino et otium tibi et materiam defuisse credimus, amicitiiis vero vel ip-

sis nutibus solet satis fieri, si desunt interdum reliqua. Non materia mihi quidem defuit, non otium, non voluntas propensissima, tuique memor semper fui. Sed quoniam et de Zolnocchiensi expeditione res quasi sub pallio gerebatur, nihil statim cognoscebamus, cavente optimo principe modis omnibus, nequid ea in re perficienda accideret incommodi; et de Transsylvanicis motibus, qui interim erant suscitati, mira varietate referebatur ita, ut quolibet diē alia atque alia vulgo spargerentur, non sum ausus ad te quicquam ex trivio scribere, calamumque hactenus eo animo pressi, ut totius rei eventu habito, pleno tibi paulo post commentario satisfacerem. Jam si quid est in his, quo me ab indignatione tua securum posse esse arbitraris, declares tuis litteris, velim; sin minus, ex nunc haud gravate veniam peto, et si forte minus impetro, feram tamen quicquid statues, aequo animo, mihiq̃ue, magnanime Federice, et iratus et bene affectus semper amandus, semper colendus, semper omni honore et reverentia singulari eris prosequendus. Contemplando enim in te non humanas solum dotes, quibus es excellenter cumulatus, sed divina prope omnia, et raram institutionem, ad omnia maxima, pia praesertim et moderata comparatam, periculum mihi de benevolentia tua non putavi esse pertimescendum. Sed excusationi satis est datum, quam admittas ut ab amicis soles benigne simul et humaniter. Vale. XXVI. Octobris 1550, Agriae.

LXIII.

Oláh Miklós Veranesics Antalnak.

Nicolaus Olahus Antonio Wrancio suo S.

Binas tuas litteras accepi ante aliquot dies intra^{1550 oct. 11} Septembrium et Octobrium kalendarum tempus ad me datas. Habeo tibi magnas gratias, quod non praetermiseris me de his rebus facere certiore, quas ab aliis minus perspicue et copiose cognoveramus. Negotium lectoratus Strigoniensis, spero quod brevi pro voto tuo expediam, habes enim principem tibi benignissimum, me paterne affectum, ejusque donationis litteras, quum Agria Viennam redieris invenies apud Bonnam meum sororium. Proinde mittam hoc triduo istuc Matthaeum Zerdahelinum secretarium meum in quibusdam rebus meis peculiaribus, cui te in omnibus collegam assignavi, jussique, ut nihil prorsus agat sine te et consilio tuo, quemadmodum ex eodem Matthaeo et ex litteris meis, quas ei ad te dedi, intelliges. Tu itaque interim, dum Matthaeus advenit, tuas res familiares istic componas, quo postea confectis meis negotiis, ad me remeare possis. Vale. 23. Octobris 1550. Augustae.

LIV.

Oláh Miklósnak Verancsics Antal.

Antonius Wrancius Nicolao Olaho Sal.

1750. nov. 10.

Litteras tuas XXIII. Octobris datas, IIII. Novembris accepi, quae quidem me magna laetitia et voluptate affecerunt, idque non tam ut nunciae accessionis novi et opulenti beneficii, quam quod meis te obsequiis uti jam velle video; quamquam et dona et beneficia tua, quibus me prius etiam quam pene cognoveris, et ornare et locupletare coeperis, ita complector et excipio, ut nihil neque gratius, neque desideratius. Deus immortalis hanc tibi erga me benevolentiam simul et beneficentiam omni largitate et ea gratia referat, quae tibi quam gratissima et quam amplissima provenire possit; ego vero enitar omni diligentia, ut gratitudini erga tantum, tamque munificum benefactorem meum nunquam desim. Ad mandata autem quae das, quod attinet. Etsi consumptis jam et plane exantlatis omnibus his, quibus retroactae vitae meae anni per tantam varietatem factorum cucurrerunt, statueram proximis kalendis Jani primitias meas celebrare, ut sequutus felicia tua in hoc sacrorum genere auspicia, is demum ipse quoque esse incepissem, qui dudum esse debebam, nec imposterum ordini meo et spiritui sancto refragarer, qui me ab initio mystem divinorum esse voluerint: tamen post-

quam et ex litteris tuis, et ex Matthaeo tuo cognovi, quae me id temporis velles in tuis rebus non exilibus, distuli meam hanc cogitationem, et ad injunctam a te provinciam appuli animum, et omnem industriam. De beneficiis tuis illud dixerim, ut mihi illic studeas benefacere. ubi tecum semper esse possim, esto quod Strigonii simus, quis enim hoc non optet tibi? quia hic certe multum etiam imposterum laborabitur, sive id de Turcis, sive de praesidiis nostris rapacissimis velimus intelligere. Nova, quae ex Transsylvania habemus, triduo post scribam copiose. Nam multa uno tempore sunt allata. His autem maturandum fuit, ut quam primum de voluntate mea in tuis rebus tibi constaret. Vale. X. Novembris 1550. Agriae.

LXV.

Oláh Miklósnak Verancsics Antal.

Antonius Wrancius Nicolao Olaho S.

Proximo septembri mense Thomas Varcotius^{1550. nov. 16.} permissis Turcis incolumes Lyppam pertingere, et illinc etiam in Transsylvaniam promoveri, dubium, quo consilio, praesertim quum et transitum illis obse-
disset, et copias haberet longe majores, quam ipsi essent, Cianadinum obsidione Rascianorum liberavit, multa in ea gente et praeda et caede edita, et inde latius propagata victoria, castellis quoque quibusdā Petrovianis potitus. Inter quae potiora sunt: Nagy-

lak, Ciallia, Mako, Egeresth et Orozlanos; hisque in locis castris positis, et possessis castellis dicitur se servare majoribus rebus. Ita certe, si e Transsylvania Turcas redeuntes denuo se videre simulabit. Haec dum aguntur foris per Varcotium, Heremita in Transsylvania deceptus concordiae fiducia, quam cum Regina et Petrovio confecerat, adiit grave periculum, quod tamen evasit. Quum enim omnibus in his obtemperaturum sese Reginae fide obstrinxisset, propter quae in illum commota esse videbatur, promississet insuper omnia impensa de suo Turcis reponere, et pro more donativum mittere, si modo et ipsa eos sine ulla dilatione regno amandandos curaret: tantum abest, ut et ipsa promissis suis stare volu erit, et Heremitae diu poenitudine et deditioe contenta fuerit, ut III. die a concordia ipsum libellum concordiae, illi remiserit, adjecto: respuere se ejus obsequia, partamque secum paulo ante concordiam nolle habere ratam. Sedulo inde sub induciarum tempore sollicitato Turca clandestinis nunciis, ut Kaszuno majores copiae summitterentur, cogerenturque etiam Valacchi novis mandatis in Transsylvaniam properare, et cum Turcis signa conjungere, hisque pro voto impetratis et mox a facta concordia cognitis: mulier pro sexu constantiae immemor, animum in occasionem inclinavit, pollicitaque sibi victoriae fiducia, prosequi inveteratum odium etiam cum periculo et infamia maluit levitatis, quam in pace, quae illi, ut affertur, honestissima et commodissima offerebatur, permanere. Sic omnibus rebus perturbatis subita mutatione muliebri, omnes populos ejus provinciae ab se alienavit, Heremitam vero in coeptis etiam securiorem fecit. Uno enim tempore accepto a Regina concordiae libello auditoque

hinc Turcarum, illinc Valacchorum inopinato ingressu, commotus et in furorem quendam incensus, ut qui jam conquieverat in fiducia futurae pacis ex induciis paulo ante Albae transactis, et pergebat ea curare, quae sedandi regui usus exigebat, repente Thordam profectus, convocavit conventum, de reginae inconstantia conqueritur, opinione periculi omnes imbuat, eundumque obviam Turcis, denuo popularibus armis excitatis, persuadet. Ibique omnium animis in Reginam aequae ac in Turcas incensis sibi vendicat, et ad novam expeditionem conflandam inducit. Igitur emissio per provinciam edicto, cum sanguineo veru, ut apud gentem nostram in subitis et gravibus rebus fieri consuevit, denuo omnes populos in arma excitat et jubet Vasarhelium convenire, quo ipse quoque Thorda abierat, indeque paucorum dierum spatio coacto populo et milite mercenario, summa celeritate venit Saxosabesum, statuitque Moldavis prius occurrere eo consilio, ut prohiberet, ne cum Turcis jungerentur, ea etiam spe, ut si hos mature repulisset, et Transalpini et Turcae ab ulteriore progressu arcerentur. Nec cessit ei tanti consilii tantaeque spei exitus infelicititer. Ingressa erant Moldavorum XIII. M. per viam Oytoz in Seculiam. Illinc-sumpto itinere per Burciae campos, penes Brassoviam, Alutam amnem et oppidum Prasmarinum, inde per Segesvarinorum et Meggiesiensium agrum, relicto in sinistra parte Fogarasio et Cibinio ad Saxosabesum urbem magna planitie circumfusam, Albaeque et Vincio continendam cum Turcis et Transalpinis conjungi animus erat. Heremita ad Vasarhelium oppidum, metropolim Seculorum, cum suis copiis consederat, loco sane patenti, et ad rem bene gerendam valde oppor-

tuno, sive acie foret decertandum sive obsistendum Barbaris, utraque via irrupissent. Nam in ea Transsylvaniae plaga duae potissimum semitae sunt ex Moldavia in Transsylvaniam: altera Oytoz quae Brassoviae imminet, altera Radnabania, quae Bistri-
ciae; illaque sola currulis est et nonnihil lata, haec angustissima et sylvarum densitate impedita, vixque equiti pervia. Igitur ubi primum constitit Heremitae, Moldavos esse in provincia, extemplo in eos VI. M. equitum misit et praecepit congregari. Verum territi Valacchi incursu Heremitanorum repente terga verterunt, fusique statim sua ignavia, sine et sanguine et negotio rejecti sunt in suos fines. Eorum casu Transalpini quoque qui jam per Turrin Rubeam Cibi-
nio adjacentem juxta Alutam flumen irrumpebant, repressi; injectus et Turcis metus. Ii enim ad pagum Ilye, paulo infra montem Aranyos nuncupatum in dextera Marisi amnis situm, Devensi arce in altera ripa, duobus circiter miliaribus a tergo dimissa sub-
stiterunt, opperientes Valacchorum adventum, ubi in hodiernum diem haerere perhibentur, satis jam de reditu solliciti, quod et Varcotius eis receptum cum IX. ferme M. hominum intercluserit, et Heremitam firma-
tis praesidio finibus Seculorum cum ingenti turba provincialium a fronte venire intelligunt. O occasio-
nem complectendam, o diu fortasse imposterum talem non eventuram, si hanc emisimus, quum et reditus difficultate laboret hostis et magnam virium partem Christianis debeat, quos attraxit, secum domi relin-
quere non ausus, ne quid molirentur in occasione. Vereor adhuc tamen jam violatarum induciarum reli-
gionem. Et utinam earum reverentia non obsimus Transsylvaniae, qua amissa ne nomen ipsum quidem

aut ipsa umbra Hungariae remanebit. Recte Valacchi itaque, meritoque maxime laudandi, qui tam constanter vel pecunia vel pietate Christiani nominis cum Heremita consenserunt, (quod fama fertur) ut ei ultro primam de se victoriae partem concesserint, fugam simulati; sed nos non aequè commendandi, si et iis et nobis ipsis defuerimus. Regina in arcem Dyod concessit cum Petrovio, nimirum jam sola cum solo. Quae profectio fugae mihi videtur esse similis, eaque omnino comprobabitur si inde ad Gialuanam arcem descenderit. De Petrovio, multa insana, vitam ejus solitudinem et gemitus et suspiria esse ajunt. Visus est non semel in proximum immigrasse e curia redeundo, suum existimans, et in colloquiis saepe subito quodam stupore conticescere, intueri tamen in homines, ut in contemplatione solent a spiritu rapti. Deus et iis mentem restituat, et Transsylvaniae opem afferat. Hic sunt quieta omnia, credo causa absentiae Turcae. A praesidiis tantum nostris expilamur et subigimur. Vale. 15. Novembris 1550. Agriae.

LXVI.

Oppolitanusnak Verancsics Antal.

Antonius Wrancius Johanni Oppolitano S.

1850. NOV.

Proximae litterae tuae ad me quanto fuere longiores, tanto venerunt gratiores, et tibi habeo ingentes gratias, quod tantam consuetudinis nostrae intermissionem, mutuarumque litterarum cessationem tam longa tamque suavi epistola resarciveris. Ea quidem mihi tantum et tui videndi et ad te redeundi ardoris attulit, ut illam ipsam epistolam saepius perlegerim, diuque meo, tanquam si tecum essem, in sinu gestarim. Ad eam si brevior tibi respondeo, ignoscas velim, considerato, quo sim loco. Porro merito tu quidem revocas me et hortaris urbem colere, sic enim est, ut scribis et me a pagano victu nemo est credo, nec unquam fuit alienior, nemo etiam erit imposterum, sit licet vel a Jove oriundus. Ut enim nefariam militum licentiam non attingam, quae hic nobis prope hostiliter dominatur, aedes mihi obtigerunt ita desolatae, hiantes, nudaе, sordidae, et oppletae fimo equino, ut ab eo tempore, quo veni Agriam, nihil fecerim aliud, quam quod his purgandis, reparandis, et in aliquem usum restituendis vacarim, quo me jam ab imminenti hyemis injuriis commode habere atque tueri possent. Merito itaque mihi Oppolitane, compateris, et vices meas doles, quod et a te et ab urbana celebri-

tate absim. At sua cuique Sparta ornanda est, quaecunque sorte obtigit, temporique, juxta sententiam prudentum semper inserviendum. Te tamen ne omnino non aliqua ex parte in spe confirmem reditus mei, scito, quod brevi veniam Viennam, si modo id evenerit, quod ad me antistes meus scribit. Tu quod te legibus tradideris, et ad oratorum scholas transieris, Helicone intermisso, probo, quod in tuis rebus maxime. Arbitror enim te sat jam Satillae lusisse, tibi nunc jam demum ista aetate ad altiora eaque certe seria studia conscendendum est, debebisque imposteriorum juvare mortales quos hucusque decantasti. Vale. 15. Novembris 1550. Agriae.

LXVII.

Verancicsnak Oppolitanus János

Joannes Oppolitanus Antonio Wrancio S.

Tuum silentium meo silentio multare decrevi,^{1550. oct. 15} non ut ira permotus esse videar, qua debeo, sed misericordia, quae tibi debetur. Vive. XV. Octobris 1550. Viennae.

LXVIII.

Oppolitanusnak Verancsics Antal.

Antonius Wrancius Oppolitano suo S.

1550 nov. 17.

Erras si meum silentium merito multandum iudicas. Prior enim tuum ipse et laccessivi et rupi. Unam dumtaxat tu jactas exceptam, meis tribus non das locum. Nec jus aetatis meae, nec expedis officium, quumque filii statum obtineas, parentem non agnoscis. Hos mores non puto te ex jurisperitorum scholis hausisse, quum in Helicone aequioribus utebare. Ad misericordiam quod attinet. Eam abs te non exspecto, nisi prius Deus fias; interim tamen, ne ingratus esse videar, Christum precabor, ut aliquando dignus reddare misericordia, qui misereris. Erubescere. 1550. Agriae. 17. Novembris 1550.

LXIX.

Nádasdy Tamásnak Verancsics Antal.

Antonius Wrancius Thomae Nadasdino S.

De Joanne Zalancio homine partium Reginae 1560. nov. 20
non obscuro neque stupido, et Turcicis legationibus, in quibus totam aetatem sub Joanne egit, notissimo. tristissimos rumores sparserunt, nec omnino falsa aut factis eius indigna. Quae ut planius possis cognoscere, altius quaedam repeto. In evocatione Turcarum Petrovius aequae Reginae ac Turcis ipsis promiserat, se eum exercitum ex Rascianis conscripturum, et in eorum castra deducturum, quo tam ipsi Turcae fidentius in Transsylvaniam prodirent. remque adversus Heremitam gererent, et Regina constantius in ejusdem odio Heremitae perstitisset. Hac enim ratione et causa utrique cum Petrovio de ejus societate et milite pacti fuerant. Misso itaque Zalancio ad Turcas legato, qui de hac fide Petrovii securos redderet, et simul eos deduceret praeparatis ubique in itinere obviis commeatibus, ne cogerentur rapinas facere, interim autem dum Zalancius apud Turcas moram trahit et lentius quam Reginae necessitas postulabat, Turcae procedunt, infestum exercitum ad Albam primum oppugnamdam deinde ad occurrendum Turcis famam emit, simulque et perniciose quaedam de Caszuni animo erga eos, quorum auspiciis veniebat, ad Reginam de-

ferunt transfugae, et Petrovius apud Temesvarum solita sua dejectus avaritia adhuc cunctatur, contrahere exercitum, quem promiserat. Sic his de causis Regina inops virium atque consilii, conjecta in metum, deserit Albam Juliam, ut urbem imbecillam, parvo cum praesidio, et concedit Saxosabesum, dato duci mandato, ut urbem dedat Heremitae, si tu eri nequiverit. Inde quotidianis nunciis necquacquam adveniente tandem sibi suppetias sollicitato Petrovio, venit Heremita, Albam obsedit, et deditione obtinuit. Tum Regina, tardante hunc in modum Turcarum auxilio, ignaviterque domi desidente Petrovio et Heremita nimis ex voto fortuna prosperante, compulsa rerum suarum desperatione, multorum, qui favebant Heremita vexata et circumventa suasionibus, tanquam agnito suo errore reverti vellet ad officium, deliberat cum Heremita facere concordiam. Facile et Petrovio persuasum de concordia, qui jam etiam ipse metum de perfidia Turcarum sibi confinxerat, ne quid argenti ad Reginae tutelam exponere cogeretur, advocatus Albam Reginae litteris, omni opinione celerius cum familiari prope equitatu advenit, ibique novam in societatem reconciliati, cuncta Reginae Heremita pollicente et concedente, quaecumque petebantur, ut in suspicionem illam apud Turcam magis conjiceret, ejusque negotia gravius intricaret, demum quoniam de impetu hostium in dies magis ac magis fama crebrescebat, Regina, misso alio ad Turcas nuncio (quod ex pacto transactae pacis facere cogebatur) oblatoque donativo non contemnendo, ne*)... viderentur, hortata est, ut reverterentur, quandoqui-

*) Három lekopott szó.

dem reduxisset ad officium et fidem Heremitam, nihilque in posterum de illius integritate tam erga se quam erga Solimanum eorum principem foret dubitandum. Nec jam armis esse corrigendum vel ipsam Heremitam, vel eos provinciales. qui ejus insaniam sequuti fuerant; omnia in illa provincia esse complanata et pacata, Solimanum vero regnis potiri non optare, qui carerent incolis; et satis poenarum seditiosis et pravis fieri, si cum pudore et damno revocassent, quae egissent perperam, — cum Petrovio ad arcem Dyod proficiscitur, fugam illinc ambo ulteriorem meditantes, si Turcae non rediissent casuque aliquo victores penitus in Transsylvaniam promovissent. Heremita quoque deducto ab Alba exercitu Turcis obviā, (uti supra diximus) in Saxosabessianum agrum eodem repulsurus, si occurrissent. Igitur, ut divina quoque sententia constaret, quid authores hujus tanti facinoris mererentur, si minister poenas mature daret, tam impium scelesto ministerium funestissimum cessit. Ubi enim perlatum est ad Turcas, Reginam atque Petrovium cum Heremita in unitatem rediisse, idque non prius, quam se in fines Transsylvaniae perduxissent, suspicati dolo secum Reginam ac Petrovium agere, (mirum enim videbatur, quod sic praeter omnem expectationem, et amicitiam cum hoste inivissent, quem opprimendum tanto studio a Sulimano contenderant, seque cum periculo eduxerant, et nunc demum prope ab ipsa arcentur victoria, quum se redire jubent), correpto Joanne Zalancio et quaestioni subdito, diu torserunt, doli confessionem exigentes. Verum quum nihil expressissent, utpote ab homine illis innocente, et hujus rei prorsus ignaro, vinculis inditis, fustibus caecidere. Postremo, nisi e captivitate

duobus filiis se se redimebat, abducebatur vinctus in servitutem. Jam de Regina et Petrovio nihil insigne ultra, ut de iis, qui de malefacti conscientia erubescunt, nec tuto lucem intuentur; Heremita vero felix satis successibus, sublimis fertur, quamquam ipse maluissem si Turcas non emississet, sed cum eis, postquam exercitu pollebat, conflixisset, essetque per me vel Alexandro gloriosior, vel Augusto felicior. In Agriensibus rebus novi nihil est, nisi jam Turcarum ex Transsylvania Budam reditus injecerit finibus his novae quippiam sollicitudinis. Comes Salmus infirmus fuit per dies aliquot, non omnino graviter, lecto tamen se se continet quietis causa. Stephani Lossoncii et Sigismundi Balassae compositio non est conaequuta, obstinatione utriusque, dum neuter alteri quicquam existimationis suae concedit. Bene vale. XX, Novembris 1550.

LXX.

Gregorianezi Pál zágrábi püspök Verancsics Antalnak.

Paulus Gregoriancius episcopus Zagradiensis Antonio
Wrancio S.

Adeo, Antoni, fili amantissime, grata fuit mihi 1550. NOV. 7
tua gratulatio, qua me ex Italia redeuntem per epistolam excepisti, ut si nulla unquam antea fuisset tua mihi vel audita humanitas, vel perspecta erga me benevolentia, hoc certe ipso tuo officio me nisi in tui amorem pellexisses, essem profecto saxeus. Tibi itaque pro isto in me singulari amore et nunc et antea optime cognito habeo gratias, ac peto, ut in me amando perseveres. Ego quidem si quid vicissim tua causa praestare potero, quo et dignitati et commodo tuo consulatur, nulla erit tanta difficultas, quae me a tuis rebus et accessionibus detinere vel deterrere poterit. Te autem filium propterea, jucundissime Antoni, nominavi, quod et aetati tuae et charitati nostrae mutuae non omnino id verbum dispar esse videatur, et quod in mea beneficia, quae habeam Agriae, me optime contento, velut in paternam haereditatem successisti. Ubi precor tibi a Deo Optimo Maximo eam praeberi rerum felicitatem, ut ad longe majora ex his mediocribus sacerdotiis liceat tibi conscendere. Meam ipse legationem Deo duce peregi Romae et fauste et feliciter totam. Litteras vero has*), quas ad

*) Így, hamarkodó kézzel, litterae quae helyett.

te cum meis mitto, datae sunt mihi Mantuae. Vale.
VII. Novembris 1550. Posonii.

LXXI.

Gregorianezi Pálnak Verancesics Antal.

Antonius Wrancius Paulo Gregoriancio episcopo Zagrabienſi.

1550. nov. 22.

O gratam perpetuoque mihi conservandam et exosculandam epistolam tuam, Paule antistes, omni veneratione dignissime, qua non solum successione Agriensium sacerdotiorum filium me tibi esse declarasti, quod et casus sibi vindicare et divina providentia potuisset, sed etiam adoptione quadam spontaneae voluntatis, meo prorsus perexiguo ductus officio, eadem epistola tua, veluti publico quodam testimonio, confirmasti. Quod quidem ut amoris tuo erga me non obscuro tribui debet, ita etiam bonitati admirabili maxime etiam ascribendum duco, quum ei tu te in patrem obtuleris, qui filius tuus esse non merebatur, sed hoc facis exemplo servatoris nostri, qui prior et eligit nos et suscipit in filiorum adoptionem, quam vel expendere possimus tam praeclarum genus in quod inseramur. Itaque jam te parentem meum confiteor, jam colo, jam suspicio, et praesenti epistola omnibus pronuncio, ac do principium meis erga te filialibus officiis. Quare accipe nova, quae hoc tempore habemus ex Transsylvania. Heremita vincit jam omnia adversa in illa provincia. Milites ejus et Moldavos et Transalpinos Valacchos, qui jam diversa regni parte in fines nostros irruerant, non sine gravi eorum occisione. in sua claustra rejecerunt, Turcas vero, qui

Petrovii et Valacchorum adventus fiducia in Devensem agrum ex pago Illye per Marsum transierant, pauloque ultra progressi. Albam cogitantes, quo se Reginae adjungerent, inter Devam, et oppidum Zaasvaros nuncupatum consederant, ipsemet Heremita, qui ea parte Transsylvaniae supra Brassoviam, qua Moldavi per viam Oythoz in Seculiam descenderant, praesidio firmata, Albam cum multitudine Provincialium advenit, eaque urbe capta, transactaque cum Regina concordia, obviam Turcis processit, eosdemque coëgit primo adventu subsistere, et de reditu, fugae similiore constituere, jussu inde et Varcotio Vardiensis praesidii duce, ut eosdem a tergo vi quanta maxima possit, urgeat, totus in eo esse nunciatur, ut hostes intercludere et circumvenire possit. Nec desperatur de victoria, quoniam ad VII. M. equitum, ut verior fama fert non accedunt, Valacchis vero denuo non intransibilibus, fun dentur etiam non impulsii. Caeterum si in fugam quoque fortiter hoste excepto adiguntur, acque speranda sunt omnia felicia. Is enim illorum locorum situs est, mihi saepissime peragratius, per quae fuga illis erit ineunda, sive per angustias Hazachiani districtus, quae vas kapu, hoc est, ferrea porta appellantur, ducentes ad oppida Karasabesum et Lugassium, Themeso amni adjacentia, sive secundum ripam dextram fluminis Marisi, qua venerant, revertentur, ut angustius atque iniquius nihil esse potest. Nisi si se commiserint sylvis Morsennae oppidi, quae sunt sane vastissimae, et latissime patent. Quum alioqui et in his nihilo levius laborabunt et periclitabuntur, modo Heremita, de cujus ego integritate semper sinistre divinavi, rem bene ac fideliter gerere velit nec fuci quippiam secum meditetur,

Porro mille in locis, positis hostibus ex sylvestri materia obicibus, nusquam eis non occurrere poterunt agrestium hominum manus, si jussae fuerint. Verum faxit Altissimus, ut et Turcae temeritatis suae poenas non effugiant, et ii a quibus in Christianos educti sunt, saniora consilia complectantur. Regina cum suo Petrovio destituta pene omni ex parte studiis provincialium in arcem Dyod quae quinque M. passuum distat ab Alba, recepit se, et moereri nunciatur, sero fortasse faciens poenitentiam de Turcarum ope advocata. Quid plura? Primis litteris, quas dehinc dabo, omnium turbarum transsylvanarum arbitror me ad te catastrophem perscripturum, quia jam, nisi me fallit de transsylvanis hominibus, et de Heremita iudicium, longa ejus hominis et nationum illius consuetudine acquisitum, videor mihi videre, Turcas incolumes evadere, nec attingi gladio Heremitae. Ferunt enim in exercitu ejus fieri cuncta langvide, dilabi omnes copias sine ulla missione, et sat fuisse debellasse Reginam, atque Petrovium, dudum sua ignavia et avaritia prostratum. Turcae vero audacter vastant, et populantur omnia, et regrediuntur nemine fere lacescente, sic demum, pater, timeo, ne in fine rerum omnium fallat Regem Heremita, fallat reginam Isabelam et Pupillum sibi creditum, adnitaturque omni conatu, ut in transsylvana dominatione sine collega atque censore confirmetur, servata Turcae clandestina amicitia. Verum longe adhuc secus, quam opinamur, et de Heremita iudicium et de iis hostibus praesentibus poterit evenire. Tamen ex angustiis transsylvanis non erant in patentes Hungariae campos Turcae emittendi. Vale. XXII. Novembris 1550. Agriae.

LXXII.

Gregoriancz Pálnak Verancesics Antal.

Antonius Wrancius Paulo Gregoriancio episcopo Zagrabien-
si S.

Veniens nuper a te Matthaeus Zerdahelinus,^{1550. nov. 23} ille, inquam, Matthaeus noster humanissimus, tui ita studiosus et amans mei, ut admirari ac fidem facere facile possim, eloqui vero minime, retulit mihi maxima quaedam, et vera sane paterni tui erga me amimi signa, ex quibus magnam cepi voluptatem, judicavi-
que sine omni plane ambiguitate, quanti me faceres, et quo affectu complectereris, qui sic ornamentis et commodis meis ultro operam dares. Cura siquidem ista tua et studium promotionis meae ad episcopalem apicem tanti habetur apud me, quanti apud verum filium debet, quum alioqui vix eam animo etiam capio, nedum ad habendas et referendas gratias sufficere confidam. Vincor igitur, vincor, Pater, tua benevolentia, atque isto tuo incomparabilis meriti officio, qui me prius etiam quam bene cognoveris, quum vix ter certe videris, jam et beneficiis augere festinas. De quo quid dicam aut quid praedicare debeam, certe aliud nihil, quam ut perpetuo bonitatem ac dilectionem istam suspiciam, colamque. Fortunae vero meae plurimum et profuse gratuler, quae post tot naufragiorum volumina tuto portu excepta, non de

pristino splendore solum, sed etiam de cumulatiore fit segura. Nec audeo plura loqui, ut homo cujus fortuna rimam fecit. Verum quicquid mecum paterne egeris, non cum alieno egeris, sed cum filio, qui digna trutina semper, quoad vivet, tanti parentis amorem, et patrocinium aestimabit. Caeterum de dignitate episcopali non sum sollicitus, cujus quidem functionem mirifice reformido propter praesentis, aevi infelicitatem, quo in antichristos incidimus, a veritate excidimus, et hominibus placere aequè studemus, atque cogimur. Tu tamen fac mecum et pro tua conscientia, quae te falli non sinit, et pro amore quo me prosequeris, ut lubet. Si enim et legem adimplere, et pietati satisfacere studes, nec proximo, nec filio desesse poteris. Cave tamen, ne plus amoris hac in parte indulgeas, quam ducaris conscientia. Haec enim nobis vera suadet, ut propinqua spiritus, et interioris vitae nostrae certus testis; ille plerumque falli solet, nempe cui externa dominantur, et cum mille affectibus miscet vices. Jam si nobiscum pie ejusmodi reputare voluerimus, Deo certe, Pater, hanc sollicitudinem permittemus, qui quum et nostri curam gerit, ut quorum etiam capilli capitis numerati sunt in coelo, et ecclesiam suam nunquam destituit, non est dubitandum quin sit eos reperturus, et vocaturus pastores ad custodiam gregis sui, quos dignos esse cognoverit, licet ii vel lateant, vel refugiant, vel longe alia meditentur. Non enim Aaron ambibat, Mosis fratris sui in sacerdotio et in procuratione populi Dei consortium, non Petrus, non Andreas piscatores, non persequutor Christi Paulus, caeterique fratres domini apostolatum affectabant, quando vocabantur; de Saule vero et Davide, quid dicemus, quando et ille in-

vitus e domesticis latebris Samuele indicante, et hic e
 pastoricio munere, omnium fratrum minimus natu, mi-
 nimaque habitus a parentibus cura, et fratribus se-
 ptem praelatus est, et ad suscipiendum regnum divi-
 na jubente providentia [perductus est? Ego vero vix
 domunculæ meae sufficiens, et prope umbra hominis
 ambiam episcopatum nec expavescam illud Prophe-
 tæ: Non mittebam eos, et ipsi currebant, non loque-
 bar ad eos, et ipsi prophetabant? Jesu bone, quanta
 multorum partim coecitas est, partim impudentia, qui
 se ipsos putent esse aliquid. quum nihil sint. Sed ab-
 sit, ut quempiam arguam, dum me Deo subjicio, cum
 divino Psalte decantando: Beatus, quem tu elegisti,
 et assumpsisti, domine, hic enim in atriis tuis habi-
 tabit. Vale mi Pater, quam felicissime. XXVIII. No-
 vembris. 1550. Agriae.

LXXIII.

Nádasdy Tamásnak Verancsics Antal.

Antonius Wrancius Thomae Nadasdino S.

1550. dec. 11. Turcae jam trajecerunt Tibiscum salvo toto exercitu, praeter quosdam paucos, qui in excursionibus ceciderunt, digressique apud Zegedinum omnes in sua redierunt. Convenerant autem Bosnenses, Syrmiones, Belgradenses, Hercegovinenses, Znonikienses, Posegani, Quinquæecclesienses, Albenses et Hatvanenses. Kaszunus ipse cum parte Budensis et Pestani praesidii mansit Zegedini. Nec scitur causa. In Nadlaceko et Cialia sua reliquere praesidia. Cianadinum, quod maxime futurum suspicabatur et rumor late diffuderat, non attigerunt, intenti suo celebriori receptui. Tibiscum ad vicum Zent Miklós nuncupatum III. circiter milliaribus infra Lippam navibus transierunt, non ausi, sese Lippensium fidei committere, quos ipsi ante et dolo et vitentaverant. Orodium inter alia loca, quae affligere, maxima ruina, et occidione affectum. Haydones, qui M. CCCC ante ad huc, quam Varcotius expediisset Varadienses copias, Orodium sese tumultuarie contulerant, relicto in agris pecore, inde facto impetu in Bosnensem passam Nadumam nomine, qui cum II. circiter M. Turcarum Kaszuno in subsidium veniebat et ad pagum Zewdy penes Marisum 5. M. passuum ab Orodio situm conse-

derat, tam acriter cum eo a summo mane ad horas vesperarum pugnasse pro castris nunciantur, ut castris perturbatis pedem referre coëgerint. Potiti itaque castris et impedimentis omnibus in propinqua villa quieti sese dederant praedam dividentes, et fruentes fortuna tam propitia, agitantusque consilia de hoste iterum in insequentem diem invadendo. Turca die insequenti non exspectato, receptis animis, tanta vi in pastoriciam et rudem turbam, nulla ratione militari utentem inexpectati fecere impressionem, ut recuperatis rebus omnibus, Orodium usque caedentes eos, tanquam pecora insequuti sint, et nisi obvia Orodien sium ope excipiebantur paucissimos pecus suum reduces habuisset. Qui desiderati sunt CC. circiter numerantur, vulnera plures accepere. Eo furore ultionis acti Turcae ulterius iram tulere, putabant enim Symandum, quod Orodio vicinum est, profugisse haidones. Ingressi itaque oppidum, trepida plebes in templum quod repentinis casibus munitum habebant, confluunt. Subeunt hostes, oppugnant miseros, jubent portas pateferi, solos expetunt hajdones, coeteris fide de securitate salutis faciunt. Creditum tandem coacte barbaris, quia imbecillae munitioni non fidebant. Portis igitur ultro patefactis reperti haidones pauci, iique ibidem statim percussi. Cum oppidanis mitissime actum propter priora officia. Soli impuberes ablati, quos casus abeuntibus obtulerat. At hajdones quos Orodientes summa pietate protexerant triduum Orodii commorati, quod ligandis vulneribus dederant, quarto post gratias in discessu suo amicis et hospitibus relaturi, totum oppidum in praedam verterunt. Hadumus interim sequi*) prohibitus, non longe ab

*) Olvashatlan szó.

Orodio consedit, opperiens occasionem ulciscendi Orodienſium incuriam, qua ſibi hajdoneſ eripuerant. Sub haec advenit Orodium cum praefidio Zolnocchino Joannes Balassa, ibique aliquamdiu facta mora, quaerens rationem, qua Hadumum poſſet opprimere; ſed quum nulla occurreret, quod impar hoſtibus habebatur, ceſſit conatu, et ſuperveniente cum Varadienſium copiis Varkotio, una in Cianadienſem obſidionem ſigna convertunt, ubi miſera Raſciano- rum plebe immani crudelitate confecta, caſtra etiam aliquot Petrovianiſ adimunt. Nihil poſtea ab utroque inſigne factum, quia Varkotius cum popularium et agreſtium hominum colluvie non auſus Hadumum aggredi ad Cryſium Album reduxit in caſtra copias; Zolnocchum Balassa rediit; praeda, quam utique retulit, non fuit turcica ſed chriſtiana. Hadumus per id tempus in caſtris ſeſe continuit, nec Lippam poſt Kaſzunum tranſire potuit. Sed paulo poſt haec Kaſzuno a Tranſſylvaniſ reſſo, Hadumus, Orodienſium injuriae non immemor, jungit ſe Kaſzuno, profectique una, cum exercitu Orodienſes invadunt. Oppidani, qui contendere cum tanto hoſte non poterant, quod nec vallo nec moenibus tuebantur, numeroque etiam pauci erant, alii alio diffugiunt; familiae basilica, quae ibi ingens eſt, regis Belae Coeci ultione nominatiſſima, captivae recluduntur. Turcae mox primo impetu igne oppidum aggrediuntur, quo una cum templo conflagrato et in cineres plane converſo, quicquid mortalium invenere tam in templo quam in oppido necaverunt, ſolis parſum eſt impuberibus, qui in ſervitutem adacti ſunt. Qui vero eam cladem evaſerunt ad noſ uſque confugerunt. Praeda hajdonum III. M. aureorum aeſtimata. Turcae caedes, conflagratio et

impuerum captiuitas exauctorauit. Hadumus passa adeo paſtorum baculis pulſatus eſt, ut foeminae nomen imposterum apud ſuos inuenerit; Hadum nempe apud Turcas eunucus appellatur.

Quid cum Moldauiſ peregerit Heremita, nondum habemus. Hoc ſolum, quod Heliaſ, gentiſ ejuſ vai-voda juſſuſ a Regina eo itinere, quo venit, regno excedere, captiuiſ reddituſ, quandoquidem nihil iam hoſtile in Tranſſyluania pateretur. Tumiduſ adoleſcens hiſ primis fortuneſ auſpiciſ recuſauit parere. dicens ſe parentiſ inſtitutuſ ſeruaturuſ et Radneſiuſ fodinaruſ via reuerſuruſ, qua pater quoque ejuſ nuper, poſtrema in Tranſſyluaniam irruptione a capto Mailado redierat. Heremita itidem nihil vi, nihil ferro fertur agere, ſed hortamentiſ atque pecunia, quoddicitur et cum Turciſ agere, cu rat emittenduſ; multoruſque opinio eſt, omnem hanc victoriam pecunia illi non ſanguine conſtituiſſe, ingenioque eum atque induſtria magiſ quam manu laboraſſe. Sed haec poſtea meliſ prodentur. Pathociuſ non ſine diligentiſ magnae cujuſdam rationiſ cauſa diutiſ aſſerua-bitur. Zalancini alter filiſ poſfugit e captiuitate, ipſe domi prae dolore ex ignominia ſui caſuſ fertur in tabem eſſe corruptuſ, languereque grauiſſima aegritudine. De cauſa quoque tam repente factae paciſ inter Reginaſ et Heremitaſ haec vulgantuſ. Turca quidaſ perſugio ad Petrouium tranſierat, iſ inter caetera illud quoque retulit: dixiſſe Kaſzunum, ſi victoriam de Tranſſyluaniaſ obtinuſſet, Moldauiſ ſe Reginaſ eſſe daturuſ in Poloniaſ abducendam, filiſ Tranſalpinis Conſtantinopolim deferenduſ; ipſe, obtruncato Petrovio, praeeſ in Tranſſyluania remaniſſet, ſede apud Cibinieneſ caeſari Solymano conſtituta.

Hoc itaque metu atque perfidia illudentis barbari permoti, ii de quibus fabula narrabatur, animum ad pacem composuere, eamque sine mora perfecere. Sic utrique odio caesaris Turcarum contra se excitato, velint nolint, uti ipse conjicio, ad regem nostrum cogentur confugere. Sed nescio quam opportune, quam suo commodo, quamque futuri grati, quia necessitate non amore id acturos certum est; quamquam de optimo principe omnia clementiae et pietatis plena etiam hostes ejus sibi possunt polliceri. Sed haec proximum tempus indicabit, quum porpius adhuc aduri incipient Turcae confiniarii. Vale. Agriae XI. Decembris 1550.

LXXIV.

Gregorianczy Pálnak Verancsics Antal.

**Antonius Wrancius Paulo Gregoriancio episcopo Zagrabiensi
Salutem.**

Laetus ad te scribo laetum nuncium. Sic enim^{1531. nov. 18}
placuit exordiri epistolam, ne te ambigua expectatione tenerem donec narratio ad rem perveniret. Beglerbegus, soluta obsidione, a Themeswaro, quemadmodum proximis litteris meis cognovisti, ad arcem usque Bechew retrocesserat. Sperans autem Lyppam se posse retinere, Uleimannum praesidem Poseganum, virum strenuum, cum tribus millibus Turcarum, qui ex toto exercitu delecti fuerant, ad praesidium ejus reliquerat. Nostri quoque jam conjunctis Hungaris et Transsylvanis copiis, die II. mensis hujus Lyppam pervenerant. Castaldus nulla mora gerendis rebus interjecta, metatis castris opportuno loco, situm urbis adhuc eo ipso die perlustrat atque cognoscit. Insequenti propius muros gentes et bombardas admovet. Tertio, declarato ordine oppugnationis, urbem bombardis petit. Disposuerat etiam, qui pro usu oppugnationis urbem diversis instrumentis alii succiderent, alii suffoderent, et cavarent cuniculos. Sed minus haec fuere necessaria quum ipsi muri septem pedum crassitudinem non excederent, essentque tum vetustate tum structura debiles; facile solae bombardae patefaciebant aditum, quantum res ipsa videbatur postu-

lare. Afflicta urbe bombardis ab hora diei prima ad usque quartam, Castaldus cognito prius, uti est vir in re militari hoc nostro sacculo inter militares duces iudicio omnium publico, facile unus, qui multos in ea professione peritissimos viros creditur antecellere, intra quantum spatium temporis effecturae essent bombardae quod ad irrumpendum satis esset, quave inclusi ad reparandum casum murorum forent facultate, decreverat sub noctem, die jam exeunte, aut omnino postridie lucano tempore impetum in urbem fieri; idque quum una cum signo, quod erat rei gerendae militibus daturus, cunctis palam enunciasset, milites accensi cupiditate manus cum hoste conserendi, signo non exspectato, temere in muros impetum fecere, quod erroris culpa non caruit, eaque in Hungaros ab exteris torquebatur, nec fortasse immerito, quum nostra gens, ut scis, non diu hostem contemplari solet. ubi primum aspexerit, quin in eum extemplo rapiatur. At error hic desiit in exitum satis felicem. Facta enim magno animo in urbem impressione, occurrunt hostes nihilo minore spiritu. fitque in ruinis acerrimum certamen, tantisque utrinque animis tantoque fragore quatuor horas pugnatum esse ajunt, ut viderentur justis aciebus conflixisse; et adhuc aequo Marte pugna utrobique jam ex toto sanguinolenta procedebat, exitusque non tam inter utrosque ambiguus quam desperatus nostrorum fore videbatur. Tunc Castaldus revocatis in castra vulneratis, ne jam fatigato hosti et ex parte diminuto quietem et reficiendi animos videretur dedisse spatium, non desistit urgere victoriam. Sed extemplo submisso novo, et recenti milite, qui alioqui ultro hostem appetebat, tanta denuo vis est illata hostibus, Varadiensi cardinali suam et

Regis munificentiam omnibus pollicente, Thoma Nadasdino christiana et vehementi oratione ibidem ad fortiter concurrendum adhortante, seque ubique cum Castaldo, uti est, in gerendis rebus et consilio promptus et factis impiger, hostibus objectante, dum alter instat Hungaris, et alter exteris, mutuoque gerunt omnia, ferro districto armati dexteras, quo pugna rite prosequatur et feliciter succedat, ut momento temporis in mediam urbem illapsi nostri restituerint dimicationem, rejectisque primum in terga hostibus, deinde late ab invicem dissipatis, victoria potirentur. Caesa sunt eo tum Turcarum duo circiter millia. Dux ipse, quum resistere hosti, qui jam undique in urbem confluebat, nequisset, in arcem se cum caeteris recepit, quae statim obsidione cincta, et cuniculis subruui, ac bombardis incepta quati, nondum expugnatam accepimus. Desiderati sunt, et vulnerati ex nostris pro audacia et temeritate, qua usi sunt, urbem invadendo ante quam signo juberentur, longe numero plures, quam si ducibus gessissent morem. Nec tamen adhuc intelleximus, quot plane vel vulnerati fuerunt, vel caesi, eaque jactura, uti scribunt, habetur longe gravissima, quae in Hispanis facta est propter eorum paucitatem et raram virtutem. Nam duces eorum dicuntur III. esse interfecti, vulnerati paene omnes, tanta constantia et fortitudine pugnaverunt. Milites vero ipsi tot exincti et vulneribus affecti sunt, ut Castaldus eam cohortem, quae ex milibus viris constabat, simul cum iis 300 qui praesidio Themeswari fuerunt designati, magnopere suppleri vellet, alioqui non futurum illum sine sollicitudine ferunt in conserendo manus cum Beglerbego, si eam ipsam Hispanorum cohortem integram non habuerit.

Vexilliferi quoque nostri, magnis vulneribus acceptis, omnia signa amiserant, sed postea redintegrato certamine ex summissione novi militis, de quo supra memoravimus, denuo fuerunt recuperata. De his quae in hac oppugnatione gesserint Hungari, nihil adhuc peculiariter habeo nunciatum. Haec tamen victoria tametsi non venit incruenta (quum nulla adeo sit virtus ingens, quae possit esse sine pari periculo, fortesque viri plerumque quo celerius eo certe gloriosius cadunt) fuit tamen adeo necessaria atque opportuna, ut omnem ex ea victoriam, Deo juvante, metiamur. Beglerbegus audita oppugnatione Lyppae, miserat Uleimano in subsidium II. m. equitum; iis Castaldus CCCC. Cataphractus Silesitanos obviam destinaverat, sed nostris non exspectatis in sua castra Turcae redire, qui a nostris VIII. miliaribus distabant. Nunc jam ipsemet Beglerbegus cum reliquo exercitu dicitur iis venire suppetias, qui in arce tenentur obsessi, unde facile futurum fieri putant, ut justis ad Lyppam aciebus congrediantur, quandoquidem et nostri, qui 66. Mhominum complent, ardentissimo desiderio proelium expetunt, et relatum sit, dixisse barbarum, tanto se cum damno atque dedecore non reversurum, etiam si mori debebit. Reliqua belli hujus propediem ad te confecta scribam, quae, ut exoptata eveniant, communibus votis coelestium opem imploremus, Vale. Viennae 18 Novembris 1551.

•

LXXV.

Báthori Endre erdélyi vajdának Verancsics Antal.

Antonius Wrancius Andreae Bathoreo voivodae Transsylvaniae Sal.

Nondum mihi quidem ab redituum tuorum pro-^{1552 April. 15.} curatoribus persolutae sunt quartales decumae anni MDL. quae mihi ratione archidiaconatus Zabolcensis cui praesum, quotannis ex toto Nagycalensi districtu soleant pervenire. Id quod scire te minime dubito, quum tuo nomine collectae sint et in tua repostae horrea. Pro harum decumarum pretio etsi memoratos procuratores tuos tam litteris quam creberrimis nunciis antea sollicitaverim, adhuc tamen nihil perfeci, nec vel nummum obtinui. Semper enim suam hanc tenaciam excusarunt absentia tua, cujus quoniam ipse quoque non ignarus eram, destiti postea, nec molestus illis esse volui, tui duntaxat causa, quem sciebam finitimo bello ad Lyppam et Themesvarum contra Turcas occupari. Eadem modestia usus sum et Posonii in conventu proximo, in quo et impensis plurimis gravabare et ingentibus curis distinebare publicis. Nunc postquam te domi esse et carere nonnihil bellicis cogitationibus intelligam, quoniam par est, ut pro aequitate unicuique quod suum est, reddatur, non existimavi, me tibi injuriam facturum, si te hujusmodi debiti diligentius admonerem. Quare rogo te, ut me-

mineris, quantum mihi debeas ratione harum decumarum, mihiq̃ue tandem per tuos satisfieri jubere velis, et mecum ita inposterum quoque de hisdem decumis juxta publica scita regni constituas, ut pro obtinendo earum pretio ultra statum diem non laborem. Caeterum quicquid de vetere hoc debito statueris, committo tuae magnitudini et benevolentiae qua me complecteris. Porro si integrum pretium reddere nolueris, quod centum ducatorum summam excedit, eam saltem non graveris partem reddere, qua et tu minus gravare et ipse sentiam atque agnoscam, quod me amas et quod alieno non delectaris, ut plerique multi. Nec hic tamen tecum liberalem hominem ago, ne scarum musca piscari videar, verum ingenue dico, quod hac re tam exili non essem tibi molestus, si quo vel paulo opulentiore gauderem sacerdotio; sed quoniam tenuissimum est, ut pro modo meo, quo inter mediocres traduco vitam, et assidue cogar interim in aulica esse voragine, necessitate impellor equidem, ut etiam minima curem, meque ingenii atque industriae artibus magis quam justorum reddituum censibus sustentem. Quo tu quidem vir opulentus et potens magis adduci debes, ut me tam a tua avaritia, qua nunquam laborasti, quam ab aliorum rapina, quae jam prope evertit Hungariam, tueri velis. Nec de hoc plura, quum plus te dare deceat, quam me petere. Vale. Viennae. 15. Aprilis 1552.

LXXVI.

Oláh Miklós egri püspöknek Verancsics Antal.

Antonius Wrancius Nicolao Olaho Episcopo Agriensi S.

Quod nondum redeo rure in aulam teque tot red-^{1562. maj 16.} eundi teneo comperendinationibus, in causa est non tam studium rusticandi, quod quidem alioqui jucundissimum est, meque ab ineunte aetate mirifice semper delectavit, videturque etiam huic aetati luculenter arridere, quae jam XLVIII. anno ad divinarum rerum vitaeque immortalis contemplationem, *) quam certe aeris exiguitas. Hoc enim tempore ita sum destitutus pecuniis, ut ea facultas minime adest, quae nitori ac sumptui aulico pro conditione mea sufficere deberet. Quod fatendum, aut erit mihi pudori, aut tu secus accipies juxta putabo, quia sic se res isthaec habet. Ac dico clarius, quod nisi in Pornoniano rusticationem diligenter frequentaro, nec aula commode mihi excoletur, et timendum etiam erit ne in Codri fabulam adigar cultu et luxu aulico. Sors enim prius paranda est, aula post consecranda. Quamquam satis jam injuriarum pertuli et gratiarum egi, domique demum vellem consenescere, non in aula, in qua quidem mecum non sic agitur, ut cum iis, de quibus est paroemia: qui eget, in turba versetur. Mendicorum haec est et parasitarum conditio. Nos in aula erogamus non corrogamus, caeterum et nostro foco et nostro domicaenio gaudemus, vehimurque ea rheda, quae

*) Egykét szó a tollban maradt.

domestica cura ac censu fovetur. Unde proximis quoque tribus mensibus, quos exegi Viennae et Pozonii comitiorum tempore, insumsi CCLX ducales nummos, ex quibus ne oboli quidem fructus in arcam mihi rediit. Vide, quaeso, jacturam, ac tibi persuadeas, velim, quod ejusmodi summam si singuli tres menses hac ratione mihi haurire debebunt, brevi equidem exhauriar ad quadrantem, et frustra tandem etiam Pornoianum colam. Neque enim aequatur felicitate coeli Alcinoi pomariis. Unico vere atque unica aestate contentum est. At dicet forsan aulicus, alieno aeri assuetus, mutuum contrahe. A contractis? Ego vero tentavi multos, sed his in locis nihil est, mihi crede, minus cogitandum, quam de mutuo contrahendo, adeo hoc tempore omnium hominum manus restrictae sunt metu futurorum ob suspicionem belli turcici. Marmoreas sane vel ileceas dixeris. Habes de meo aere et de difficultate pecuniae comparandae. Accipe jam, quot me manent impendia. Vallo imprimis et propugnaculo muniendum est mihi rebusque defensivis et praesidio militari, vigilumque custodiis instruendum Pornonium. Equitatus deinde ipso numero colonorum ad primam expeditionem, ut in comitiis decretum est, meo ipsius aere apparandus. Quotidiani item sumptus provida quadam et nimis ingeniosa industria acquirendi, quibus haec cuncta perficere, apparare, meque etiam ipsum ac familiam sustentare possim, quandoquidem, ut scis, unos *) adhuc proventus ex Pornoniano meo, quod paulo ante sextum mensem mihi est collatum, perceperim; quum varia etiam huc accedant etiam alia debita, Viennae ad necessarios usus contracta, ad quae

*) Úgy látszik tollhiba „nullos“ helyett.

persolvenda assidua vexatione agor a creditoribus. Taceo de CXXVIII nummis ducalibus, quos Petro Cucelio antecessori meo, tuo vero ab orandis canonicis horis ministro ad primum Calend. Quintil. debeo numerare. Cui quidem nisi ad diem satisfecero, ad Garamantes erit mihi recedendum, adeo infantiles furias levissimi hominis reformido. Verum quantum velint urgeant me creditores, ejulent, querantur, diem Petrus dicat, Pornonium plura exigat, et Turcarum minae cervicibus immineant, ego quidem certe nullo alio pacto credo me tantis debitis atque impensis suffecturum, quam si fortuna quapiam in Euclionis plautini ollam incidero, aut domi rusticando, parsimonia enitar pecuniarum aliquid cumulare, quum alioqui haec mea profecto a te absentia insuavissima sane et molesta mihi est, dum omnibus horis mecum trepidem, ne incurram in tuam malevolentiam, tanquam quorundam aliorum tuorum ingenio uti vellem, quo me per has occasiones subducere vellem tuis obsequiis. Quod in me quidem nunquam est casurum, donec alter nostrum decesserit, utar licet et fortuna et libertate regia. At ne quid nimis agam cum tua erga me indulgentia, quae mihi deesse nunquam est solita, beneficentia vero et patrocinium semper adest, tuae me summitto voluntati et committo iudicio, maneboque in Pornoniano meo et tuo, quamdiu indulseris; redibo quando jusseris; et ubi me esse volueris, praesto ibi adero. Vale. XVI. maji 1552. Ex Pornoniano. *)

*) Az 1553. 1554. 1555. 1556 és 1557-ből, mint Verancsics első konstantinápolyi követségének éveiből fennmaradt levelek jelen gyűjtemény III. és IV-dik kötetét képezik.

LXXVII.

Egy lengyel püspökhöz Verancesics Antal.

Reverendissime in Christo pater et domine mihi observandissime. Salutem et officiorum meorum recommendationem.

1557. NOV. 20.

Existimo jam tandem advenisse tempus, quo ego vestrae reverendissimae dominationi restitutus, ipsa vero mihi, denuo literariam inter nos consuetudinem renovemus, postquam legatione Turcica ipse absolutus, vel potius custodia Aegypti liberatus eo redierim, ubi et meus, et amicorum meorum esse possim. Daturus igitur principium huic meo erga dominationem vestram reverendissimam summi et studii, et amoris officio, breves has ad eandem litteras dare volui ut, magnifici domini Lassottae nostri, viri humani et non solum vetere notitia mihi perspecti, sed etiam charitate conjuncti (ut Poloni omnes esse solent) occasionem nactus, eandem et de salvo atque incolumi meo reditu, quem ei fore gratissimum non diffido, quod me jam inde ab initio non secus amavit, ac semper apud sacratissimum regem meum tum verbo, tum opere promovit, facerem certiolem, et usum praefatae consuetudinis nostrae litterariae, diu sane injuria temporum longinquisque et publicis non exiguae molis occupationibus intermissae, jamque prope consopitae, excitarem, pristinumque in cursum revocarem, cupidissimus vicissim ex suis literis cognoscere, quod recte ipsa quoque dominatio vestra reveren-

dissima et valeat, et fruatur rebus suis. eidem interim propensissima offerendo mea officia et quicquid ex me ad ejusdem honorem, cultum et observantiam possit proficisci; nihil gratius habiturus, quam si me solito affectu complectetur, meaque in his utetur opera, quibus re ipsa declarare possim, quanti eandem faciam quantumque ejusdem cupiam benevolentia potiri. Nec in praesentia plura, nisi ut precata eidem a Deo Optimo Maximo salute et omnium rerum suarum felicibus successibus, rogem postremo, ut reverendissimos et reverendos dominos et veteres amicos meos, dominum Hosium, Prerembzky, Porembszky, Gwrszky et Cromerum meo nomine salvos esse jubere non gravetur. Felix dominatio vestra reverendissima valeat. Viennae XX. Novembris 1557.

LXXVIII.

Kaszun budai beglerbégnek Verancsics Antal.

Antonius Verancius episcopus Agriensis passae Caszuno
Budensi beglerbego S.

Ea quae per Petrum Croatam serenissimi regis 1558. Jan. 2.
mei proximum ab te tabellarium missum mihi et Francisco Zay collegae meo nuper nunciasti, intellexi, ad eaque ut responsum tibi faciam paulo prolixius, ansa abs te mihi praebita, scito non tibi causam his de rebus indignandi expostulandique, de quibus ad nos

nunciariis, quum majestas regis mei proximis literis suis ad te datis per memoratum suum tabellarium abunde scripserit, quonam pacto tam de pecore istinc abacto, quam de hominibus aequae nostris ac vestris ab initio induciarum non ita pridem tecum factarum, et ab eo tempore quo ego cum collega meo Francisco Zay apud te fuimus redeuntes Constanti-nopoli in captivitatem per utrorumque nostrum finitimos abducti sint, agi oporteat. Tu tamen quid de hoc animi habueris? Num eo modo praefatorum captivorum ab utraque parte liberationem dimissionemque transigi velit, an quopiam alio, nihil prorsus rescrip-sit, quem omnino animum suum hac de re quamprimum significare majestati ejus debuerat. Quo nimirum modo haec ipsa tota res sine controversia celerius haud dubio ad finem perducere potuisset.

De qua quidem controversia sive re nunc etiam ego ad te quid possim scribere, nihil aliud video quam quod adhuc rex meus ea est voluntate ut utrinque designentur homines idonei mittanturque in medium quempiam locum inter Strigonium et Comaromi-um situm, atque ibi habita cognitione tam captivorum utrorumque finium, quam quibus in locis et quo tempore capti fuerint, aequa et amicabile eorum fieret restitutio. Isque modus ad hanc praesentem controversiam inter nos, et vos componendam visus est sane peropportunus, et peraptissimus regi meo. Tu tantum per tuas literas mature declares, an tibi placeat et quando eum aggredi velis.

Ad alia quod attinet. Praefecti sane tui ob subitarias et furtivas quaspiam hujusmodi excursiones, et depraedationes vagorum hominum, quorum utriusque fines satis multos habeant, quoniam neque imperiis qui-

dem principum facile reprimi atque extirpari possint, quod etiam passae vestri nobis aliquando dixerant, non deberent statim ditiones regis mei invadere, et evastare, jusque sibi, haec in hunc modum perpetrandi pro suo arbitrato vindicare, quum induciarum aequitas pari ratione utramque partem, inter quas confectae sunt, concernat, similesque controversias, quae de parvis rebus incidunt, nec armorum vi, nec animorum furore consuetum est complanare, sed transactione amicabili et sine omni contentionum strepitu per homines probos, et ad id idoneos, ut jam supra memini.

Ubi vero nunciasti, praefectos tuos te non posse in officio continere, et inhibere ab excursionibus, nisi restitueretur tibi abactum a nostris pecus, admonens et me et collegam meum eorum scilicet verborum, quae Budae habueramus tecum de judiciorum observatione; subjungisque violationem quoque earundem induciarum, si praefecti tui in quaspiam excursiones eruperint, non a vobris, sed a nostris partibus ortum et causas habituras: sic videris passa, mihi agere, ut ille, qui quum jam inflixit homini plagam, eum demum ad cavendum monet, satis sane sero, moremque hujusmodi tam crebro cum omnibus vicinis vestris usurpatis (quod me, qui vobiscum non ita pridem satis multum et panis et salis consumpserim, nec dicere aegre patieris, nec scire denegabis), ut jam mos iste vester tolerari, et per confoederatos ac vicinos vestros vix vobis credi potest. Ubi enim finitimos in amicitiam, et in foedera vestra perduxistis, securosque ab hostilitate vestra verbotenus sinceritate reddidistis: mox omni opinione celerius vel ex minimis rerum deductis causis maximas criminationes instituitis, de quarum postmodum

complanatione, dum totum reliquum ejusdem icti jam vobiscum foederis tempus discursatione inter principes oratorum inaniter consumitur, vos finitimi omnia vastatis, et diripitis, quaecunque aditu vestro pertingere potestis. Qua quidem praxi atque artificio Tuygon passa, et Ali passa, et qui eos praecesserint, summo studio, atque conatu usi, egregie praestiterunt, ut ego et collega meus Franciscus Zay, qui hujusmodi turbarum et controversiarum causa totum Constantinopoli apud tuum principem Zuleymanum desudavimus quadriennium, facile de his institutis, et praxibus vestris ubique testificari possimus, vobis alioqui hoc interim omnibus locis, quae nunc sub indicibus verbo tui principis scripto confectis, et confirmatis, nulla justa honestaque causa occupatis, possidentibus; adeo vobis et justitiam et injustitiam inservire cogitis, jusque omne commodis vestris accommodatis.

Quod autem ais de induciarum violatione, eam utri parti ascribas, si forte fortuna intervenerit, liberum tibi est dicere quicquid velis. Scio enim pacem et quietem finitimis vestris nunquam placuisse, semperque in occasiones disturbiorum esse intentos, quae nos etiam diutius Constantinopoli tenuerunt. Meministi tamen totam aetatem superiorem serenissimo regi meo a vesiriis passis potentia principis vestri bellum fuisse minitatum, eaque causa non solum in Croatia, in Slavonia et in pluribus aliis locis per Hungariam factae sunt a finitimis vestris depredationes, verum tu cum subjectis tibi zanzgiacchis prodieras in castra, in quibus nos exceperas, et regina quoque Isabella tria jam circiter Transylvanorum millia armaverat et in superiores regni partes contra regem

meum jusserat contendere, quod vel ab ipsomet Francisco Bebecho coram nobis tibi referente audivimus, quando abs te VII millia equitum auxilio memoratae reginae, immo et suo contra filium suum Georgium, postulabat. Quos ob vestros et ob reginae vestrae apparatus majestas quoque regis mei finitimarum ditiorum suarum salutis sollicita delectorum militum curam gessit, et eos eo misit, quo usus et pericula postulabant. Non autem ut vim vicinis suis pacem colentibus inferre cogitaret, sua alioqui tutaret, et vim illam ab se summovertet. Quod etsi princeps tuus probe intelligeret, non tamen, ut vos facitis finitimi, praecipitabat in injurias. Edoctus enim in dies a nobis oratoribus de veris causis, quae vos eum celabatis, et quorum eratis authores atque artifices, prudenter expendebat artes vestras, et id, quod nemini tutela sui esset interdicta. Unde nec a pacis semel sibi jam praeposita voluntate recessurus, nos ad regem nostrum ejus causa perbenigne voluit expedire, dato etiam ad te mandato, quod Bebeko Budae coram nobis ostendebas, ut praefectos tuos arma deponere, et pacem cum rege meo servare faceret. Quae quum sedulo cuncta verbis litterisque tuis ad regem meum missis exequutum te fuisse declarasses, hujusmodique et tui principis voluntatem et tuum animum a nobis quoque affatim cognovisset, subito omnes gentes suas ex finibus tam eas quas habebat apud Jaurinum, quam in Superiore Pannonia contra rebellium turbulentias, removit, et in hyberna transtulit.

Quid viciissim a vestra parte sit hac in re pro aequitate et integritate induciarum tuisque tam promissis speciosis exequutum, aliud sane non est hucusque visum, quam, quod sola castra tua fuerint dis-

soluta, zangziacchosque tuos ad stationes suas remiseris, ut, ni fallor, in finitimos suos quilibet eorum pro virili sua, moreque suo gentilitio incipiat tumultuari. Quia conspicati exercitus nostros ex finibus recessisse, regemque nostrum, et tibi et principi tuo firmiter credidisse, latissime non quilibet seorsum singillatim, sed una plures pluribus locis effusi sunt in excursions. Alii enim profecti in Superiorem Pannoniam gentibus reginae auxilio, totam vallem Muraniensem, et oram Sayo amnis quae loca ad hoc usque tempus nullam hostilitatem Turcarum senserant, nunc ita ferro atque igne evastarunt, ut, facta hominum pecorumque maxima et caede et praeda, nihil prorsus sine clade reliquerint, inibique etiam nunc crudelissime grassari nunciantur. Quod gentes nostrae mandato regis sui attendentes ex hybernis tantummodo respiciunt, prohibiti omnino induciarum sacra violare.

At aequae etiam in Croatia vestri apud Ztegnicznacum, et Topuzcam arces inter Mrysniczam, et Coranam amnes adeo magnam fecerunt depopulationem, ut certe belli manifesti tempore majorem nequivissent. Praeterea, quot etiam alia loca depraedata sunt hoc ipso tempore in Slavonia et in Hungaria nimirum jam a nostro reditu, firmatis tecum induciis, quia majestas regis mei proximis literis suis perscripsit ad te satis copiose, nolo tibi recensere. Tu tamen ubi id tantum de grassationibus tuorum zangziacchorum regi meo rescribas, quod sis eos puni-
turus, credo equidem, sed, ut existimo, non alia poena, quam duorum aut trium afferum. Nec interim cessabunt quotidie excurrere et passim cuncta obvia diripere, sic, ut facile cuivis appareat quomodo et

tu inducias et mandata tui principis observas, et zangziacchos tuos observare facias. Quum ea sola profecto causa ad budensem beglerbegatum sciamus te esse restitutum, uti ab ipsis passis, vesiriis nobis est affirmatum, quod te princeps tuus pro viro moderato, aequitatis studioso, et idoneo ad pacem cum rege meo conservandam, habuerit. Qua quidem opinione quum et tu regem meum speciosis literis tuis, et nos oratores verbis locupletibus imbuerimus, facies valde alienum et a fama et a nomine tuo, si rebus, atque effectibus huic tantae existimationi tuae non responderis.

Ego vero de his ad te quod latius perscripserim, feci ex officio meo, uti pacis cum collega meo Francisco Zay paulo ante legatus, et praesentium induciarum author, et cogente insuper me, una ex parte te, ex alia rege meo clementissimo, qui hujusmodi zangziacchorum tuorum excursionibus minime expectatis, saepius sane coarguit et succenset nobis identidem requirendo, qualemnam vel pacis spem, vel inducias a tuo principe et abs te retulissemus. Eaque propter indignari mihi non debebis, liberius agenti tecum, quin potius modum convenit te non gravate ex his accipere, quonam pacto easdem inducias imposterum per tuos zangziacchos observari facias. Et is modustalis est. Nam si quae inter nos et vos subitaria furta et non meditatae praeparataeque vel hominum vel pecorum, rerumve aliarum depredationes inciderint: non statim ipsimet zangziacchi tui insolenter sibi administrent justitiam, arbitrenturque licere subita et furenti insurrectione confoederatos invadere atque eorum bona populari. Quod quidem immanium et violentorum hominum esse solet, non humanitate

aequitateque utentium; verum per cognitionem, uti jam ante dixi, commissariorum, qui utrinque ex viris probis semper, quum usus postulaverit contraversiarum hujusmodi, poterunt in finibus inveniri ac designari, ad easdem contraversias componendas; sic enim et grassatores nostri a rege suo, et a te vestri facillime inhibebuntur, ne latrocinia exerceant; et ipsae induciae sanctius servabuntur.

Mirari autem non potui satis quando audiui, te non posse, quod nunciasti mihi, zangziacchos tuos in officio continere, et a faciendis excursionibus prohibere. Si enim bene tunc eos continebas, et tumultibus comprimebas, quando adhuc gentes nostrae in finibus armatae excubabant, et induciarum initia tractabantur, nec adhuc tabellarius noster ad principem tuum transmissus fuerat, cum his quae rem de pace concernebant: cur id etiam modo facere nequeas, non video, nec facile credo. Quia pristina tibi autoritas non est diminuta, et Turcas dominis suis omnium gentium quae in mundo sunt inveni ego obedientissimos.

Te itaque, Kaszune passa, insigniter vel tua causa oro, ne velis in posterum hac excusatione uti, quia auctoritatem tuam deprimet, et zangziacchos tuos ad majorem in dies licentiam animabis, eaque fortasse impedimenta reliquae paci afferes et suppeditabis, quae postea attulisse noluisses, quum res secus quam sperasses evenisset. Ego alioqui cum collega meo Francisco Zay, qui nunc hinc abest, non desisto interim apud serenissimum regem nostrum summa diligentia, summisque viribus agere omnia, quaecumque ad bonam et veram pacem inter nostrum regem et tuum principem componendam pertinere judicamus; tu tantummodo zangziacchos tuos fortissime, ut, si ve-

lis, potes, regas gubernesque, et potius paci consulas quam bello, a qua pace princeps etiam vester ac passae vestri vesirii non sunt animo alieni, quod nos satis comperimus; omnesque hoc interim finitimorum controversias, quascunque incidere contigerit, cures humanitate et sedate per idoneos viros, juxta quae jam dicta sunt, cum rege meo componendas, quem vicissim tecum id facturum, usurumque summa sinceritate pollicemur. Vale. Viennae. Secunda Januarii 1558.

LXXI

Oláh Miklós esztergomi érseknek Verancsies Antal.

Antonius Veraneius Agriensis reverendissimo domino domino Nicolao Olaho Strigoniensi salutem.

Recentes veredarii regii Cassovia litteras attu-1558. Jan. 10. lerunt, quibus nunciant castellum Zeőleős acerrime oppugnatum fortissime fuisse a praesidio suo defensum et adhuc esse incolume. Nostras copias quatuor milliaribus abesse ab hostibus, remque utrorumque ad conflictum prospectare, nec certamen eosdem hostes refugere, nostros etiam magno animo affectare, eaque causa passim propius illos accedere, et praeliuros haud dubie, si se exspectare voluerint. Ceterum quum una hostium manus animos fortasse nostrorum exploratura, reliquas copias praecessisset, graveac-

cepit detrimentum. Nostri etiam de illorum excursu mature facti certiores obviam eis submisere, improvisoque in illos facto impetu, etiam fugavere, caesisque et captis in fuga non exiguo numero Melchiorem quoque Balassam vulgatum est in potestatem devenisse, quamquam non omnino confirmatum. Desideratus est ex nostris ad Munkach Michael Perenny, ex hostibus vero ad Zeoleos Georgius Tarzay, ambo, ut refertur, ictu machinae bombardicae et recenti temulentia acti dum oppugnatione castelli caepta temere discurrunt, inter primos, Turcas autem numero vix septingentos apud Bala Zent Miklos esse, eosque dies ac noctes sollicitari a regina, ut suis auxilio proficisci velint; sed obaudisse primum aliquamdiu, postremo obsides ab ea postulasse, quo secure proficisci possint; quibus quum fuissent missi duo quidam milites gregarii, eos habuere contemptui, reginaeque responderunt, hoc non esse tanti, ut vel unam ovem capitibus eorum freti, periculo exponere dignarentur. Verum si eis miserit Georgium Bathory, Joannem Terek, Melchiorem Balassam et Thomam Varkoch, in ejus castra sine mora profecturos. Quod qualiter debeat intelligi, nemo, meo iudicio, tam potest esse caecus, qui nesciat; nisi si ii, qui data opera sapere nolint. His tamen litteris illud etiam ascriptum est, quod et Turcae dissolvi jam incepissent, et rebellium copiae novo delectu augerentur ex Transylvania, quamquam neutrum certo nuncio. Et credibilis est potius utrosque augeri quam minui, nobis praesertim inermibus, et cum jactura induciis fidentibus male hostium fide servatis. Quum interim et Georgius Bebek non obscure videtur opinionem illustris et magnifici domini palatini comprobasse, quam in-

terdum superioribus diebus de levitate illius usurpabat, nimirum quod haud ita multo post novam esset recantaturus palinodiam.

Accersitus enim a Telechessi, contra vim rebellium contendente, nec ipsemet ad eum profectus est, nec misit suos milites. Et quia ad hoc castellum quoque in tertio a Cassovia milliario aggressus est erigere, meae quoque nihilo secius subscribit conjecturae, quem quidem ego semper ab initio clam cum patre sensisse crediderim, communibus bonis ac fortunis consulturus; eapropter, utinam post quempiam dolum malum hujusmodi, vitium etiam in gentes nostras, aut in aliquod municipium nostrum non adjiciat. Hoc alioqui hujus victoriae principio satis nos puto contentos esse posse, modo exitu quoque optato frui et gaudere possimus, nec, ut saepe accidit alias, summa rerum fraudemur, et initia duntaxat nobis cedant, fine hostes potiantur. Deus tamen meliora; et ego quidquid deinceps quoque supervenerit, significare non praetermittam. Deus Altissimus dominationem vestram reverendissimam incolumem ac felicem servet. Viennae 10. Januarii 1558.

LXXX.

A királynak Verancesics Antal és társai.

Sacratissima et serenissima majestas regia, domine domine
nobis clementissime.

1558. febr. 21.

Heri quum huc venisset magnificus dominus Georgius Bebek, et adesset hic etiam magnificus dominus Jacobus Zekely cum praeceptorii litteris vestrae majestatis ad eundem dominum Bebek datis de restitutione oppidi Zikzo generosae dominae Catherinae Zekely, relictæ quondam magnifici domini Michaelis Perenny faciendæ, egimus cum eodem domino Bebek diligenter et usi omnibus opportunis rationibus, ut eum induceremus ad acquiescendum voluntati ac mandato vestrae majestatis. Aliud nihil obtinuimus, quam quod vicissim instantissime nos petierit, vellemus apud majestatem vestram intercedere, ut respectu personæ ejus et fidelium servitiorum suorum dignaretur eum in tutela portionis oppidi Zikzo, quæ filios Francisci Perennii, nepotes suos concernat, gratiose conservare usque ad eorum legitimam ætatem, et non alium; quum dicat, eos paternam culpam non attingere, et maximæ ignominiae futurum, si dicta nepotum suorum tutela alieno cuiquam committeretur; quumque addat etiam, non parum servivisse se majestati vestrae in fidem et partes ejus concedendo, summaque perseverantia reliquum quoque tempus vitæ suæ sit in majestatis vestrae fidelitate acturus, ea se ait

fiducia memoratam portionem oppidi Zikzö in suas manus accepisse, qua non dubitavit praefatam tutelam nepotum suorum impetraturum. Nec id optare se alia causa, quam ne alieni dictorum suorum nepotum hereditatem distrahant, neve loca illarum partium a Turcis infestentur, uti jam accincti fuerant ipsum Zikzo invadere audita morte Michaelis Perenny, qua etiam de causa, ipsis oppidanis exigentibus, castellum ibidem erigere inceperat. Quod quia mox accepto vestrae majestatis mandato sustulerit, supplicat ut ei saltem tutelam dimidiati oppidi memorati, nomine supradicto gratiose velit concedere, et tametsi jam antea etiam supplicaverit pro ista gratia, non obstante quod adhuc tot mandatis vestrae majestatis parere ob fiduciam, quam dicit se habere in vestrae majestatis benignitate et clementia, distulerit, denuo voluit experiri, num hoc ipsum gratiae ab ejusdem majestatis vestrae clementia poterit obtinere; quod si obtinuerit, promeriturum se se fidelibus suis servitiis pollicetur; sin minus, justitita mediante tentabit jure suo eidem vestrae majestati demonstrato ac declarato. Aegerime enim fert, si id ei gratiae denegabitur, quum dicat se non ignorare quanti momenti et sit, et haberi debeat ejus apud majestatem vestram fidelitas; eamque quanto et quam accurato studio, quotque rationibus partim extollat coram nobis, partim eidem vestrae majestati addicat ac dedicet, eloqui sane vix possumus. Nosque quum videamus hinc temporis conditionem, hinc statum horum finium plurimis periculis obnoxium, pro eodem domino Georgio Bebek intercedere apud majestatem vestram, ejus ipsius rogatu adducti sumus, supplicamusque humillime, dignetur benignius secum de

hoc statuere, quam hucusque statuerat, praesertim quum affirmet jurejurando, se alteram portionem praefati oppidi libere et pacifice memoratae dominae viduae, relictæ quondam domini Michaelis Perenny, possidendam permissurum, altera suae tutelae ad tempus concredita. Ad quod quum vestrae majestati non sunt modi defuturi, ut videlicet dominus etiam Bebek contentetur, postquam tot locis in his partibus laboretur, nec uno tempore illis commode ordinaria majestatis via succurri possit: putamus, dandum esse aliquid adversis temporibus. Nihil alioqui agere pro fidelitate nostra intendimus, quod vel consilio majestatis vestrae voluntatique adversetur, vel ejusdem rebus obesse possit. Ubi autem de mandato vestrae majestatis ad occupandum dictum oppidum mihi Johanni Pethew dato fecimus mentionem, si ultro acquiescere voluntati vestrae majestatis recusasset, respondit, eum id quidem facile perfecturum, quoties voluisset, quum ipse ad obsistendum non esset gladium suum districturus, iri tamen non mediocriter offensum, ut cui de gratia vestrae majestatis erga se minueretur fiducia. Nec ab eo aliud consequi tantisper potuimus, dum ab eadem vestra majestate alia redierit deliberatio. Quare, clementissime rex, quid sit ad postremum de hoc decernendum, solius sapientissimum vestrae majestatis consilium novit; existimamus tamen nos, non alienum fore a commodis Vestrae majestatis hujus temporis, si idem dominus Bebek exaudiretur, ne his fidelitatis suae apud majestatem vestram primordiis ejusdem sibi gratiam, vel in re non admodum magna et alioqui etiam temporaria defuisse queri quandoque possit, debiliteturque in fiducia (uti sunt hac tempestate hominum mores), quam se in ma-

jestate vestra collocasse dicit. Nam ad nos interim quod attinebit, eum in obsequiis majestatis vestrae, quanta maxima dexteritate poterimus, retinere enitemur. Deus optimus maximus sacratissimam majestatem vestram una cum serenissimis liberis suis dominis nostris clementissimis incolumem et felicissimam conservet. Cassovia XXI. Februarii 1558.

LXXXI.

Ugyanannak ugyanazok.

Sacratissima et serenissima majestas regia, domine domine nobis clementissime.

Ne alteri quoque parti desimus, cui diligentissimam, ^{1558, Feb. 21} et fidelissimam operam praestitimus, si modo rem pro arbitratu et conatu nostro apud hominem durisane et spinosi ingenii conficere potuissemus, magnifico etiam domino Jacobo Zekely dedimus ad majestatem vestram litteras, cujus generosae dominae sorori relictae magnifici domini Michaelis Perennii, quo pacto commodè possit hoc in praesenti negotio subveniri sine turbis harum partium, et incommodis ac molestiis vestrae majestatis, si hic dominus Bebek coacte coeperit ab oppido Zikzo removeri, certe non videmus, nisi si re in aliud tempus dilata, opportunior et vestrae majestati et fidelibus suis facultas exspectabitur; quum hic homines eo videntur prolapsi esse temeritatis ac licentiae, ut jam ad agendum bona rectaque cogi eos oporteat.

Donec autem hoc funestum tempus duraverit, quid cum quoque, et majestatem vestram, et fideles suos ministros agere conveniet, majestatis vestrae est et judicii, et voluntatis; quum nos interim omnem operam et industriam nostram adhibaturi simus, ut, quaecunque per nos hic aguntur, ab omnibus incommodis et molestiis vestrae majestati pro viribus nostris caveamus. Quam Deus optimus maximus incolumem ac felicissimam conservet. Cassoviae XXI. Februarii 1558.

LXXXII.

Torda Zsigmondnak Verancsics Antal.

Antonius Verancius episcopus Agriensis Sigismundo Torda salutem.

1558. febr. 22.

Nescio equidem unde suspicionem meam, Sigismunde charissime, de absentia tua in meo istuc adventu habueris suspectam, quum certe nulla laborarim, nec quisquam dubitare debeat in assiduo te esse motu, quicumque munus tuum noverit in republica. Et si forte manifestius doluerim, quod tum abfueris, quum ipse aderam: amor potius tribuas, quo te non mediocri prosequor, quam suspicioni, de quo scribis. Aequae enim videre te desideravi, ac sane et nunc desidero, atque tu me. Idque si utrique nostrum dedisset fortuna, quod optaveramus, non solum de legatione mea, quae multa habuit digna auditu, et

de rebus ad historiam eorum pertinentibus, quae a Moesia Superiore usque ad Propontidem, et a Bosphoro Thracio in Cappadociam usque per Pontum, Bithyniam et Galatiam et Phrygiae partem viderim et perlustrarim, conferre tecum potuisse; verum etiam de compluribus aliis, de quibus tu quoque non minus lucem tuorum studiorum voluptatemque percepisses, quam ipse perceperim. Quod, quia sic in fatis fuit, ut utrique nostrum in praesentia negaretur, rem omnem in Deum referamus, et illud tempus his ipsis votis nostris aequo animo exspectemus, quod idem Deus nondum concesserit. De aliis hoc habeto: me hodie Agriam versus bonis angelis Cassovia solvisse. Quo si te aliqua publica causa excurrere contigerit, vel etiam mei privatum studium aut tua, necessitas induxerint, Agria mea sic utere, ac tua licebit. Nec de me quicquam superaddo, nisi quod me Verancium sis habiturus Verancius. Vale, ac felix esto. Cassoviae XXII. Februarii 1558.

LXXXIII.

Maximilián királynak Verancsics.

Ad sacratissimum regem Maximilianum.

1558. mar. 14.

Clementissime rex. Quum egregius dominus Franciscus Pesthiensis de mandato magnificorum dominorum commissariorum, quibus cura finitorum locorum incumbit, Agriam me deduxit, et in possessionem episcopatus juxta morem in talibus consuetum instituit: majestatem vestram scire humillime cupio, eum sese mecum perofficiose, ac summa humanitate gessisse, etsi omnia tamquam ad majestatis vestrae dignitatem, et arcis hujus ac meum commodum, quietemque, si qua modo quies in his finibus esse possit, pertinuerunt, exequutus sit, ut debuit. Quare, etsi illum virtus et probitas et fides sua erga majestates vestras affatim commendent, non deero tamen ipse etiam eundem vestrae majestati peculiariter commendare, et supplicare, ut eum dignetur habere commendatiorem, quo in dies melius ac melius eidem inservire connitatur; quum hujusmodi fructus clementium et benignorum principum gratiae a bonis et fidelibus servitoribus referre soleant.

Proinde clementer meminerit majestas vestra, quod iter Agriam suscepturus petiveram ab eadem majestate vestra Stephanum Zolthay in comitem, qui me huc deducere debuisset; nunc perspecta viri integritate morum et in re militari industria, sagacitate

que, in tuendis finibus necessaria, praefeci illum alteri castellanatui ea conditione, si majestatibus vestris probabitur. Quare quum elapsi temporis praefecti minus visi sunt mihi diutius in his officiis retinendi propter bonas rationes, de quibus postea latius scribam: supplico, dignetur et ipsa majestas vestra contenta esse hac electione pro perpetuis meis servitiis, et concedere, ut hic maneat, et dare etiam apud majestatem regiam sacratissimi sui parentis, clementem operam ne mihi adimatur, quum magnificus dominus Zay facile jam providerit de alio, qui capitaneatus sui Comaronii vicem gerat. Nam etiam provisorem ejusdem Stephanum futurum collegam quaero, qui non erit minore virtute et peritia militari praeditus, quam sit Paulus Sarkandy, quem alioqui et bonum et militarem virum non ignorem; quemque illi substituere cogito, Franciscus Jakussyth est, de quo mihi etiam magnificus dominus Turzo fecerat mentionem.

Ceterum quod attinet ad castellum Putnok, cujus cognitionem majestas vestra in me rejecerat, diebus proximis magnificus dominus Sigismundus Ballassa miserat ad me homines suos cum unis litteris vestrae majestatis ad eum datis, quibus ei intimaverat, quod praefati castelli cognitionem mihi commisisset, quodque de re ad dictum castellum pertinenti me cum agere debuisset. Cui ego per praefatos homines suos, quum declarassem majestates vestras quamplurimis ex locis ac personis fidedignis fuisse informatas, memoratum castellum opportunissimo loco ad regni commoda esse collocatum, easdemque omnino decrevisse ut servetur, addidi, nequaquam id aliter fieri posse, quam ut aut eius dominus illud retineat beneque custodiat, postquam in manu sua simul cum bonis

suis existeret; aut si id minus vellet, ipsum castellum cum suis bonis ei homini ad manus restituat atque assignet, quem illi majestates vestrae ostendissent; nulla enim ratione easdem velle, ut ejusdem castelli locus maneat sine custodia atque praesidio. Et ne forte existimasset majestates vestras idem castellum hoc praetextu, dedita aliqua opera, ab eo alienandi quaerere: dedi illi consilium, ut ipse potius memoratum castellum retineret, quam cuiquam alieno cederet, et curaret majestatibus vestris gratificari hujusmodi officio, quod ei et honori et commodo esset successurum.

Non defui plura quoque similia illi suggerere, ut eum omnibus modis inducerem ad illud castellum retinendum et conservandum, considerandumque, quonam pacto et gratiae principum acquiruntur, et patriae tum saluti, tum utilitati cura impenditur. Renunciavit per eosdem homines, sibi meum consilium placuisse, eoque etiam in posterum omnibus suis in rebus usurum, quod agnovisset me sincere secum agere; quin etiam quod me in patrem esset deinceps habiturus, velletque mea in omnibus his uti opera, favore et patrocinio, quaecunque apud majestates vestras negotia sibi emersissent; quod demum hominem quoque hujus ipsius rei gratia ad majestatem vestram esset quamprimum destinaturus, quo de ratione intentionis ejusdem castelli secum transigatur. Quum autem ejusdem castelli dicit esse bona perexigua, nec ea sufficere ad illud conservandum sine aliquo publico vel regni, vel majestatumstrarum subsidio, quorum bonorum regestum ab eo habitum his inclusi: fortasse non esset alienum, si majestates vestrae id ei subsidii ad memorata bona facere dignarentur, quod cuiquam

alieno homini novo, militique gregario faciendum decernerent, si sic accidisset, ut a domino Balassa reciperetur, alioqui de hoc majestatum vestrarum expectandum est judicium ac deliberatio. Et licet significaverat mihi, quod quando secus fieri nequiret, quam ut cum castello bona etiam ejus restitueret, eadem bona dimidiatim esset dimissurus, altera parte castello conservando attributa, altera pupillo educando apud se retenta: respondi, non id eum decere, sic cum majestatibus vestris agere, quum pauculis etiam bonis hujusmodi bifariam in hunc modum divisus, parum essent utrobique futura utilia et citius desolarentur, quum praefectus castelli, parcendo interim parti suae, pupilli partem atterere non esset cessaturus, quod exemplis non caret; et esse ac futuram majestatum vestrarum voluntatem, ut aut ipse hoc castellum conservaret, postquam difficilius bonis se ejus spoliari patitur, aut cum castello bona etiam universa restituat; aequitatem hoc postulare, ut castellum suis bonis foveretur, cujuscunque manibus fuisset concreditum. Summa itaque haec est, quod quantum per internuncios de voluntate ejusdem domini cognoscere potuerim, libenter idem castellum retinebit, si vel mediocre aliquod subsidium illi e publico concedatur. Et quia omnino hac de re et conventionem missurus est hominem suum ad majestatem vestram, uti mihi est pollicitus, petiit a me 20 aut 25 peditum auxilium ad suos 30, qui memoratum castellum interim retinere debebunt, donec secum vel in hanc, vel in illam partem transigatur: ego, etsi sciverim eum non indigere tam exiguis sumptibus, quum ipse vix adhuc numum ex episcopatu perceperim, petitioni tamen ejus nolui deesse, ut hominem in officio majestatum vestrarum continerem.

Negatis itaque illi peditibus meis peculiaribus, ne si quid interim castello periculi accideret culpa peditum, ea in meos transferretur, ipseque poenas luerem; stipendium de meo 20 peditum obtuli, quos tamen ille conscribat, et suo nomine in idem castellum mittat, regatque, ut voluerit. Quicquid jam de hoc erit statuendum, in majestatum vestrarum est potestate, cura tamen habenda est maxima, ut mature ejusdem castelli constitutur ratio, quia rebus regni, quoad eorum locorum beneficium, oportunissimo loco omnes affirmant esse situm.

Addo in fine de singulari quodam certamine, quod hic apud Agriam hesterno die miles quidam noster cum Turca quodam hathvaniensi habere debuerat, quod quidem ego ne fieret prohibere omnino institueram, ut rem et commercio hostium infido et tam propinquo plenam periculi, utilitatisque regni publicae nullius. Verum quia ejus constitutio antequam huc ego advenissem eo jam militum ardore, studioque honoris defendendi processerat, ut et loco et die dicta. ac significata hosti certaminis res immutari nullo pacto sine infamia potuerit, coactus itaque militibus assentiri, una res consilium et vota mea juvat, quod quem nostri locum Turcis sub ipsa fere arce constituerant, ad eum accedere noluerunt, nec ad eum nostri, ad quem Turcae voluerant. Sic heri profectis nostris pulcherrimo sane apparatu tam equitum, quam peditum ad mille ferme armatorum numero; per integrum ferme diem in futuri duelli loco Turcas exspectarunt, sed frustra, quia nec venire, nec significavere quicquam, et hac ratione liberati ab hac molestia, edixi omnibus militibus, ne in posterum quicquam vel agant, vel aggrediantur de hujusmodi certaminibus, prohibitu-

rum me omnino, ut vel literas ab hostibus de re simili accipiant, donec a majestatibus vestris edocear, quo modo me in his posthac gerere debuero; interea tamen majestas vestra dignabitur acre mandatum ad me dare, ne admittam hujusmodi certamina, quae semper importarunt non exiguum quodpiam periculum, et utilitatem nullam, quum interim et explorationes fiunt ab hostibus, et eorundem metuuntur perfidiae. Deus opt. max. vestram sacram Majestatem salvam ac felicissimam quam diutissime conservet. Agriae 14. Martii 1558.

LXXXIV.

Perényi Gábornak Verancesics.

Ad magnificum dominum Gabrielem Pereny.

Magnifice domine, amice nobis observandissime,^{1558, mart. 22.}
 Salutem et servitiorum nostrorum commendationem. Stephanus noster Zolthay cupidissimus dominationi vestrae magnificae satisfacere juxta sua promissa; summa sollicitudine est pro equo eidem comparando; sed quia tam cito nulla ei facultas offertur, tardius suis promissis satisfacit; nam quum multo majores viri quam est ipse Zolthay nequeunt equos invenire quales optarent, et essent necessarii, non est mirum si hac ipsa difficultate idem Zolthay laboret; at quum

nec nunc equi digni vestra magnifica dominatione, nec pecuniarum in praesentia facultas offertur eidem Stephano Zolthay, decrevimus nos et ipsum Stephanum Zolthay debiti hujus molestia, et magnificam dominationem vestram expectatione satisfactionis ejusdem liberare, ut sciat eadem vestra magnifica dominatio, quantum habeamus animum et voluntatem eidem dominationi vestrae magnificae gratificandi. Propterea ubi ab eodem Zolthay, si equum non haberet, trecentos florenos exigit, quos a perfido Turca expetiverat, quod certe pretium nimium est, praesertim quum a Christiano exigatur: nos ut voluntati ac desiderio vestrae magnificae dominationis satisfiat, parati sumus pro eodem Zolthay decimam vinorum possessionis Tholchwa, quae est in bonis vestrae magnificae dominationis, florenorum ducentorum quinquaginta in comitatu Zempleriensi concedere in sortem praefati debiti ejusdem Stephani Zolthay, ex qua non solum 300, sed etiam 400, 500-rum florenorum utilitatem dominatio vestra magnifica est perceptura. Rogamus, ut hac satisfactione respectu nostrae etiam amicitiae velit esse contenta, nec gravetur, hac nostra voluntate et hoc nostro amico studio erga se cognito, hominem aliquem suum ad nos destinare qui et ipsius Zolthay obligatorium debiti sui chirographum nobis afferat, et per quem nos etiam praefatae nostrae decimae eidem vestrae magnificae dominationi deputatorias litteras remittamus. Nec existimet dominatio vestra magnifica, quod idem Zolthay eidem illuderet, sed revera nondum refecit damna sua in captivitate accepta, vestraeque magnificae dominationi nunquam erit ingratus, nec beneficiorum suorum erga se immemor existet.

Faciet itaque dominatio vestra magnifica rem nobis quoque admodum gratam, si illum solito favore suo prosequetur. Nam si nos dominationem vestram magnificam amamus et honoramus, volumus, ut etiam nostri eandem et ament et observent. Sed hoc diu jam sponte sua Zolthay facit. Restat, ut Deus optimus maximus vestram magnificam dominationem incolumem ac felicem conservet. Agriae. 22 Martii 1558.

LXXXV.

Mihály testvérének Verancsics Antal.

Michael, frater charissime, salve.

Quod hactenus ad te de peculiaribus rebus nos^{-1558, mart. 27.} tris nihil scribere potuimus, accidit cura et sollicitudine cognoscendi res ac universum statum episcopatus hujus nostri agriensis, quod initio nobis fuit faciendum. Scito jam nunc, egere nos eo provisore, qui esset nobis ac rebus nostris accommodus. Messis enim et multa est et multiplex, et quod ad summum tibi dicam, altero quopiam me opus habeo, nisi velim dispergere et prodigere, vel ut rectius exprimam, alienis negligere, quod nobis ipsis colligere et accumulare possemus. Tu igitur is peridoneus esses nobis, frater, iudicio nostro, et facile posses hoc subire munus, induciis praesertim cum Turca factis, si modo tam et diu et longe ab domo et ab charissimis tuis abesse non gravabere; vel potius si idem ipsi tui charissimi absentiam tuam perferre poterunt. Haec autem res quoniam indiget consilio,

deliberatione et facto quam celerrimo, quod jam initia curandorum redituum instent prae foribus: quid aut animi aut facultatis ad hoc sis habiturus, facias me certiore omni festinatione festinantius. Hominum enim hujusmodi tantam penuriam ubique video, quocunque intendam animum, ut in ipsa multitudine juxta factum cynici Diogenis vix invenio virum, quem arripiam optabilem; et tametsi non eum tantummodo quaeram, qui ad hoc officium esset industrius, et bonus calculator, quali utique non admodum careremus, verum tamen pro ejusmodi laboramus, qui frugi utilitatibus nostris foret, quique ea nobis esset apicula, quae nostri viridarii flores nobis exugeret, et nostra curaret alvearia. Tute nosti cetera. Vale. Datae Agriae. 27. Martii 1558. U. I. Certus autem de honesto tuo salario juxta morem usitatum, animum tuum quam celerrime litteris tuis ad me perscribas. Quum interim in hoc sum, ut ad te per hominem proprium ea transmittam, quae exspectas tu, et res meae postulant. Tuus Agriensis.

LXXXVI.

Verancsics Antalnak Torda István.

Reverendissime domine, patrone omni officio et^{1556 mart. 8.} observantia colende, salutem et prompti servitii commendationem. Redditae mihi sunt heri literae reverendissimae dominationis vestrae, in quibus eadem se excusat, quominus mihi decimam aliquam conferre possit, primum, quod omnes fere decimae jam sint aliis collatae; deinde quod non paucae sint in manu mea cum collega meo Francisco Pestiensi, unde non debeam petere id quod habeam. De prima causa doleo profecto meam infelicitatem, qui solus decimis Agriensibus excidi; quod vero ad alteram attinet, meus mos nunquam fuit, ut decimas ad usum regium, id est ad publicas necessitates sequestratas, mihi ipsi usurparem aut in privatum commodum verterem. Donec ego decimas regias tractavi, sincere et inculpate tractavi. Nunc eas alius tractat. Ego neminem culpo, loquor de me ipso; sed ejusmodi peculatum dignum esse statuo extremo supplicio. Si aliquis hoc de me reverendissimae dominationi vestrae exposuit, lapsus est bonus vir, ne quid dicam gravius. Nunc ita est ratio decimarum regiarum, ut ego eas nec curem, nec administrem, nisi quantum consilio providere possum, ne detrimentum sacra regia majestas capiat. Quicquid autem dominus Franciscus Pestiensis, cui ea provincia incumbit, a reverendissima dominatione vestra conduxit: mihi cum eo nulla intercedit conspiratio lu-

cri ex regiis decimis aucupandi, ac tale flagitium procul a me abesse volo. Si quas autem decimas sibi privatim conduxit, eas mecum non participat, neque ego opto particeps earum fieri; vellem tamen si reverendissima dominatio vestra mihi significaret, quas ei decimas in rationem regiam locaverit. Me vero, obsecro, dominatio vestra reverendissima ex meo ingenio, quod dominationi vestrae reverendissimae cognitum et perspectum esse scio, non ex aliorum iniquis sermonibus aestimare velit. Sunt enim homines levissimi, qui ex innata sibi malitia virorum bonorum detrimentis gaudent, a quibus nihil unquam eis accidit adversi. Quomodo autem cum reverendissima dominatione vestra dominus Pestiensis convenerit, ego nescio, ac nollem ea mihi ascriberet, si quae in ea conclusione reverendissimae dominationi vestrae ingrata posuit. Mihi, reversus, dixit: Ruscam a reverendissima dominatione vestra domino Paulo Zarcandio esse locatum. Quod si pars aliqua earum decimarum, quae ad Cassoviam et Saros sunt conductae, mihi cederet, nulla esset causa, cur ego a reverendissima dominatione vestra quicquam peterem. Sed absit a me nefas, quod nec in aliis ferendum judico. Ingenue ad reverendissimam dominationem vestram scripsi, sicut fert mea natura; et petii ingenue, ut aliqua decima reverendissima dominatio vestra egestatem domus meae levaret, non ea astutia, ut undique in me lucra confluant. Neque enim magna affecto, sed pro mea tenuitate parvis sum contentus. Nunc quoque peto a dominatione vestra reverendissima, tanquam a patrono meo singulari, si adhuc locus aliquis petitioni superest, ut mihi quoque veterano servitori suo exigua aliqua decima providere dominatio vestra reverendissima velit.

Reverendissima dominatio vestra novit, quae nondum sint locatae, ego nullam nominare possum. Si decimam Zytko integram non potest conferre, saltem partem ejus dimidiam vel tertiam reverendissima dominatio vestra concederet pro rata parte pretii. Quod ita peto, si est facultas rei et si sine molestia dominationis vestrae reverendissimae fieri potest. Si non adparet ratio, qua meae quoque necessitati reverendissima dominatio vestra queat succurrere, feram aequo animo sortem meam infaustam, et vestrae reverendissimae dominationis veterem erga me benevolentiam boni consulam. Certum tamen et sibi persuasum habeat dominatio vestra reverendissima, hoc excepto, si quid mihi dominatio vestra reverendissima de sua in me gratia deciderit, decimam hoc anno in domum meam nullam ingressuram.

Nudius tertius accepi litteras spectabilis et magnifici domini Stephani Dobonis, hodie vero a reverendissimo domino archiepiscopo litteras mihi veredarius reddidit; scribunt ambo sacram majestatem regiam ad paschae ferias Viennam redituram. Quod restat, dominationem vestram reverendissimam valere quam bellissime, et rebus Agriensibus diu feliciter praeesse ex animo opto. Eperies XXVIII. Martii, anno 1558. Reverendissimae dominationis vestrae perpetuus servitor Sigismundus Torda.

LXXXVII.

Magócsi Gáspárnak Verancsics Antal.

Ad Gasparem Magochy.

1558. apr. 18

Binas nuper litteras dominationis vestrae egregiae a magistro Gregorio Zygediensi, canonico nostro accepimus, et ea quae tam his litteris suis ad nos perscripsit, quam quae prius per fratrem Ambrosium, postea per hunc ipsum Gregorium oretenus nobis referenda nunciavit, intelleximus. Ad omnia itaque singillatim, et suo ordine responsuri, quem ad modum proxime nos facturos recepimus. Non parva nos habuit admiratio desiderii vestrae egregiae dominationis, quod habere se de successore in Giulensi ista sua praefectura obtinendo nobis ostendit; qua quidem praefectura, quum tanto tempore ipse summa integritate, summaque virtute ac laude gesserit militari, raesertim tot vallata hinc factiosorum intemperiiis, illinc Turcarum hostilitatibus, nemine interim adhuc reperto, qui eandem istinc vel exigere, vel amovere, quod sciremus, contenderit, admirari sane videmur non immerito, quod ipsamet dominatio vestra egregia sponte sua sese eadem velit abdicare praefectura. Quae quidem, si genus suum esset in istius regni partibus exterum, equidem non invite crederemus tam diuturnam Gyulae suam mansionem taedium molestiamque illi attulisse; quum tamen in hisdem partibus sit indigena antiquissimus, stemmateque polleat primario,

cur patriam et genitale solum suum coepit fastidire et curam ejus alieno cuiquam velit permittere; at quum fortasse non desunt, qui hiant, non satis plane perspicimus, minusque adhuc induci potuimus, uti ad caesaream et regiam majestatem dominum ac principem communem nostrum elementissimum pro ista petitione sua scribere festinaremus. Idque duplici causa. Altera, quod hoc officium non putavimus ad verum amicum pertinere, dubii an amico nostro utile atque honorificum esset futurum. Altera, ut huic deliberationi mora aliqua interponeretur, donec aliud quodpiam solidius et utilius hac de voluntate sua caperet consilium, si forte istud, in quo nunc persistit, vel ab aemulis illi aliquibus fuisset maligne subditum, aut aliqua alia ratione non satis firme illud suscepisset; uti magnis etiam viris et majoribus nobis, gravi quidquam cum poenitudine evenire consuevit exitu rerum suarum non proviso. Aequae enim consilia ac judicia humana facile falli solent, et praesertim ea, quae non admittunt aliena, calculumque amicorum non explorent; quum a natura ipsa insitum sit hominibus, res alienas acutius et diligentius rimari ac perspicere, quam curare et introspicere suas. Propterea dominationem vestram egregiam rogamus, ut si forte fortuna eam de his liberius et familiarius commonemus, ne velit vitio nobis vertere, quia quum ei fraterno afficiamur affectu, cupiamusque multo majorem et honoratiorem fieri, nollemus ut hoc suum subitarium fortasse desiderium praecipitaret, a quo aliqui si decedere mutareque sententiam noluerit, mature cupimus edoceri, parati eidem et in hoc et in aliis rebus summo studio gratificari, quas ejusdem commodo praestare poterimus, cupientes domina-

tionem vestram egregiam non in ista solum, in qua nunc est, fortuna conservari, sed etiam ampliorem eidem dari, uti viro, qui jam cum summis proceribus afflictæ et prope eversæ patriæ nostræ adjumento esse possit. Haec ad ea, quæ oretenus nobis dominatio vestra egregia nunciaverat, respondimus. Ad ea vero, quæ de litteris regiis ad illam datis interceptisque a factiosorum satellitibus scripsit, non habemus omnino, quid dicamus, quum nihil de eis antea intellexerimus; caesareæ tamen ac regiae majestati domino nostro clementissimo per primos tabellarios, ut nos est hortata, scribemus, eamque admonebimus, ut si quid in eis fuerit ardui cujuspiam negotii, eas clementer aliis reficere non dedignetur.

Quod de Transsylvanorum proximis comitiis nihil amicus ille suus fuerit ausus scribere vel nunciare, credendum est; redacti enim miseri illi populi sub jugum turcicum partim sua propria voluntate parum sano consilio, partim quorundam desperatione et cupiditate, non est mirandum, si et securitatem et libertatem amiserunt, quam quidem sub imperio turcico nulli unquam omnium mortalium, qui in eorum potestatem devenerunt, diu salvam atque incolumem obtinere. Id quod nos cum magnifico domino Francisco Zay legatione nostra apud eum principem proxima satis sane didicimus; tametsi tota jam etiam Hungaria probe cognoverit, suis propriis malis et experientis edocta, potissimum vero Budensi excidio, quæ civitas non sane alia causa, quam praetextu falsæ et insidiosæ charitatis, qua princeps ille simulavit se posteritati Johannis regis affici. *)

*) Kimaradt: „avulsa est“ vagy hasonló jelentésű ige.

Nec dubitandum est, quod nisi, eadem posteritas et qui illi adhaerent, fucum hunc primo quoque tempore animadverterint, providerint, et mature suis rebus consuluerint, brevi profecto in se et ipsamet, et ipsi Transsylvani experientur, nec id quidem seculus, quam jacturam Budae. Videant igitur omnes, consulimus, quorum cum fortunarum et libertatum, tum otii et salutis res agitur. Quia si jam reginae atque ejus filio punishmentem sub virga ferrea sine respectu Turca minetur publicitus, nisi fecerit ejus imperata: quid quaeso, actutum Transsylvanis non imponet servitutis? idque si sit per unum apparitorem chyau-sum, quid non ita multo post a zangziachis et passis non sustinebunt, quum illorum cervicibus imminuebunt portis provinciae eorum occupatis, uti jam ternas occupaverunt: Lyppae, Transalpinae, Moldaviae. Quare exclamemus ambo: o infelices et sine consilio! Utut tamen ipsi soli voluerunt, sic habeant. Caeterum quod de aliis, quae modo fiunt, in eadem Transsylvania scribit, ea omnia et plura non ita pridem aliunde etiam intellexeramus, quod videlicet Francisco Bebeccho capitaneatum et omnes reliquos titulos, quos in eum congesserant, abrogassent, quodque eos Melchiori Balassae conferre voluerint, ipse vero eos assumere noluerit. Quum ne Joannes quoque Terek comitiis interfuerit, ob satis enormes quasdam causas a Bebeccho in eum et in Melchiorem Balassam machinatas eo quod cum socero suo libenter eodem coelo ac solo tectoque frui audeat. Quapropter postquam sic inter sese columnae posteritatis Joannis coeperint dissentire et deflagrare mutuis odiis: palam est, eas diu non staturas, nec futurum aliud, quam ut consilia quoque et conatus eorum in perniciem patriae suscepti saniores cursum incant et defrauda-

ta illa plebecula resipiscat, verumque ac legitimum regem suum agnoscat, atque ad eum revertatur, ne prorsus evertatur.

Jam vero de nugis gallicis nobis sane non ignotis, quas Christophorum Bathory a Somlyo scribit dominatio vestra egregia ab eo rege attulisse, non est quod aut ipsa magnificiat admireturque, aut nos rescribamus, nisi et vel ex hoc regis illius hostilem in Christianorum statum agnoscat voluntatem, et perniciosissima studia. Qui provinciae transsylvanae jam prope circumventae et hiatu hostis haustae, viduae quoque unius ac pupilli perangusta fortuna subnixa periculo, cupiditatibus suis adjumenta quaerat, jamque in talem eos choream induxerit, cujus finis et ipsis et multis sane aliis luctuosus erit. Idque non a nobis solum habeat dominatio vestra egregia pro vaticinio, sed pro re jam non obscure cognita, coeptaque ad effectum duci, ejusmodique à nobis, quod tam aperte referantur, velimus, nemo offendatur, nam et nos aliquid fuimus in hoc ipso labyrintho et in hac tragoedia; saepissime isthaec omnia et palam et occulte, ut non caecus, videns, vaticinati sumus, quae jam illis partim evenerunt, partim non remote immineant, caventes commodis et incolumitati publicae; sed minus nobis creditum est, quod etiam tunc simili aegritudine mentes quorundam laborabant. Nunquam tamen gravius aut ipsi Transsylvani, aut ipsorum domini, quos intempestive, ultimoque suo ac sane nostro etiam excidio cervicibus suis imposuerunt, lapsi sunt, quam hoc tempore; nec jam aliud in re perpetrata restat dicere, quam ut oretur Altissimus, velit concedere, ut et ii et illi errore periculoque suo prospere agnito et probe perspecto, corrigant, quod errarunt, et declinent periculum, quod

construxere sibi. Caeterum repetito Christianorum consortio, fidem etiam optimi regis et jam etiam divina gratia caesaris sinum, a quo exciderant, repellant.

De zangziacchis, qui dicebantur concurrisset Quinqueecclesias ad prohibendam arcis Babolcha instauracionem, verum id quidem fuit, sed nec illud quoque falsum est, quod digressi fuerint. Quamquam ne nos quidem adhuc certo cognoverimus, quare sententiam mutaverint, nisi quid aliud occulte moliantur, quapropter omnes nostri finitimi debebunt eo vigilantius ad eorum motus prospectare et attendere, quo sedatius atque otiosius sese gerant; tali enim tempore dolose quopiam impetu contra nos fabricato, ut insperatus, ita et fortius consueverunt erumpere. Qua ratione et causa aestivi quoque illorum apparatus metuendi erunt vel nobis Agriensibus vel Zygetho, qui tamen si omnino vani non fuerint Julio mense plane constabunt nobis, idque potissimum ex janizerum portae caesaris apparatu; de quo dominatio vestra egregia per exploratores suos curet sedulo informari, si videlicet iisdem janizeris fuisset imperatum equos sibi comparare, quia summarum expeditionum temporibus singuli, vel ad summum bini singulum equum ferendis sarcinis et interdum reficiendae lassitudini habere solent.

Post has binas vestrae dominationis egregiae litteras redditae sunt nobis aliae binae, quarum alterae praefatum magistrum Gregorium commendarunt, alterae Michaëlis Serienii casum declararunt. Quoniam autem antea etiam commendaverat nobis alium quoque ordinis nostri hominem Petrum Thorday Varadinensem canonicum, et ejus possessionem

Boch, libenter et securitatem Petro a militibus nostris, et Gregorio favorem ex nobis gratia vestrae egregiae dominationis obtulimus, eoque erunt nobis deinceps commendatiores, quod vestra egregia dominatio non omnino videtur jam aspernari et rejicere nostros catholicos. Quod postremo Michaelis quoque nostri Serienii res ademptas recuperare nititur, gavisus sumus, et rogamus, ut serio ei adesse velit quantum per eam fieri poterit; est enim et juvenis, et miles bonus, nobisque cumprimis charus; eaque causa nos quoque diebus proximis quosdam ex nostris gentibus trans Tibiscum miseramus, sed nemine invento grassatorum Thomae Varkoch et Clementis Artandi, quos venari jusseramus, cum armento Francisci Nemethi redierunt. Qui Franciscus misso nuper ad magnificum Johannem Pethew capitaneum Cassoviensem superiorum induciarum, quae cum eo habebantur, foedere, aggressus erat his in locis contra fideles regiae majestatis hostilia, et praesertim in Cassovienses; contra quem deductis gentibus Telechesianis superiorum partium idem Emericus Telechessi et Johannes Pethew cum quodam duce alemano equitum cataphractorum et peditum ad Tokay usque signa pertulerant impetu sane valido, ut nimirum primario credebamus tam inquietum hominem subito oppressuros. Sed eo arce sua, ut vulpe vetere, et nostrarum festinationum subitarum non ignara, haudquaquam produnte, ipsi quoque nostri pedem retulere, et nunc circum Boldokew, Zantho et Gincium castra habent. Quid acturi et conaturi praeterea, nescimus aliud, quam quod novas gentes a sua majestate supervenire audimus, incerto tamen authore. De quibus quicquid postea certius cognoverimus,

ad dominationem vestram egregiam scribemus. Habet verbosas litteras, sed tamen amicas. Deus optimus maximus vestram egregiam dominationem felicem servet. Agriae 18. Aprilis. 1558.

LXXXVIII.

Testvérének, Verancsics Antalnak Verancsics Mihály.

Salutem et felicitatem.

Hodie cum essem in prandio apud magnificum^{1558. apr. 29} dominum oratorem Venetum, dedit mihi hasce litteras ad dominationem vestram reverendissimam sonantes, puto eas esse Dumnensis illius, quantum ex sigillo percipere potui. Porro ipse dominus orator se et officia sua plurimum commendat ei, et nescio quid mihi de romana legatione attigit, quod quidem et ab aliis quibusdam in aula audio dici aliquando.

Hoc anno fiunt ubique maximi apparatus. Turca emittit 130 triremium classem; Venetus 80; rex Philippus naves rotundas armatas 60, praeterea contra Gallum numerosissimum exercitum. Idem Gallus contra tam equitatu quam peditatu ferme par viribus accedit. Inter alia fertur in Francia tam magnam multitudinem Lutheranorum inundasse, ut jam frustra jure animadverti in eos conentur, unde regi fit majus ferme negotium quam ab externo (igy) hoste. Expectantur oratores congratulatorii ab omnibus

christianis principibus: serenissimus autem rex Maximilianus perendie proficiscetur ad aquas calidas non longe ab hinc, ubi circiter unum mensem moraturus dicitur.

Si dominatio vestra reverendissima ad hanc imperialem vocationem ventura huc est, praemittat aliquem ex suis cum instructione, ut praeparentur necessaria tam pro jumentis quam hominibus, nam de hospitio secura est. Si quid interim colligerim dignum scitu, dabitur opera, ut habeat. Salutet meo nomine omnem familiam suam una salute. Ex Vienna 29. Aprilis 1558. Michaël Verancius frater et servitor.

LXXXIX.

Oláh Miklós esztergomi érseknek Verancsics Antal.

Reverendissimo et illustrissimo domino meo domino Strigoniensi, legato nato, primati regni Hungariae etc. domino et patrono mihi colendissimo.

Reverendissime ac illustrissime domine, domine 1559. máj. 5.
mihi colendissime, salutem, et servitiorum meorum commendationem. Ad 27. diem Aprilis binae litterae dominationis vestrae reverendissimae mihi sunt reditae, satis sane sero, quod aliae 19. Febrnarii, aliae 22. Martii scriptae fuerint, magna perferentium negligentia. Verum vestrae reverendissimae dominationi habeo maximas gratias de novitatibus tam ex Turcia, quam ex Germania allatis; et laudetur Altissimus, qui exspectationi nostrae de promota sacratissima majestate regia domino nostro clementissimo ad imperium christianum tam benigne, tamque favorabiliter responderit. Nam ad laetitiam quod attinet, majorem certe in tota vita nec elapsis annis unquam sum expertus, nec futuris experiar; nec enim parva est felicitas, si et nobis ambitionem nostram fateri permisum sit, esse jam caesaris consiliarium. Sit igitur haec electio et acclamatio felix ac fausta, rebusque nostris sic afflictis et prope jam accisis illi restaurationi ac saluti, ad quam diu suspiramus et respicimus. De Turcae vero intemperiiis non est quod miremur, semper enim sibi est similis. Et quandoquidem dudum tyranni animum et mores et conatus ha-

beamus cognitos: via et modus, et ratio quaeratur, ut, si eum vi superare nequeamus, quietum saltem quopiam artificio teneamus, et a proseguenda secum contentione abstineamus. Quamquam (quod saepe alias et scripserim et loquutus fuerim) nullounquam officio in officio retinebitur, nisi arma et vires nostras exstare, serioque excubare viderit. Et haec quantum ad vestrae reverendissimae dominationis litteras; quantum autem ad ea, quae hinc ipse dudum debuisssem, eadem vestra reverendissima dominatio veniam mihi dare dignabitur, si ne nunc quidem pro arbitrato meo vel exilem schedam commode possim exarare, adeo multiplicium negotiorum curis prope interceptus quodam modo obtinear, ut nesciam, si huc ad episcopum an ad bellicum quempiam ducem, qui ne miles quidem unquam fuerim, an ad magistrum causarum gerendum venerim, qui et ab alienis litibus discutiendis semper abhorruerim et suppresserim meas. Brevi tamen ubi novi officiales mei suis in locis constiterint, et negotiorum hujusmodi partem ad sese receperint, spero me liberiores futurum, et ad solitam officii hujus mihi sedulitatem rediturum. Caeterum quod attinet ad decimam Zeplak, eam dominationi vestrae reverendissimae misi cum his. expeditam; habuit sane multos procos, praesertim vero ad Saros Cassoviamque designatarum administratores, et quosdam ex vicinis nobilibus; omnibus tamen negata est. Audio eam anno proximo XX vasa vini habuisse, praeter triticum, multo magis opimum quam pro arendae suae summa. Quod eo volui ascribere, ut dominatio vestra reverendissima diligenter ejus curam haberi mandet, ne ab officialibus distrahatur. Non poterit credere, quam multi pro ea laborarint, quum sit satis exigua,

futura tamen semper dominationis vestrae reverendissimae cum omnibus reliquis ad Agriam, quae etiam ejus est, pertinentibus. Plura mihi essent ad vestram reverendissimam dominationem scribenda, potissimum autem de episcopatus hujus mei mea portione, quae quidem mihi, nulla hactenus pecunia reposita subnixo, esu et potu sane ipso in hac militari palaestra et finitimo exercitio (ne nunc attingam reliquum, quod certe totum stipendiis gentium datur) consumetur. Ea tamen ad opportunitatem suam differo, vestra reverendissima dominatione obnixè rogata, ut mei apud gratiam suae caesareae et regiae majestatis paterne saepius et per omnes occasiones velit meminisse; quia haec provincia magna est, et milites assidue queruntur de praeteritis stipendiis non illis persolutis; quia autem nec proventus episcopatus hujus opinioni suae respondeant, nec est mihi peculium peculiare, quantas perfero quotidie molestias, dominatio vestra reverendissima videat, quam Deus opt. max. felicem servet. Agriae 5. Maji 1558. Vestrae illustrissimae et reverendissimae dominationis servitor addictissimus.

XC.

Verancesics Antalnak, testvére Mihály.

Reverendissimo domino domino Antonio Verancio, episcopo Agriensi, perpetuo comiti Hevesiensi, s. caesareae majestatis consiliario etc. domino observandissimo.

1558.máj.25.

Salutem et felicitatem. — Dominationem vestram reverendissimam et exspectant omnes hic, et simul admirantur neque litteras neque nuncios de reditu suo aut diuturniori mora ab ea transmitti. Ego autem etiam rarius quam soleam, domo egredior; quid enim interrogantibus de ejus mora responderem nil habeo; certe, et pudet et taedet. Tamen si factor hic essem tantum, aequum esset ut domini mei litteras frequentiores haberem, ut tantum sciretur me suum esse hominem. Vereor ne locum det proverbio: honores mutant etc. Nam ex Constanti-nopoli frequentiores recepi, nondum enim equitibus et peditibus stipabatur. Nos, quia nostro gradu continemur, contemnimur. Extra jocum, mirantur omnes de ejus taciturnitate. Hic amissa Tata, quies ut antea, solus scit princeps quid agendum fuerit. Sua majestas etsi non sine sua tertia sit, tamen a periculo longe abest; dominus palatinus cum ad extrema pericula devenisset, utcunque convaleuit, et semisanus certe invalido corpore huc se contulit; sic enim res postulant. Rex Maximilianus adhuc fruitur balneis in Bolchyr una cum serenissima regina. De reverendissima dominatione vestra jam aliquoties caesarea majestas interrogavit, quod retulit mi-

hi reverendissimus Strigoniensis, me autem idem, ego me nil scire retuli. Sed, ut fertur, non dabitur dominationi vestrae revendissimae quietis locus, et ad meridiem, puto, paratur legatio. Nos omnes hic bene valemus qui reliqui sumus. E Dalmatia nil habeo. Oratores duo veneti expectantur, Capellus quidam et Navagerius, qui fuerunt capita decem. Classis turcica petit Melitam magna vi, quam tamen reperient bene munitam neapolitanis militibus. Gallus et rex Philippus in castris sunt. Fruges Venetiis minuerunt pretium. Opto dominationem vestram reverendissimam bene valere. Omnes suos meo nomine salutare faciat. Viennae, 25. Maji 1558. Michaël Verancius frater et servitor.

XCI.

Verancsics Antalnak, testvéröcsese Mihály.

Reverendissimo ac illustrissimo domino Antonio Verantio, episcopo Agriensi, perpetuo comiti Hevesiensi, consiliario caesareae majestatis, domino observandissimo.

Salutem et felicitatem. Cum Vienna discessissem ^{1528. aug. 22.} prima die Augusti, ejusdem mensis die 14. Venetias attigi incolumis cum omni comitiva et jumentis. Eadem die intellexi parentem nostrum cum omnibus aliis sanum et sospitem, tamen ex recenti vulnere moestio-rem; quem spero volente Domino, adventu meo miti-

gaturum suam tristitiam. Accepit etiam consors mea ex unici fratris morte non vulgare damnum; sed et ego, nam eum loco fratris habui; de ejus familia aequae ac mea cura erit agenda, omnes enim parvuli sunt; mater vero juvenis et inconstans ac inutilis. Hic Venetiis Zacharias et Leonardus Scavonelli bene valent, neque domi eorum exceperunt amicissime et honorificentissime, omniaque pro voto dominationis vestrae reverendissimae prompto animo effectum (1gy) dederunt. Ceterum Zacharias petiit, ut eandem certiore facerem de ejus servitute, quam in dies exhibet huic majestati caesareae in mittendis litteris et accipiendis ex Constantinopoli; nam cum inde veniunt, per ipsum redduntur agentibus suae majestatis; similiter cum eo mittendae sunt, medio ejus fit, ut habeant recapitum; ita ut ejus servitus neque agnoscitur, et illi utilitatem accipiunt omnem proprio nomine. Rogat itaque dominationem vestram reverendissimam, ut ejus servitutem commendet caesareae majestati, ut sua majestas sui memoriam habeat et servitorum ejus. Quod plus est, neque scribere ad dominationem vestram reverendissimam per eorum nuncios audet, nam litterae aperiuntur ejus, et accepto succo ex illis pro suis mittunt. Sed ego commisi, ut medio Hieronymi Jacni deinceps mittat litteras suas. Quod attinet ad vestimenta parentis, libentissimo animo fidejussionem suscepit; accepimus autem panni optimi ulnas 38, akatii ulnas 16, damasci ulnas 12, veluri ulnas 4. Summa tota quam debemus facit ducatos currentes 114, n. 9. Opera Jovii quae reperi latina mitto, historiarum scilicet duo volumina; Leonis X-mi pontificis maximi vitam; illustrium virorum antiquorum et modernorum item vitae 12. vicecomitum Mediolanensium. Mitto etiam bre-

viarium romanum, quo majoris impressionis non reperi. Ceterum missale strigoniense nullibi reperitur, et qui reliqui fuerant nuper in Germaniam allati sunt; scutellae argenteae quidem reperientur aliquae, non tamen novae, neque ejus formae, cujus dominatio vestra reverendissima indiget; tamen mihi videtur, quod melioris argenti hic fiunt, et leviori pretio. Ita namque cum artifice calculum subduximus, ut ex 72 maviis fient majores scutellae 12; mediocres 12 ex maveis 48; minores 12 ex maveis 30; disci 12 ex maveis 24; tota summa facit mavias 174. Singulae autem maviae constant ducat. 6. p. 23., de liga, ut vocant. Cum manufactura vero singulae maviae constabunt duc. 7. z. p. 1. Promisit autem, quotiescunque datum fuerit illi negotium ut fiant, perficiet totum opus in spatio mensium trium. De ocularibus, cum advenissem, retulit Zacharias, quod nullus artificum repertus sit, qui eo modo, quem optat dominatio vestra reverendissima, sciat ea facere. Ego tamen cum Francisco Caligorio quendam reperi, qui promisit facere experientiam; si fient, ut bona sint. mittentur brevi ad eam. —

Pictorem cum maxima difficultate reperimus; omnes affirmant plus in tanto temporis spatio, quo isthuc irent, domi se lucraturos; tamen unus juvenis obtulit se pro fl. 25, et omnibus expensis, ita ut ferme alii 25 exponentur. Sed quid hoc? modo fiat quod volumus.

Reverendo domino Nicolao de Dominis decano Tervesii reddidi ejus litteras, quas accepit gratissimo animo, et obtulit se ad vota sua omnia, dixitque se daturum copiosum responsum; litteras tamen ad me nondum misit, sed jussi Hieronymo, ut in reditu divertat ad eum, et accipiat litteras. Ac-

cessi magnificum dominum Marcum Antonium de Musa, qui heri profectus est Veronam pro capitaneo. Salutem a dominatione vestra reverendissima accepit gratissimo animo, et inquisivit de fortuna et valetudine ejus copiose et studiose, deinde jussit, ut nomine peterem a dominatione vestra reverendissima opus ejus historiarum de rebus Hungaricis, promisitque se solum tantummodo visurum et lecturum, nemine particeps facto; quare autem id optet, mihi non aperuit. Quod reliquum est, dominatio vestra reverendissima habet hic famam satis illustrem, meque hic viderunt quasi testem ejus magnitudinis splendide cum hac comitiva. Tamen mihi constitit, ita ut ferme exhaustus hinc abibo. De ejus legatione futura plena est civitas, et multi exoptant, praesertim amici. Ego hinc hoc triduo discedam in Dalmatiam, unde copiosiores litteras a me exspectet. Oratores hujus domini ad caesaream majestatem heri hinc moverunt. Quod reliquum est, bene valeat et feliciter agat. Ex Venetiis 22. die Augusti 1558. Michael Verancius frater et servitor.

XCII.

Busbek Augeriusnak Verancsics Antal.**Ad magnificum Augerium a Busbek.**

Hyeme superiori quum essem Agriae, quaternas^{1558. sept. 4.} litteras a magnifica dominatione tua satis quidem eas sero, sed tamen perjucundas et summe gratas acceperam, ex quibus unae erant ad me et ad collegam nostrum magnificum dominum Franciscum Zay communiter datae, reliquae ad me solum; eoque adhuc tempore diligenter ad omnes responderam via turcica et ragusini cujusdam mercatoris Budae mercaturam exercentis opera. Quod his ob eam causam visum est mihi esse attingendum, ne idem responsum denuo repeterem, utque tua magnifica dominatio intelligeret illius temporis rescribendi officium non fuisse praetermissum. Nunc idem prosequuturus officium haec primum ad eam scribo. Majestatem caesaream dominum nostrum clementissimum optime jam ab aegritudine proxima convaluisse, et conventibus omnium regnorum ac provinciarum suarum pecuniae cogendae gratia operam dare, hisque diebus peracto Viennae conventu austriaco, ad reliquos provinciarum Norici celebrandos serenissimum regem Bohemiae Maximilianum filium charissimum die 25. hujus*) mensis misisse, re-

*) Értsd: praeteriti; mert a jelen levél sept. 1-én kelt.

gressoque Viennam, memoratis conventibus feliciter confectis, Maximiliano ipsam quoque majestatem caesaream (uti nunc habemus) in Germaniam ad res imperii sui stabiliendas et curandas belli rationes in eum eventum, si pace ista Turcae frustraretur. Nec dubitandum est majestatem ejus tantum ad insequentem annum et pecuniarum et copiarum paraturam, ut imparatam inermemque hostes non sint inventuri, si bello sibi tentandum esse statuerint. Contulit enim ei Austria duos ferme auri milliones ad sexennium, et quibuscunque nationis ejus res familiaris fuerit amplior, viritim omnes unum equitem cathaphractum de suo ad emergentes usus nutriet. Quid ad hac reliqua majestatis suae regna et provinciae et universi status ac principatus Imperii conferent et pecuniarum et gentium, per sese magnifica dominatio vestra facile conjiciet, scietque haud dubie id etiam ab aliis, quum hoc imperatore hac tempestate nihil eidem imperio acciderit optatius, testantibus id assiduis, et magnis legationibus, quibus illinc majestas eius sacratissima omnibus ferme diebus visitur. Et tametsi adhuc sint aliqui, qui insanis Galli studiis teneantur, sperandum tamen est, brevi ea relicturos, ubi bonitatem, et providentiam suae caesareae majestatis propius gustare coeperint. De Philippo autem rege amplissimo quid quaerit? Mira principis fortuna, industria, consilium, et tantum in re militari judicium ac vigilantia, ut facile pater in filio agnoscat. Mense siquidem Julio ad XV millia Gallorum apud Gravelingam exercitus ejus XI millium armatorum in finibus Flandriae et Picardiae post amissum Thiunville municipium tanta virtute confecit, ut LXXX duntaxat milites. quod miraculi vice scriptum est ex Flandria, cladem vix ef-

fugere potuerint. captis ad haec omnium ordinum duc-
toribus et ipso summo totius exercitus duce domino
de Thermes, sic antea Momoransio ac ejus filio, et de
quibus suo tempore scripseram. Nunc domino de
Thermes cum tot aliis claris ejus regni magnatibus in
potestatem habito, et Petro Strozio ictu bombardae
apud Tyunville municipium sublato, omnibus fere
summis et ducibus et viris, solo quodam ex Gvisana
familia rebus insistente, et gentis existimationem sus-
tentante, totus creditur Gallias viduassee. Paulo post
mari quoque paucissimorum dierum interjecto spatio
duplici potitus est victoria, et prima de X ac IX na-
vibus in freto anglico, quae Caletum, Bolognam, et ad
alia ejus orae maritimae loca munitiones, commeatus,
et militum supplementum vehebant. Classis enim an-
glica dum in eo mari excubat et observat hostium ex-
cursus, forte in memoratas incurrit naves, pugnaque
cum his conserta, uni effugium non concessit, cursu
hinc destinato versus aquitanicum oceanum, aliud
quodpiam fortunae quaerens beneficium, praesertim
quod a paulo ante victis cognoverat, plures post se
cum hisdem commeatibus, munitionibus, ac praesi-
diis naves mitti, quumque jam Britanniae citerioris pro-
montorium, quod Gobense cosmographi vocant, supe-
rassent tempestate excipitur, vique ejus validiore
compulsa, qua diutius jactata dubio exitu fuerat, in
portum Rocciellae civitatis apud Sanctones supra Ga-
rūnnam amnem subducit se, ibique praeter omnem
opinionem LX hostium navibus deprehensis, eas inva-
dit subito impetu, pugnatque, et potitur victis. Inde
cognito, quod non ita multo longe ab eo portu III
millia Gallorum essent, qui cum hisdem commeatibus
et munitionibus in Picardiam praesidio mittebantur,

hos quoque pari celeritate, cohortibus classiariorum expositis, oppressos improvise, et affectos gravissima caede; incolumis tandem cum captivis, et navibus, et magno virorum numero, copiaque commeatuum rediit in sua maria. Philippus jam his tam insignibus victoriis adeo feliciter fortiterque ultus jacturam Thyunvillae municipii, Peronam urbem cum XLV millibus peditum, et XV millibus equitum partim cataphractorum partim levius in vestrum belgicum morem armatorum petit, nullibi non paratus, non maxime cupidus praelii. Deus altissimus adsit dexter ejus et consiliis et conatibus, omnesque religionis nostrae principatus, qui odiorum ambitionumque suarum causa societatem armaque cum Turcis non vereantur in Christianos jungere, conterat atque confundat. At Gallus quoque non multum a Philippo remotus, impar tamen Philippi viribus, quinque leucis pedem referendo, et pugnam declinando omnia post se exurit, ne suppetant Philippi copiis necessaria; praesidiisque ex Insubribus in Gallias accersitis, quibus est agros et aperta regionis ejus defensurus, totum hunc exercitum, quem modo in Philippum habet, per adjacentes urbes periculo dispositurum nunciant, neutro eorum in castris suis existente, quamquam utroque ea ubi a IIII ubi a V milliaribus subsequente, quo subitis rebus postulantibus, subito possit consulere. Quae vero inter eos per totum adhuc hunc Septembrem et fortassis etiam per Octobrem expectentur, si modo tantos exercitus tam diuturno tempore poterunt sustentare, mira arbitrantur fore, estque mortalium nemo, qui Deum non precetur, ut in aliquam firmam et veram pacem hoc eorum bellum deducatur. Quia profecto non solum vestrum Belgium,

et vicinae illi provinciae, sed etiam universa regna christiana eo laborant misereque affliguntur. De pontifice summo vellem, si possem, gratiora, sed molestum habemus. Caesareae majestatis electioni adversatur, quod eisum quoque calculum et auctoritatem accessisse voluisset, si quid modo non subsit aliud, quod conjici sicco etiam calamo facile potest. Eadem tamen majestas caesarea haudquaquam insperatae hujus et intempestivae novitatis jaculo mota, uti semper fuit in hujusmodi perturbationibus constantissima, et animo vere caesareo, hoc est invicto, fert rem sapienter et summa moderatione, legatum ejus sanctitatis operiens, quem jam destinavit unum e cardinalibus, quemadmodum proxime per oratores nostros dominum Martinum Gusmanum et Petrum Paulinum significavit. Exterorum res sic se habent in praesentia. Nostrae, ut ad id tempus, adhuc eundem cursum tenent. Omni enim ex parte premimur, impetimur, populamur, et inducarium ac pacis tempore, quo reliqui Turcarum confoederati soleant esse otiosi ac securi, nos et jacturas majores facimus, et perimus, necdum tamen ad gladios recurrimus, tamque hosti fallaci credere, ejusque amicitiam tam inaniter sollicitare desinimus. De quo. Augeri, collega dignissime et vir amplissime, quam multa tuae magnificae dominationi commemorare possem, si litteris, quas istuc interdum damus, tam disertis, tam securis esse liceret, scio non ambiget, et pro me interim Tatta loquatur, quae a nostris finitimis negligentissime custodita, ea jam diligentia hostium emunitur, ut nos ad reliquae suae viciniae custodiendae solertiam sero excitasse videatur, ne dicam succendisse etiam ad obsistendum tandem tam propinquo periculo.

Quae de reliquo regni statu scire cupierit, affatim didicit omnia a nunciis Baldo et Martino, quos majestas sua caesarea proxime ad magnificam dominationem tuam misit. Quae quo nomine, quo praeconio, quibusque meritis versetur apud communes principes et totam aulam, utar e quidem paucissimis; vix tamen ulli oratorum, qui ante et nos et eam titulo isto Turcae hinc triverunt limina praestantior fama vigerunt. Nec requirat caetera. Verum incepta tantum virtute atque industria (quod egregie facit) munus tam praeclarum enixe urgeat, dum ad metam illud deducet, parumque interim vel difficultate ejus vel periculis moveatur. Habebit sane caesarem, quum sospes domum istinc redierit, et Trajano meliorem et munificentior Julio. Tertium, quod fortasse mallet, Deus ei optimus maximus curabit aequae, ut curavit nobis. In eum tantum spes omnes collocentur. Nec plura modo, nisi ut valetudini suae conservandae incumbat; opera et amicitia mea pro suo arbitrato utatur, quod maxime etiam desidero, et amicos nostros reverendum patrem Joannem Baptistam Zeffum, Lucianum Cabogum, Hieronymum Zacharettum, Licinium, Abrahamum, Muratum, et caeteros omnes meo nomine salvos esse jubere non gravabitur; sitque diu felix atque incolumis. Viennae, prima Septembris 1558.

XCIII.

Illicinus Péternck Verancesics Antal.

Ad Petrum Illicinum doctorem, praepositum S. Thomae et canonicum ecclesiae Strigoniensis.

Reverendissime domine tanquam frater hono-^[358.sept.10]rande. Ille, qui mittendus est, nobis electis Romam, intra unam hebdomadam solvet. Ei litteras dominationis tuae dedi, ubi accepi commendatione plurima adhibita, estque functurus fideli officio, quantum est pollicitus. De sermonibus dominationis tuae ad ecclesias nostras, quod scribit, intellexi. Quorum lectioni quidquid mihi temporis a publicis tribuitur negotiis, sedulo impendo, et si rogas de his quid sentiam, quamquam non is sum Aristarchus, cujus lima lucubrationibus dominationis tuae addi debeat, summe tamen placent mihi, nec displicuit etiam dominationis ejus epistola, quae plura praestitit in decursu, quam fronte promiserat, ita ut prolixitas etiam ejus multum satisfecerit: tantummodo eum Maecenatem sortiretur, qui eos prelis ac luci traderet. Ego nisi finium cura laborarem, qui me exhauriunt ad unicum assem, id tuae dominationi opus non denegarem, alioqui quicquid per alios, qui me magis crassi sunt, ut Mydae, ad hoc hortando, petendo, rogandoque impetrare ejus gratia potero, operam meam polliceor, nisi tamen reverendissimus dominus meus, imo nostrum ne- tum omnium parens Strigoniensis eorundem sermonum imprimendorum assumerit impensas, non video, quis

assumet, adeo algemus reliqui. De consilio ex hoc regno abeundi, quod animo volutat, si quid ei beneficiorum et dignioris conditionis non adjicietur, nollem quippiam dicere, quod reprehendi posset. Meo tamen iudicio meliora et sperare et commutare id sententiae debet. An in Italia celerius et facilius beneficia acquirantur quam hic? perinde ac ipse ignorarem, quibus modis in Italiae curiis laboretur. Deus bone! quanta ibidem agmina candidatorum, quanta venatorum copiae? non dico isthoc, quasi virtutes dominationis tuae non mereantur omnia summa, verum hic pene unus es, et si qui accedunt alii, hos quoque antecellis, et primas mereris cathedras. In Italia quotus quaeso esses? ubi multi et doctissimi in postremis haerent, et senescunt latitantes, dum ne antistitibus quoque tempestive providetur. Tua itaque dominatio reverenda viderit diligenter, ne quid committat praecipitantius, quod postea consequeretur poenitudo. Cui quidem quum ab initio necessitudinis nostrae semper amice faverim, nequeo eidem non consulere libere, dum versatur in periculo, minus passione quapiam prospectulo, alioqui et illud cavendum erit, ne, si ab ista exciderit sponte sua fortuna, eam denuo repetere cogatur et frustretur inani palinodia, quum in alium fuerit collatum, quod exuerat, et exempla hujus naufragii complura aevo nostro vidimus. Quo magis mallet dominationem tuam alienis fieri doctiorem, quam suis alios. Sed haec a me sic, velim, accipiat, ut ab amico singulari et raro. Valeat, et me, ut facit amet. Viennae X. Septembris 1558. Dominationis vestrae reverendae tanquam frater et amicus bonus Agriensis.

XCIV.

IV. Pál római pápának Verancesics Antal.

Ad papam Paulum III.

Beatissime pater. Post humillima ac devota san-1558.sept.12. sanctitatis vestrae pedum oscula beatorum. Quoniam divinae majestatis providentiae, cujus nutu ac dispensatione omnia coelestia terrenaque gubernantur, visum est, ut ego subjectus et devotus sanctitatis vestrae orator licet indignus ad episcopatum ecclesiae Agriensis his temporibus electione et nominatione sacratissimae Romanorum caesareae majestatis, tanquam et in quantum Hungariae regis, vocatus sim, quemadmodum ex litteris majestatis suae clare sanctitas vestra intelliget, eaque causa provolutus omni cum debita veneratione ad beatos sanctitatis vestrae pedes, humillime supplico, dignetur mihi confirmationis et consecrationis suae sanctam atque apostolicam benedictionem clementer impertiri, deque ipso episcopatu Agriensi gratuita ac pia bonitate et munificentia sua benigniter absque ulla annatae solutione providere. Quod quidem, beatissime pater, non eo postulo atque imploro, quia aut sanctae matris ecclesiae, et apostolicae sedis ordinationi velim refragari, aut subterfugere ne tantum tamque excellens munus sanctitatis vestrae gratitudine aliqua juxta morem majorum, et laudabilem et consuetum agnoscam, sed propter turbulentissimum et afflictissimum regni hu-

jus statum, quo, toto jam ferme hoc ipso regno, hinc in Turcarum, hinc in rebellium suae caesareae majestatis rapinas et potestatem redacto, sic omnes episcopatus ejusdem regni distracti sunt et evastati, ut, dissipatis et amissis omnibus eorum proventibus, solis jam dumtaxat titulis, ac nominibus, et cura functionum retinentur, idque ob christianae religionis nostrae zelum, ne in mediis hostibus constitutae genti nostrae reliquiae Christi, et catholicae romanae ecclesiae destituantur pabulo fidei. Et tametsi inter alios memoratos episcopatus, qui ex proventu antiquorum redditum vix vicesimam partem obtineant, unicus meus agriensis sit, cui superest adhuc aliquid: hoc tamen, quod dixi, aliquid, vix pro quinta parte habetur nunc ex eo, quod quinquies tantum habebatur priscis et bonis temporibus. Verum et haec ipsa portio quum partim per Turcas et rebelles distrahatur, partim ad munitiones, aedificia, officialium solutiones, et ad ejusdem arcis Agriensis conservandae praesidium impendatur, quod assidue in ea majus quam mille armatorum retinetur: quantum de reliquo ad episcopi, familiaeque suae sustentationem cedere debeat, ex his cognosci perspicue licet; continuoque ejusdem Agriae postulante periculo, haudquaquam minores impensae ad eam conservandam tuendamque fieri possunt. Quia a tribus illi partibus in quinto et sexto milliario Turcae, rebelles vero tam propinqui incumbunt a parte quarta, ut pro portis eo fere quotidie habeat, et caesareae majestatis fideles ea illorum hostilitate infestante, qua ne vel turcica majore. His itaque, beatissime pater, aerumnis, spoliis, calamitatibus et miseriis nostris sane plus quam miserimis perspectis, humillime atque obnixè supplico,

dignetur sanctitas vestra pro sua singulari in oppressos christianos, et in sanctae matris ecclesiae catholicos atque obedientes filios pietate, velit mihi humillime supplicanti praefatae confirmationis et consecrationis suae benedictionem absque alicujus annatae solutione clementer conferre. Quod eidem sanctitati vestrae quum sit futurum apud homines gloriosum, tum apud Deum optimum maximum fiet acceptissimum. Ego vero pia ac paterna ista sanctitatis vestrae benedictionis liberalitate adjutus commodius et pastorale hoc munus meum in ecclesia Dei exercebo, et custodiae dominici gregis, quae mihi a sanctitate vestra gratiose committetur, attentius advigilabo, votis, nomini et mandatis ejusdem semper addictissimus. Quam Deus altissimus sacrosanctae isti apostolicae, et sanctitatis vestrae sedi, ac ecclesiae catholicae quieti, conservationique sanam felicemque cum optatis rerum omnium suarum incrementis ad multos annos tueatur ac servet. Datum Viennae Austriae XII. die Septembris MDLVIII.

XCV.

Nádasdy Tamás nádornak Verancsics Antal.

Ad magnificium dominum comitem palatinum Thomam a
Nadasd.

1558. sept. 19

Nova, quae his diebus habuimus, plura sunt, et varia. Johannes marchio Brandenburgensis venerat huc die III. mensis hujus cum filio marchionis Henrici a Braunswik. Decima fidem majestati caesareae solemni juramento praestitit, et eodem a sua majestate, insequenti vero ab archiduce Carolo exceptus prandio, ad serenissimum regem Bohemiae profectus est, inde ad caesaream majestatem denuo reversurus. Quartadecima veneti quoque oratores appulerunt, Johannes Capellius et Bernardus Naugerius, viri clari, et in sua republica primarii, comitatusque et famulatio multo et nobilitate non pauca; caeterum cras audientiam habituri. Ex Flandria diu jam nihil erat auditum, variaeque omnium animos opiniones agita-verant, quid in causa foret, quod a Philippo rege statis suis diebus non venirent tabellarii; nudius tandem tertius constitit, unum per iter fuisse interemptum, idque jam quum in ditionem majestatis caesariae pervenisset, hincque factum est, quod per hos dies proximos scire nequivimus, quid inter illos exercitus ageretur. Atheri appulit salvus alius, qui quaenam attulerit, non sum adhuc plane assequutus, quod ea silentio quodam videntur praeteriri. Quae tamen edita sunt in publicum hujusmodi sunt: Vires utriusque exercitus validas esse, distareque ab invicem

nonnisi unico nostro milliario, ac prorsus ignorari de futuro praelio, sedulo tamen ab utroque captari opportunitates, et nostrum vix a pugna contineri, novis stipendiis, quae accepit recens, incitatum, nec interim multorum cessat suspicio, esse aliud quippiam sub hoc cortice, quod nesciri, ac taceri malint; sed et Deus donet et nos speremus meliora. Nec sunt de externis alia. Nostrae merae sunt tragoediae. In Transsylvania Franciscus Bebek et Franciscus Kendi cum fratre suo Antonio, rebellionis suae nefariae, et tot aliorum scelerum, die Septembris prima ultimas patriae, quam in servitutem et ad extrema rerum suarum perduxerunt, dedere poenas. Miserat regina oratores suos in Turciam, petitum, addi finibus Transylvaniae si non cetera, quae annis superioribus adempta sunt, at saltem Lyppam, cum ea portione terrae, quae a Lippha ad arcem Hunyad porrigitur, idque Galli suasu, spe concepta de illius patrocínio, quod ei per proximum legatum fecisse dicebatur. Vicissim duo quoque Francisci cum Antonio, triumviratus pestilentissimus, eodem suos destinant oratores, iisque dant contraria et plena accusationum mandata. Regnam denuo exitum ex Transsylvania meditari, et ad Germanos defecturum, ubi primum Lyppa et postulatis finibus potiretur; eaque causa petitionibus ejus passas nequaquam locum debere dare. Periclitari tunc magnopere oratores reginae et de illorum captivitate passas consultare, vixque jam etiam manus ab eis abstinere. Quum hoc interim, quoniam et casum eorundem oratorum suorum, et causam ejusdem casus fama celeriter extulerat, clanculariae a regina litterae superveniunt; quibus perlectis cognitisque confestim, et reginae fides est habita firmior, et tota

vis indignationis passarum in accusatores ejus versa, remissique utrorum cum ciauso oratores, nec plane referunt quali cum responso ; conjectura tamen est, quod cum tali, qualem effectus demonstravit. Nam Bebechi et Kendiorum callide apud Valacchos in itinere remoratis oratoribus, cum aliis ciausis ad reginam festinavit. Quae mox et iis, quos jam morti destinaverat, et aliis ejus provinciae summis ac selectis pro more viris, consiliariis suis, ad audiendum, quae Turca renunciaverat eidem de reddendis petitis finibus, consultandumque quid deinceps esset illis agendum, Albam Giulam accersitis, conveniunt. Regina tum, quae jam dudum cum Melchiore Balassa, et cum quibusdam aliis de omnium trium caede transegerat, ipso Melchiore, ut totius praxis et parricidii duce, quique non ita longe cum 200 equitibus, et 300 peditibus latere fuerat jussus, per posticum in arcem nocte intempesta recepto, ipsamet dicitur eundem magno animo fuisse alloquuta, moram ut omnem rumperet, et patrare maturaret, quod se patraturum commodo publico receperat. Ibi mox Thoma Dacczo et Gaspare Perussith in Franciscum Bebek inmisso, Franciscum et Antonium Kendy, qui una erant, ipse Balassa occupat, momentoque, et sine magno negotio iis ambobus interfectis, ut qui nunquam fortes habiti fuerant, Bebek, tametsi nec ipse multum insignis quapiam praeclara nota bellica, facile tamen non cessit invasoribus, sed simulac ab eis circumveniri sese vidit, ensen corripuit, et primum in Gasparem, ut quidam ajunt, Perussith, ut quidam alii, in Thomam Dacczo invectus, quod ii ante alios cum duobus militibus gregariis irruperant, ita est tutatus vitam, ut omnibus magnis et prope lethalibus vulneri-

bus affectis, plane visus est declarasse, quod iis sese eripere non aegre potuisset, si rem cum solis habuisset. Verum irrupente multitudine, quae illos sequebatur, plurimis gladiis victus, succubuit. Sic iis regum novorum perniciosissimis authoribus dignissima morte extinctis, facile jam caeteris omnibus seditionum studiosis constabit in posterum, quantum fidei, spei, opisque et studiorum in Turcarum societate atque amicitia ponendum erit. Beatique et ter et quater erunt, qui jam tandem vel his extremis rebus nostris, tam manifesto irae Dei exemplo redierint ad se, et sapere incipient. Sed de hoc, quid sperari debebit, paulo post sciemus, quum jam et Transsylvaniam totam maximis tumultibus agitari nunciant, et iis tam egregie per fidem turcicam summis capitibus e medio sublati magna caeteri haud dubie corripientur formidine. Huic autem facinori ne majus quoddam et magis memorabile corollarium desit, regina die postero, caesorum cadaveribus in publicum abjectis expositis, iudicium palam haberi et cognosci iussit, jurene an injuria fuissent interfecti; nam praeter accusationes et caetera quibus offenderant reginam, crimine etiam appetiti ejus provinciae principatus culpabantur. Facta enim tam ipsi Turcarum tyranno majoris tributi, quam Hrustano passae munerum appromissione, sibi Transsylvaniae regimen et curam tutelamque Joannis filii, rejecta ejus matre, ut alemanicis studiis infecta, committi tradique postulaverant. Quare convicti eodem ambitus, perfidiae, proditionis et laesae majestatis crimine, damnatique capitibus; illud quoque discussum iudicio, sepe lirine an insepulti projici debuerint? Bebecchoque multo nocentiore invento caeteris, quadrifariam securi

carnificis discissus et IIII Albae Giulae civitatis turribus angularibus appensus est; Kendinis data sepultura. Caeterum ne rebelles sua tantum manu videantur sese conficere, quod hac caede eos facere incepisse cernimus, post deditionem arcis Barko Emerico Thelekessy factam, eidem se dedidit Kevesd, et jam Zerench quoque castellum oppugnat. Franciscus Nemethy in dubium rerum suarum conjectus ac ferme desperatus turcicum auxilium sollicitat; sed quia Budensis passa illud ei summittere cunctatur, quod fortasse non fidat homini, Joannem fratrem suum, qui nuper hinc metu detentionis profugerat, obsidem, ut Epergiessio scriptum est, passae pollicetur, tanta est in eo erga caesareae majestatis domini nostri clementissimi fidem contumacia, tantus in rebellione consensus. Perniciosum erit hoc ei regioni, si conceperit scelus; sed et illud magni et metus est et pericali, quod subjicio. Tria Turcae castella Gyulae arcis opponunt, et jam duo confecta sunt. Alterum ad Vilagoswar in pago Syry, alterum in Erdewhegy, tertium in Varsany sub oculis fere ipsius Giulae moliuntur; ad haec Tattae quoque passam Kazzun justo cum praesidio esse profectum, Budam vero alium ejus loco designatum. Sed nos rem Tattae quo studio quave ratione curaturi simus nescio; Gasparem tamen Magochy Gyulae praesidem certum est cum quatuor ferme millibus hominum, armato excitoque ad suum militem et nobilium ordine, et plebea turba, in castra descendisse, obstaturumque totis viribus, ne hostes sibi pedicas objiciant, cui adsit Deus altissimus, postquam homines nequeunt. Verum si tantum incendium eo loci non exstinxerit Magochy, haud dubie mali series Agriam proxime spectabit;

cujus incolumitati, obsecro, consulatur, quod vel solius dominationis vestrae magnificae hortamentis fieri poterit, minimeque futurum dubito. Vale et felix esto. Viennae XIX. Septembris 1558.

XCVI.

Verancsics Mihály, testvérének, Antalnak.

Reverendissimo domino, domino Antonio Verancio, episcopo Agriensi, perpetuo comiti Hewesiensi, sacratissimae caesareae majestatis consiliario, domino observandissimo. Verancsics Antal kezével: Receptae 23. Novembris 1558.

Salutem et felicitatem. Ego Domino comite die 14. ^{1558. oct. 1.} Septembris incolumis domum perveni, ubi omnes reperi incolumes utriusque domus, licet luctu et squalore plenos; quibus tamen adventus noster consolationis nonnihil attulit et tristitiae abstulit; imo potius prospera valetudo et honorum ac dignitatis accessio dominationis vestrae reverendissimae, quae quascunque calamitates nostras temperat et in oblivionem adducit. Quod reliquum est, ea quae perficienda fuerant mihi injuncta per dominationem vestram reverendissimam, partim confecta sunt, partim vero iis proximis diebus divino auxilio conficientur, utputa: domus conductio, hortus, insula, negotium Spalaten-

se et similia; nam quae agenda erant Venetiis, ex itinere peregi, et eam certiore inde de omnibus feci per litteras; quod autem in hanc diem distulerim, in causa fuerunt vindemiae, nam appuli recte in ipso furore vindemiarum. Porro hic viget nunc extrema omnium rerum charistia, vini mira exiguitas, fruges autem vix etiam reperiuntur, adeo ut verendum sit, ne hac hieme a fame velut ab hoste haec civitas obsidionem experiatur. Ceterum Provian szigetiben vagyon eladó egy szép ház szüleivel egyetemben, kinek mása nincsen ott; az házzal íptéssel, kerttel, gyműcsivel, csatornakúttal és helylyel, id est, Scruanovics Péteri ki volt; de nem hiszöm, hogy annye pénznek szerit tehetem mennyét kírnek, mert több kelletik nigyedfél száz forintnál letennyi írette; de csak az ház odvarával és kertvel jobb kétszáz forintnál, anekül vagyon hetven mírtik fülde. Azám gonyai (?) mind szőlő hasznos, olajmolnával. Quare summopere dominationem vestram reverendissimam rogo et supplico, ut huic negotio suppetias ferat, et quidem mature, si pro ejus ratione fieri poterit, ne tam nobilis res nobis elabatur; ego tamen omnibus artibus, quibus potero, negotium differam ad responsum ejusdem vestrae reverendissimae dominationis, mert az a ki eladja csak engemet várt. Quod autem ad equos attinet, statim a principio dedi operam ut intelligam, sicubi aliquid nobile electumque habeatur. Ita accepi esse in quodam loco rem singularem, hoc est equum nominatissimum apud praecipuum virum et militem famosum; mox dimisi, ut tentetur hominis animus, responsum tamen quotidie expecto; si erit dignum animal, non dimittetur.

De morte summi pontificis, puto hujusque intel-

lexit. Faxit Deus ut eum sortiatur successorem, qui meliores partes amplectatur et bonis adhaereat, posthabitis satanae ministris. Dominatio vestra reverendissima dignetur ad me solito more saepius scribere, ut sciam semper quo loci versetur, et quibus successibus ejus dignitatis rationes progrediantur. Et cum hoc feliciter diutissimeque ac optime valeat. Salutem dicunt omnes et felicia precantur pro incolumitate ejus. Sibenici, prima die Octobris 1558. Michaël Verancius frater et servitor.

U. I. Scriptis jam litteris iterum advenit fama, pontificem nondum decessisse, sed in extremis laborare, et palatium esse jam direptum. Turcica classis dudum se recepit Constantinopolim, male affecta tam ab hostibus quam a peste, nostra vero propediem domum revertetur incolumis. Hic publica fama est tam a mercatoribus, quam etiam ab ipsis Turcis, cogitare Turcam proximo anno expeditionem in Ungariam facere.

XCVII.

Sebridovski Endre **krakói püspök** **Verancsics Antalnak.**

Reverendissime in Christo pater, domine et amice observandissime. Salutem et mentis deditissimae accuratam commendationem.

1858, oct. 18.

Non oblivione veteris nostrae consuetudinis, prioribus litteris non responderamus, sed, quod cui recte litteras daremus, non habueramus. Quid enim an ego, quum minutas etiam amicitias non retinere solum, sed cupidius etiam consecrari soleam, vestrae Dominationis reverendissimae amoris et consuetudinis obliviscerer? ac me ipsum retexerem? Equidem dolui vehementer, quod hoc toto temporis intervallo, nullam neque doloris, neque voluptatis meae dare vestrae dominationi reverendissimae significationem potuerim: doloris dico; quem summum habebam ex tristiori apud Turcam successu: voluptatis autem, quam incredibilem ceperam ex jucundo et optato in patriam reditu. Quare primum nunc vestram dominationem reverendissimam incolumem ad nos rediisse laetor: deinde illi ex hac amplissima dignitatis accessione gratulor, neque autem magis vestrae dominationi reverendissimae, quam ipsi etiam ecclesiae Christi gratulor, cui talis episcopus divinitus obtigerit, cujus pietate et doctrina, quod infectum est, curari, quod collapsum, sustentari facile posse videatur. Sed religionis malum, quod in omnium oculos

incurrit, nunc non attingo. De nostro mutuo amore, arctissimaque conjunctione, quando nihil diurnitate et temporis et silentii detractum aut imminutum est, restat ut illam nostram amicitiam, quae omnibus studiis et officiis pulcherrime inter nos evaluerat, scribendi assiduitate renovemus ac confirmemus; ut absentes quasi praesentes per litteras colloquamur, et liberius de omnibus rebus inter nos commentemur. Mihi dominationis vestrae reverendissimae litteris nihil potuit accidere jucundius: in quibus nostrae consuetudinis quasi quandam expressam imaginem vidi. De meo autem animo erga vestram dominationem reverendissimam pluribus verbis narrabit hic meus ex fratre nepos, quem vestrae dominationi reverendissimae commendo majorem in modum. Pro veteri autem nostra amicitia vehementius ab illa peto et quaeso, ut fratrem ejus juniorem, si commode fieri poterit, in numerum suorum asciscat: sin minus, curet ei locum, vel apud dominum Sigismundum Herbestein, vel apud alium aliquem principem virum, apud quem non otio, neque desidia, sed labore et cura juventutis suae tempus transigat. Sed mallet eum esse apud vestram dominationem reverendissimam propter morum virtutumque plurima exempla, eoque mihi gratius facere nil poterit. Christus Jesus vestram dominationem Reverendissimam in longissima tempora servet iucolumen. Datae Cracoviae XVI. Octobris anno MDLVIII. Reverendissimae dominationis vestrae antiquus ille et ex animo amicus et frater Andreas Dei gratia episcopus Cracoviensis et dux Severiensis manu sua.

Kivülröl Verancsics kezével: Receptae 29. Octobris 1558.

XCVIII.

Dudics Endre Verancsics Antalnak.

Reverendissimo domino domino Antonio Verancio, episcopo Agriensi ac sacratissimae caesareae majestatis etc. consiliario etc. domino domino ac patrono colendissimo.

Kivülről Verancsics kezével: Redditae 28. Oct. 1558.

1558. oct. 28.

Reverendissime domine domine ac patrone colendissime. — Tametsi quae summa est dominationis vestrae reverendissimae tum in omnes alios, tum privatim in me benignitas ac singularis quaedam humanitas, nunquam ad eam aditum mihi praecclusum esse sensi: tamen quibusdam sum rationibus adductus, ut satius esse crederem scripto potius petitionem meam complecti, quam sermone declarare. Atque illud imprimis, ut id facerem, me movit, quod cum intelligerem, non eum esse me, qui antea unquam ullo officii genere, quo in eam essem animo, quaque observantia colerem, testificari potuerim; et tamen necessitas me ipsa ante ab ea beneficium petere cogeret, quam ego quicquam de ea mereri potuerim: recte me facturum existimabam, si epistola, quae, ut dicitur, erubescere non solet, supplicationem meam explicarem, quae quidem hujusmodi est.

Nudius quartus cum ad familiariter libereque colloquendum admirabili quadam et plane incredibili dominationis vestrae reverendissimae humanitate ac bonitate invitatus et pertractus essem, commemoravi tum ei omnem rerum mearum statum, ac quid animi

haberem, quid cogitarem, quid consilii caperem, de rebus deque studiorum ac totius vitae meae genere quid statuerem, copiose satis, nec scio an liberius etiam, quam decuisset, explicavi. Tum illa, ut facile quivis insignem ejus pietatem intelligere posset, ut me consolaretur adjuvaretque, cum animadverteret hominem esse me litterarum cupidissimum, suique studiosissimum, neque tamen, ut maxime vellem, ullam rationem, qua desiderio meo fieret satis, invenire me posse videret: benignissime ipsa, sua sponte duo mihi sacerdotia obtulit, ex quibus non tam ego me meaque studia, quam pauperrimam ac prorsus miserabilem matrem meam, una cum suis pupillis sustentarem. Equidem tum ita sum exhilaratus, ut cum benevolentiae ejus ac liberalitatis magnitudinem paulo altius considerarem, verba quibus illi gratias agere possem, non reperirem, sed ita eo tempore ab ea discessi, ut copiosissimas lachrymas profundens, Deum Maximum ex animo sim precatus, praeberet aliquam mihi occasionem, qua, si nihil aliud possem, saltem non immemorem esse me hujus tantae benignitatis declararem. Nunc vero, quoniam reverendissimus dominus archiepiscopus ita me dimisit, ut unius tantum anni spatium aegerrime concesserit, quo absoluto nisi reversus ac presbyter factus fuero, beneficia ista mea vacare intelligantur: eo res recidit, ut nisi reverendissimae dominationis vestrae liberalitate fuero sublevatus et recreatus, quo confugiam, aut quid sperare debeam, prorsus ignorem. Quapropter cum ad perficiendum studiorum meorum cursum non uno anno sed majori temporis intervallo sit opus, humillime dominationi vestrae reverendissimae supplico, ne me miserrimum ac pene calamitosum hominem indignum

esse censeat, de quo tam praeclare, ut instituit, mereatur. Potest illa, rebus suis omnibus salvis, quod sponte sua pollicita est, nunc maximis a me precibus sollicitata concedere, ac beneficiis illis, de quibus meminimus, inſciis omnibus, Deo tamen, benefactorum omnium liberalissimi mo remuneratore, conscio, me meamque multis jam calamitatibus oppressam ac prope extinctam familiam erigere, atque a summa miseria in optimum statum vindicare. Quod sane dominationis vestrae reverendissimae factum praeterquam quod Deo ipsi Maximo gratissimum futurum spero, illud etiam accedet, quod ego me perpetuis atque arctissimis benevolentiae ac liberalitatis ejus vinculis constrictum sentiens, nullum sit officiorum genus, quod non sim libentissime subiturus, ac dominationi vestrae reverendissimae suisque perpetuo serviturus. Ac si quando illa nepotem suum, ut tum dicebat, in meam disciplinam tradendum, meaeque curae ac fidei committendum putabit, sanctissime affirmo ac recipio, daturum me operam diligentissime, ut omnes homines intelligant, qui et dominationi vestrae reverendissimae, et illi, majori fide, diligentia ac benevolentia servire aut posset, aut velit, reperiri posse neminem. Nam ego, etiam non impetrato eo quod peto, statui tamen quamprimum id per tempora licebit, in familiam patrociniumque me suum conferre; neque vero dubito non futurum mihi locum inter suos familiares, qualiscunque ille tandem futurus est; profecto modo penes illam sim, quamlibet aliam conditionem etiam oblatam volens ac libens contemnere et negligam. Quodsi autem dominationi vestrae reverendissimae ita videbitur, hoc pacto illa mihi beneficia conferat, ut non ante mihi fructus ex iis provenientes concedat,

quam nepotem suum mihi dederit instituendum, ut interim ego certi aliquid habeam, quod sequar. Nec est quod illa vereatur, ne id ingratum accadat reverendissimo domino archiepiscopo. Nam nonnisi longo post tempore haec resciet, si tamen unquam resciet; et tum nihil mihi cum ipso negotii erit: nec habebit quod ille conqueratur, si dominatio vestra reverendissima miserum hominem et ab omnibus relictum joverit, ac sua liberalitate veluti ad vitam revocarit; imo vero hoc tum apud ipsum, nisi sit natura admodum depravata praeditus, tum apud omnes omnium nationum homines, futurum est nomini ac familiae dominationis vestrae reverendissimae honestissimum ac gloriosissimum. Habet praeterea et ille homines apud se, qui ecclesiae dominationis vestrae reverendissimae beneficiis opulenti fruuntur. Ego sane cum in humanitatem ac benignissimam dominationis vestrae reverendissimae naturam intueor, adduci non possum, ut dubitem, me non omnia, quae peto, consecuturum. Quod ut fiat, suppliciter atque humillime ab ea peto, in qua omnem spem meam positam habeo; a qua omnes et meae miserae matris et meorum pendent fortunae ac commoda: quos mecum una dominationi vestrae reverendissimae quam possum officiosissime ac diligentissime commendo et trado, gratiosissimum ac benignissimum exspectans responsum. Dominationis vestrae reverendissimae humillimus ac deditissimus servitor Andreas Duditius Sbardellatus.

XCIX.

Sebridovski Endre krakói püspöknek Verancsics Antal.

Reverendissimo Andreae Sebridovio episcopo Cracoviensi.

1558, oct. 30.

Reverendissime in Christo pater et domine, domine praesul integerrime, amice et fautor colendissime. Salutem ac obsequiorum meorum in gratiam ejus veteri jam eoque confirmatissimo studio devotioneque commendationem. Nudius tertius et litteras vestrae reverendissimae dominationis accepi, et Stanislaum Albertumque nepotes suos eo quidem excepi animo, quo eandem semper et praesens et absens jam inde a pluribus annis colo atque observo, nempe et voluntate et affectu singulari. Nec aliud dicam de suis jucundissimis litteris, quia humanissimis, nisi quod mihi quanto diutius fore desideratae, tanto sane venere gratiores; verum oblatiis meis omnibus officiis et fraterna opera Stanislavo Patavium bonarum artium gratia festinanti, Albertum apud me pro voluntate vestrae reverendissimae dominationis retinui, quem quidem sic habiturum me polliceor, ut vel ipsum fratrem meum Michaelem, vel ejus filium. Neque dubitet, disciplinam illi bonorum morum defuturam, quum et plurimum nobilium erit in consortio, et a nobis etiam non discet alia, quam quae discuntur in catholicorum episcoporum scholis. Paulo post, ubi aulae nostrae formulas apud me perdidicerit, et tyrocinium ho-

spitis deposuerit, eum, si alibi esse censuerit, illud sibi persuadeat velim, me nulli officio defuturum quo eidem vestrae reverendissimae dominationi gratificari potero. Nec pluribus ad ejus litteras in praesentia vacat respondere, quum majestatis caesareae domini mei clementissimi in imperium profectio nos quoque Hungaros occupatissimos teneat, dum de toto regni statu, quod nobis reliquum est, solliciti bellum Turcae anno insequenti formidemus, cujus rumores ut apud nos jam indies videntur increbescere, ita nec nostri quoque segnes erunt apparatus. Reliqua gubernabit Altissimus, qui vestram reverendissimam dominationem incolumen ac felicem diutissime servet. Viennae, ultima Octobris. 1558.

C.

Rapicius Endrének Verancsics Antal.

Andreae Rapicio.

Magnifice Rapici salve. Legi complurium doctissimorum hominum seculi nostri epistolas, quorum nomina praetereo invidiae vitandae gratia, verum suo cuique honore, sua laude existimationeque integra salvaque permissa, unus me ita hoc scribendi genere delectavit Palearius, ut cumulate perplacuerit. Docte illi quidem omnes et latine et graviter, et summo sane judicio, summa cum laude scripsere, qui jam

1558. NOV. 1.

partim praecesserunt Palearium, partim sui fuere temporis. Hisque de causis non immerito eos nobis et Italiae et Galliae et Germaniae prela tam certatim et identidem restituunt, ut sane dignissimos, qui fruantur luce nostra sempiternum. At tametsi ne in Paleario quoque desiderentur hujusmodi dotes, quibus hos pollere dixi, habet tamen quiddam singulare et rarum inter alios Palearius. Nam quicquid in buccam venerit pro rei atque argumenti statu (quod doctiores peculiare dixerunt esse epistolae), id, meo quidem iudicio, dumtaxat scribit, scribit autem et pure, et concinne, et jocundo cuncta cum acumine, adeoque sibi belle et citra negotium videtur satisfacere (ubique expeditam dictionem professus, qualem elegorum suorum poetae fieri volunt), ut eum re vera sine anxio rerum verborumque delectu scribere, non meditari, effundere, non difluere, et semper sui argumenti memorem nusquam ab eo indecenter avagari iudicem. Vitato praeterea omni in parte colorum nervorumque apparenti oratorio apparatu, copiosum, plenumque nihilominus argumentorum invenio, quamquam lenem planumque, et per commata quaedam pluribus astrictum locis gradientem, ut et Isocratis, et Caesaris, et Ciceronis, et Cornelii Taciti familiarem fuisse facile agnoscas. Quumque sine omni vehementia, neque in affectus assurgendo, neque in tragica erumpendo, cuncta presso perspicuoque calamo explicet, quae concepit animo, atticam sane dicendi modestiam leporemque et amasse, et assequutus fuisse mihi creditur. Haudquaquam interim vel succi, vel nervorum indigus, ea vi potissimum delectatus, quae sententiis, non verbis continetur. Habes meum, Rapici charissime, de Paleario iudicium, quod equidem non attigi

ex arrogantia, quam mihi nec natura dedit, nec fortuna finxit, sed quod ejus adamarim epistolas. Quo amore si fortasse deceptus fuero, agnosces hominis judicium. Tametsi quid debuerim pertimescere, non video, si et Andreas Aliattus celebratissimae eruditionis jurisperitus, veteris eloquentiae reparatorem ac civilis juris dignitatis assertorem nominaverit, et Jacobus Sadoletus, vir excellenter doctus, ac magnus cardinalis, dixerit, non posse laudes ejus sine scelere praeteriri, esseque homines illos imperitos, qui eas ignorassent, qui vero supprimendo dissimulassent, improbos. Magna profecto commendatio, eoque etiam amplissima, quod a laudatissimis viris tanto sit diplomate posteritati consecratus. Unum in eo mihi non placuit; voluissem, ut exclamationes suas ad immortalem Deum direxisset non ad immortales, quamquam et Bembum, et Jovium, et pler osque aios seculi hujus habuerit scriptores, quos imitaretur, parum illos quoque hac in parte laudandos. Quodsi leve quippiam, et ad theologorum cautiones pertinere dixeris, non ad oratorum, neque eorum, qui stylo student luculentiori: alterum tibi assentior, alterum sane non concedo. Nam quum a professione nostra christiana prorsus est alienum, joco etiam vocem hanc ex ore hominis nostri audire: Dii immortales, qui in signo, in lapide, in argento, auro aereque fuerunt daemones, humani generis illusores: tantum sane abest, ut id commodi gratia faciamus orationi nostrae consulentes, dum eam pleniorum vocum sono amplificantes, graviores reddere contendimus; quasi vero nec romanus nitor, nec oratoria gravitas admitteret Deum immortalem, idque vocis non ab imo pectore, neque bucca plenior vel effari, vel exclamare posse-

mus. Sed haec ad te familiariter, ut cum iis soleo, quorum ingenio delectatus, humanitatemque et virtutem complexus, consuetudinem etiam concupisco, ultroque lacesso, ut potiar concupitis. Quod postremum erit, remitto tibi Palearium, quem quidem ita totos hos dies, quibus apud me fuit, legi volvique ac revolvi, ut mirifice etiam adamaverim. Mihi quidem certe rem facturus es gratissimam, si curabis, ut nudius tertius recepisti, ne caream Paleario, idque mox, ubi in ejus vel bibliopolam, vel typographum incideris, quum Germaniae civitates peragrabis; cui vicissim ipse quoque mea non negabo, neque subtraham officia, quaecunque usus tui postulabunt, eruntque in mea potestate. Vale. Viennae, Novembris prima 1558.

CI.

Testvérbátyjának Antalnak Verancesics Mihály.

Reverendissimo domino domino Antonio Verancio, episcopo Agriensi, comiti perpetuo Hewesiensi, sacratissimae caesareae majestatis consiliario, domino observandissimo.

Kivülről Verancesics A. kezével: Receptae 29.
Decembris 1558.

1558. nov. 6.

Reverendissime domine, domine observandissime. Salutem et servitiorum nostrorum commendationem. Ita repente contigit me scribere hasce litteras, ut particulariter omnia prosequi nequiverim, praesertim mihi specialiter commissa. Sufficiat igitur pro nunc certificare dominationi vestrae reverendissimae, nos omnes esse et vivere incolumes, et plurimum desiderare ejus litteras, ex quibus salutis suae rationes omnes et fortunarum perdisceremus. De fama et praeconio dominationis vestrae reverendissimae apud omnes hasce nationes quid dicam? nisi quod summis viris et omni laude dignis attribuitur. Ut autem attin-gam nonnihil et summatim de quibusdam quae forsitan scire desiderat: De negotio Traguriensi nihil fit. Hic offertur simile per parentem juvenis illius, qui fuit nuper apud eam. Filunt (?) Petrum de Bassano, modo velit dominatio vestra reverendissima; brevi tamen clarius per proximos nuncios. In reliquis frater Nicolaus hortum licitavit florenis 400-is; sed et aliae plures res, et utiles, et hujus loci praecipuae prostant; de quibus totaliter adhuc scribere nequeo praeter ea,

quae nuper scripsi de Praeviano. Sint Maecenates etc.. Quod reliquum est, circa negotium Ragusinum nihil expeditur, ita ut parens me quotidie obtundat (?); in ea tamen est spe, in qua eum dominatio vestra reverendissima confirmavit per litteras. Salutem dicere dignetur Belgramonio, Lazkoni magistro curiae suae caeterisque suis familiaribus omnibus cum Pechy Janos meo nomine. In reliquis opto dominationem vestram reverendissimam optime velere et quam diutissime. Ex Sibenico. Die 6. Novembris 1558. Michael Verancius servitor et frater. *)

CII.

Egy nagyságosnak, úgy látszik, Telekesi Imrénék.

1558 nov. 12.

Magnifice domine vicine, amice, et tanquam pater nobis observandissime, salutem et servitiorum nostrorum commendationem. Litteras dominationis vestrae magnificae, quas ad nos et ad magnificos dominos bellicos consiliarios proxime dedit ratione decimarum nostrarum, eas utrasque intelleximus. Quum autem de successu earum aliter scripsit nobis, aliter dominis bellicis consiliariis, non parum et ipsi et nos admirationis habuimus de hujusmodi sua industria; easque ipsas litteras, quas nobis miserat, eisdem consiliariis magnificis ostendimus, ut perspice-

*) Következik néhány sor cryptograph irással.

rent, quonam pacto dominatio vestra sese in istis finibus non solum cum caeteris omnibus majestatis caesareae fidelibus, sed etiam nobiscum gereret, qui in hisdem istis finibus tantae molis arcem, tamque magnum praesidium fructibus earundem decimarum sustentare cogeremur. Parque sane erat, ut vel propterea tuti a rapina dominationis vestrae et suorum esse deberemus, si forte inimicum omnino animum erga nos induisset, et constituisset apud se, ut nunquam quicquam deinceps ex ejus humanitate et benevolentia speraremus. Porro non contenta damnis, quae nobis citra nostrum omne demeritum maxima intulit, conditione quoque nostra perinde ac ignoti cujuspiam et ex trivio hominis abusa, contemptu denique nos perstrinxit, dum ademptis nobis nostris redditibus ad caesarem nos, aequitatem nostram quaesitum et amissa repetitum amandaverit. Magna sane ista dominationis vestrae licentia, qua et nos tam confidenter atque impune spoliare parvi ducit, et de indulgentia immo etiam de gratia et de favore optimi et integerrimi principis, summi omnium malefactorum osoris, audeat sibi et suis non benefactis tanta polliceri. Quas quidem offensiones a dominatione vestra magnifica ut indignissimas et inexpectatas, ab eo praesertim homine, quem semper loco patris coluimus, et duras certe et peracerbas accepimus; et eas licet toleraturi honoris nostri causa non simus, prius tamen ad opportuna remedia quam ad aequitatem conferre nos noluimus, unde tota re et tota nostra causa ad majestatem caesaream impigre delata, gravissimeque apud eam pleno consilio expostulati, respondit: se nunquam id licentiae dominationi vestrae concessisse, nostrosque redditus si sic attinget violenter, ut

conquesti fueramus, aequitatem, justitiamque postulare, ut nobis de suo satisfaceret, idque si negasset, sciret satisfacturam cameram de stipendiis dominationis vestrae militaribus. Eam se ad istos fines misisse non grassatorem sed praesidem, non populatorem sed protectorem et propugnatorem fidelium suorum datoque ad eam super his mandato, quod est brevi acceptura, decimarum nostrarum pretia, si fructus sibi retinuerit, persolvi nobis clementissime jussit. Jam dominatio vestra magnifica si amicitiam et officia nostra grata habere velit, quibus ad hoc usque tempus, ubicunque res et commoda ejus postularunt, nunquam adesse praetermisimus, rogamus, ut pariter ipsa etiam de adeptis nostris decimis amice et humaniter nobis satisfacere velit; sin ab hoc animo fuerit aliena, ut futurum non speramus, procul dubio magnopere dolebimus, et memoria tantae injuriae, quam omni damno anteponimus, non conquiescemus, quoad vivemus. Quum enim majestas caesarea nec jussit, nec vult dominationem vestram istic inter nos fideles suos vivere ac potiri rerum rapto, ita nec magni sane nec utilis est consilii, alias arces in finibus spoliare, alias vexare, ubi una omnes periclitentur, nostra praesertim Agriensis, ut magis extima et propinquior ad hostes caeteris. Dominationem vestram magnificam denuo rogatam velimus, curet benevolentis animo, ne inter nos commordeamus mutuo, sed potius coamemus, postquam tantae opportunitatis tamque arduum confinium ambo ex aequo tenendum servandumque suscepimus, habeamusque fere jam in visceribus, nedum prae foribus nostris hostes tam multiplices, et in exitium nostrum consentientes, a quibus mordeamur. Neque committat, quod pro fraterno no-

stro consilio eam hortamur, ut, sicut fortiter ac praeclare hoc anno de utrisque hostibus, deque tot arcibus, tot castellis expugnatis triumphavit, voceque omnium laudatur, ita etiam de labefactatis et attritis fidelibus, quos tueri ac servare inoffensos debuerat, vituperetur; quamquam alioqui, si ut aequitatis est, nec de ademptis nostris redditibus convenienti nobis satisfactione respondebit, nec huiusmodi nos damnis in posterum laceessere destiterit, protestatum imprimis coram Deo, deinde coram principibus nostris et toto regno his nostris litteris esse volumus, nostri huius dissidii, si forte fortuna inciderit, non nostram sed vestrae magnificae dominationis culpam fore. Haec autem scripsimus ad vestram magnificam dominationem, quod fatemur, et irato et dolenti animo, nectamen sine spe, quod sit amicitiae nostrae in omnem eventum rationem habitura. Quare tentaturi an sit huic spei nostrae responsura, provisorio nostro mandavimus, ut ad vestram magnificam dominationem hominem suum cum his litteris nostris et cum caesareo mandato mittat, quod simul cum litteris nostris quando intelliget, rogamus, gerat sese sic nobiscum, ut neque hac nostra spe, nec vestra frustremur amicitia. Deus eandem conservet sanam et felicem. Viennae, XII. Novembris. 1558.

CIII.

Verancsics Antalnak Torda Zsigmond.

1558. nov. 13.

Reverendissime domine patrone et fautor observandissime. Salutem et devinctissimi pectoris obsequia. Fuit heri populus in curiam convocatus; ibi cum dominus judex inter caetera de adventu dominationis vestrae reverendissimae retulisset, secuta est approbatio omnium plena favoris: Excipiendum libenter talem patronum, amanter habendum, honorem non tantum reverendissimae dominationi vestrae sed etiam servitoribus tribuendum; unum tantum a dominatione vestra reverendissima postulari atque intelligi oportere communitas censuit: Quatenus reverendissima dominatio vestra hic nec doctrinam impedit, nec turbabit ministerium, neque in ordine, ritibus atque caeremoniis ecclesiasticis aliquam mutationem molietur, seque huic rei non admiscebit. Fecimus nos civibus de dominatione vestra reverendissima spem bonam, non sine praedicatione ejus ingenii, sapientiae, virtutis, humanitatis. Tamen quia communitas certior fieri optat, uno brevi epistolio ad judicem, scrupulum hunc reverendissima dominatio vestra facile tollet, et civium animos sibi devinciet. Ego dominationem vestram reverendissimam cupidus exspecto. Quam Deus immortalis incolumem et felicem hic statuatur. Albertus quoque Sylva adest, qui se in commoditatibus hospitii disponendi haud segnem praestitit. Eperies 13. die Novembris anno Domini 1558. Reverendissimae dominationis vestrae servitor Sigismundus Torda.

CIV.

Pesti Ferencznek Verancsics Antal.

Ad dominum Franciscum Pesthiensem.

Quod proxime ad nos egregia dominatio vestra^{1558-nov. 13.} de rebus novis partium istarum scripsit, gratias habemus, easque sane permagnas, quia nisi ipsa interdum ad nos litteras daret, saepenumero integri etiam menses nobis praeterirent, quod nihil sciremus de nostris finibus, quo nimirum in statu rerum essent, quidve illis aut commodorum decessisset, aut incommodorum accessisset, quemadmodum de clade quoque Turcis a praesidio primum vestro Cassoviensi et domino Georgio Bebeek, deinde etiam ab nostro Agriensi diebus superioribus illata videmus accidisse, quum et dominatio vestra, et omnes alii, qui huc dedere de successu ejus litteras, ita paucis eam descripserunt, ut vix attigerint, idque tam obiter et prope cursim, quam de re aliqua perpusilla, fitque hinc, ut cognitio ejus etiam nunc desideretur ab omnibus, quam amplissimam et memorabilem latissime apud nos fama divulgavit, extulitque etiam ad externos. Nec id immerito quidem, quum vix armatorum nostrorum mille quingenti supra tria millia hostium ea caede affecerunt, ut paulo pluribus quam mille dicatur contigisse effugium. Factura itaque nobis est dominatio vestra rem longe gratissimam, si hujus tantae victoriae totam

summam ac seriem primo quoque tempore ad nos exarabit, sed id tamen ea ubertate atque eo ordine, ut ei nihil desit, sua potissimum historia, hoc est, veritas ipsa. Quia dicunt hic, Agrienses nostros sero erupisse, ac jam fugientibus hostibus supervenisse. Cassoviensem ducem dominum Joannem Pethew et dominum Emericum Telekessy mature quidem eos invasisse et pugnassee cum illis plusculum, sed post primum impetum terga mox dedisse, et soli domino Georgio Bebeek successisse feliciter; eum scilicet dum Cassovienses fugarentur, Agrienses nihil de conflictu scirent, summo et suo animo et robore suorum in hostium latus incurrisse, non casu, sed consilio, eoque demum incursu ejus fuisse factum, ut perfractis ac territis hostium turmis, Cassoviensium quoque inhibuerit fugam, remque ex hoc totam desisse in victoriam, quam adeo magnam fuisse hic habemus persuasum, ut sit affirmatum, etiam ab inermibus rusticis, continuum triduum insequens, veluti pecora palatos, per montium ac sylvarum invia oberrantes, sine omni negotio captos et interfectos esse complures. Quae quoniam alii hoc modo apud nos referunt, alii vero alio, nec hactenus vel duo reperti sunt, qui eadem referre potuissent, adhuc desideramus veritatem, et haud dubie pergratum multis fecerit quisquis ille fuerit, qui rem omnem ad amussim huc perscribet. Quem laborem si dominatio vestra tam multorum gratia subierit, nostra autem potissimum, qui tam sedulo eam rogamus: et de solita sua humanitate ac diligentia laudabitur, et par a nobis sumet officium, immo etiam multiplex, quia toties quoties uti nobis et nostris rebus voluerit. De Melchioris Balassae ac Joannis Terek novis conatibus, non est quod attingamus pluribus, sed agant,

conentur tumultuenturque ut velint, sic enim ruunt instabiles, leves ac praecipites. Et nec ipsi quoque fata sua effugient, quae tantoper urgent, nec post eos ille etiam, quorum causa et Transsylvani et tam multi alii tantum insanire sapientiam esse putaverunt. Sed o bellam sapientiam, lepida illorum consilia, qui affectarunt regimen valacchicum in Transsylvania. En jam quod optarunt, habent, et qui fuere authores, probe ejus principia caedibus suis dedicarunt. Brevi profecto leges easdem experturi caeteri. Et ne ipsam quoque Joannis prolem ac posteritatem immunem ab his victimis futuram ad imitationem Dracularum, Myrcieorum, Petrascorum, et idgenus plurium Valacchiae stultissimorum regulorum, qui omnes de Turcae fide confisi, ejus perfidia indies extinguuntur. Nec est dubitandum caeteros quoque Christianos, quicumque amicitias Turcae ambiunt, foederibus credunt, et spem in ejus ope ponunt, similes fructus relatueros. Atque utinam ii nostri miseri, vel his sese initiis colligerent et mature sibi providerent, ne extremis intercipientur. Nova hinc, quae scribamus, nunc non habemus aliud, quam quod magna spes nunciatur de futura pace inter Philippum regem, et Gallum. Nec alia causa conclusionem ejus differri, quam quod longiorem et firmiorem facere laborent, quo demum respublica christiana, vel sub hoc Turcae ad annum insequentem apparatu conquiesceret a bellis et dissidiis intestinis. Caeterum, quod suam curam etiam dominatio vestra adhibuerit de commodo nobis istic hospitio disponendo, fecit rem nobis gratissimam et relatione gratiarum dignissimam, quarum nos quoque curam non intermitteremus, ut per occasiones ei non ingrati simus. Diem tamen nostri hinc

discessus nec adhuc scire possumus. Camera enim tenet nos. Cujus quidem retinacula ut ad hoc tempus ignoravimus, ita nunc nihil aequae difficile putamus quam cum camera negotium habere. Brevi tamen speramus, quod rem quoque nostram absolvet; idque ubi primum fuerimus assequuti, postero die ad vos ingrediemur iter. Et dominatio vestra egregia bene ac feliciter valeat Viennae 13. Novembris. 1558.

CV.

Verancsics Antalnak Rapicius.

Reverendissimo atque amplissimo praesuli domino Antonio Verancio, episcopo Agriensi, domino suo observandissimo.

1558.nov.14.

Quod tibi isthinc proficiscens me facturum pollicitus sum, ut ad te scriberem, si quid forte haberem, quod scriptione magnopere dignum judicarem, id nunc oblata opportunitate faciendum mihi existimavi, non tam quidem, ut scires ea, quae hic proxime sequuta sunt, quam ut hinc intelligeres, Rapicium tuum, per multas provincias ultro citroque cursitantem, tui memoriam perpetuo secum circumferre. Neque nempe ullo unquam tempore fieri posse puto, ut humanitatis, ut amoris illius erga me tui obliviscar, qui, quoniam ex naturae tuae bonitate potius, quam ex meis ullis meritis ortus est, eo mihi majorem necessitatem imponit, ut vicissim tibi summam meam erga te observan-

tiam ac cultum illustri aliquo argumento testatum relinquam. Atque utinam aliquando, vir amplissime, id mihi liceat facere per occasionem et fortunas meas; non enim dubito quin voluntatis ac animi mei sensum perspicere liquido posses. Pragmā venimus V. Id. Novembr. usi itinere satis prospero, tametsi gravitas coeli et aëris in clementia aliquantulum nobis molestiae attulerit. Tanta nempe vis nebulae totos hosce septem dies, quibus iter fecimus, fuit, ut diu alter alterum internoscere non posset. Caesari proprius ad urbem accedenti, in aperta porrectaque planitie itum est obviam a Ferdinando filio cum quatuor mille expeditis equitibus bohemis, quos ille ita instruxerat, ut simulacrum certaminis coram caesare inituri viderentur. Is ubi patrem intra teli jactum conspicatur, e vestigio a suis divulsus citato equo illum excipit, amplexaturque; prae gaudio lachrimae obortae, nusquam tantus ullo in principe ardor animi visus, adeo in fronte, in oculis nescio quid divinum praeseferibat, quod sola cogitatione comprehendere potest. Nec mora ab hipposcopistis innumera glandium seges honoris causa displosa, nihil ab iis praetermissum quod ad plenam cumulatamque laetitiam pertineret. Ferdinandus ubi caesarem et Carolum archiducem excepisset, ad suos statim revertitur, jubet illos sensim movere. Ibi caesar aliquamdiu moratus spectabat equitum procedentium ordinem; erant autem ii ita dispositi, ut quini incederent. Ita fiebat ut totus numerus in gyrum solutus universam fere planitiem, quae ad quinque millia passuum quaquaversum patebat, occuparet. Hinc progressus caesar, ab aliquot rusticorum peditum cohortibus excipitur; quem ubi conspicerent praetereuntem, momento quibusdam flagellis, quibus erat a summo

clava robustior pendula (iis autem passim utuntur rustici ad excutiendas frumentorum spicas), tantos strepitus excitarunt, uti omnes in risum solverentur. Ajunt Bohemos olim hoc armorum genere in bello usos. Crediderim ego non alios fuisse apud Virgilium caestus, ubi Entelli et Daretis monomachiam eleganter depingit. Caesar captus novae rei spectaculo paulisper substitit, accessitque propius, ut rem ipsam paulo attentius contemplaretur. Astabant e regione hujus urbis senatores et cives, eodem omnes cultu ornati, ex quibus, qui erat aetate grandior, habita de more oratione, caesarem allocutus est. Paulo inferius stabat altera peditum instructa acies, a quibus continenter ejaculatum. Idem omnibus cultus, eadem vestis fuit. Urbem ingresso caesari universus clerus obviam processit; erat undique effusa omnis sexus aetas, parvuli, juvenes, senes, pendere ex domibus, ex pergulis, ex protectis, ex suggrundis; vias, compita, diverticula complere, ut communem patriae patrem conspicerent ac salutarent. Urbis plerique anguli singulas Musas servabant. Vidimus Calliopen, Uraniam, Polyhymniam, et reliquas, amictu candido, rubea zona succinctas, cum innumera puerorum et promiscui sexus multitudine. Hi pueri cum olim ad senectutem pervenerint, memores procul dubio eorum omnium, quae adolescentuli viderunt, non sine voluptate filiis suis narrabunt, venisse aliquando in urbem Ferdinandum caesarem tanto populorum omnium atque adeo totius orbis applausu, ut nihil unquam post hominum memoriam admirabilius factum sit. Sed haec levia pro iis, quae jam audies. Ubi in forum venimus, ibi erat videre non armatos, non togatos homines, sed integram puellarum ac virginum

chiliadem. Dii boni! qua forma! quo cultu! Nullum mea quidem sententia inter tot spectacula neque aliud plausibilius, neque honorificentius hoc uno fuit. Laudarunt omnes archiducis Ferdinandi tempestivum et sagax ingenium, qui novum hoc pompae genus praeter omnium opinionem excogitaverit. Quod ipsum profecto, quo praeclarius fuit, eo est Austriacis dedecorosius, utpote quos oportebat in excipiendo caesare omnes alios anteire; sed danda est iis tamen in ea re venia, qui nimirum in agris et vineis totos dies sunt occupati. Sed omnino, extra jocum, fuit ea res tam admirabilis omnibus visa, ut non dubitem futurum aliquem, qui illa omnia aliquando publicis litterarum monumentis consignet ad memoriam hominum sempiternam. Hinc ad pontem ventum est, quem in locum universa Judaeorum faex gregatim convenerat, ut caesarem umbella pensili exceptum in minorem urbem deducerent. Ibi variae cantillantium Hebraeorum voces auditae; ad quas pene omnes obsurduimus. Erat inter illos qui legem Moysi populo ostentaret; sed praeterieram fere eos, qui sunt ex instituto nominis Jhesu. Stabat pro coenobii foribus, hoc est, in ipso vestibulo hominis loricati statua, ita efficta ut videri Mars aliquis posset. Quid sibi ea res voluerit, nondum mihi exploratum est. Habita ab iis, ut audio, apposita oratio. Pons vero ipse, qui operosissime tot arcuum mole utramque urbis ripam jungit, totus armatorum hominum statione complebatur. Videre mihi videbar florentem aliquam rempublicam, in qua Coclites, Sertorii et Curtii revixissent; sed audi adhuc majora. Superato ponte dum pleno passu ad arcem contendimus, in ipso fere ascensu, offendimus quingentas matronas stantes, ex iis, quae jam virum

luserunt, omnes pullatas, candida ex humeris taenia defluente. Quid hic commemorem totidem senes, veneranda canitie conspicuos, qui sub vespertino crepusculo, accensis funalibus, caesarem exspectabant. Jam fere ad regiam arcem perveneramus, cum ecce in ipso statim limine a Sileno excipimur. Is festa fronde caput revinctus, ac ridenti similis, dextra manu liquorem ex uvarum racemis exprimebat, cum hoc lemmate: Sileni liquor non silet sed loquitur. Vidimus etiam ex siphunculis, quos alii salientes vocant, vinum continenter effluere, idque nullo cratere seu pelvi susceptum humi quasi rivulos quosdam efficere; quod laetitiae causa a Ferdinando archiduce institutum fuit. Porro in ipso arcis ingressu exstructa erat veteri more porta quaedam convexa, sive arcus prodigiosae magnitudinis, cujusmodi olim romanis imperatoribus ex triumphatis hostibus erigi solebat, hoc in ejus suprema basi praefixo carmine: Imperio, Fernande, novis et honoribus aucte, huc ades aucturus non minus imperium. Arcum ipsum, quem multae inscriptiones, picturae ac emblemata ornabant, duae insignes surrectae pilae seu columnae structiles, ab utroque latere clandeabant; in quibus eximiae magnitudinis statuae, altera Samsonis, altera Gedeonis, summo artificio ad vivum effectae, non sine spectantium admiratione visebantur. Hinc usque ad regiam ipsam principis cuncta auro micantia, et magnificis instructa artificiis cernebantur, omnes porticus ambulatoriae et columnarum epistilia tinnulis, bracteolis et perpetua fronde vestiebantur; trophaea subinde varia aureis indicabant litteris. Erant passim fornices triumphales operosissime exstructi, variis statuis ac imaginibus exornati; quae omnia faciebant

ad felicissimum ipsius caesaris ingressum. Haud ita post gigantomachia extra urbem edita igne artificioso. Vidisses informes gigantes loco moveri, incedere, montes montibus addere, mox Jovis fulmine absumptos inconsultae temeritatis suae poenas dedisse. Obstupuerant animi omnium inusitatae rei miraculo. Nimirum hoc tempore nihil non ars et ingenium hominis aemulatur. Sunt qui putent non otiosam fuisse hanc fabulam, sed ea velut admonitos factiosos homines, ne temere aliquando in principem insolescerent. Ea ipsa die tot in altum ejaculati ignes, tot audita bombardarum tonitrua, uti aedes mirabiliter concuterentur; dixisses tonare Jovem, crepitare auras et raucum murmure coelum compleri. Quid multis? Nullus fuit in urbe locus, qui non argumentum aliquod laetitiae suae prae se ferret. Ipsi, mehercule, muri, ipsae urbis viae prae gaudio exiluire. Habes, praesul amplissime, pompam Pragensem non descriptam a me, sed quasi pennicillo delineatam. Quod feci non solum, ut et tu laetitiae hujus particeps esses, verum etiam, ut exiguu hoc argumento constantem ac perpetuam meam erga te observantiam, quam scio alioqui tibi antea esse exploratissimam, cognitam ac perspectam haberes.

Comitia III. id. Novembris hic primum haberi coepta. Ea die more majorum decreta fuit supplicatio, ut bene feliciterque eveniret, quod consilium reipublicae causa a caesare susciiperetur. Existimo caesarem hinc propediem Augustam discessurum. Hoc inde colligo, quod praemissi jam sint designatores aedium. Nos, quod unum possumus, rogamus Deum, uti omnia caesaris consilia reipublicae christianae fausta ac salutaria esse velit.

Haec cum scriberem, allatum fuit tristissimum de

Caroli V. fortissimi, sapientissimique imperatoris morte nuncium; universa caesaris aula in luctu et squalore versatur. Hujus nunquam satis laudati principis interitu alterum christianitati oculum ereptum esse omnes fatentur. Sed haec orbis ipse viderit. Quod reliquum est, praesul amplissime, velim, tibi omnia de me cumulatissime et audacter polliceare. Nam etsi opes meae infirmae sunt et multa tua erga me officia exstant, enitar tamen, ut observantiae et venerationis meae studiis intelligas, quanti faciam humanitatem tuam. Bene vale et Rapicius inter tuos adscribito clientulos, observantia cultu et studio cessorum nemini. Pragae postridie id. Novembris, anno 1558. Tuae reverendissimae atque amplissimae dominationis deditissimus servitor. A. Rapicius D.

CVI.

Maximilián cseh királynak Verancsics Antal.

Sacra majestas regia, domine domine mihi clementissime.

1558. nov. 20.

Quoniam milites Agrienses propter stipendiorum suorum insolutiones tam diuturnas arma sua saepius oppignorando, coacti, magna pars eorum inermes remanserunt. quod eadem ad postremum redimere nequiverunt. Prospecturus itaque, ut ex inermibus faciam iterum armatos, oblatus mihi est mercator qui-

dam, civis Viennensis, vir bonus et commode dives Johannes Lauser, qui diversi generis arma octingentorum vel mille circiter florenorum Agriam est meo nomine conducturus. Propterea vestrae sacrae majestati supplico, dignetur id mihi et dicto mercatori facultatis et gratiae suae regiae gratiose concedere, et mandatum superinde jubere fieri. Polliceor autem eo me omnes, qui eadem arma coëmere voluerint, edicto inhibiturum, ne quid vel minimum eorum quopiam in Turciam efferatur; et quoscunque deprehendero, impunitos gravissima poena non relinquam. Viennae. 20. Novembris 1558.

CVII.

Nádasdy Tamás nádornak Verancesics Antal.

Ad magnificum dominum comitem palatinum.

Mitto dominationi vestrae magnificae descriptio-^{1558.nov.24.} nem apparatus, quo serenissimus archidux Ferdinandus cum Bohemis suis die VIII. Novembris majestatem caesaream excepit Pragae. Nec aliud novi post proximas literas, quas ad eam dedi, Viennae etiam consequutum, nisi casus quidam Giulensium non exigui periculi, si in tumultum quempiam reciderit. Veniens enim huc dominus Gaspar Magochy praefectus ejus arcis militem quendam suum, virum, ut ajunt, fortem, et a fide summe commenda-

tum, arci illi cum plena potestate totum etiam illud praesidium regendi praefecerat, dum redisset ipse. Hunc Franciscus quidam Horwath, miles similiter Giulensis occultus Gasparis, nec omnino ignotus aemulus, ascita sibi quorundam conjuratione post discesum ejus occidit, idque, ut allatum est, sicario more, quia ex insidiis tamquam fortuito. Deus bone, quanto gradu, quam ingeniose atque sollicite fata gentis atque regni nostri properent et ad extrema praecipitent, vestraque magnifica dominatio videat quo in periculo locus ille versetur. Gaspar Magochy tam insperato casu hic percussus, discruciatu incredibiliter, nec adhuc tamen expeditur ejus negotium. Praefecturam ulteriorem arcis ejus detrectat. Ii eum non exaudiunt. Fit utrinque magna sollicitatio. A Gaspare, ut illi praefectura abrogetur; ab iis, ut in ea idem diutius perseveret; sed ad hanc usque diem jam ab VIII. nec praesente pecunia, nec munificis praemiorum pollicitis ac summa etiam laudatione meritorum ad id est adductus. Et sic res celeritatis et necessitatis plusquam maximae, maximo cum discrimine Giulae adhuc hunc in modum extrahitur. Serenissimus autem Rex Bohemorum quoniam hinc omnino die crastina cogitur recedere, nec incursu cum Gaspare Magochy componi potest, quaeso, videat iterum atque iterum, quae confusio, quanti tumultus, ac periculi metus. Atque ego habens Giulam magni et opportunissimi cujusdam propugnaculi, et antemuralis Agriensis loco, qua sollicitudine, quo angore aestuem, nulla sane cogitatione, quamvis magna atque intensa, complecti, nedum oratione exponere possum, si quid eidem Giulae acciderit ad versi. De quo metu non praetermisi proximo consilio justa fere declamatione disserere, sed quoniam cum

effectu biduo cognoscemus, quum jam majestas regia proficiscetur, et consilii bellici deliberatio prodibit. Interim tamen Deum optimum maximum oremus, ut prospectum velit Giulae. Ea verum, si nobis adime-
tur, tot subito per Tibisci oram et per illos terrarum tractus, quibus circumvallatur Agria, imponentur castella et praesidia, ut ego ante etiam expeditionem summi tyranni turcici judicem Agriae esse metuendum, vel exaudiar ipse vel obaudiar. Mira enim jam non solum nostros finitimos, sed totam etiam gentem, uti ad me quotidie fere perlatae clamitent et testentur litterae, pervasit desperatio, et ex desperatione consternatio, quod tam frigide cura sit incepta haberi nostrorum finium. Cui malo dominatio vestra magnifica, si est aliqua ratio, succurrat, oro, ne sic vel saltem nos una secum destituamur qui tenemus fines. Quum alioqui omnium etiam communiter video res pessimo esse statu, sive ad Croatiam respiciam, sive ad superiores regni partes. Sed Deus eandem conservet sanam et felicem. Viennae 24. Novembris 1558.

Post scripta. Supervenit Praga, Bohemos conventum absolvisse, eosque inter caetera duo scitu nostro digna caesareae majestati spopondisse. Collaturos ei se ad annos IIII ex quolibet millenario cujusque bonorum stabilium talleres XII, plures videlicet dupplo, quam comitiis prioribus; et quod expeditioni contra Turcam futurae viritim omnes intererunt, si illi vel majestas sua caesarea vel quispiam e serenissimis filiis suis praefuerit. Heri Mariae quoque reginae obitum attulere tabellarii, quam non ita pridem dixerat rex Bohemorum in Flandriam redituram. Recte bonus imperator et de duabus sororibus quae secum totam ferme vi-

tam exegerant, constituit eas e Flandria educendas nimirum *) . . . et quaeillum tanto tempore summa pietate coluerant, altera bellicis etiam studiis iuverat, in coelum quoque comitarentur . . . fruiturae.

CVIII.

Strada Jakabnak Verancsics Antal.

Antonius Verancius episcopus Agriensis praeclaro viro et antiquitatis studioso Jacobo Stradae S. D.

1558. dec. 4.

Vide, Strada, quanti te faciam, si tantum diligam, ut, quod homini non imprudenti tentare sit periculum, adire tamen tua causa nec verear nec recusem. Haud ignorato interim, sed eodem quod tibi majus quoddam videri debebit, et cognito et perspecto periculo. Ais te intellexisse, quod Hieronymi Donzellini civis veneti, arcium liberalium et medicinae professoris doctissimi legissem quandam declamationem, quam est in senatu reipublicae suae, quum ab exilio fuerit restitutus, de quorundam aemulorum suorum criminationibus habiturus. Hortaris simul atque impensius efflagitas, ut ad te perscriberem, quid de hac ipsa declamatione sentirem. Duobus a te aggredior, Strada, insperato et imparatus. Insperato, quod quum ea declamatio tradita mihi sit ad legendum secreto et sub interdicto Arpocratis, vim equidem patior, Strada, et ad peccandum adigor. Impara-

*) Olvashatlan szó.

tus vero, quod et arduam et difficilem mihi provinciam imponis, qui nihil unquam in humanis rebus molestius ago, sic et natura et disciplina institutus sum, quam judicem et censeam aliena; multoque et facilius et securius isti petitioni tuae poteram oretenus satisfacere, quam epistola, quum ejusmodi censurae ac judicia non omnino tuta, non libera esse soleant, quae de iis haberi contingat aliquando, quos nondum vendicare sibi fata, nec adhuc ad studiorum suorum evasere metam, quibus ut quaelibet aetas, quilibet annus consueverit aliquid addicere, ita et amplificationes nostras, quae a judicio procedunt, luculentiores erga talium virorum virtutes esse conveniat. Te tamen, amantissime Strada, quid demum hoc officio morer, cui singulariter gratificari cupiam, nec quae multis amicis aequae ac tibi soli, adeo me tibi tua humanitate tuaque comitate vendicasti. Quare quoniam de eadem declamatione non a te solum, sed et ab aliis non vulgaribus hominibus fieri mentionem audiui, arbitror eam ex meo quoque silentio in tuum posse transire, sed hoc ita tamen, ut meminerimus esse ultimi, in quos culpaе hujusmodi reprehensio torqueatur, si author sese a nobis offensum iri existimasset; cui quidem ego, vel ab eadem declamatione lecta tantum coeperim bene velle, studereque ejus famae et favere virtuti, ut persuasum habere possit, me jam sibi esse conjunctissimum. Verum, ut jam, quod jubes, aggrediar, invenio declamationem Donzellini primum doctam, latinam, artificiosam, pravem, deinde sic distinctam, perspicuam, ornatam, numerosam, ut ubique ab obscura, a sordida, a tumida, a peregrinaque et inusitata dictione aliena, mira et vi et jucunditate lectorem ducat ac delectet simul. Porro maxime

aptum rei argumentum de qua agit, sortitus Donzellinus, tanto illud decore ac judicio tractat, ut diligentissime actioni suae, tanquam forensi, intentus, sic diligentiam et conatus operosiores tegit ac vitat, ut re vera optimum deceat oratorem, qui vel in senatu coram patribus, vel in populo coram quiritibus dicturus prodit. Nulla enim in parte a rhetorum regula vel unguem latum abscedens, et humilia et magnifica moderate prosequens, ubique pro re ac loco, ubi copia, ubi brevitatem usus, hic sensus verbis, illic verba pensando sensibus, ne orationem suam alio loco jejunam linqueret, alio ubertatem locupletaret, sed suam cuique parti copiam necessariam apponeret: ita peraffabre duos quospiam viros martiales, rei militaris peritissimos visus est mihi imitari, qui descendentes ad depugnandum in arenam, mutuo (de armorum nullo conducto inter sese transacto, quibus essent pugnaturi,) eadem arma nec producunt simul omnia, nec uno tempore, dimicationis consilium et rationem occultantes, sed successive, alia atque alia rapiendo, quo quilibet eorum varietate armorum ignorata, sollicitum teneat alterum et novitate insperata celerius ad deditionem impellat. Quo pacto Donzellinus quoque et de patre suo, et de sese dicens tam varie, opportune, caute, summa insuper et modestia et verecundia utriusque virtutem, utriusque merita, suam etiam innocentiam ab objectis criminibus tractat, ut facile cuivis constituisse putem, hac eum declamatione non gloriae memoriaeque nominis sui propagandae ad posteros studium quaesivisse, et eruditionis suae iconem exponere voluisse, sed id solum contendisse, ut innocentia sua et integritate vitae declarata, aemulorum calumnias procul ab se summo-
veret.

Adde huc, quod etsi ex ipsa causa facile pateat, iratum esse criminatoribus suis Donzellinum, quum in exponenda innocentiae suae apologia nihil diligentiae praetermittat, id tamen facit sine vehementia et incitatione spiritus, tanquam Atheniensium lege teneretur et in Areopago esset dicturus, nusquam (ut irati solent) aut inanes sonos voci, aut animi motibus fomenta vestigatus. Quod sane magno eum iudicio fecisse arbitror, quum in senatu tantae majestatis ac magnitudinis verba facturus, idem assequi leniter, modesteque studuit, quod alii turbulenter solent. In quo duorum quorumpiam navigantium agnosco similitudinem, quorum alter mitibus zephyris, alter furentibus austris decurso et superato freto siculo, incolumes quidem ambo eundem portum attingere, isque celerius, ille serius, verum ut hic dubia, molesta et plena periculi, sic ille certa, segura, svavi facillique navigatione, et, ut Flaccus ait, Lalagen canendo. Quae omnia, urbanissime Strada, qui praestare potuit, eum sane magnum, doctum, et non minus eloquentem, quam potentem et perfectum prope ratorem habendum esse iudicem. Quumque isthaec in Donzellino nostro inesse magno cumulo, quantum pro captu meo, videar mihi perspicere, arbitror virum et in compositione praestanti esse ingenio, iudicio, doctrina, et in dicendo facundia, ubertate, dignitateque esse laudandum. Nam quum ad haec et suo ubique gradiatur pede, et summa facilitate dictionis fluat, mira prudentia et verba et sensus ad persuadendum defensionis causae accommodando, eum in ea ipsa declamatione nitorem comperi, quem nativum vocitamus a simplicitate sua, quamquam ea ingenua, perita, et grata non aliter commendanda, quam odores quorumlibet florum antequam cum exoticis

misceantur. Et sperarem profecto fieri haec multo
 cumulatiora, si authorem ipsum audiremus sua scri-
 pta recitantem. Quum in pronuntiatione oratoris to-
 tam rhetores dicant vim orationis consistere, quae
 praesertim in actionem proditura sit, ut et haec, non
 autem ut describatur et legatur tantum. Mire enim
 afficit et in aspectu vox viva, oris benignitas, vultus gra-
 tia, et in eloquendo gravitas, autoritas, venustas, comi-
 tas. Quid quaeris de inventione, et tota ipsius declama-
 tionis propositione, quod fortasse initio attigisse de-
 bueram? Ingeniosa sane est, et ad movendum sane ac-
 commoda. Ut enim in causis forensibus et nunc mos apud
 nos est, et olim fuerat apud veteres, in iudicium dedu-
 cere et ostentare iudicibus uxores, liberos, et omnem
 eorum reliquam cognationem, eos ad commiseratio-
 nem commovendo: sic in parte aliqua video nostrum
 fecisse Donzellinum, diversa tamen ratione ac
 modo meliore; nimirum quia non sine iudicio. Nam a
 paterna probitate, a benemeritis, et a fide in rem-
 publicam orsus, sic demum in suam causam succedit,
 tamque eam scite et prudenter videtur prosequi, ut
 probaturum evidentissime non dubitem se ex bono
 patre nonnisi optimum filium fuisse procreatum. Qua
 in re imitatus Socratem, qui suam quandam apologiam
 apud Athenienses habiturus, vulgare exemplum a-
 spernatus, nec uxorem, nec liberos, nec reliquam co-
 gnationem suam traxit in forum, id muliercularum di-
 cens esse levitatis et ineptiarum, quae et legum rigoris
 et iudicium sanctitatis ignarae, plus aerumnarum
 suarum apud eos aspectum posse arbitrentur, quam
 turis et iustitiae aequitatem. Duo, mea quidem con-
 jectura, non casu sed consilio magnifice perfecit Don-
 zellinus. Omnibus enim suis aetatibus excussis suae-

que totius vitae reddita ratione, et innocentiam suam omni culpa vacare affatim demonstrat, et conscriptos reipublicae suae patres mirifice commendat, eos non ex artis adjectionibus, quae causis adminicula esse solent, sed ex sola ac nuda rei veritate innuens judicare consuesse, qui et justī et sapientes forent. Sed hic jam objurgas fere me, et fortasse etiam obclamas, sat esse laudum in brevem declamationem; si quid addis, expedi. Pareo, et id quidem ego abs te reprehensionis aequo animo fero. Nec eo inficias, plura me perstrinxisse quam delicatae quorundam aures admittere poterunt; quod hominum genus opinionibus suis relinquamus, velim. Sic enim omnes natura sumus, ut quae mihi maxime placeant, ea maxime aliis, in palatuum morem displiceant, quibus non aequae idem sapiat cibus, quamquam sit ille omni ex parte perfectissime conditus et coctus. Nostra ista haec est imperfectio. Hoc a nobis malum est, ut aranearum malignitas, quae et ex rosis et ex violis venena sugit. Ajes, etiam ex cicuta mella reponunt. Verum ut ad institutum redeam, unum adhuc adjicio: quod declamationi nostri Donzellini si laudum reliquarum magna etiam pars deesset, eo sane solo argumento, sic enim ipse censeo, illustris et satis laudata esse posset, quo tam ardens desiderium suum in patriam redeundi excusat, ne in hac etiam memoratae suae declamationis parte non adhibuisset iudicium. Quid enim magis et naturale est, et humanum esse debeat, quam amare patriam et in ea perpetuo cupere commorari? suntque nobis exemplo complures nationes, quae apud exteros et raro commode, et quaedam nunquam etiam assuescunt. Quot praeterea ex novo, ut vocamus, orbe in nostrum educti sunt mor-

tales, qui diu supervixerint? contabescere eos sane in dies ac brevissimo tempore deficere, caeterum, si reducantur, vel gravissima etiam aegritudine correpti mox vel ipsam ubi nativi soli auram attigere, confirmari et convalescere feruntur; quod in nostris quoque hominibus crebro videre licet. Ac ne in feris quoque, et in caeteris omnibus aliis fere animantibus, loquendo nunc de sylvestribus, desunt similia exempla nobis. Quae tametsi alia sylvas, alia montana, alia planities, et paludes alia latissime pervagentur, ubi tamen foetare, conquiescere, hyemes, noctesque et extrema vitae exigere tempus suaserit, quibus in locis orta altaque fuerunt, ad ea sane se semper peculiariter et avidissime conferunt. Unde et in planis cervos, in sylvis apros, in praeruptis cantibus capreas venamur, agnoscentibus et piscibus sua maria, et repetentibus. Verum ille philosophus naturam virtuti subicere conatus, et humanitatem ipsam suis solatiis spoliare tentavit, et vagos etiam homines visus est laude dignos esse voluisse, ut eam sententiam primus protulisset: omne solum forti patriam esse. Novit hoc quidem probe Donzellinus, nec ignoravit teneri se humanis necessitatibus et parendum esse philosophiae legibus. Ideo excusavit hoc ipsum suum desiderium, et id quidem tam ex arte, apte ac diserte, quam et loco suo, et cum decore summo. Quo fit, ut eum et ego habeam excusatissimum, et dignissimum putem qui ab ea nobilissima republica et a suis sapientissimis patribus recipiatur in patriam. Deus bone! an vituperandi sint illi cives et premendi exilio, qui ament patriam, virtute ornent, integritate commendent, omnesque caeteras nationes ubi summis laudibus extulere, suam praeferant omnibus, et pro ejus

incolumitate exules etiam existentes periclitari non recusent, tanto inquam amore illam complectantur, tantum ei sese debere et fateantur et testentur. Cujus amoris vim, suavissime Strada, vel in ipsis quibusdam volucris peregrinis mirificam intueri facile possumus, quae quum apud nos, tot terrarum tractus emetitae, exigant aestiva, eo haud gravate regrediuntur hybernaturae, unde advolaverant, nullo labore quamvis longinquo pensi habito; et licet in teterrimis aliae paludibus, in aridissimis arenis aliae, hae in nemoribus abstrusissimis, illae in obscurissimis caecisque montium arborumque foraminibus abditae agant, edoctae tamen a natura, nullibi se commodius ac securius per saevitiam hyemis quieturas arbitrantur, quam in solo genitali, nulla prorsus nostri, si quis sensus insit, vel amoenitate, vel fecunditate illectae permotaeque ad permanendum. Et ut etiam de homine loquar, quid pergam vetustorum tot enumerare exempla, quum jam catastrophem poscat epistola, quae certe plurima possem? Omnibus tamen praeteritis, ne sim longior, Ithacam Ulysses, homo prudens et sapiens, immo et conditione et dignitate et rerum experientia summa, totque amplissimis urbibus praetulit, quot in vita viderat, nec alia causa tot errores, tot pericula pertulit, quam ut rediret sospes in Ithacam et sepeliretur in Ithaca. At Ithacae ad Venetias, quae sit comparatio? Orbis fere universi emporium, theatrum, domicilium sunt Venetiae. Commemoro magnitudinem pulchritudinem, aedificia, instituta, politiam, omnium artium studia, et id genus sexcenta, quibus habetur celeberrima. Ulyssis Ithaca vix etiam scopuli digna nomine, nedum insulae, quantam et qualem et urbem fuisse, et esse potuisse, ipse iudices.

Hoc itaque amoris, quo in patriam esse sconuevimus, quicquid sit quod in nobis profecto plurimum dominatur, naturae ipsi demus, oportet, Strada, nec putemus id a ratione quoque esse alienum. Quae quidem ratio Donzellinum etiam nostrum non minus jubet iri defensum, quam summe etiam laudandum, quem patriae tam justissimo desiderio teneri, tanta charitate flagrare videamus. Sed jam ut finem faciam, duo tibi expediam; alterum de hujus ipsius declamationis titulo, alterum de expostulatione contra Zachariam Dolphinum episcopum Pharensem et apostolicum non ita pridem apud nos nuncium, virum moderatum, mihi non aliter quam de fama notum, qua etiam nunc viget in aula nostra, et honesta memoria celebratur. In quibus, nisi me judicium (ut humanum) fefellerit, reperi, quod desiderarim, tamque de utroque proferam et secure et libere, quod sentiam, quia tu jussisti, et receperis te, quicquid ipse offendero, rei personam et poenam culpa subiturum; quam etiam amanter sincere pro officio, quod amicis in omnibus rebus debeamus. Porro itaque quum declamationem hanc coepissem legere, et perlegissem jam dimidium, incidissemque in eam partem, quae de criminatione tractat aemulorum, factus sum suspensior, observans et circumspiciens, sicunde declamator erumperet, adversarios posceret, pulverem moveret, cieret pugnam, manus denique cum eis consereret, incitatusque et erectus spiritu, valide totus ad victoriam emicaret et contenderet. Quae mihi quidem certe viderentur omnino in declamationibus, partes esse debere. At ipsa tota declamatione de qua agimus, sedatissimo stylo, quamquam eo diserto, praestanti, solidoque ad calcem usque perducta, id quoque Donzellinum judicio fecisse anim-

adverti, ne patrum reipublicae suae clementia restitutus ab exilio, eos primo aditu, quo sibi gratiarum actione reconciliandi et demerendi fuerant, intempestiva contentione offendisset, eoque incurrisset hominis confidentis reprehensionem. Prudentissimo interim usus consilio, totius et generis sui erga rempublicam fide et sua innocentia moderate ac instar supplicum declarata, tamque longinque etiam exilii incommodis recensitis, ut hoc veluti quodam syngrapho, quantum et beneficium ab eisdem patribus suis receperit, et quantum pro recepto deberet illis gratiarum, testatum faceret. Quae quum potius ad descriptionem vitae, morum, virtutumque, et gestorum quodamtenus accedere videantur, haereo equidem, an declamationis titulum habere debeant. Nam licet apud et veteres, et nostri temporis rhetores ea jam dudum declamationis significatio recepta sit, ut habeatur pro exercitatione quando ficti, quando veri, thematis, declamemusque aut in scholis, aut in privatis aedibus, animum usumque dicendi facientes sibi juniores, proveciores vero gestuum modos, aliaque hujusmodi ad recitandum attinentia praeparantes, ne quid illis in actione seria non praetentatum, non praemeditatum accidere posset. Quamquam id etiam exercendae et experiundae vocis causa factitabant, num videlicet in strepitu et in tumultu satis lateribus sufficere, ac memoria tenere potuissent, quae illis erant declamanda, quemadmodum de Demosthene proditum sit, qui ad fragorem fluctuum hoc experiri consueverat, ubi quo spiritu, qua incitatione, quo clamore vocis fuerit opus, vehementius argumenta institutae defensionis in fluctus ipsos intendendo, perinde ac in praesentes adversarios, tute consideres, quum praesertim in eos, contra

quos honorem et innocentiam nostram tueri progredimur, et vehementia sane verborum, et vi animorum agere consuevimus. Quod quidem declamationis esse proprium, et Demosthenes ipse manifeste videtur ostendisse, et ego quid de hoc etiam senserim vides, nostrique Donzellini declamatio hoc ipsone an alio titulo uti debeat, jam id auctori prudentissimo relinquamus. Sat hucusque officiosae nostrae audaciae, et finiamus reliqua. Nam quoddam simile de expostulatione quoque cujusdam incuriae Zachariae Dolfini sentio. Quae quum res privata fuerit, nec aliquid conjunctionis habuerit cum adversariis, censerem id in senatu attingere minime convenire. Homo amicus, vir summus, et antistes commendatus, si cuiquam promissae suae operae, insperato quopiam impedimento prohibitus, sat facere nequiverit, vel esto etiam, quod studio alieni animi fecerit, quod non facile crediderim, attamen nec sic quoque, cum tantis adversariis, de tanto viro, in tantae majestatis loco, et praesertim inter suos gentiles expostulandum ei esse putarem, sed privatim, ut cum privato, et de privatis rebus. Quandoquidem ipsi etiam saepenumero nosmet nobis ipsis quaecunque promittimus, aut obstantibus fatis, aut fortuna adversante, aut etiam temporum et hominum iniquitate minus praestemus, falsi nimirum, et decepti fortuitis: sic certe et Zachariae Dolfino existimarim accidisse. Quem alioqui humanum, officiosum, et ad gratificandum omnibus bonis et virtute ornatis natum esse intelligam. Verum et hoc authorem modeste amiceque monuisse sufficiat, et tu, humanissime Strada, sume a me quodquod et tu tantopere exegeris, et ego iter Agriam parans jamjamque currum inscendens potuerim prae-

stare, magnum, siquidem ausus officium, si officium modo. Tua tamen amicitia victus, non imprudens, imprudens etiam dici tua gratia non sum veritus, ut cognosceres, quanti te faciam, quam sis mihi charus, quantam ex tuo denique tam suavi ingenio, ex tam ingenuis et perpetuo victuris studiis capio voluptatem. Restatque, ut cures, ne amicum laesisse videamur, qui si fortasse laesum iri se profitebitur, te objiciam irato. Sed non ita tamen, ut ipse quoque tua charitate, quicquid luendum poenarum fuerit tibi, non luam una tecum. Vale. Viennae IIII. Decembris 1558.

CIX.

Egy Tisztelendónék Verancsics Antal.

Venerabilis nobis dilecte, salutem. A discessu ^{1558. dec. 5.} tuo binas tuas litteras non plures accepimus, idque ex itinere, et postremas Venetiis datas die 4. Novembris proximi, ad quas tibi nunc demum respondemus, quod hactenus data opera nolimus, exspectantes, ut intelligeremus, Romam te tandem evasisse. Doluimus equidem plurimum de incommodis, quae in itinere a furibus et causa equi habueris; et si monitis nostris paruisses, quum nos etiam multa regna peregre adierimus et emensi simus itinera, certe nec furum injurias pertulisses, nec equo tuo incuria tua defuisses, quem non alia causa pedum scabiem contraxisse certum est, quam quod fessum de itinere, et foedatum luto non curaris in hospitiiis. Quod tamen ex eo factum esse putem, quod et famulo carueris, et corpore pigritiaque

abundaris, nec assueveris quadrupedum succussiones tolerare; unde ad isthaec tua incommoda, tertio quoque (si nescires) laboras, quod non mediocriter displicuerit nobis, lento te gradu iter istud peregris-
 se. Utcunque tamen accidit, ferimus, etiamsi nolimus, verum hortamur te diligenter, ut provinciae, quam demandavimus tibi, non desis, omnemque lapidem moveas, et experiaris rationes, ut sine dilatione et nos, et alii domini fratres nostri electi confirmentur, occurraturque mature tot ecclesiarum nostrarum defectibus, quum ad eos, de quibus per te proxime scripsimus Romam, indies non pauci alii exoriantur, quibus non prius contrairi et provideri poterit, quam conservabuntur ecclesiis sui pastores. Et ne vel illud unum reticeamus tibi, de quo hactenus neque cogitaveramus nedum audiveramus, perlatum est ad nos chrisma etiam per dioecesim nostram ad baptisandum desiderari; quare sollicitè impetrandae confirmationi nostrae insistes. Ut autem veluti denuo pariam novos filios, ministros, et sacerdotes ecclesiae ac dioecesi meae, scholam institui, et praefeci illi duos bonarum artium peritos praecipue vero theologiae nostrae catholicae professores, habitoque 20 circiter (quantum pro hoc principio) juvenum delectu, qui jam matura aetate sint, et nobiscum de ecclesia romana ac suis ordinationibus sentientes, sacris etiam initiari velint. Plura id genus commodorum reponere suo loco possemus in ecclesia nostra, non tam nos soli quam etiam domini electi alii, si essemus consecrati, sed hoc praestare nec scimus nec possumus, uti deberemus et res postularet. Propterea iterum hortamur te in Domino, alioqui etiam committimus tibi, ne desis et tuo officio et huic nostro desiderio ac necessi-

tati, qua nostri imo Domini nostri greges magnopere periclitantur. De proventibus anni hujus quid quaeris? summa et vini et tritici ubique paucitas, nullibi copia, quae sperabatur, evenit. Nobis Agriae tam parce provenerunt, ut omnes commeatibus designati sunt propter futuram magni Turcae expeditionem, de qua quotidie ad nos magni rumores afferuntur, ita ut jam et finitimis arcibus cura munitionum mandata sit, et ad bellum omnes apparamur. Propterea sollicite laborandum erit tibi apud illustrissimos et reverendissimos dominos cardinales, humillime et imploranter illis supplicando pro benigna relaxatione annatae, quia non solum, quod ea non solvendo simus, sed quod vix etiam victum ex eodem episcopatu nostro sufficientem proventurum nobis speremus. Novi autem aliud ad te nihil scribere possumus, quam quod diebus proximis tria millia Turcarum irruperant in bona magnifici Georgii Bebek, deprædatique oppidum Zikzo, et circum omnia penetraverant, fere usque ad castellum Fiwged. Ibi Cassoviense praesidium, una cum Bebeko et caesareis gentibus, numero circiter 150, hostes jam redeuntes insequuti, nostris vero Agriensibus obviam profectis, sic eos habuerunt, ut vix mille quingenti vel sexcenti incolumes evaserunt, reliquis aut caesis, aut captis, et tota fere praeda recuperata, signisque aliquot hostilibus relatis. Nos cras hinc Agriam discedimus, stipendia militibus nostris daturi, et lustraturi illud confinium. Tu vero ad nos quicquid scribes, litteras ad manus reverendissimi domini Strigoniensis dabis. Vale. Viennae, 5. Decembris 1558.

CX.

Testvérének, Mihálynak Verancesics Antal.

Reverendissimo domino domino Antonio Verancio, episcopo Agriensi, perpetuo comiti Hewesiensi, sacratissimae caesareae majestatis consiliario, domino semper observandissimo. Vienne ad manus reverendi domini Francisci de Andreis, supremi capellani reverendissimi domini Strigoniensis. — Verancesics kezével: Receptae Agriae 21. Februarii 1559. Salutem et felicitatem.

1538. dec. 27.

Quod paulo tardius scribam ad dominationem vestram reverendissimam, quam par fuerat et ego promiseram, in causa est quod raro certi homines hinc Venetias proficiscuntur, quibus tuto litterae paulo ponderosiores credi possint; quamvis etiam negotia mihi commissa nonnihil temporis subtraxerint. Ne autem longior justo sim in hoc praeambulo et excusationis (sic), breviter rem aggredior.

Spaletum profectus egi rem diligenter et multis verbis, et auditus sum benigne et cum multa comitate; tandem sic mihi respondit: si *) esse neminem in tota hac provincia et alia, quocum id negotii et tutius et etiam libentius confecisset . . . quominus illa autem quae illi ex . . .

Quod autem ad hortum attinet fratris Nicolai Diffinici res parum utilis magno constaret nunc a principio, ea enim summa habere possumus locum cum magnificentissima fabrica et possessione primaria, introitus quinquaginta plus minus florenorum, ut paulo postea

*) Néhány cryptograph szó, valamint alantabb is, szintén pontokkal jelelve.

edisseram; nam minoris eam vendere nullo pacto vult quam ducatis quadringentis, et adhuc sine trasse-to (?) et casulis illis ante portam; neque affirmaverim firmam ejus venditionem aut tutam, licet ipse asserat, nam quicquid monachus acquirit, monasterio acquirit.

De . . . videtur gregem illum mutasse sententiam, tamen data est mihi spes non vana ad dies paucos, mutatis senioribus, in eam opinionem reversuros, nam ille qui id facere constituerat, in dies expectatur.

De . . . mirum genus hominum et intractabile. Domum vero vicinam domini Damiani conducere nequimus eo, quod est locata honestae personae, quae ad mortem ferme excludi non potest.

Quod reliquum est, parens optime valet imo fortiter, et accepit ea omnia, quae ei dominatio vestra reverendissima per me misit, etiam cumulate; unde visus est consolari et magno animo tolerare fortunae casus; videt enim non se solummodo tactum sed etiam plures in hac civitate, qui optimos filios et juvenes amiserunt. Nuper etiam soror novercae unicum filium amisit; mortem obiit etiam Joannes Longus alias Misich, et Franciscus Seniunich alias Ciünteta. Vina fuere paucissima, fruges carissimo pretio acquiruntur, et alia omnia desunt, ita ut a longo tempore in pejori statu haec civitas non fuerit.

Caeterum nunc si unquam alias tempus et occasio est emendi stabilia, qui sumptibus abundat. Tamen inter alia nunc prostant Ego si ibidem domum exstruere velim, uti est necesse, vix proficiam cum altera ex iis summa, cum cohorte et horto; itaque consultius mihi videtur in omnem eventum emere unam

ex iis, nam aut fabrica aut terra dono est ventura, et faciam, adjuvante Domino, si vel minimum a dominatione vestra reverendissima auxilii accepero, hac hieme. Pulchrum enim est et utile et necessarium omni tempore, in eo loco commodum habere secessum; et eo magis si et utilitatem adferat. Itaque hanc emptionem futuram dominatio vestra reverendissima pro certo habeat, quoniam occasiones talium rerum vix semel in centum annis occurrunt.

Equorum nunquam alias fuit major raritas ut nunc est, hoc est bonorum et nobilium, eo magis quod proclamata est in iis nostris confinibus generalis expeditio in Ungariam, licet fecte, ut deinde accepimus; accedit huc, quod zanzacchus iste Clisiensis et Hluinensis modernus epirota est natione, malus vicinus, qui non solum equos evehi prohibuit, sed et animalia et fruges, et omnia alia; tamen non desisto interrogare, ut mihi a dominatione vestra reverendissima commissum est.

Porro dominatio vestra reverendissima . . . alias quia . . . facit autem totam summam . . .

Quare dominatio vestra reverendissima perpendat, et rescribat mihi, quid agere debeam, percontetur etiam istum, quid animi habeat.

Nunc venio ad litteras dominationis vestrae reverendissimae Octobri mense scriptas. Quae de molesta solitudine illa scribit, facile credo, nec aliter fieri potest, si ejus naturam quis perpendat; certo ego quamprimum hoc natale solum attingo et conspectu dominationis vestrae reverendissimae carere incipiam quasi orbatusea, novo desiderio videndi incendor. Quare in hoc donec vixero, et suo et meo desiderio satisfacere decrevi, eo magis quod et res Agrienses, ut scribit, id

expetant, nam nemo aliena manu ita cibum ori ad-movet ut sua. Proinde mox a festo paschatis (cum di-vino auxilio) me in viam dabo, nam istis meis retina-culis non ita teneor, ut non libere possim parere vo-luntati et servire commodis dominationis vestrae reverendissimae, imo et omnium nostrum, nec ulla me deterrebunt pericula. Qui conveniret eam quotidie periclitari, me vero in tuto frui et quiescere? Si ad rem faciendam minus aptus fuerim, tamen in admini-stranda re familiari et curandis introitibus paucis ce-dere vellem.

Quod autem ad expeditionem turcicam attinet, hic omnes Turcae uno ore futuram fore affirmant; tamen a quibusdam ex eis potiori loco constitutis certo intelligimus, ipsum imperatorem in delirium ce-cidisse, et vocasse majorem filium ad praefecturam adrianapolitanam, qui metu insidiarum venire noluit, et ob id incidisse in indignationem patris; quamobrem certo affirmatur, nunc utrumque filium esse in armis. Hae eadem retulit etiam baylus, qui nuper hac re versus est Venetias; licet tamen quotidie fiant appa-ratus bellici Constantinopoli in apparentiam futurae expeditionis. Hinc Malchoch beg ferme quotidie in-festat miseram Croatiam, unde nuper defecerunt ad ipsum ad 70 domus colonorum, ut quiete vivere pos-sint, cum nemo pro eorum defensione advigilet. Tamen cum haec scriberem, advenerunt nova, bonam manum Turcorum profligatam esse in Ungaria circa Hathwan, ita ut ter mille desiderati sint. Certe ipsi Turcae retulerunt solummodo dazdaros 70 cecidis-se eo praelio, filio autem cujusdam Murathi manum esse totaliter abscissam; quae res fuit nobis auditu ju-cundissima, futura jucundior si ita est.

Eperiesinum profecto secessum laudo, locum utcumque tutum et civilem, inter suas decimas longe a strepitu militari et prope Agriam suam, quin puto etiam iHis partibus aliquanti emolumenti futuram ibi dominationis vestrae reverendissimae mansionem, unde jam a prope impertiet salute Geloum nostrum et Zwlam, et Belsium.

De pictore pene praeterieram. Parentem ad vivam imaginem feci effigiari, quem, ut facilius deferri possit ad dominationem vestram reverendissimam, in mediocri feci tabella depingere, ex illa postea exemplum capere quilibet pictor poterit in eam quantitatem, quam voluerimus, et ibi et hic ubique.

De parricidiis Transsylvaniae quid scribam? Miseri homines tandem suo damno experiuntur Turcarum amicitias, et muliebri ac puerile imperium. Forsan hisce ostentis revertentur aliquando ad cor.

Quoniam autem praecipua cura habenda est rectae valetudinis et nullus thesaurus est pretiosior sanitate corporis, mihi esset consultum, ut mecum adducerem dominationi vestrae reverendissimae unum physicum bonum, qui semper et sano et aegroto adesset, hominem juvenem et peregrinationis cupidum. Reperi Venetiis unum satis aptum huic negotio, nostrae gentis, natione Pharensem, nomine dominum Gabrielem Leporinum, virum doctum, expertum, comem, facundum; laetum congerronem, praesentiae virilis et gravis; eo magis, quod marchionis Sfortiae medicus fuerit, credo per biennium, non ignaro nostro Domitio, a quo informari poterit facile. Dicit: cur nostratem, quorum ingenia noveris, et non potius externum? Scio et novi; tamen, et Italorum plurimi, praesertim qui in aliena regnata excurrunt, vix prima initia

artis transgressi nil sibi non credi volunt, ut taceam de eorum hominum curiositate, deliciis, astutiis ac insatiabilitate, ut triduo ditescere cupiant. Is noster etiam fide potior ac lingua aptior ac moribus commodior; experientia autem ejus nuper in cura Joannia Ferro Venetiis mirabilis apparuit, qui cum gravissimam aegritudinem contraxisset, eo die eum in pedes sistit, quo praedixerat; fecit hoc idem in aliis non paucis et nostris ibidem, erat enim Venetiis cum suis fratribus in defensione litis cujusdam. Tamen si aliter visum fuerit dominationi vestrae reverendissimae, edoceat me, quid in hoc mihi faciendum fuerit, antequam hinc moveam.

Non mirabitur, quod res ita in hac epistola misceo; scribo enim, ut mihi quid in mentem venerit. Recordor in discessu meo cum valedicerem dominationi vestrae reverendissimae, quod mihi dixerat, ut in reditu adducerem mecum filium meum Faustum, nam et ego idem optavi, ne hic a pueritia mores hosce discolos imbiberet, et a teneris puriorem doctrinam apprehendat et linguas addiscat; est autem jam satis majusculus, itineri aptus; vivax ingenio, eleganti forma et vere nobili, non stultus aut pueriliter futilis; apparet aptum futurum majori fortunae; proinde decrevi mecum ducere, si in eodem proposito est vestra reverendissima dominatio, nam hic nobis peribit sub disciplina matris inter mores civitatis corruptissimos.

De Hieronymo Domitio quod scribet non displicet, et talem futurum spero, qualem nuper eidem descripseram, et scripsi ad eum et adhuc scribam; matri ejus et sororibus Tragurii retuli rationem rerum suarum, et quod ejus curam deponerent, esse

enim, si probus fuerit, apud parentem potius quam dominum.

Frater Vincentius Andronicus, de quo scire cupit: est naturalis filius condampauli Andronici, filii Joannis, qui Joannes fuit frater doctoris Jacobi, paulo longius a linea familiae Tranquilli nostri; aliud de illius moribus scribere nescio, nisi quod diu studiis incubuit et semel fuit a pyratibus captus.

Praeterea quae scribam pro nunc nihil est, nisi ut dominatio vestra reverendissima optime valeat una cum omnibus suis; et quia intelligo ex litteris domini Joannis Bassani futurum Posonii in diaeta per totum mensem Januarii, ex solita diligentia dignetur ad nos de prospera sua valetudine semel et iterum litteras dare, antequam longius recedat. Ipse autem juvenis Dominus Joannes Bassanus in suis ad parentem litteris miro modo se de benignitate dominationis vestrae reverendissimae erga se laudavit, ita quod et pater et omnes cives et amici nostri jubilentur, et Deum pro incolumitate sua exorent, laudant, extollunt, venerantur. Ex Sibenico, die 27. Decembris 1558. Michaël Verancius, servitor et frater.

CXI.

Maximilián cseh királynak Verancesics Antal.

Ad sacram regiam Bohemiae maiestatem.

Ad XXI diem Decembris proximi Eperiessium^{1359. j. n. 4.} veni, ubi quum tantummodo dominum Sigismundum Tordam et dominum Franciscum Pesthiensem, domino Telekessy in castris existente, invenissem, contuli cum eis omnia mandata, quae me a sacra vestra maiestate de com meatuum ratione consequuta sunt in itinere. De quibus haud mora, facto etiam domino Telekessy certiore per litteras, intelligere cupiens, quid facto opus esset, et quonam modo vellet nos id aggredi, tractareque negotii in illius absentia, respondit, quod responsurum sciebamus. Ipse quoniam bellicis rebus occupetur, et in conspectu hostium esset, nos de his ageremus, quae e re et de mandato vestrae sacrae maiestatis forent, dum idem re contra hostes bene gesta et confecta nobiscum esse posset. Nos itaque caeteri aggressi hanc curam com meatuum, urgeri fere quotidianis tum litteris tum nunciis domini Telekessy de subsidiis gentium expediendis, quas ab his comitatibus et civitatibus requisiveramus, jussuque etiam vestrae sacrae maiestatis conferre debuerunt, coepti sumus, hosque totos dies ab appulsu meo summa sollicitudine et labore hac in re tritos, consumptos. Extorsimus demum tam a comitatibus Ung, Zemplin, Wywar, Zepes, Saaros et Abbawywar, quam ab his quinque civitatibus equites

centum, sexcentos verò pedites cum aliqua summa victualium. Hisque adjectis 400-tis pecunia Agriensi conscribendis, cui delectui habendo hesterna die, quod felix faustumque sit majestatibus vestris, proposui vexillum, fecique et tympanum percuti, et tam in hac civitate, quam in aliis proclamari, ut, qui stipendia vellent pedestria, convenirent, et nomina darent; futurus est non contemnendus numerus nostri exercitus. Conferent autem haedem civitates machinas quoque aliquot, vulgo falconetos nuncupatas, omnemque dabamus operam, ut et a comitatibus et a civitatibus majorem hominum numerum obtineremus, sed non potuimus, primum turcicis rumoribus, quos ad arcem Fylek congregari increbuerat, deinde quod gravarentur nimis jam impensis et laboribus, quodque bona eorum populationibus essent evastata sic, ut plebei etiam quotidiano victu destituerentur. Viritim autem ut consurgant et prodirent, quo, necessitate vocarentur, et dominus Telekessy praecepisset, tantum abest ut morem gesserint, ut etiam audire id quidem proponi sibi non potuerint, lamentati et causati paulo ante de Turcis et de egestate dicta. Caeterum nec nobilitatem ipsam a suis sedibus et familiis, nec cives a civitatibus tuto posse abscedere.

Nescivi ego hactenus tam exacte comitatum et civitatum harum statum et consuetudinem. Verum etsi aliqui ex illis non sint fortunis imbecilles, communiter tamen adeo videntur esse tenues, ut frustra magnae (am) cujus (quam) piam spei (spem) auxiliiorum militarium in eis haberi oportere putem, magno quopiam periculo ingruente. Et praeterea quum in moribus habeant plus gemere et queri, quam mali et incommodorum patiantur, quia tamen pro minima

etiam re, quae est in reipublicae commodum conferenda, semper ad popularem deliberationem cuncta referant ac rejiciant, tempus quasi de industria extrahendo, vix quicquam cum eis opportune ac tempori concluditur. Utcumque tamen nunc potuimus, hinc ad quintum diem omnia expedita et ad locum praesto erunt, quem nos illis praefiximus.

De hostibus quod magni aliquid scribere possem, aliud non est, nisi quod sint magno numero, et populus collaticius, praeter partem quandam equitatus mercenarii, quo satis commode pollent. Peditatum habent exiguum, isque in dies dilabitur, ac in nostra castra concedit. Valacchis vero diu jam dilapsis Seculos quoque vix contineri ajunt, quod premantur omnes non solum gravi conditione temporis, sed etiam solutionum, pabuli et commeatumum penuria. Caeterum bombardis etiam omnino carere adeo validis, quibus Kisvardae obesse possent; nec ullam esse facultatem proprius muros accedendi, vimque illi aliquan inferendi, a qua metuendum foret. Circum dumtaxat oppidum, quod parvo intervallo arcis subjacet, intra munitiones tumultuarias sese continent, nescimus sollicitine propinquitate nostri exercitus, an expectatione novi cujuspiam auxilii, vel etiam erecti ad aliquam spem deditione obsessis potiundi, non usquequaque a nostris metuentes, postquam careant cataphractis, uti et ab exploratoribus nostris et ab eorum transfugis cognitum est. Verum quoniam obsessi et commeatus vel pro annua obsidione habeant, et nullis adhuc terroris seu inconstantiae significationem dedere: nihil adhuc videmus, quod timendum illis esset; immo quum proxime duos pedites emisissent, plurium hominum suppetias petitur, quod qui praesidio designati fuerant, in-

gressu ab hostium nimis celeri superventu erant prohibiti, summissi sunt eis XL pedites cum uno hostili vexillo non ita multo ante in velitari certamine adepto, quibus peditibus receptis incolumibus, et vexillo a summa arce versus hostes postera die explicito, non sine magno et dolore et pudore Melchioris Balassae, visi sunt haud dubie forti esse animo ad obsidionem tolerandam. Nosque etiam ex his judicamus, totam adhuc rem bono esse statu, modo ex parte alia Turcae non ingruerent, quos jam intelleximus a Fylek recessisse, et dominum Telekessy tuto posse urgere, et infestare Transsylvanos.

Nostri adhuc initio, Tibiscoque nondum congelato, potiti magna virtute, quamquam in flumine pugnando, et non sine aliquot militum jactura, Tibisci transitu et hostili ripa apud castellum Tarkan, ripaque eadem trecentis armatis emunita, castra in citeriore, sicut et hostes apud Kisvardam communiverant, a quibus non amplius uno milliari distant. Verum quia ulterioris ripae praesidium crebris hostium incursionibus labefactabatur, nec dominus Telekessy poterat navali trajectu tempestive suis succurrere, in castra eos traduxit, pauloque post, Tibisco etiam ipso glaciebus constrato, quod peropportune nostris cessit, hostes quoque minus libere ac secure discurrere coeperunt. Et sic utrique ad hoc tempus in munitionibus suis haerent, nec facile scitur, quonam hostes consilio.

Verum dominus Telekessy nolens casu gentes vestrae majestatis periculo objicere inconsulte, magna instantia sollicitat haec comitatum et civitatum auxilia, ut tandem experietur fortunam, postquam cataphracti non veniunt, in quibus, post Deum, solis totam victoriam collocabat. Ac isthaec etiam auxilia

ubi ad eum pervenirent, habebit, ni fallor, ad duo millia hominum et octingentos, etsi cataphracti affuissent. Deus bone, quam victoriam sperare poteramus, sed ne cum iis quoque desperamus, divino accedente auxilio, quum dominus Telekessy nihil sane optimi, vigilantissimi et perquam industrii ducis omittit muneris, quo res Dei Opt. Max. gloriae, et majestatum vestrarum honori, commodoque tot Christianorum bene et feliciter geratur.

Quantum autem obsit his finibus, quod ex eis deducti sint cataphracti neque confestim summissi sunt alii, vel ex hoc liquet, quod et dominus Telekessy debiliorem sese esse existemet, et dicant, Transsilvanos quoque ea sola fiducia fretos suscepisse hanc expeditionem, quod deductis hinc cataphractis putaverint fines hos prorsus fuisse exarmatos.

Quae opportunitas quantum animi Turcis etiam allatura sit, quis ex his non intelligat? reveraque si ullo alio tempore fuernut necessarii, hoc certe commodissimi essent, quorum adventu etiam nunc solliciti sunt rebelles; quamquam alioqui semper futuri sint opportuni, quum majestatibus vestris fuerit visum, ut mittantur.

Pauca addo de Kysvarda, cujus ut majestas vestra sacra clementer rationem et curam habere velit, summa et diligentia et humilitate supplico atque insto, quia si (quod avertat Deus) Kysvarda veniret in hostium potestatem, credat majestas vestra, quod et Tibiscus cum tota ulteriore regione hostibus cederet, et haec citerior in ultimum discrimen conjiceretur; tantum momentum habendum est de incolumitate memoratae arcis. Et Deus Opt. Max.

vestram sacram majestatem diu felicem et incolumem servet. Eperiesii prima die Januarii 1559.

CXII.

Maximilián cseh királynak Verancsics Antal.

Sacra regia majestas, domine domine mihi clementissime.

1559-Jan.2.

Proximis diebus accepto a majestate vestra sara mandato de conscribendis 400 peditibus, et de curanda compositione cum magnifico domino Dobo de controversia divisionis praedae turcicae inter dominum Telekessy, exercitum vestrae majestatis, dominum Joannem Petew, dominum Bebek, et plures alios milites, primum jam exequi aggressus sum, et alterum propediem aggrediar, ubi primum videlicet res cum his hostibus transacta fuerit, et in otium ac stationes suas milites reducentur.

Verum supplico vestrae sacrae majestati, ne velit ad placitum reverendissimi domini Jauriensis, alterius mei parentis, tot commissiones mihi hic Eperjesii imponere, quia tot me expectant curae Agrienses, ut jam hic coeperim illis sudare et laborare; dignetur itaque gratiose intelligere, quod ubi has commissiones ad id tempus modo hic impositas fuero exequutus, Agriam me subito conferam. Deus tantummodo faxit, ut hostes nostri debellantur.

Et quia tot me negotia exceperunt hic, et pro-

fecto non est mihi modus impensarum (ut vel sub confessione majestati vestrae dicam, si episcopum Agriensem puderet dicere publice), supplico majestati vestrae sacrae, dignetur gratiose mihi absentiam a comitiis praesentibus condonare, quum aliqui quicquid publico bono commodoque caeteri domini et fratres mei in eis decreverint, ratum sim ipse homuncio habiturus, modo unitati et concordiae in auspicia vestrae sacrae majestatis consuluerint, omnibus quae a voluntate dignitateque majestatis vestrae non discrepabunt.

Illud in fine adjiciens rogatus, ut majestas vestra dignetur castelli Wngh aliquam curam geri mandare, ne quodpiam adeat periculum; quum enim imbecilli teneatur praesidio, postquam quod ordinarium habeat equitum 50, apud dominum Telekessy sit, verendum est, ne hostes a Kyswarda in regressu eam etiam fortunam experiantur idque partium nostrarum cum periculo. Propterea dignabitur Mathiae Vyczmandy boni viri supplicationem gratiose admittere, est enim fidelis servitor majestatis vestrae.

Idem ago pro domino Gaspare Seredy. Erant in arce Kewesd machinae quaedam tormentariae, quas dominus Telekessy asportavit et secum in praesenti expeditione habet, idemque dominus Seredy in arce sibi dimissas esse voluisset; quae quum dimissae non sint, supplicat ut majestas vestra dignetur eas ei reddere mandare. Quod negotium quale sit, quia ego nesciam, nec intelligam, quomodo fuerit arx illi assignata, tamen audio dixisse dominum Telekessy: ea omnia intercepisse, se nomine vestrae sacrae majestatis, nimirum regio; caeterum nullam se in restitutione difficultatem interpositurum, ubi

mandatum viderit vestrae majestatis. Quae res quum dominos consiliarios bellicos concernat, in reliqua me non ingero, re majestati vestrae declarata, et exhibito amico officio. Quicquid rerum imposterum successerit, utar in perscribendo debita et necessaria celeritate. Deus optimus maximus vestram sacram regiam majestatem felicitet et salvam velit. Eperysesii 2. Januarii. 1559.

CXIII.

Telekesinek Verancesics.

Ad dominum Telekessy.

1559. jan 3

Magnifice domine, amice nobis honorande. Salutem et nostri commendationem. Conclusionem omnium rerum, quas habuimus per hos dies cum comitatu Saaros et cum his comitatibus, dominatio vestra magnifica intelliget ex communibus litteris. Caeterum sciat me heri explicasse vexillum, tympanum percussisse, et fecisse per has omnes civitates delectum peditum proclamari, qui jam concurrunt, nomina dant, et stipendia illis numerantur. Sed adhuc adeo frequentes non habemus, ut necessariae celeritati, quae nos urget, satisfaceret. Quare misi et Cassoviam pecunias, et quia fidem hic mihi fecit Franciscus Calnay, vestrae magnificae dominationis ad nos nuncius, istic partim ex transfugis, partim ex locorum istorum incolis posse conscribi non contemnendus numerus, dabo operam,

ut hic ducenti conscribantur, reliqui vero istic, missa pecunia per Franciscum Chaghy, militem meum Agriensem, quem capitaneum praefeci omnibus. Interim autem curet dominatio vestra magnifica, ut sint in promptu pedites, et eos parva aliqua subarrhet sua pecunia, donec hinc ad id designata afferetur.

Quae de Turcis nuper ferebantur, aliqua ex parte videntur vani fuisse rumores; venerunt certo numero ad Fylek arcem, cui novo praeside sive zangziaccho imposito, abiisse eos, quidam retulerunt. Nostri tamen Agrienses scripserunt mihi in haec verba: Explorationibus de Turcarum motibus nos non deesse. Caeterum verum esse, quod in Fylek et in Zolnok congregati forent, ignoreturque eorum animus. Se tamen hoc unum scire, quod magnificus dominus Telekessy securus potest esse a Turcarum horum metu et agere contra exercitum Transsylvanum quicquid velit. De quo laudetur Deus, qui certe etiam nos hic magna sollicitudine liberavit, deditque haud dubie dominationi vestrae magnificae amplissimam et optatissimam facultatem hostes istos astringendi et propulsandi duce sua dextera; qui ut eidem clementer adesse velit, assidue oramus, et bene vestra magnifica dominatio valeat. Eperiessii 3. Januarii 1559.

CXIV.

Roblem Menyhérd kassai parancsnokhoz Verancsics Antal.

Ad Melchiorem Roblem.

1559, Jan. 4.

Magnifice domine, amice, honorandissime. Salu-
temet mei commendationem. Ea quae proximis litteris
scripseram ad dominationem vestram magnificam,
non scripsi, quod aut litteras ejus non intellexissem,
aut quod improbassem ejus concepta animi et con-
silia, praesertim in bellicis rebus, in quibus vestra
dominatio magnifica et nata et educata sit, seque ad
reliquam etiam vitam ita accinxit, ut facile putem,
nulla alia usurum quoad vixerit quam militari, quod
quidem vobis Hispanis et peculiare fuit semper, et in
summis laudibus datur. Verum quum hac in civitate
de mandato suae caesareae et regiae majestatis sub-
stitissem, commissiones quasdam cum domino Te-
lekessy et cum aliis dominis commissariis habiturus,
essemque unus ex dominationibus vestris, qui hos fi-
nes una teneremus, et tueremur: existimaveram li-
cere mihi de his amice, fraterne et libere colloqui,
agereque etiam litteris, quae essent et honori nobis
omnibus, et finium horum commodo. Nec sane illa,
quae scripseram, reprehensiones fuere, sed tantummo-
do familiaria hortamenta et monitiones mutuae, quas
quidem ego etiam in actionibus meis a collegis meis,
et ab iis, cum quibus cuipiam praessem functioni ha-

beremque commune ministerium, nunquam aspernarer, nec in sinistram partem vel acciperem vel interpreterer; alioqui si quid, quod non providissem, eandem dominationem vestram magnificam offendisset, rogo ut ignoscat mihi.

Quod ad suspicionem civium de quorundam in ista civitate dubia vel etiam improba fide attinet, et ait: quendam ab eisdem carceri jam esse mancipatum, seque optare, ut aut dominus Sigismundus Torda, aut dominus Franciscus Pestyensis istuc veniret, quo matura fieret de iisdem suspectis hominibus cognitio, nimirum quod in huiusmodi casibus, et mora et negligentia saepenumero, ac plerumque semper nocere et damnosa esse consuevit, quod etiam nunc potissimum, isti civitati a proditione intestina esset metuendum, donec dominus Telekessy cum exercitu suae caesareae majestatis reverteretur.

Has suspiciones undecunque et quibuscunque ex causis suscitatas esse existimabimus, quum eo etiam praetextu vel privato quopiam commodo suscitatas fuisse facile credi possit, ne scilicet plures armatos cogarentur in quaedam castra mittere: at ego maxime laudo dominationis vestrae magnificae animi institutum, quod in gubernatione et custodia civitatum etiam ficta pro veris ducat. Cura enim et administratio vel civitatum vel bellorum seria sane sunt non ludicra, quae ad scenam et theatra pertinent. Propterea collato heri et excusso hoc negotio cum dominis fratribus nostris Sigismundo Torda et Francisco Pestyensi, illud ex aequo visum est nobis, ut huiusmodi homines malae mentis, mali animi, qui quidem fidei etiam bonae esse non possunt, cum dexteritate, et sine strepitu comprehendantur. Nec id solum veri et con-

fessi criminis nomine, sed etiam ludicri, quo saepenumero malum tegi consuevit, ut venena melle, ut pallio ensis, et odia risu.

Caeterum quod ad alia spectat, etsi id vestra quoque magnifica dominatio optime novit, tamen etiam a suspicionibus malorum vacuas oportet esse civitates et respublicas, quia ut latentes pestes frequentius in perniciem erumpunt, quam apertae, ita et hostes sane cogniti minus metuuntur et facilius evitantur. Sed de his satis. Et quod dominationem vestram magnificam scire volui, in eo jam toti sumus, ut alter ex iis dominis, quem ipsa postulat, istuc venire possit; sed id fieri nequit, donec hae gentes, quas ab his civitatibus et comitatu Saaros sollicitamus et conscribo ego, in promptu fuerint mittenturque in castra ad Telekessy. Interim tamen quicquid dominatio vestra magnifica pro dexteritate et prudentia sua in hoc transegerit, bene casurum non diffidimus, speramusque, quod dominus Deus omnia adversa ab humeris suis propulsabit.

De controversia Cassoviensium et Joannis Alaghy, ratione possessionum Forro et Garadna, bene dominatio vestra magnifica utrique parti consuluit. Sed tamen apud nos in judiciis magna vis iurium juxta eam partem versatur, quae possessione potitur ejus rei, quae est in controversiam deducta; hincque est, quod partes minus alienis consiliis acquiescunt. In quo, meo judicio, fiat, quod fieri potest, quod vero non, agat fortuna. Et quod erit reliquum: Ubi ait dominatio vestra magnifica dominum Telekessy plures ab ea pedites alemanos postulare, de quo nos etiam hic multa sumus colloquuti, et indicavimus, vix hoc posse et debere fieri, quia Cassovia sine milite mani-

bus plebeorum non est committenda. Quod quia dominatio vestra magnifica etiam perpendit, hoc totum ejusdem consilio et voluntati permittimus. Quam Deus optimus maximus felicem servet. Eperiessii 4. Januarii 1559.

CXV.

Maximilián cseh királyhoz Verancesics Antal, Torda Zsigmond és Pesti Ferencz.

Ad majestatem regis Bohemiae Maximilianum cum collegis Sigismundo Torda et Francisco Pesthy.

Hesterno die venit ad nos ex castris Lucas Palatycz litteratus a domino Telekessy et a domino Teykovycz nuncius cum his mandatis missus, quae nobis non mediocrem sollicitudinem attulerunt. Conquisitis enim et congestis in unum veluti fascem omnibus, quibus adversarios augeri posse putandum est, nescimus quid animi conceperunt, ac ipsine quempiam finxere sibi metum, an incutiant nobis, onus fortasse aliquod in nos transferre satagentes, quod subire ipsi nollent, dum id a nobis postulent consilii, quod sane in sola primum majestate vestra sacra deinde in ipsis consistit, qui sunt supremi belli duces, et quibus est vel aggrediendi vel non aggrediendi hostis (quantum nos assequimur) tota ratio demandata, non nobis, qui a majestate vestra commissionem hujusmodi non accepimus.

Tam diu autem in castris suis et ii et illi otiosi sedent; nostri in dies hinc inde ex tot comitatibus et civitatibus palam augentur, praedas ex hostibus interdum referunt, vexilla illis eripiunt, transfugientes eorum pedites recipiunt, et sollicitant oblata hinc auxilia, quo tandem in hostes aliquid agerent et Kyswardam obsidione liberarent. Quae quum per nos exequuta sint omnia, illisque et eos pedites, quos Agriensis conduxit, et quos hae civitates ac comitatus Scepusiensis et Saarosiensis contulerunt, misimus, jamque ab eis optatos eventus speraremus: has difficultates bene gerendae rei de repente nobis, vel potius sacrae vestrae majestati offuderunt hostium incrementa extollentes, qui omnes, quos enumerant, si in massam convenerint, Turcis etiam accedentibus, haud dubie hic nulla vis est, quae illis poterit resistere, immo noster etiam exercitus cum Kyswarda arce magno periculo laborabit, graviorque majestati quoque vestrae sacrae incumbet cura ad pares vires his ex locis opponendas; quum nec mercenarii militis copiam habeant, nec voluntas hoc tempore in popularibus eorum militaris existat, detrectantes etiam domo vestigium prodire, nedum in castra proficisci.

Verum nos tantis, tamque subitis hostium incrementis fide nondum adhibita, veritque etiam praxes quaspiam Melchioris Balassae, similes hiis quae contigerant superioribus diebus apud castellum Zeoleos, maturavimus ad majestatem vestram mittere tam ea quae iidem domini capitanei nobis nunciarunt, quam quae nos illis respondimus, ut ipsa majestas vestra sacra, rebus omnibus sua prudentia, suoque sapientissimo judicio consideratis et excussis, istic delibaret, et quid memoratis dominis capitaneis erit faciun-

dum clementer mandet. Quum nos interim curabimus, ut mox peculiari quopiam exploratore in castra hostium misso, clarius et certius de his cognoscamus, vestramque majestatem sacram, quam celerius fieri poterit, edoceamus, humillime eidem supplicantes, ut huic suo tam perturbato exercitui dignetur gratiose, pecuniarum aliquid summitti mandare, quia ob defectum hujusmodi haud dubie turbae hae suscitantur et moventur, videnturque eo etiam milites magis tumultari, quod solutiones (per dominos commissarios nuper ad Kalendas Januarias illis promissas) necdum venturas intelligant. Caeterum si soli Hungari hac de causa turbarum quippiam molirentur, cura esset aliquanto levior, sed lamentantur etiam Germani, quemadmodum majestas vestra ex literis domini Teykowycz ad nos datis cognoscet. Significantes illud humillime, fines hos in discrimine magno versari, ac mature providendum esse, ne milites queri possint, neve quid cum hostibus ratione Kyswardae transigatur, quo haec majestatum vestrarum ditio reddatur imbecillior. Et Deus opt. max. vestram sacram majestatem sanam et felicem servet. Eperiessii 9. Januarii 1559.

CXVI.

Telekesinek Verancsics Antal.

Ad magnificum dominum Telekessy.

1559. Jan. 11.

Intelleximus mandasse dominationem vestram magnificam peditibus, quos eidem misimus hinc auxilio, ne recta in castra venirent, sed in quibusdam vicinis pagis subsisterent, donec aliud a dominatione vestra mandatum acciperent. Intelleximus etiam tractatum quendam fieri cum hostibus, qui ad concordiam vel ad quaspiam inducias spectarent, de quo tamen ad nos dominatio vestra nihil scribit. Propterea si is tractatus, belli progressu inhibito, finiatur in aliquam bonam et honestam concordiam, nec erit opus copiis militaribus, hortamur dominationem vestram magnificam, ut pecuniae nostrorum Agriensium velit parcere, et supersedere a peditibus conscribendis, quos in mandatis ad conscribendum habui. Scit enim quanto laborent ipsi etiam Agrienses defectu solutionum, et nobis onus incumbat ad eam arcem sustentandam et conservandam. De quo quia et hominibus nostris similem informationem dederimus, mandavimus tamen, ne quid suo motu et consilio agant, unde error committi aliquis posset, quia et illis, et nobis negotium facesseret. Caeterum quoniam idem peditatus si diutius a castris aberit, verendum sit, ne partim clandestino quopiam hostium excursu affligatur, partim dilabatur, judicaremus esse consultius, ut castris primo

quoque tempore jungerentur, et magnificae dominationis vestrae potestati assignarentur, quum alter ex hominibus nostris, hoc negotio exequuto, expletoque delectu, ad nos redire deberit.

Has vero quum scribere incepissemus, accepimus suas de X. Januarii datas, quibus postquam adeo vires hostium magnas facit, nos hic etiam timere incepimus, praesertim quod et nunc scripsit, hostes quatuor millia equitum habere, et nunciaverit nuper totidem eisdem hostibus proxime numerata fuisse stipendia, nempe quae ad festum usque divi Georgii essent illis suffectura (tam divite vena fluunt nunc, si diis placet, Isabellae reginae, aurariae), quodque ad eos confluerent omnes hi comitatus, Zathmar, Ugocha, Zabolch, Krazna, Zolnok, et quicquid est apud eorum factionem virorum fortium, Thomas Varkoch, Clemens Artandy, Georgius et Paulus Capitaneus, cum tot Turcarum turmis, qui nunc congregati apud Budam et Pestum obviam passae novo proficiunt, Dravum sane non Tibiscum versus. Duo tamen a metu nos et consternatione continent, quod equitatus hostium e Seculis sit ex majori parte, quodque proxime dominatio tua scribebat simulque nunciabat, pedites hostium in nostra castra transfugere turmatim, quod in suis penuria solutionum laborarent, quodque multo plures ad nos essent defecturi, si quod illis daretur, dominationi vestrae suppetere. De Tibisci solutione glacierum diu nos quoque timuimus et timemus etiamnum; nostra tamen causa non est factum, quod eis dominatio vestra magnifica uti noluerit; utque ipsa occasionem Tibisci congelati non arripuit, ita Balassam Melchiorem arrepturum, si ea illi obvenerit, facile suspicor, quia tunc oppugna-

tionis suae capiet fructum, quem ei Deus non concedat, quum sicco ad eum pede dominatio vestra magna transmittere non poterit. Peditum vero expeditioni moram non certe nos attulimus, sed partim dominatio vestra, quae significarat litteris suis, essent in promptu quidem pedites, sed in castra veniendi mandatum ejus exspectarent; partim ii, qui eos contulerunt, debueruntque celerius apparare, quando quidem ne horam quidem per hos dies, quibus congregandis et in castra ablegandis sudando et aestuando operam dedimus, conquiescere potuerimus, putamusque, et laudari et excusari debere nos a magnifica dominatione vestra, modo jam in castra apparenter et solenniter inducantur, declareturque hostibus, nostro exercitui non ficta, sed vera et certa mitti subsidia. Cujus exercitus quum dominatio vestra magnifica pro sua prudentia solertissima incolumitatis et victoriae curam solito more sit gestura, tum enitetur summo studio, ne quid, quod ut collega fraterne scribo et commoneo, in tractatu isto transigatur, quod praeter voluntatem et dignitatem sacratissimorum principum nostrorum cadere posset. De quo studio etsi monere dominationem vestram magnificam superfluum sit, tamen, quia jam cum turcicis praxibus, quae semper fuerunt dolosae, negotium habemus, aequo animo ferre debebit omnia, de quibus mutuo colloquimur per litteras et per nuncios, quo et principibus nostris clementissimis pro voto inserviamus, et consulamus patriae. Deus eandem juvet et roboret in omnibus. Eperiessii XI. Januarii 1559.

CXVII.

Maximilián cseh királynak Verancsics Antal.

Ad serenissimum regem Bohemiae Maximilianum.

Proximis diebus uno fere tempore expeditis in ^{1559. jan. 15.} castra peditibus, qui hinc a me, ab his civitatibus, et a Sepusiensi ac Sarosiensi comitatibus mitti debuerant, et accepto alio a maiestate vestra sacra mandato de negotio commeatum, absente etiam domino Telekessy obeundo et exequendo, id ipsum mox aggressi negotium ego, Sigismundus Torda, et Franciscus Pesthiensis, triduum cognitioni ejus dedimus, excussisque omnibus rationibus, unde tantus commeatum in his finitimis locis vestrarum maiestatum acciderit defectus, quorum negligentia suis temporibus non fuerint accumulati, quis denique ordo, quis modus, quae via ad hos neglectos resarciendos ac recuperandos restaret, novos quam levissimis sacratissimae caesariae maiestatis sumptibus comparandi, quo praefata finitima suae caesariae maiestatis loca ad omnes futuros eventus belli instructa commeatibus forent et sufficerent praesidiis suis sustentandis, eas demum invenimus, quas maiestas vestra sacra distincte est ex communibus litteris nostris clementer cognitura.

Verum quid ipse sentiam et intelligam pro mea peculiari opinione, quam maiestas vestra sacra dignata est gratiose mihi injungere ut perscribam,

etsi ego ut his in rebus novitius, nec adeo tritus ut collegae mei, prius ab eis omnia intelligere et postea mecum considerare expendereque debuerim, examinatis etiam meis privatis quibusdam hominibus de huiusmodi administratione rerum gnaris, tamen nihil admodum secus invenire potui, quam quod iidem collegae mei invenerunt et observaverunt. Ac defectuum quidem ea est prima causa, quod annum proximum ubique infoecundum habuimus. Secunda, quod et messis et vindemia in haec inciderunt tempora, quibus exercitus majestatum vestrarum circumductus est per ea loca, in quibus nomine earundem majestatum vestrarum coëmptae erant decimae. Quas dum egenus miles hostilium partim evastandorum agrorum studio, partim indignatione egestatis minus considerat, promiscue et decimales et reliquos omnes omnium fructus, quos potuerunt assequi, corruerunt et diripuerunt. Tertia vero privatorum quorundam licentiae imputatur; quorum nomina, quia majestas vestra a domino Francisco Pesthiensi, praecipuo proventuum majestatum vestrarum administratore intelliget, scribere ipse praetereo. Acrius tamen corripiendi erunt, ut et in posterum a simili temeritate abstineant, et male usurpata restituant, quum in ea saltem invadere non debebant, quae majestatum vestrarum erant, quaeque si tam rapaciter attingere non verentur, qua ratione, quibus legibus, quave humanitate a privatorum fortunis abstinebunt? Nec defuit, quantum intelligo, per administratores majestatum vestrarum curare, quam diligentissime fieri potuit, earundem collectionem decimarum, sed haec impedimenta obstiterunt, quum ne me's quoque Agriensibus, quos ad reponendum colligere mandaveram, parsum sit, decimatori-

bus meis et officio et agris, magno certe et duplici
 vestrarum majestatum detrimento, exactis, nimirum
 quod, ut Cassovia, Saaros, Murano (sic) ita et Agria
 pari cura majestati vestrae sustentaretur.

Sed de defectibus et de neglectu com meatuum
 haec habui. Et recuperatio eorum quoad pro hoc anno
 jam non admodum ea fieri potest, quae sufficere de-
 beret, quandoquidem direpti, et a diversis usurpati
 fructus decimarum, ita etiam huc illuc distracti sunt,
 ut vix jam inquirendi eos ratio supersit praeter eos,
 de quibus majestas vestra sacra a domino Francisco
 Pesthiensi dignabitur gratiose intelligere. Hisque
 mandato ejusdem vestrae majestatis serio recupera-
 tis et repositis, reliquum quod ad justos anni hujus
 com meatus pertinebit, supplendum erit pecunia.
 Nec de vino in tantum laboratur, cujus competens ali-
 quanto habetur copia, verum tritici est penuria, quod
 nullibi minore pretio poterit comparari, quam, ut
 mihi dicitur, in comitatu Sepusiensi, qui hoc annonae
 genere caeteris abundat magis, eoque fovet ferme
 ipse solus omnes hos alios comitatus vicinos et has
 civitates. Qua causa maturandum etiam esse existi-
 mo cum pecunia, quia paulo post verendum est, quod
 accrescet eidem tritico pretium non solum alibi, sed
 etiam Sepusii.

Discussimus autem inter caetera illud quoque,
 num alicunde vel corrogari vel imperari possit ali-
 qua summa tritici, ut in regno nostro fieri consuevit.
 Sed modum nullum reperimus, quum passim omnes
 populi cum plebe simul annonae tenuitate laborent;
 suntque infiniti, qui, cum annis aliis maxime abunda-
 rint, hoc egent, et jam emptitio pane vivunt. Quare
 subsidium videtur in sola pecunia esse repositum,

qua necessarium triticum coëmi possit et debeat. Caeterum, quoniam majestas vestra gratiose mihi mandavit peculiare aliquid scribere pro informatione comparandorum praefatorum commeatuum, referam quaedam, quae imposterum usui esse poterunt, quandoquidem non videam, quod huic praesenti anno sine paratae pecuniae sumptu subveniri possit. Sunt, clementissime rex, in his partium superiorum comitatibus plures et Strigoniensis et Agriensis ecclesiae proventus in quartis et decimis, quos quum capitula, praepositi et archidiaconi bellorum et turbulentorum hominum causa pro arbitrato suo accumulare in sua horrea nequeant, agrorum dominis, et quibus possunt, divendunt. Propterea quotannis, ubi primum divi Gregorii festum appetere incipiet, uti jam nunc, duobus aut tribus mensibus ante, administratores reddituum vestrarum majestatum debebunt hujusmodi quartarum et decimarum nomina in suis rationibus annotare, et majestati vestrae sacrae ad scitum dare, ejusque litteris regiis tam capitula et archidiaconos, quam etiam nos ipsos qui praesimus capitulis, inhibere, ne hujusmodi venales decimas quartasque cuiquam alii vendant, et in arendam locent, quam sacratissimae caesariae et vestrae regiae majestati. Sed quia domini terrestres conabuntur huic emptioni pluribus locis obsistere jure vetusto regni, meo judicio nunc in comitiis mentio fieri deberet, quo publice decerneretur, jus hoc decimarum cujuscunque terrae dominis liberum majestatibus vestris fore, hoc praetextu potissimum, quod his has arces et civitates finitimas earumque praesidia fovere nutrireque cogantur publico regni commodo et conservationi; quum ipse etiam de Agriensibus decimis, quae remotius ab Agria fuerint,

et propius Cassoviam ac Saaros, quas poterad eas addicere, quas ex conventione conferre debeam. Unde haud dubie ea quotannis commeatuum cogetur copia, cujus pars etiam in pecuniam converti fortasse poterit, si frugi cumulatotes et curatores eorum fuerint. Tutela tamen memoratae quartae ac decimae debebunt tempestive esse provisae; messis enim ac vindemiae tempore primum militibus vestrarum majestatum deponi sua stipendia oportebit, ne occasione egestatis direptionis licentiam arripiant. Deinde ut eodem tempore in quolibet comitatu, in quo fuerint decimae et quartae hujusmodi vestrarum majestatum coëmptae nomine, excubet una equitum cohors, et rapinam omnium inhi-beant. Quod idipsum mihi quoque circa Agriam erit faciendum, quum jam auspicato anno meliore ratione geretur mihi cura decimarum quam gesta sit proximo, quem ut episcopatus mei primum habui non aliter, quam pro paedagogo et tyrocinio meo, daturus operam non ita multo post, ut omnes superflui et inanes sumptus partim resecentur partim tollantur omnino et mei et aliorum, ut plus habeant milites, qui etiam sine hoc habent sane omnia.

Si quid aliud ad facultatem commeatuum augendam excogitare potero interim, scribere ad majestatem vestram sacram non praetermittam, perscripturus etiam paulo post, quae et ad statum et ad comeatus Agrienses attinebunt, ubi primum cognovero et constituero, quae ibi erunt cognoscenda et constituenda. Eo enim hoc biduo profecturus, reliquas commissiones omnes differam, dum et dominus Dobo, et dominus Telekessy aderunt; ea sola sane et sollicitudine et cura aestuans, quam inprimis Agriae de-

beo. Deus opt. max. majestatem vestram sacram incolumem et felicem servet. Eperiessii XV. Januarii 1559.

CXVIII.

Oláh Miklós esztergomi érseknek Verancesics Antal.

Ad reverendissimum dominum archiepiscopum Strigoniensem
Nicolaum Olahum.

1559. Jan. 15.

Quod ego praesentibus comitiis Posoniensibus interesse nequiverim, uti pro mandato sacrae regiae majestatis debebam, et arcis meae Agriensis commodum postulabat, volebatque et suadebat reverendissima domina vestra, cui ego in omnibus tam libenter obtempero semper, quam hilariter et cum summa animi voluptate: primum obstitere mihi complures commissiones publicae hic et Cassoviae obeundae, cura deinde status Agriensis magna ea quidem ac multiplex, postremo vero defectus sumptuum non exiguus et plus quam verus. Namsuperioribus mensibus in aula nimis, et ad fundum usque totius parvuli mei peculii exhaustus, si quodpiam vel exile fuerit aliquando mihi, dum rem et stipendia militum Agriensium sollicito, ne in ipso quoque episcopatu meo vel tantum ex parte mea tertia parati subsidii reperi, quo aere me alieno sperarem posse liberare, nedum ad novos sumptus comparandos, quibus iterum nec

adhuc visa Agria tam repente istuc recurrere deberem.

Quum itaque tam longum tamque periculosum iter, Turcis et rebellibus obsessum, parvo impendio peragi haud quaquam facile possit; hic vero tantis detinear negotiis, mihi quidem satis difficilibus, et ex necessitate incumbentibus: vestram reverendissimam dominationem obnixe et filiali fiducia rogo, ut nec ipsa ob hanc meam absentiam indignetur mihi, nec me tam apud omnes reliquos dominos magnates, quam etiam apud sacram regiam majestatem paterne recuset excusare, cui de hoc jam binis litteris scripsi, et certus sum gratiam mihi ejus majestatis non defuturam.

Caeterum quod ad hos fines attinet, magno sane in discrimine versantur, et fortasse in quanto nunquam ad hoc tempus. Hic enim qui pareat, nemo est; qui imperare velint contendantque perpetrare quicquid cuique libuerit, tam multi sunt, ut neminem excipiam, quia sane omnes, nullo certo, nullo digno moderatore in medio existente, et omni ex parte hostibus imminentibus. Quid quaerit? omnia sunt confusa, omnia perturbata, omnia licentia et impunitate depravata, inclinataque ad extrema. Et nisi solida quapiam ratione mature hisdem finibus prospectum fuerit, vereor magnopere, ne una dierum talis improviso casus ingruat, cui ad occurrendum et tempus et ratio et remedia ipsa deerunt, palmasque tantummodo, stupentes et dolentes, invicem complodemus ob amissa. Populi de populatione et violentiis, milites de stipendiorum insolutione lamentantur, et variae coram pusillis aliquot nobis, qui hic praesimus quadam ex parte rebus, protestationes quotidie fiunt, dum com-

plures aliud quippiam fortasse secum meditantes sibi de periculis finium cavent. Terra vero ipsa universa regem expetit, et tutelam ejus inclamat. Sexcenta alia sunt hujusmodi, quibus est summo studio, summa celeritate providendum, si praesertim contra nos expeditio Turcae comprobatur.

Quum autem dominationem vestram reverendissimam summum et serium conatum, pro sua primaria autoritate et singulari amore, quo est in patriam, ultro etiam adhibituram esse sciam, quo fessis et jam labantibus rebus nostris maxime modo succurratur, quando ad eum cardinem rerum perventum esse videat, quo solo extrema regni nostri fortuna haeret: omissis caeteris impraesentia, Agriam ei peculiari-ter commendo, oroque, ut quum de conservatione finium reliquorum in comitiis referetur, sic Agriae consulendum et prospiciendum curare non grave-tur, ut persuadeat sibi, vel secundam vel tertiam fu-turam, quae sit vim et impetum hostis exceptura. Nec attingo reliqua ; sed considerata arcis Agrien-sis magnitudine, et numero militum, quo teneri de-beat, in id potissimum dignabitur incumbere, ut ali-qua certa firmaque constituatur ratio, qua crebrius jam memorati milites ejus praesidiarii accipiant sua stipendia, quandoquidem et pars proventuum tertia, quae est illis assignata, ad hoc sit perexigua, et com-meatus annui reliquum fere totum vendicent sibi.

De his duobus exercitibus quod possim scribere, parum hactenus uterque gessit, quod esset memora-bile, et nostrum diebus proximis jam inferiorem fore verebamus, quod Tibisci glacies remittere incepe-rant. Sed quatrimum est, quod denuo speramus me-liora. Uno enim tempore, allatis exercitui a majestate

regia pecuniis, et glacies Tibisci vires et milites animos resumpserunt, sic ut jam dominus Telekessy et dominus Teykovycz stratagema et impetum, quem admodum heri intelleximus, in hostes meditentur. Deus Opt. Max. adsit illis, et faciat victores. Ac de me, quod restat, Agriam tandem hoc biduo proficiscar, Cassoviaque mittam ad comitia; quos missurus sum, vestram reverendissimam dominationem rogo, dignetur eos pro sua gratia, qua me singulariter fovet, habere commendatos. Valeat felix et diu vivat. Eperies-
sii 15. Januarii 1559.

CXIX.

Maximilián cseh királynak Verancsics Antal.

Sacra regia majestas domine domine mihi semper clementissime.

Post fidelium ac perpetuorum servitiorum meo- 1559. jan. 29.
rum in gratiam vestrae sacrae majestatis humillimam commendationem. Ad XXII. diem hujus mensis veni Agriam cum domino Franc. Pesthiensi; ad XXIII. lustravimus peditum ordinem, equestrem vero die postero; in ipsa autem lustra invenimus pedites 317, equites vero 545, et jam stipendia utrisque numeramus, peditibus eo numero, quo sunt inventi, equitibus duntaxat 400-tis, quia reliqui officiorum administratione fruentur, Dabuntur autem tam peditibus, quam

equitibus trina stipendia, computatis huc 1025 florenis qui sunt ad pedites. Eperiessii conductos inpenſi, quorum etsi mora satis jam molesta sit iis, in quos ea summa est distributa, ferent tamen, modo dignetur majestas vestra sacra gratioſe mandare ne illa longius prorogetur, quum interim aliis etiam de causis, potissimum vero de his tam mediocribus, ut dicunt, et seris solutionibus, tantum negotii habuerimus cum ipsis militibus, ut vix eis restiterimus quum abitum etiam minitarentur. Quapropter Franciscum etiam Jakossyth alterum ex castellanis capitaneisque supremis, alterum Franciscum Gemes capitaneum peditum, et Stephanum Pelyny militem summa contentione ad majestatem vestram cum his petitionibus mitti institerunt, quas ex supplici eorum libello majestas vestra dignabitur cognoscere.

Dedimus autem omnem operam, ut sedatius agerent, et a majestate vestra opperirentur certam de expeditione Turcarum principis notitiam, ipsi tamen vicere, et nos coacti sumus accommodare nostras voluntates eorum instantiae, moniti loco et tempore, ubique et cum omnibus dexteritate usi, ne quid disturbaremus in hoc ipso praesidio, quod totum est ex veteratus*), et ita interse concors, atque unitum, ut, si vel pauci ex eo digredi incepissent, totum sane labefactari oportebat, non parvo hujus loci cum detrimento et periculo.

Et quum haec ita sese habeant, venientque in notitiam vestrae majestatis tempestive: reliqua ipsa majestas vestra, ubi aderint, sapientissimo suo consi-

*) Így; az iródeák hibájából; Katona, exulceratum-ot nyomtatott helyébe.

lio, suaque gratia benignissima, a qua nemo unquam non contentus, non satisfactus abscedit, in animis et voluntatibus eorum tranquillabit, et moderabitur. Quanquam ut majestati vestrae humillime dicam, quod ad verum attinet, haudquaquam motum et sollicitudinem hanc horum praefectorum et militum lenem esse dignetur existimare; mirum enim est inquam et in quantam indignationem concitantur ubique milites finitimi tam diuturna insolutione stipendiorum, et nisi certior aliqua ratio constitutur, et crebrius aliquid accipiant, et satisfiat illis de praeteritis creditis, omnino verendum est, ne periculosum una dierum aliquem tumultum committant, idque potissimum sub his de expeditione magni Turcae rumoribus, quorum colore ac praetextu, non mediocriter in quandam majorem libertatem videntur abduci, quod suam operam expetibiliorem fore, ut magis necessariam, arbitrantur. Ideo et majestas vestra, pro suo sapientissimo consilio, et pro rerum omnium, quae de Turca apud eam habeantur, veriore notitia, sic dignabitur eos ab se gratiose expedire, ut et animi eorum conquiescant, et his finibus consulatur; illud in fine expeditionis nunciorum eorundem haudquaquam praetermittendum, sed etiam, ubi clementius ad petitiones illorum responderit, exacte ac solenniter ab eisdem cognoscendum erit: an constanter et ipsi milites, et praefecti eorum toleraturi sint obsidionem in hac arce Agriensi, si quo casu ea cingeretur, necne? nunc enim explorandi sunt de hoc eorum animi, et omnis ratio arcis hujus retinendae, ea tempestate ingruente, constituenda, et firmanda, postquam ipsi etiam milites cum praefectis suis ad protestationes descenderunt, alterque praefectorum personaliter

istuc venire voluerit. Nec differatur res, ut mature jam deinceps munitionibus arcis hujus, constituto omnium consensu, insistamus, quia praeterit tempus, et sensim ver succedit.

De modo autem subveniendi solutionibus praefatorum militum Agriensium, etsi a me non est majestati vestrae, dominis consiliariis ac dominis regnicolis ullus demonstrandus, ille tamen inter alios unus satis commodus esse videretur, ne hii duo comitatus, Hevesiensis et Borsodiensis, quopiam deputentur ab Agria, sed potius alii etiam aliqui eis adjungantur, uti antea quoque, non ita pridem, factitatum fuisse constet, esto, quod ego ne in hoc etiam velim aliquid meo instinctu agi, quod non dubitem, et majestatem vestram sacram, et omnes dominos consiliarios, ac dominos regnicolas Agriam habere et habituros commendatam.

De Turcis quod hic in adventu meo offendi exemplum litterarum cujusdam hominis in medio Turcarum commorantis, mihi non, sed praefectis meis noti, hic inclusum ad majestatem vestram misi. Cacterum palam hic fertur, et a captivis etiam confirmatur, agros et villas ultra Tibiscum per totam eam regionem in timaros, principis Turcarum nomine distribui, augerique apud Bala Zenthmyklos, in Zolnok, Lippae, et in castellis apud Gywlam factis praesidia Turcarum, ut timari hujusmodi facilius possessione occupentur et retineantur.

Ad hoc itaque advertendum est, clementissime rex, et in memoriam revocandum, sic enim et annis superioribus tractum eum terrae a Lyppa ad Transylvaniae fines porrectum fuisse usurpatum, et in potestatem redactum. Et quod Varadinum etiam

postuletur, ne id quidem est (quantum pro iudicio meo) ambiguum, ex eo enim mox et Gylwae vim externam afferent hostes, et in eos omnes comitatus imperium constituent, deducuntque ad effectum illud tandem, quod nos etiam ex Turcia non semel scripseramus, dolis et astu Transsylvaniam circumventuros, non vi; nec est dubitandum quin haud ita multo post incipient commeatus ex Transsylvania postulare, et in Hungariam contra majestates vestras exercitum jubere emitti, ut hinc simul et hominibus et victu exhauriatur Transsylvania, illinc ipsi sine negotio qua voluerint, et fortasse etiam bifariam et trifariam cum Valachis in eam irrumpant, et potiantur ejus dominatione. Vult enim Turca Transsylvaniam, et quidem dum in vivis est, ut ea manes illius apud infernum sustententur, quia sepulcro et basilicae suae illam inscripsit, et addixit. Sed caeci rebelles, qui hoc non perspiciunt. At certe prope est, ut extrema consequantur, nisi et ex alto Deus advenerit, et majestates vestrae consilium inierint, ut eam praeripiant. Et per Deum etiam oro, elementissime rex, dignetur ita majestas vestra in considerationem accipere et producere in medium, ut nunc tandem regni hujus saluti consulatur, si consuli possit. Quia terra ultra Tibiscum amissa, amittetur et Transsylvania, et Tibiscus, et hi fines omnes, qui Tibisco adjacent, de ultimis rebus laborabunt, omniaque postmodum tarda erunt remedia, ubi sic ex parte omni circumvenientur.

Postremo, ubi praefecti et milites Agrienses instabunt pro augendo hoc praesidio, tam peditibus, quam equitibus, non petulanter agunt. Circumstant enim Agriam Bala Zenthmiklos, Zolnok, Hathwan,

Bwyak, Zonda, Salygo, Fylek, Chew, Zechen, et plura alia hujusmodi loca, in quorum quatuor. quatuor zangziachi sedent, et munita sunt omnia non mediocri hominum numero; imminentque arcis huic nimis propinque, quod poterunt referre domini consiliarii. Et hac potentia hostium solliciti Agrienses nec reliquo exercitui vestrae majestatis magno adesse possunt auxilio, nec admodum multi et longe audent ab Agria excurrere. Sic itaque cuperent esse aucti, ut hoc utrumque, quum occasio posceret, praestare possent. Si enim dimissis in praesidio arcis 400-tis vel 500-tis equitibus et totidem peditibus, ipsi pari numero excurrerent, quo vellent, memorabiles profecto res hoc praesidium gerere posset divina concedente gratia. Caeterum ubi pedites antea totidem fere servabantur in oppido, quot in arce, nunc 200-tis in arce habitis 100 in oppido retinentur, propter portarum custodiam, et nocturnas vigilias. Quum autem nec arcis sufficiunt 200-ti propter ejus magnitudinem, nec centum oppido: attingi de hoc, in fine, ut quum nuncii partis hujus meminerint, majestas vestra sacra etiam a me aliquid intelligat, et sit ante informata. Cui Deus opt. max. donet et vitam longissimam, et prosperitatem quam maximam et sempiternam, Agriae 29. Januarii 1559., ejusdem vestrae sacrae regiae majestatis servitor subjectissimus, Agriensis.

Czímzete: Serenissimo et pientissimo principi, domino domino Maximiliano, Dei gratia regi Bohemiae, archiduci Austriae, duci Burgundiae etc. domino et regi mihi semper clementissimo. Posonii. Cito, cito, cito citissime, cito.

CXX.

Maximilián cseh királynak Verancesics Antal.

Sacra majestas regia domine domine clementissime.

Memini me superioribus mensibus aliquoties,^{1559. febr. 1.}
 occasionibus postulantibus, plura in consilio majestatum
 strarum fuisse loquutum, ut majestates vestrae prohiberent
 duella finitimorum cum Turcis depugnanda, quod non alia
 causa provocarentur nostri, quam ut in fraudem aliquam
 conjicerentur, explorarenturque tam ipsi, quam arces et
 loca, quae duellis hujusmodi designantur. Qua praxi et
 Fylek et aliae non paucae arces et loca, et fere quidquid
 haecenus et in Croatia et in Sclavonia, et in Hungaria
 finitimorum locorum per sua tempora amisimus, incipiendo
 a Belgrado, apud quod quotidie duellis certabatur, amissum
 est et perditum, nec adhuc didicimus ea cavere, quae nobis
 pariunt perniciem, et in Turcarum fraudes et praedas nos
 deducunt.

Proximis diebus Turca quidam arcis Fylek militem
 quendam domini Bebek in singulare certamen provocaverat,
 et ex conducto inter eos convenerat, ut apud arcem
 Haynachkew pugnaretur. Michaël Saarkewzy arcis ejus
 praefectus quum apud se hoc certamen fieri concessisset,
 plures ex finitimis nostris eo confluerant, in quibus
 mei etiam aliquot fuere Agrienses, aegerrime dimissi,
 sed dimissi tamen ad 45 equites, ne vicinis pro usu
 defuissem militari,

praesertim in re ante jam adhuc multo, quam ego Agriam redissem, acta et constituta. Die itaque abhinc tertia, quae erat dicta certamini, quum in locum nostri convenissent, Turcae quoque prodeunt ex Fylek arce circiter 50, nec in locum pugnae designatum veniunt, sed a longiore spatio depugnationem duelli ostentantes, litteras ad nostros dant, nunciantes: timere se propius arcem accedere, quod intellexissent, Agriensem episcopum et dominum Bebek in insidiis esse cum suis gentibus, eaque causa tam paucos de suis militibus cum adversario suo in pugnae locum dimisisse. Caeterum prodirent in campum, et aequo ac patenti loco certaretur. Qua conditione visus Turca nostris factus esse inferior, de qua in conducto jam transacto nulla fuerat facta mentio, prodire renuerunt, atque interim facti per iudicem certiores ad mille Turcarum haud ita multum longe ab eo campo, in quem evocabantur, bifariam in insidiis latere, renunciarunt, commilitonem suum et honori et conductui suo satisfecisse, eum adesse in loco pugnae designato, exspectareque provocatorem adversarium. Sic extracta die colloctionibus huiusmodi per internuncios, nostri illinc abscedunt primis tenebris, vixque duobus milliaribus progressi invadunt, verum eis ibi non inventis, villam conburunt, et in praedam vertunt quidcunque et quoscunque in ea inveniunt. Exemplum sane opportunum vehementer ad roborandas monitiones meas, quibus hos finitimos nostros assiduo sollicito, ne Turcis credant, neque cum illis familiarius agant, quum quicunque fraudem et perfidiam velint pingere, Turcam pingant. Doleo tamen casum eorum, qui abducti sunt in captivitatem, inter quos nobilium etiam aliquot erant familiae; doleo etiam loci peri-

culum, cujus gratia rem hanc quoque tam multis prosequor, humillime supplicans, ut majestas vestra sacra simul cum dominis consiliariis dignetur rationem aliquam inire, et constituere, de arce illa Haynachkew vendicanda a periculo, et meliore quopiam statu conservanda; quia si perierit, circumventa erit, Agria, et fines isti pejus periclitabuntur. Distat a Fylek uno milliari, ab Agria sex, a Zenderew totidem, et a Putnok quatuor, qua est hosti via Cassoviam. Sedet autem loco eminenti et natura munito, male tamen et praesidio et munitionibus provisa. Qui vero praeest illi Michaël Saarkewzy, homo est plebeus, et licentiae plenus, nonnisi vagos et viles homines adjunxit sibi, et nisi praedatione promiscua uteretur, arcem eam tenere non posset. Cum Turcis autem, ut vicinus et eorum ingenii vel ignarus, vel negligens, ut ex nostris multi, modo agit familiariter, modo hostiliter. Turcae vero, ut ex usu, et natura sua facere solent, omnibus in rebus ei sese pro occasionibus accommodant, opportunitatem captantes, qua eum corripere possent, brevique id futurum formido, nisi cum eo transigaretur aliquid, quo firmiore statu ac ratione consistat; nunc enim gravissima aegritudine laborat, et ea tali, quod dicitur una hora pluribus locis lectum commutare, tanquam phrenesi laboraret. Nam cum Turcae irruperant, unus ex militibus meis apud eum remanserat, qui vidit et illum cum morbo suo conflictantem, et qua etiam ignavia ac inscitia homines ejus bombardarum ejaculationibus navabant operam, quique vix sciebant quo loco tormenta essent collocanda et dirigenda; miraturque etiam nunc, quod vel hucusque locus ille non perierit.

Arx itaque illa, clementissime rex, quum sit loco

commodis nostris posita opportuno, munitaque non tantum loco sed etiam opere satis commode, possetque non admodum magno impendio conservari, quum non sit magna: consulerem humillime ut lustraretur commissariis aliquibus, qui essent viri militares, et vel cum hoc Michaële Saarkewzy modo et ordine quopiam necessario componeretur, vel aliquid aliud inveniretur quo arcem illam incolumem haberemus, quia in periculo manifesto versatur.

Ego hominem (quantum sciam et possim) officiose tracto, quia et ipse totum sese mihi obsequentem offert. Immo, quia proxime etiam nunciaveram illi pluribus verbis ne Turcis temere crederet, neve duella hujusmodi admitteret, et id genus alia multa, renunciavit: se nunc demum cognovisse vera esse, quae toties illi et scripseram et nunciaveram; quodque inposterum et meis usus esset consiliis, et duella hujusmodi non admissurus. Quae duella si majestas vestra omnibus finitimis interdicere dignabitur, haud dubie non mediocriter finibus suis consulat, quum jam ego quoque ita milites meos instruxi ad eludendos provocatores hujusmodi, ut jam rarius provocent, cessentque ubi me non assentiri intelligant. Quandoquidem ipsi etiam Turcae, quum excusatione legitima volunt sese subducere cuipiam negotio hujusmodi, ad passam rejiciunt, sic nos quoque fucum fuco excludamus, et rebus nostris, quoad ejus fieri possit, consulamus oportet.

De rebus illorum aliis id solum perlatum est ad nos, hoc biduo Fylekum venisse novum praesidem, hominem juvenem, et nunc primum tyrocinio principis emissum, qui pro suis viribus partem aliquam ignominiae antecessori suo Velesano clade proxima

inustam reparaturus, militarem se et acrem virum his praeturae suae initiis ostentat, videturque non omnino quieturus; unde et apud arcem Haynachkew perpetravit hoc facinus in pagum dedititium, et scalarum magnam copiam dicitur fabricare. Nos et apud ipsum et apud alios nobis suspectos tenemus exploratores, intenti ad omnium motus, ut non offendamur improvise, quum interim castellis etiam quibusdam, nobis adjacentibus, jam summis subsidia, destructuri paulo post, ubi gelu remiserit, et ligonem terra admiserit, unum in pago Arlo, quod est nobis in III. milliario Fylek versus, idque ob hoc solum, si teneri nobis non poterit; ea nunc potissimum occupati cura, ut quod est in Kaza detrahatur, speroque quod brevi detrahetur, humillimeque majestatem vestram sacram edocebo proximis litteris. quicquid in hac re confecero. Quam Deus optimus maximus incolumen et felicem servet. Agriae 1. Februarii 1559.

CXXI.

Verancsics Mihály, testvérbátyjának Antalnak.

Salutem opto et felicitatem.

Post illas dominationis vestrae reverendissimae 1559. febr. 9. litteras per Belgramonium missas nullas alias in hanc diem habui. Signum est eam longius a Vienna, uti scripserat, recessisse; ad quas tamen litteras ego

prope trinis responsum dedi via veneta. An eas acceperit, omnino ignoro. Sed quoniam opera domini Zachariae Scaramelli missae sint, in eam opinionem venio, non periisse, et ideo eadem toties repetere superfluum arbitror. Ex praesentibus autem haec habebit: Nos omnes incolumi frui valetudine, ipsum vero parentem etiam athleticè. Sola tamen uxor mea, quod utrum gerat, suo solito more omnibus rebus fastiditis summo opere nauseat. Mea vero aegritudo adhuc mecum inducias habet, brevi tamen exspiraturas, cum instet mensis Martius, quem nulla ratione est evadere; quamvis huic podagrae etiam succenseam, eo nomine, quod ante festa natalitia suum officium facere neglexerit, distuleritque in hos menses, quibus me in itinere ad vos esse oportuerat. Tamen quoniam video festinandum esse, erit operae petium, quamprimum pedibus insistere potero, vel semisanum iter invadere. Nunc ad alia.

De dissidiis domesticis Turcarum imperatoris et filiorum nil certius est, quae sine dubio illum domi hoc anno retinebunt; particulariter autem nescitur hic, quid inter illos secutum sit hucusque. Sed et maria a classibus quiescent, multi enim apparatus in ea re audiuntur. Quid caesarea majestas in ista Germanorum diaeta concluderit, omnes provinciae istae hiant ore expectant.

Quod ad nostram civitatem attinet: inter alias urbes vicinas annonae commodiore fruimur, licet carissimo pretio omnia emanant, panis praesertim. Oboriuntur etiam ab aliquo tempore nocturna furtiva per apothecas et domos; nuper tamen deprehensus unus suspendii supplicio affectus est. Is erat Petrus Rancolinovich Placarius, propter quamdam butegam

mercatoriam expilatam, ablatiis pecuniis et panno. Novo autem anno prima Januarii nocte praecedente parum adfuit, quin magna ex parte civitas conflagraverit; nam ignis erat accensus in Gorica circa domum Thomae Prahulich, cum spiraret vehementissimus Boreas, ita ut nemo vel accedere propius potuerit ad exstinguendum; tamen praeter omnium opinionem, singulari Dei miraculo exstinctum est incendium in medio cumulo ligneorum aedificiorum, non multis absumptis domibus. Aliud nihil est tale scitu dignum, nisi si hoc: quod Franciscus Semiunich Civuleta mortem obierit, desponsata in mortis articulo Dragna concubina ejus, et turpiter et indigne ad damnum filiae suae unicae.

Noster autem consanguineus dominus Michaël Lucich ex Venetiis satis honorifice rediit. Auctum enim est illi stipendium duobus ducatis plus; praeterea creatus est capitaneus super viginti equites croatos, primos qui in hac provincia vacaverint, tempore vero belli super quinquaginta. Christophorus vero frater ejus cogitat mecum venire ad dominationem vestram reverendissimam, nondum tamen totaliter secum deliberavit.

Joannes Bassanus, qui isthic degit penes dominationem vestram reverendissimam, huc ad parentem suum dominum Petrum dedit litteras, quibus extollit miris praeconiis favorem et gratiam ejus erga se, quando ipse pater in dies non cessat paria referre in utrumque nostrum, et licet antea quoque nos amaverit, tamen nunc singulari officio et veneratione colit, adeo ut nuper, cum nescio quid agelli emere voluissem, nec aes suppeteret, ultro obtulit de suo se mutuaturum florenos 100. De cujus voluntate circa

id quod hic possidet, scripseram prioribus meis ad dominationem vestram reverendissimam, sed hucusque responsum non habui, expectamus tamen quotidie.

Porro has litteras accepit a me noster Tranquillus qui meta (?) solum causa divertit huc, ut accipiat hasce litteras; quem cum interrogassem, num vellet ad dominationem vestram reverendissimam usque proficisci, negavit, nisi si Viennae fuerit, inquit. Quod reliquum est, nos Deum pro dominatione vestra reverendissima sedulo precamur, ut diu incolumis felixque nobis supersit, et ut gloria et fama ejus cum ubique, tum in hac nostra honorabili conditione quotidie crescat et augeatur, ut omnes posterius, sua in hac domo beneficia consecrata videant et fruantur. Ex Sibenico die 9. Februarii 1559.

Servitia sua commendat Franciscus Butrisith cum debita reverentia, eamque salute impertit. Salutabit autem dominatio vestra reverendissima meo nomine omnes suos praecipuos familiae charos, praecipue autem dominum Joannem Bassanum, et Joannem Pechy, et Lackonem. De Belgramonio nihil habeo. Bene valeat. Michael Verancius frater et servitor.

Czímzete: Reverendissimo domino Antonio Verancio, episcopo Agriensi, comiti perpetuo Hewesiensi, sacratissimae caesareae majestatis consiliario etc. domino observandissimo. Verancius Antal kezével: Receptae Agriae 19. Martii 1559. *)

*) A levélhez külön papiroson néhány cryptograph sor van mellékelve, e bevezetéssel: Interim, hisce diebus praeteritis, s e zárszavakkal: ipsa optime capiet consilium ex praeteritis.

CXXII.

Maximilián cseh királynak Verancesics Antal.

Sacra regia majestas, domine domine mihi semper clementissime.

1559. mart. 6.

Post fidelium ac perpetuorum servitiorum meorum in gratiam vestrae sacrae regiae majestatis humillimam commendationem. His nostri carnisprivii feriis passa novus Budensis Tuigon omnes finium suorum praesides convocaverat Budam, et proxime eorum in hos fines nostros excursionis factae acceptaeque cladis causam de mandato sui principis judicialiter discussit. Praesides fere universi omnem rei utriusque culpam in Kazzum passam, cui hic successit novus, contorquebant, cum et excursionem et praedam in deditorum pagis fieri praecepisse, lucri cujuspiam studio captivorum, quo hoc egressu suo et provinciae principem et praetorianos ejus passas donis conciliare sibi potuisset, quum descendisset Constantinopolim, expurgaturus suam de his ipsis accusationibus contra se factis innocentiam. Passa vero, etsi vicissim in praesides culpam, quam in se contorserant, retorqueret, Filekiensem tamen nomine Velisanum totius rei et motae et male gestae reum faciebat; eum imprimis ad se detulisse, Emericum Telekessy castellum Zerench cum exiguo milite obsidere, se cum Francisco Nymethy conjunctionem et mutuam intelligentiam habere, edocerique ab exploratoribus, mi-

nime levibus fundi ac fugari illum facile vel mediocribus copiis posse, foreque, ut eodem hoste victo, vel ab obsidione saltem depulso, et honorem et utilitatem non solum ii qui gessissent rem, sed etiam ipse passa Kazzum esset habiturus; hisque urgentissime et suasionibus et hortamentis adhibitis, eosdem apud se instituisse totis viribus, ut ex praesidiis quanto majorem militum numerum potuisset, evocaret, et eos in unum convenire juberet.

Tantaitaque ad assentiendum opportunitate inductus, qua exercitum majestatum vestrarum vel interceptum vel saltem depulsum iri ab ea obsidione arbitrabatur, fateri se quidem in hoc dumtaxat peccavisse, si quid pecavisset, non invitum, quum in hostes domini sui, non autem in subditos eosque deditios copias emisisset. Hisque ambarum partium rationibus auditis, Kazzum passam fuisse absolutum, ac Ezicum ire permissum, profecturumque illinc etiam Constantinopolim, nisi se muneribus redemerit, domini ac tyranni sui crudelitate absterritus.

Velisanus omni primum honore atque officio spoliatus, in vincula postremo et carcerem conjectus est. Nec parsum caeteris quoque praesidibus, quorum pars sponsorum fide conservati gratiae, ut Hatvaniensis et Vaciensis, pars, et fere omnes reliqui abjecti, ac mandato principis Constantinopolim missi, ut ibi gravius castigentur.

Haec exploratores nostri Buda nobis attulerunt, addidereque, palam inter Turcas affirmari principem eorum magna sollicitudine aestuare ob dissidium filiorum, suscepturumque haudquaquam contra nos, sed contra filium juniorem primo quoque tempore expeditionem, quod ille, jacta jam in omnem even-

tum alea, non in fratrem solum, sed etiam in patrem hostilem animum declaravisset; hisque de causis novum hunc Budensem passam habere in mandatis, ut pacem cum majestatibus vestris curet, ne princeps eorum hac intestina seditione domi occupatus, foris faceret aliquam in finibus jacturam.

Ubi advertendum erit ad tam callidi hostis ingenium, providereque diligenter oportebit, ne aliqui cum eodem hoste subiti tractatus, nimirum proximis similes ineantur, et nova quaepiam legatio in ejus casses ad simplicissima verba conjiciatur exemplo nostrae superioris, qua quomodo sese tyrannus ille cum vestris majestatibus gesserit, notius est quam ut refricetur ejus commemoratio; eritque magnopere cavendum, quod humillime dico, ne iterum illudat inimicus, quamquam ab ejus amicitia paceque non est fugiendum, si bello certare nequiverimus. At prius certa fide praenosendum esse arbitror, an sit acturus sinceriter, ne postea (rem) vanis et contentiosis tractatibus tempus extrahat, dum perturbationes suas domesticas componat, uti fecit nostro tempore, quum Muztapham filium sustulerat.

De reginae Isabellae gentium conatibus. quarum adhuc per majestatum vestrarum ditionem pars magna vagatur, quid eadem habeat aliunde, nescio; ad nos tamen affertur, duo ab eis castella erigi in comitatu Zabolch, alterum in oppido Nagykallo, alterum in Zalka pago Eched arci domini Nicolai Bathory vicino, ut ex eis Kiswardam obsessam teneant et premant donec ad deditionem compellant. Quae castella etsi a Kiswarda III. duntaxat milliaribus nostris distent aut circiter V, et videantur non admodum ei nocitura: quia tamen, ubi firmabuntur, omnem eam circumjacentem regionem sibi confestim vindicabunt;

haud dubie et Kiswarda brevi succumbere cogetur, et quicquid Agria decimarum in districtibus illis obtinuerat, habere desinet. Quod non solum ipsi Agriae afferet detrimentum, sed etiam arcibus et civitatibus, quae nomine majestatum vestrarum his in partibus sustentantur, imminuet commeatus, quandoquidem, uti scripseram proxime Eperiessio, illis in locis hac habentur decimae, quarum pars aliqua ad eas addici posset, quae commeatibus Cassoviae et arcis Saaros quotannis ex hoc episcopatu assignari debent; id quod jam haudquaquam commode fieri poterit, si castella illa constiterint et evaluerint.

Quare tempestive occurrendum erit, clementissime rex, viribus aliquibus majoribus huic futuro detrimento. Alioqui si illud admiserimus, credat majestas vestra, Joannis posteritatem multo majores ex templo spiritus sublaturam, neque in hoc termino metam fortunae suae posituram, sed ulterius progressionem. Quo futurum maxime timeo, ne, quanto latius ipsa fines dominationis suae propagabit, tanto plurium subditorum vestrae sacrae regiae majestatis studia infirmantur, propter saeculi hujus et hominum et morum et temporum infelicitatem. Nec id loquor sine dolore animi vehementissimo. Ubi tamen quaevis natio coeperit hinc et inde vi majorum hostium subjugari, quam sua tueri sese possit, in id plerumque levitatis cadere consuevit. Quo magis majestas vestra sacra dignabitur serio et ad hos et ad illos fines respicere, quia res hunc in modum praesertim a Turcis, partim a rebellibus labefactatae, diu certe sine praesenti aliqua defensione non consistent.

Quod vero de Michaële Saarkewzy et de arce Hajnachkew proximis litteris scripseram, morbus

ejus in dies ingravescit, et interdum jam mania etiam dicitur laborare; ego intentus curae, ne arx illa quopiam alio a maiestate vestra recideret eodem Michaële praefecto ejus moriente, familiarem quendam meum, non insulsi ingenii hominem, ad eum missi, jussique, ut in arce apud aegrotum tamdiu desideat, donec aut convalescat, aut decedat, agatque interim quicquid occasio suaserit, quo aut idem aegrotus moriens, aut milites ejus, ubi vita ille excessisset, arcem eam mihi sub vestrae maiestatis nomine commendent, quam ego, si ad manus meas deveniet, ea cura et fide conservabo, donec de statu ejus aliter eadem maiestas vestra statuerit, qua debebo quam diligentissima, vestramque sacram regiam maiestatem humillime matureque edocebo, quicquid deinceps consequetur. Quam Deus opt. max. felicem atque incolumem servet. Agriae 17. Februarii 1559.

CXXIII.

Maximilián cseh királynak Verancsics Antal.

Ad maiestatem regiam Maximilianum Bohemiae.

Proxime mihi et capitaneis meis maiestas vestra^{1559. mart.} sacra mandavit, ut bona quaedam domino Bebek, ad suos aliquando, praesertim vero ante et suam et paternam notam pertinentia, diu jam a Turcis subjugata et a nostris quoque vi armorum possessa, ut

pleraque alia, ab iis, quibus ob fidelia merita per sacratissimas majestates vestras fuerunt collata, reddi curaremus. Quod mandatum quoniam subito non sumus exequuti, humillime supplico, dignetur sacra majestas vestra gratiose nobis veniam dare. Nam visa eorundem bonorum tam majestatis caesareae, quam vestrae regiae in plures milites donatione, haudquaquam id eorum juris ausi sumus praecipitanter infringere, sed omnem rem ad iudicium pro regni consuetudine et libertate utrarumque partium remisimus, non omnino sine gravi indignatione domini Bebek; quum aequitas suadeat, ut iis militibus alia bona reponantur ex majestatumstrarum munificentia, etsi his eos privari oportebit, quandoquidem nulla existent eorum demerita, propter quae sic eadem illis de plano adimi deberent.

Sed ad hoc mandatum alia quoque eodem tempore duo accepimus, alterum, ut possessionem Zolnok, arcis in ipsis portis adjacentem Nicolao Enyey, alterum, ut oppidum Czegled, non a Pesto longe situm, Alberto cuidam Beleny nomine monialium Budae Veteris reddi curaremus; quae bona cum aliis pluribus, quum jamdudum a Turcis subjugata sint, a nostris tamen militibus metu armorum suorum non tam possidentur, quam in officio retinentur, cogunturque redditus ac census regio ad arcem Agriensem administrare, de quo saepe jam ac saepius tractatum est in consilio apud vestras majestates; quidam, qui bona hujusmodi sua esse asserunt, nec ea tamen suo, sed Agriensium periculo et sudore tenere volunt, alieno clypeo, non suo utentes. Credat majestas vestra sacra, quod hos milites tanta propterea indignatio corripiet, ut si nondum bene pacatis cum

Turca rebus eadem bona avellentur ab Agria, intra breve tempus tam multi dilabentur, ut dimidia pars vix eorum remanebit; cladis enim et malorum tempore quum ii ea bona, quorum fuerunt, pro derelictis habuerunt, nunc quum jam vident teneri ac utilitatem ex eis aliquam capi posse, ad parata alieno sanguine et virtute recurrunt. Vestra tamen majestas sacra dignetur clementer scire, quod si desinent Agrieuses per eas partes excurrere in quibus sunt similia bona, nec dominus Bebek ex Zenderew, nec Nicolaus Enyey ex Patak, nec moniales Posonio aut hinc eorum substitutus poterunt ea obtinere.

Et tametsi ipse etiam putem me habere spiritum Domini, nec tam rapaciter vel aliena affectem, ut impudenter ecclesiasticis abuti velim: Agriae tamen nisi hac etiam ratione consuletur, hoc statu regni rebus sese habentibus quo nunc habeantur, neque camerae tantis sumptibus sufficiant; juro humillime vestrae sacrae majestati, male eandem Agriam habituram, utcunque vestrae sacrae majestati consulitur. Quoniam autem et dominis (sic) monialibus ex conventionem ipsimet Czegledienses redditus suos quotannis pendunt, cur se quidam tam impudenter in hoc officium ingerant, satis mirari nequeo, et praesertim hic Albertus Belleny, qui quum olim obsidione Agria cingebatur, et viri fortes ac boni cam obsidionem subire non verebantur, ipse tunc et Agriam destituit, et majestatum vestrarum stipendia, quae diu fecerat antea, rejecit, nunc tamen et ipsius Agriae fovetur gremio, et alienis periculis otio suo prospicere contendit; quod quam indignum sit, majestatem vestram sacram considerare non dubito, et supplico humillime, dignetur mihi ignoscere, quod haec tam

verbose fuerim persequutus. Multa enim fere quotidie a maiestatiſ vestris poſtulantur aliter quam poſtulari deberent. Sed jam poſtquam eadem maiestas veſtra ſacra videt, et hunc Albertum hoc officio et pane bonorum militum indignum eſſe, monialesque eſſe ſatis commode proviſas, neq̃ dominum Bebekum jure hoſ milites privare poſſe, qui ab initio penes unam fidem in ſervitio maiestatum veſtrarum permanserunt, et modo etiam permanent; ac verendum ſit, ne qua Agriae accersatur perturbatio, ſi bonorum hujusmodi detrahatur illi ſuſtentatio, quorum in conventionem etiam mea tanquam in inventario facta eſt non levis mentio: maiestas veſtra ſacra dignabitur ſecum clementer expendere, quam ſit hoc periculolum factu, quum in comitiis etiam reſponſum dederit nunciis Agrieniſibus: ex proventibus epiſcopatus Agrieniſis milites ejus foveri oportere, donec ex cameris veſtrarum maiestatum provideri poterit. Quod ſi ita omnino fieri debebit, ut omnino debet, et fit quotidie, quantum fieri poſſit: quorſum Agriae hujusmodi bona detrahi debeant, ex hiſ jam veſtrae ſacrae maiestati liquido conſtare poſteſt. Et reſtat me de hiis ipsis bonis ad pacatiora tempora retinendis exſpectaturum mandata, quae et maiestatiſ veſtris utiliora et militibus Agrieniſibus erunt gratiora; daturus interim omnibus verba, quae potero aptiora, ad rem differendam et impediendam, quia haec finitima loca tueri non poſſunt niſi hominibus et ſumptibus. Et maiestatem veſtram ſacram Deus. opt. max. diu felicem et incolumem ſervet. Agriae VI. Martii 1559.

CXXIV.

Ferdinánd császárnak Verancsics Antal.

Sacratissima caesarea et regia majestas domine domine Imperator et.

Quoniam quaecunque successivis diebus in his fini-^{1559. mart. 7.}bus accidunt, quaeque ipse etiam Agriae rerum geram, non praetermitto ad sacram regiam majestatem Bohemicam dominum meum clementissimum scribere diligenter, ad vestram quoque sacratissimam majestatem caesaream si itidem non facio, ea causa fit, quod occupationibus et curis ejusdem maximis et multiplicibus nolim addere molestias; in quo siquid fortasse videar deliquisse, et defuisse meo officio, supplico humillime, dignetur majestas vestra sacratissima clementer mihi ignoscere. Caeterum quum his diebus ex Turcia litteras accepissem de non levibus rebus operaque Rogerii Tassii venetae majestatum vestrarum postae ad me perlatas, et ad sacratissimum regem Bohemiae subito datas, eam earum partem in latinum ex Italico traduxi, et ad vestram sacratissimam majestatem misi, quae de rebus magni Turcae et ejus filiis Persaeque et Philippo rege scribebantur; nec id feci quia ea sacratissimae vestrae majestati essent ignota, sed ut apud me, ratione loci ex quo sunt datae, considerata

non supprimerentur sine sacrorum meorum principum scitu.

Praeterea quod pari ratione videtur ad ea facere, quae his ipsis litteris continentur, est apud nos homo quidam nostras, ob quoddam crimen, servatusque in carcere cum captivis, eorundem lingvæ non ignarus, Turcis tamen ignorantibus. Nuper itaque, quum unus ex iisdem captivis, qui pecuniam, qua se redimeret, Budam quaesitum, sponsore sui dato dimissus fuisset, et rediisset vacuus, a caeteris captivis hoc nomine interrogabatur, quidnam eorum princeps moliretur, essetne expeditionem in Hungariam factururus, quoque totus reliquus ejus rerum status haberetur, et id genus alia. Respondit, nunc statum res ejus esse pessimo, alterum ex filiis cum eo agere hostiliter, eumque illi eripuisse Aegyptum, et in dies potentiam ejus contra patrem augeri, nec possibile esse, ut expeditionem Hungaricam hoc anno suscipiat, quin potius, si quod bellum gerendum erit ei, iturum adversus filium, cui cum Persa et foedus amicitiae, et armorum societas intercessisset, ac demum totam Turciam hoc tumultu esse perturbatam ac sollicitam; atque supramemoratus homo, quaecunque Turcae inter sese de hujusmodi dolentissimo animo contulerant, observavit, et nobis recensuit die postero.

Noster quoque explorator, quem Budam miseramus, ut intelligeret aliquid tam de motu praefati magni Turcae, quam de novi hujus passae actionibus, retulit, ab amico quodam suo sibi esse dictum, nihil certi constare de ejusdem Turcae in Hungariam expeditione, huncque rumorem modo valde intendi, modo remitti, nesciri tamen, quanam id causa nisi si difficultates tegerent, quibus nunc laborant, et potius cum ipsum

Turcam nullam habiturum contra nos expeditionem credi oportere, neque habiturum, quia a filio et ex Asia metueret complures; alioqui hoc tempore naves apud Beogradum onerari frumento, quod subvehetur Budam, illudque si quum advectum fuerit, reponeretur ad servandum, venturum Turcam; si vero aut exponetur venui, aut distribuetur inter milites, non venturum, signum erit. Et haec de Turcicis rebus; ego vero, uua cum praefectis meis, novum hoc ver assequuti, operibus quibusdam Agriensibus operam dare incepimus, Deum opt. max. assidue orantes, ut maiestatem vestram sacratissimam diutissime felicem et incolumem servet, suisque sacratissimis conatibus atque vigiliis optatos successus cedat. Agriae 7. Martii 1559.

CXXV.

Nádasdy Tamás nádornak Verancesics Antal.

Ad magnificum dominum comitem palatinum Nadasd.

Illustris et magnifice domine, domine fautor et patrone mihi semper colendissime. Salutem et ser-^{1559. mart 7.} vitorum meorum propensissimam commendationem. Habeo maximas gratias vestrae magnificae dominationi de novis rebus, quas communicavit mecum, nec praetermisit hjs tot et tantis comitiorum negotiis occupata, mihi etiam vacare plusculum. Quam ego quidem benevolentiam vel potius gratiam singularem et officiis meis studiosissime promereri contendam, et

nova novis compensabo. Verum ubi de capellani mei*) Romae apud sanctam sedem apostasiae et lutheranismi causa in carcerem coniectum esse scribit, quem pro mea et pro caeterorum reverendissimorum dominorum fratrum meorum confirmatione eodem miseram nuncium, etsi id tempestive cognovisse non mediocriter placuerit, ut mature de substituendo, quopiam alio curam gereremus, quod est omnino factum necessarium, dolui tamen vehementer, qui et ipse in id calamitatis, miser satis alioqui, et a me et ab aliis de sola apostasia praemonitus, quum lutheranum esse nunquam deprehenderim, impegerit, et negotium nostrum intricaverit. Sed quid? res humanae fere omnes sic se habent, ut etiam hae, quae optimis consiliis gubernantur, perturbationibus suis non careant. At nos electi prospiciamus rebus nostris oportet, quemadmodum jam ad eosdem perscripsi, quid nobis faciendum esse sentiam. In Imperio autem faxit dominus Deus, ut omnia publico Christianitatis, nostri praesertim afflictissimi regni commodo et gerantur et constituentur, nec dubito respiraturos jam nos, postquam sacratissimus rex noster ad ejusdem imperii clavum accessit. Res vero Gallicae si cum Flandris convenient, orbis ipse a malis conquiescet. Sed diffido Gallo, metuoque vehementer, ne Turcae socio et confratri suo operam mutuam reddat, juxta illud: „mutuo muli scabunt“, donec tyrannus ille domesticum incendium exstingvat. Ideo solertissime erit advertendum, ne et Gallus spe pacis nos eludat, et Turca opprimat improviso, dum rumores belli domestici spargat, quasi hoc negotio intestino praepeditus

* Így. Világos hogy, capellánom meum'-nak kellene itt állani.

parsurus esset nobis, quo omne tempus nostrorum apparatusum frustra efflueret. Ego ab his de utroque hoste suspicionibus divelli nunquam facile possum, quippe, quae prima et potissima Christianorum perditio est, Turcae credidisse; secunda et ultima: foedus atque amicitiam cum eo contraxisse. Quod ipsum et de Gallo, et de posteritate Joannis teneo, qui Turcae armis freti et amicitia ac societate irretiti, ingenio etiam ac maleficiis ejus sese accommodant, ut vincant, et fructu scelerum suorum potiantur.

Sed de ejusdem Turcae motibus ac domesticis turbis, deque Persae victoria, quam adeo ingentem dicit superioribus mensibus de Tartaro retulisse, censeo nihil esse dubitandum, si litteris fides est adhibenda, quas mihi per hosce dies ab eo amico ex Turcia attulerunt, cujus antea etiam vestrae magnificae dominationi scripta ostenderim, et nunc in specie has ipsas ejus litteras solito more meo ad majestatem regiam dominum nostrum clementissimum miserim, traductione earum in his expressa, quo et dominatio vestra magnifica et mei caeteri domini observandissimi eadem intelligerent, quum sint et multa, et non sine, ut videtur mihi, consentanea ratione exarata.

Quod (inquit) ad Tattae amissionem attinet, quae capta est sub induciis, doleo; sed ii ob illatam a suis vobis hanc injuriam semper dubitaverunt, quod caesarea Romanorum majestas, ubi September excessisset, esset eis motura bellum, aggressique ob hunc metum artificia et praxes suas, sedulo ostentarunt id captivitatis Tattae plurimum suo displicuisse principi, quo interim ab apparatu belli contra se faciendo supersederetur, nec nostris armis vexarentur. Hisque de causis mandaverant suis finitimis, ut quieti stude-

rent, nec excursions facerent, summa adhibita diligentia, ne caesarea majestas ad movendum ei bellum provocaretur, veritus incommoda, quae sibi ex hoc accidere potuissent, quamquam plus fortasse detrimenti, quam utilitatis retulisset, et tametsi decrevisset ab armis sese continere hoc tempore, quod haudquaquam pro praesenti rerum suarum satis adverso statu habeat modum finitimis suis succurrendi, propterea tamen non intermisit commeatum et munitionum curam. Mox enim in istos fines mitti Danubio mandavit pulveris tormentarii magnam copiam, et globos ferreos, pro majoribus machinis, quorum minimi XVIII, maximi XXIII occharum essent ponderis, duodecies mille, et ligones, et palas, et id genus alia instrumenta, usibus fossilibus in bello necessaria; saccosque crassioris telae centies ac octogiesies mille, tumulis excitandis ad obsessorum murorum altitudinem superandam et conscendendam; postremo fusores quoque bombardarum misit Budam; et hinc multi conjiciunt, quod sit anno insequenti oppugnaturus Viennam. Verum pro opinione secretorum et familiarium quorundam amicorum, maxime vero N. nostri, tui peculiariter studiosi, qui ait se ab N. quodam affine suo, intimo et domestico ministro Turcae intellexisse, animum ejusdem esse propius ad Transsylvaniam accedendi, quod omnino eam provinciam apud se deliberaverit obtinendam, et basilicae suae, quam aedificavit recens, summittendi, sic eam nomine suo dotaturus et ditaturus; proventibus ejus, ut aequae ac reliquae majorum suorum eleemosynas erogare possit. Quapropter mirifice doleo, reginam has tam magni momenti res non perspicere, neque providere, vitareque, ne ipsamet suum evertat tandem domina-

tum; deberetque sane sedulo cogitare et prae oculis habere Szokoli, Raduli, et cujusdam tertii, primariorum hominum Valacchiae Transalpinae casum, quos hic princeps, fide et salvo suo conductu ad se perductos, mari haud ita multo post, juxta vicinas huic urbi insulas, sommergi fecit.

Sic vereor reginae quoque ipsi eventurum, si Deus quodpiam remedium non interposuerit, quo hic princeps propositum mutet. Quippe quem audio dixisse quod ipsemet Bebecchi mortem et sanguinem ulcisci ac ejus bona, tanquam servi sui, occupare velit; nam ipse Bebek ductorem se ejus exercitui futurum receperat, persuasus, quod hac ratione ad summam quampiam rerum esset evasurus, nimirum si effundendo humano sangvini, variisque formis excogitandis, quibus alienos status perturbaret et fortunam everteret operam daret. Quapropter justo etiam Dei judicio ad tam ignominiosam mortem cum complicibus suis perductus est. Neque ex his considerat regina subtiles horum astutias et occultas deceptiones, qui simulantes et persuadentes illi primum se Zygetum, Comarum, Viennam, et dehinc Agriam oppugnaturus, utinam potius, Gyula et Zigetto pertentatis Transsylvania non sit prima, quam experiantur, et eam sine evagatione gladiatorum, fidei, amicitiae et benevolentiae colore sibi vendicent. Quia ii summa sunt dexteritate, summo artificio ad inveniendas occasiones, quibus aliena regna intercipient. Nec plura de hoc dixerim, quamquam haec etiam, quae sum hucusque persequutus, in bonum et quidem in eum finem exposui, ut ob oculos ponerem, quae accidere possent.

Sed propterea ex parte altera nihil habemus certi, nec firmum facere possumus judicium, si hic

princeps ad bellum extra sua regna poterit proficisci, ob diversos respectus, de quibus jam deinceps dicam; et primum pro eo, quod videmus palam, scito, eum magna indignatione ex imaginationibus novarum rerum esse succensum, quum si homo elatus, iracundus et intolerabilis. Unde fit, quod perturbationes etiam accipiat non mediocres, quippe cui tot etiam intra breve spatium temporis supervenerunt insperatae res, haeque adversae omnes, ut bellum, quemadmodum ex bono loco habeam, quod meditabatur apud vos gerere, meo et eorum hominum iudicio, de quibus supra memineram, longe nunc est alia gerendi voluntate, quam eum diebus proximis fuisse cognosci potuit. Et videntur ejus consilia et conatus frigidius procedere metu eventuum, qui controversia et tam manifesto bello filiorum accidere possent; maximoque ex his angore aestuat, recogitando assidue secum, quam miros, quamque etiam adversae qualitatis effectus haec ipsa filiorum controversia, quae est habenda maximi, posset producere.

Quum enim pater utrumque filium, Zelimum ac Bajaziettum, longius ab se et distantius alterum ab altero collocare voluisset, ut et ipse securius regnaret, et ipsi agerent inter sese quietius, jusserat majorem Iconium in Ciliciam, quae nunc Caramania dicitur, minorem vero natu Amasiam in Cappadociam proficisci, hisque in locis zangzacatus suos gerere. Major nomine Zelimus patri parere non recusavit, minor etiam contempsit; et quia Zelimus ex priore zangzacatu, quem Magnesiae in Mysia Phrygiae habuerat, per ea loca Bithyniae in Caramaniam transire cogebatur, quae tenebat frater, multo copiis majoribus instructus quam esset ipse, metuebat sibi; ne tamen patris mandatum praeterisse videretur, et dissimularet metum

movit Magnesia cum IIII. duntaxat millibus hominum, et ingressus iter tam lente illud agere coepit, ut vix milliare unum in die promoveret, crebro consistendo, et extrahendo tempus digressibus, donec fratrem hiisdem locis excessisse, sibique tutum iter reliquisse cognovisset. Qui vicissim tantum abest ut eo proficisci voluerit, ut potius extemplo pedem firmaverit, et aggressus fuerit omni ex parte earum regionum majorem militem contrahere, coactoque XII vel XV circiter millium hominum equestrium lectissimorum numero, non ex solis Turcis sed etiam ex Persis, Curtis, aliisque nationibus, et progressus nonnisi biduum, denuo constitit eo animo, ut passum ultra nequoquam faceret.

Quo mirifice offensus parens ter ad eum per janitores suos, quos Cappizias vocant, nunciavit, ut Amasiam tandem proficisceretur. At ille vicissim suis ad patrem missis nunciis oravit summo studio, ut in suo zangzacatu, in quo adhuc erat, ex eoque excedebat, illum hiemare pateretur, vel saltem in Magnesia urbis zangzacatum, quo frater erat excessurus, liceret ei proficisci, ibique gerere zangzacatum, aversatus Amasiae mansionem, ut fatalem locum omnibus, qui ei ex ottomana stirpe retroactis annis praefuerunt, qui nimirum omnes fuissent ab adversa fortuna vehementer infestati, et sortiti demum eventus infelices.

Verum hac illi facultate a patre non concessa, mox ad necessitatem conversus, tres filios, et tres filias, cum reliquo foeminarum suarum gynaeceo, et tota suppellectile Amasiam expedit, servato apud se quarto filio aetatis suae annos nato XII, qui cognita utcunque perturbatione parentis, divelli ab eo

nulla potuit ratione, quum insuper magnis vocibus profiteretur, se cum patre suo et vivere et mori velle, tantoque animo pueri motus pater eum apud se retinuit. Postea, quasi magno quopiam exoneratus esset pondere, ab se familia amandata, vertit animum ad fratrem bello insequendum, urgendumque ad consequendas manus, studio contentionis, quae est inter eos, finem attingendi. Zelimus, cui et animus, et vires desunt, Prusam cum admodum parva existimatione venit, esto quod sit et natu major et patri charior; unde ut est vino deditus, ita etiam avarus habetur ab omnibus. Bajazettus contra, qui et fratre est liberalior, et a tota gente sua diligitur, decrevit eodem omnino potiri, vel vivo, vel mortuo, utcumque Prusam sese subduxerit, et in ea civitate securitatem sibi constituerit. Fit itaque ex his, ut omnes qui habent rerum gerendarum peritiam, judicent jam nec rationem ullam esse redeundi Baiazettum cum patre in gratiam, posteaquam ei sese tam aperte, ensequendo stricto inobedientem declaravit, nec deinceps in quiete vitam acturum, ulloque loco sine suspitione, quoad vivet, mansurum, donec aut ipse fratrem, aut ipsum frater confecerit.

Quem pater adeo magnum ignem exstincturus, misit passam Pertanum ex quatuor ultimis, ad Baiasetum cum trium vestium aurearum munere, eumque nomine suo moneri jussit, pareret patri, et Amasiam in designatum sibi zangzacatum sine mora proficisci non recusaret, in eoque pro sua voluntate, et mandato moraretur, alioqui sciret, postea, errore jam commisso, omnem illi poenitentiam fore frustraneam.

Passa Pertanus legationem hanc subiturus, fertur in discessu, testamento condito de ultimis rebus

suis statuisset metu, ne eum Bajazettus partim existimationis suae amplificandae causa necaret, partim ut populis de se incuteret pavorem. Simili ratione ad Zelimum quoque Prusam legatum misit Mehmetum quatuor passarum tertium cum simili trium vestium munere, et mandato, incumbens totis viribus, ut memoratos filios in mutuam concordiam revocaret. Quod quidem difficile factu erit, quia opinio est, Bajazettum cum Persa conjunctionem et occultum foedus habere, eique omnium locorum restitutionem promisisse, quae pater ab eo acceperat elapso tempore, si ei amicus fuerit, et paterno imperio ejus auxiliis potiretur. Et tametsi res hujusmodi non sint in hoc statu permansurae, Bajazetti tamen superbia ea est, quae iam paternam exsuperat, palam et animose ostendens, quod in amasiano zangzacatu manere nolit. Et sic, legationem hanc ii duo passae quonam sint effectum peracturi, adhuc ignoratur.

Hic vero princeps dubius ex his admodum de motu Persae opportunitatibus suis consulere non omittit, apparatus intendendo, et expediendo quo ad resistendum paratus et praesto esse possit, si forte inter eos bellum exardesceret. Quum diebus proximis jam Zkender passa summus praefectus Turcae eorum finium, qui sunt ad Persiam, scripserit huc, se ex quibusdam signis colligere, et quasi jam plane cognoscere, Persam omnino motum aliquem armorum ineunte vere tentaturum, victoria tumefactum, quam nunc obtinuit de Tartariis. Ii enim eum LXXX milibus familiarum ingressi in provinciam Syrnanam, summas ejus regionis montes insederant; Persa vero, e regnis suis aversurus hanc nationis hujus colluviam, filium in eos immisit pleno cum imperio. Qui

XIII. die Augusti mensis habito cum hiisdem Tartaris praelio rem feliciter gessit. Amissis enim ex suis IIII dumtaxat millibus hominum, CXX hostium millia confecisse fertur. Qui vero tantae cladi superfu-erant, in montes illos ad familias suas fuga facta, salvos se fore crediderunt; sed hac fiducia frustrati sunt, quia idem Persae filius hiisdem conscensis montibus novum in eos impetum fecit, ubi post aliam victoriam omnibus maribus ac impuberibus interfectis, uxoribus ac filiarum et servarum greges in captivitatem abegit.

Hoc novum verum est, et merito hic idem princeps secum in animo suo discruciar, et semetipsum rodere debet, quod scopum, quem destinaverat sibi, nequeat attingere, quum destinata huiusmodi non semper eventus obtinent, quos conceperant. Unde expeditionem aliquam contra externos, maxime vero in Hungariam educere, non erit ei facile, quum modo res ipsius in aliam formam commutatae sunt, alium cursum tenent; haedemque pro iudicio meo, si hoc statu fuerint, quo sunt impraesentia, haud quoquam poterit proficisci, esto quod hoc tempore nullibi bellum gerat, et minus ipse etiam credo quod illud vel per exiguum habere desideret, quando quidem omnes et orae Graeciae maritimae consumptae sunt fame, ac plurimis affectae malis, et respectu filii Bajasitti, contra quem immortali odio commotus est, laboratque etiam maximo metu, ne occasione suae absentiae Constantinopolim veniret, et in thesauros invaderet. Quapropter homines iudicio praediti omnia huiusmodi secum expendunt, agnoscuntque, eundem ne Adrianopolim quoque hoc anno proficisci audere, quantumvis elatius animum gerat, et sese jactitet.

speroque quod confusus ad postremum remanebit, maxime si pax inter Philippum regem et Gallum consequetur, uti hic consequuturam omnes judicant, quod iis ea esset parum e re et intempestiva. Ad Algerum vero quod attinet, superioribus diebus a Hazzan aga filio Barbarosae ejus loci summo praeside venerant duae triremes, et per has nunciarat caedem nostri exercitus, quem ducebat Orani comes cujus ob audaciam nimis temere fortunae sese identidem exponendi, accidit id erroris, et clades earum copiarum accepta est. De qua sane debemus non immerito dolere, Deusque tam illorum, qui occisi, quam qui sunt capti, misereatur. Hazzan autem aga tanta victoria elatus classem integram petiit ab hoc principe, quo mox, ubi navigandi tempora subierint, expeditionem contra Oranum ducat. Cui responsum est, ut a quibusdam turcicae classis praefectis amicis meis accepi, quod ei X triremes ad futurum navigandi tempus idoneum mittentur, et si contigerit principem hunc in Hungariam cum expeditione non proficisci, ad has X addentur quinquaginta; sin vero proficiscetur omnino, hoc etiam eventu fore ut eadem classis emittatur, sed maritimis duntaxat provinciarum suarum custodiendis oris. Utque hactenus intelligere potui, jam injunctum est scribis, quibus haec incumbit cura, ut expediant mandata ad evocandos remiges, et caeteram classi turbam necessariam, nec id pro majore quam pro LXXX triremium numero; doleoque ipse mirum in modum quod iis tantum fortuna faveat. Nam proxime etiam classis XLVII triremium, quae ab expeditione rediit, vix duos remos singulae triremes per omnes foros habuerunt, et quicumque hostis obviam illis isset, haud

dubie superior eorum exstitisset, quia vacuae erant hominibus aegreque suffecerant salvis et incolumibus domum reducendis. Licet autem satis magnam nostrorum hominum fecerint praedam, tamen de illis etiam desiderati sunt maximo numero, partim tabe diversarum aegritudinum confecti, partim vi hostium in depraedationibus et in locorum oppugnationibus caesi.

De Gallo autem oratore, Vigna nuncupato, credo, quod ei brevi succedetur, quamquam ipse dicat, se non hinc recessurum, nisi cum classe, quam promissam sibi esse jactat. Quod illum eo animo spargere existimo, ut vox in vulgus exeat, regi suo Turcae amicitiam non defore etiam imposterum, quo facilioribus et honestioribus rex ejus conditionibus pacem faciat cum Philippo. Qui orator Vigna argutis suis inventionibus, et occultis libellis supplicibus crebro huic principi exhibitis effecit, ut oratores Genuensium spe et consilio suo frustrarentur, dimitterenturque parum decore et infectis rebus.

Conqueruntur autem, quod hic princeps verbo et promissis suis quae illis fecerat, non stetisset. Quumque de his apud Hrustanum Passam agerent diligentius, responsum habuerunt, quod libelli eorum supplices, quos a Francisco franco, cognominato Turturino, acceperant, non fuissent a principe intellecti, verum postea intellectis, et cognito, quod uterentur vexillo Philippi regis, cruce rubea insignito, eum haudquaquam cum illis foedus habere velle, nisi statuerint se et amicorum amicos et inimicorum ejus inimicos fore; conditioneque hujusmodi ab oratoribus non accepta, mandatum illis est, ut intra dies VIII interdicti omnium etiam rerum mercimonialium emtione, Constantinopoli recederent; cui mandato more

gesto et eodem ad diem exequuto, solverunt hinc, eosque jam Chium pervenisse intelleximus. Franciscus vero Turturinus, qui legatus civitatis ejus diu jam hoc foedus curaverat, et crediderat, Hruztanum se pugno tenere clausum, uno momento tanta spe dejectus est, eique omnis labor, omnis industria redundavit in nihilum, nec id ob aliud quam ob avaritiam, imbecillitatem, et fastum ejus urbis magnatum. Quorum animi plane sunt hoc experimento cogniti, et haud scio qua justa et legitima ratione has suas praxes apud Philippum regem salvabunt, quove easdem ipse ab eis est accepturus animo, ea re potissimum, quod promiserant Turcae se intra biennium, ubi tres milliones aureorum nummum a Philippo rege, quos ei mutuo dederant, exegissent, Genua classem imperialem amoturos, ab eodemque Philippo defecturos, quando quidem ea essent facultate et fiducia, quod tot triremes adornare possent, cum quibus cuivis principi opponere sese non dubitarent.

Unde meo quidem judicio iidem Genuenses continendi erunt bonis verbis, et quadam quasi comitate restituendam illis pecuniam suam esse censerem, quod interim cogentur in officio persistere, et sese bene affectos demonstrare, fientque hunc in modum sub manu multo meliores, et quales esse oporteat, quamquam cum Hruzitano passa mira quaedam de maximis rebus, et quae universae christianitati, quemadmodum dictum est mihi, cessura essent in praejudicium, contulerunt. Hisque modo honestatis gratia silentio commissis, prosequor alia, quippe qui dum cum eodem Turturino essem una hospitatus, et animadvertissem nimis crebro et intime, et occulte illum cum passa agere, suspectum habui, decrevique nego-

ciationem ejus intelligere, quam cautissime potuissem, modumque assequutus avertendi et perlegendi scripta ejus in cubiculo, quo pene simul utebamur, reperi schedam unam ad passam exaratam, qua illi declarabat, esse sibi facultatem agendi et concludendi de induciis inter Philippum regem et magnum Turcam faciendis observandisque terra et mari. Postea idem Turturinus, quia amicus esset mihi, quum jam in procinctu esset discedendi, contulit mecum de omnibus, quaecunque egerat et transegerat, pariterque confessus est peramanter, quod cum Hruzano passa convenisset, quodque jussisset, ut reverteretur ipse ad Philippum regem, et edoceret eum, decrevisse principem suum inducias cum eodem Philippo facere, et arma terra, marique suspendere. Eniteretur propterea summa diligentia, ut a Philippo rege cum responso per totum Martium Constantinopolim recurreret, quo cognito Philippi animo, princeps etiam ejus tempori deliberare posset, an expeditionem in Hungariam sit prosequuturus, necne.

Atque his hunc in modum actis Turturinus hinc recessit, et jam vigesimus dies est a discessu ejus. Iter autem acturus erat terra Ragusium versus, inde mari Anconam transmissurus, et demum promoturus Romam, gratia de hiis colloquendi cum domino Barkas oratore Philippi regis, qui Venetiis eodem erat venturus, uti ex ejus literis, quas ex eadem urbe ad eum dederat, iter parans cognoverat. Et quantum ipse Turturinus judicabat, in magnam venerat spem, quod hoc induciarum negotium perventurum esset ad effectum. Nec defuit per me, quin in dies tam de his, quam de omnibus aliis similibus rebus diligenter et minutim dominum Augerium edocerem,

ob ejus singularem erga me benevolentiam, qui quidem summa se prudentia et regit et gerit, illud non mediocris gratiae divinitus assequutus, quod Philippus Baldus, unicus solator ejus aerumnarum ac solitudinis summissus ei fuerit, quando quidem chaus custodiae ejus excubator neminem ad illum tam turcarum, quam christianorum ingredi permittit, tametsi habeam ipse modum dandi ad eum fere quotidie literas meas, et illius recipiendi Venetias destinatas; cui quidem operae nunquam hactenus defui, nec defuturus sum etiam in posterum.

Caeterum habita ab eodem domino Augerio facultate, si modo eam mihi concesserit, ipsemet istuc veniam, singillatim coram de omnibus rebus hujusmodi rationem expositurus, veniente hoc principe in Hungariam; ubi tam cum Majestate caesarea quam cum serenissimo rege Bohemiae communicabo meam quandam opinionem, idque (uti jam dixi) si Turca Viennam et ad vicina ejus loca voluerit venire, contendamque omni studio, ut uno mense ante sim istic quam ipse aderit, quum sit mihi tale quiddam, quo, uti ipse existimo, maxime hostis exercitus poterit disturbari, quamquam alioqui omnes communiter, qui sunt ingenio praediti, judicant, quod propter causas et res superius enumeratas, haudquaquam inpraesentia, quod videmus manifeste, venire poterit. Hisque hic fine posito, reliqua quaecunque successivis diebus consequentur, perscribere curabo diligenter.

Nec harum literarum XX Novembris proximi Galatae datarum fuere alia, quam salutationes, commendationes et officia. Quibus omissis, ut ad rem nihil facientibus, ea dumtaxat ex eis verti, quae de novis rebus habuerunt, transmisique ad ve-

stra mmagnificam dominationem; quae qualia fuerint, ex eorum collatione intelliget, quae istuc aliunde perferuntur. Nam videntur mihi satis prope ad veritatem accedere, nisi hoc fortasse fallar, quod facile credam id quod maxime vellem, juxta afflictorum hominum conditionem. Sed hic etsi quotidie fere aliquid de his audimus a vicinis qui nobis imminet, et non solum armis, sed etiam rumorum terriculis premere nunquam nos desinant, ego tamen omnem istinc tam de magni Turcae expeditione, quam de Philippi regis et Galli pace opperior veritatem. Quae si revera confieret, sperarem nos quoque quieturos, fines postremo hi nihil omnibus sunt, quam antea esse soleant. Novus hic passa cum zangzachis novis omnium dedititorum subditorum immunitates et jura commutat, eaque omnia sic astringit, ut paulo miseri post ad restim usque astringentur. Giulia quoque in dies magis ac magis circumveniri coepit. Lippensis begus ubi primum iniit eum zangziacchatum, magnam copiam silvestris materiae subditis caedere et eam ad castellum, quod nuper apud Giulam erectum est, comportari mandavit, animo aliud ibidem erigendi, et jam erectum dilatandi, Gyulenseque praesidium magna et gravi esse sollicitudine, nec illud sine tumultu fore, quando praefectum novum quem hinc 27. Februarii expedivi cum homine meo praecipuo, et equitibus XL recipient. Remque aut ejus aut hujus loci exaggerare pluribus nolo, ut quam scio esse notissimam; omnes tamen hi fines magnopere laborant, et imbecilles sunt, nec aliam illorum videor mihi videre conditionem, quam quae superis ac fortunae relinquitur. Obsecro itaque dominationem vestram magnificam, et omnes caeteros dominos,

gerite horum finium carum, quia hostes non dormiunt, timendumque maxime est, ne, dum nos spe et studio pacis aliud agimus quam quod res postularet, finium aliquam, vel horum, vel aliorum partem amittamus, quum et illud per captivos ad nos affertur, vix eorum principem expeditionem contra nos facturum, emissurum tamen e primariis passis unum, cujus non aliud mandatum erit, quam Zigetum, Gyulam, Agriam et Transilvaniam tentare. Quae Transylvania quam egregie adepta sit Valachiae Transalpinæ dominatus. formam, nova reginae Isabellae parricidia de clarant Audimus enim, quod Andream Bathory a Somlyo, Michaelem Czyaki, Joannem Zalanczy et quosdam alios fecerit recens occidi, Melchioris quoque Balasae filio sub custodiam redacto, quod accersitus ab ea pater venire respuerit. Atque ex hiis tam horrendis foeminae praestigiis, et Georgium Bathory, et Joannem Terek, et Clementem Artandi, et Thomam Varkoch in timorem fuisse coniectos, omnesque fugitare conspectum ejus. Verum Franciscum etiam Nemethy, qui ad eam profectus fuerat, a medio itinere, hiis fortasse cognitis, domum rediisse et novo cuidam castello excitando operam dare. Quae omnia etsi sub incertis adhuc circumferuntur authoribus, late tamen obtinere fidem, quum Turcae amasii et beneficiarii similes fructus referre soleant; quibus ut Dominus Deus saniolem mentem concedat, eosque in viam reducet, oremus. Meque ac servitiis meis Vestrae magnificae dominationi officiosissime commendatis, eandem cum omnibus suis charissimis salvam et felicem esse cupio. Agriae VII. Martii 1559.

XC. b.

Nádasdy Tamásnak Verancsics Antal.

1558. aug. 5.

Summa rei totius actae, peractaeque oratorum nostrorum, apud summum pontificem legatorum, haec est. Cum primum in urbem appulissent, et audientiam sibi dari postulassent, responsum eis a pontifice est, ut exspectarent. Ad ea subjungere oratores, aequo id animo se facturos, cum a Caesare suo in mandatis habuissent, ut se se omnino voluntati Sanctitatis Suae conformarent. Renunciavit eos tanto facilius moram ejusmodi laturos, postquam hoc mandatum haberent. Ideo etiam ex officio suo exspectarunt. Hunc in modum expectatione oratoribus imposita, pontifex interim per omnem Italiam misit, qui consulerent jurisperitos, quid hoc casu rerum, quod papatu suo inusitatum contigisset, sibi esset decernendum. Uno enim Imperatore superstitute, alium constitui, et id a Lutheranis, nec se consulto, nec apostolica sede, et novum, et absurdum sibi videri, prorsusque ignorare, quid tandem rerum agat, quod e dignitate fieret papatus.

Hac expectatione in diem ferme sexagesimum sextum dilata, solus ad postremum D. Martinus Guzmanus privatim, et jam sub noctem accersitus a pontifice, expediti sunt paucissimis: serenissimum regem Romanorum, pium, catholicum, et praeclare ab initio semper de apostolica sede fuisse meritum, dignumque

gratiis esse amplissimis, verum, nec se quoque auctoritati et dignitati suae deesse posse. Casum hunc adeo novum et insolitum, etiam deliberatione esse difficillima, nec tam repente quidquam adhuc de illo potuisse constituere, brevi tamen statuturum, et per oratorem suum, quem jam destinasset, significaturum.

Habemus ad haec et Caletem in Picardia recuperatum, et Algirium in Africa, multorum asseveratione captum. Sed nondum omnino affirmanter. Algirium Hispanis, qui proxime aliquot millibus in ea Africae litora fuerant a Philippi classe expositi, per oppidanos quosdam deditum. Caletem vi captum, ut praesidio destitutum, facileque de Calete credere potuisse, si modo acciderit. . . . Rei tamen, quae de Calete dicitur, quia adhuc in expectatione veritas est, videbimus non multo post, et significabo, quidquid constiterit. Dat. Viennae 5. Augusti 1558.

TARTALOM.

1549.

	Lap
I. Bornemisza Gergelynek nov. 13.	1
II. Slavicus Lukácsnak nov. 20.	3
III. <i>Verancsicsnak Slavicus Lukács</i> nov. 27.	4
IV. Slavicusnak dec. 1.	5
V. N-nek dec. 1.	7
VI. Perneszi Györgynek dec. 4.	7
VII. Testvérének Jánosnak dec. 10.	9
VIII. N. Lőrincznek dec. 10.	10
IX. Pesti Gáspárnak dec. 13.	11
X. Pesti Gáspárnak dec. 18.	13
XI. Csáki Mihálynak dec. 19.	18
XII. Testvérének Jánosnak dec. 19.	20

1550.

XIII. Andronicus Tranquillusnak jan. 10.	21
XIV. Testvérének Mihálynak jan. 10.	23
XV. Testvérének Mihálynak jan. 16.	24
XVI. Dániel képirónak jan. 17.	26
XVII. Petrinus Mihálynak jan. 20.	28
XVIII. Dániel képirónak febr. 1.	29
XIX. Csáki Mihálynak febr. 8.	31
XX. Macarius Józsefnek febr. 8.	33
XXI. Macarius Józsefnek febr. 8.	33
XXII. <i>Verancsicsnak Csáki Mihály</i> febr. 15.	35
XXIII. Arsatus Vitálisnak febr. 24.	40
XXIV. <i>Verancsics Andronicus Tranquillus</i> febr. 25.	42
XXV. <i>Verancsicsnak Csáki Mihály</i> mart. 2.	43
XXVI. Révay Ferencznek mart. 5.	45
XXVII. Testvérének Mihálynak mart. 12.	46
XXVIII. Andronicus Tranquillusnak mart. 12.	49
XXIX. <i>Verancsicsnak Csáki Mihály</i> mart. 18.	51

	Lap.
XXX. Csáki Mihálynak apr. 24.	58
XXXI. <i>Verancsicsnak Csáki Mihály</i> apr. 28.	58
XXXII. Hasenberg Jánosnak máj. 1.	60
XXXIII. Csáki Mihálynak máj. 16.	63
XXXIV. Nádasdy Tamásnak máj. 20.	66
XXXV. Balthus Bonifácznak jún. 8.	68
XXXVI. Selli Eleknek jún. 18.	69
XXXVII. Hasenberg Jánosnak jún. 20.	71
XXXVIII. <i>Verancsicsnak Nádasdy Tamás</i> jún. 27.	74
XXXIX. Nádasdy Tamásnak jún. 28.	75
XL. Oláh Miklósnak júl. 2.	76
XLI. Hasenberg Jánosnak júl. 8.	78
XLII. Hasenberg Jánosnak júl. 7.	80
XLIII. Csáki Mihálynak aug. 1.	83
XLIV. Slavicusnak aug. 5.	82
XLV. Hasenberg Jánosnak sept. 2.	97
XLVI. Oláh Miklósnak sept. 2.	97
XLVII. Armpruster Kristófnak sept. 2.	102
XLVIII. Csáki Mihálynak sept. 13.	104
XLIX. Oláh Miklósnak sept. 26.	106
L. Nádasdy Tamásnak sept. 26.	109
LI. Oláh Miklósnak sept. 28.	114
LII. Oláh Miklósnak oct. 2.	115
LIII. Nádasdy Tamásnak oct. 2.	118
LIV. Nádasdy Tamásnak oct. 4.	126
LV. Nádasdy Tamásnak oct. 6.	122
LVI. Nádasdy Tamásnak oct. 8.	127
LVII. Nádasdy Tamásnak oct. 10.	131
LVIII. Oláh Miklósnak oct. 11.	132
LIX. Nádasdy Tamásnak oct. 12.	135
LX. Oppolitánus Jánosnak oct. 14.	138
LXI. Nádasdy Tamásnak oct. 26.	139
LXII. Federigo Badoariónak oct. 26.	142
LXIII. Oláh Miklósnak oct. 23.	145
LXIV. Oláh Miklósnak nov. 10.	146
LXV. Oláh Miklósnak nov. 15.	147
LXVI. Oppolitánusnak nov. 15.	152
LXVII. <i>Verancsicsnak Oppolitánus</i> nov. 15.	153
LXVIII. Oppolitánusnak nov. 17.	154
LXIX. Nádasdy Tamásnak nov. 20.	155
LXX. <i>Verancsicsnak Gregoriánczi Pál</i> nov. 7.	159
LXXI. Gregoriánczi Pálnak nov. 22.	160
LXXII. Gregoriánczi Pálnak nov. 28.	163
LXXIII. Nádasdy Tamásnak dec. 11.	166

1551.

LXXIV. Gregoriáncai Pálnak nov. 18.	171
---	-----

1552.

LXXV. Báthori Endrének april 15.	175
LXXVI. Oláh Miklósnak máj. 16.	177
(Az 1553—7-ből szóló, Verancsics első konstantinápolyi követsége éveiből fenmaradt, levelek a III. és IV. kö- tetben láthatók).	

1557.

LXXXVII. Egy lengyel püspökhöz nov. 20.	180
LXXXVIII. Kaszun budai beglerbégnak jan. 2.	181
LXXXIX. Oláh Miklósnak jan. 10.	189
LXXX. A királynak Verancsics és társai febr. 21.	192
LXXXI. Ugyanannak ugyanazok febr. 21.	195
LXXXII. Torda Zsigmondnak febr. 22.	196
LXXXIII. Maximilián királynak mart. 14.	198
LXXXIV. Perényi Gábornak mart. 22.	203
LXXXV. Mihály testvérének mart. 27.	205
LXXXVI. Verancsicsnak Torda Zsigmond mart. 28.	207
LXXXVII. Mágoesi Gáspárnak apr. 18.	210
LXXXVIII. Verancsicsnak testvére Mihály apr. 29.	217
LXXXIX. Oláh Miklósnak maj. 5.	219
XC. Verancsicsnak testvére Mihály máj. 25.	222
XC. b. Nádasdy Tamásnak aug. 5.	364
XCI. Verancsicsnak testvére Mihály aug. 22.	223
XCII. Busbek Augérnak sept. 1.	227
XCIII. Illicinus Péternek sept. 10.	233
XCIV. IV. Pál romai pápának sept. 12.	235
XCV. Nádasdy Tamásnak sept. 19.	238
XCVI. Verancsicsnak testvére Mihály oct. 1.	243
XCVII. Verancsicsnak Sebridovski Antal oct. 16.	246
XCVIII. Verancsicsnak Dudics András oct. 28.	248
XCIX. Sebridovszky Endrének oct. 30.	252
C. Rápicius Endrének nov. 1.	253
CI. Verancsicsnak testvére Mihály nov. 6.	357
CII. Egy Nagyságosnak (Teleki Imrének ?) nov. 12.	258
CIII. Verancsicsnak Torda Zsigmond nov. 13.	262
CIV. Pesti Ferencznek nov. 13.	263
CV. Verancsicsnak Rápicius nov. 14.	266
CVI. Maximilián cseh királynak nov. 20.	272

	Lap
CVII. Nádasdy Tamásnak nov. 24.	278
CVIII. Strada Jakabnak dec. 4.	276
CIX. Egy Tisztelendőnek dec. 5.	287
CX. Verancsicsnak testvére Miklós dec. 27.	290

1559.

CXI. Maximilián cseh királynak jan. 1.	297
CXII. Maximilián cseh királynak jan. 2.	302
CXIII. Telekesinek jan. 3.	304
CXIV. Roblem Menyhérdhez jan. 4.	306
CXV. Maximilián cseh királyhoz Verancsics, Torda és Pesti Ferencz jan. 9.	309
CXVI. Telekesinek jan. 11.	312
CXVII. Maximilián cseh királynak jan. 15.	316
CXVIII. Oláh Miklósnak jan. 15.	320
CXIX. Maximilián cseh királynak jan. 29.	328
CXX. Maximilián cseh királynak febr. 1.	329
CXXI. Verancsicsnak testvére Miklós febr. 9.	338
CXXII. Maximilián cseh királynak mart. 6.	337
CXXIII. Maximilián cseh királynak mart. 6.	341
CXXIV. Ferdinánd császárnak mart. 7.	345
CXXV. Nádasdy Tamásnak mart. 7.	347

A M. AKADEMIA TÖRTÉNELMI BIZOTTSÁGÁNAK KIADÁSAI.

- MTÖRTÉNELMI TÁR. I. köt. X. és 260 l. egy példánnyal 2 frt. 10 kr.
 — — — — — II. köt. 215 l. 100 réshes meteszt példánnyal 3 frt. 10 kr.
 — — — — — III. köt. 264 l. egy példánnyal 1 frt. 40 kr.
 — — — — — IV. köt. 260 l. 1 frt. 40 kr.
 — — — — — V. köt. XVIII. és 231 l. 1 frt. 40 kr.
 — — — — — VI. köt. 264 l. egy példánnyal 1 frt. 60 kr.
 — — — — — VII. köt. 264 l. 1 frt. 60 kr.
 — — — — — VIII. köt. 289 l. 4 kiadv. tábl. 1 frt. 60 kr.
 — — — — — IX. köt. 244 l. 1 frt. 88 kr.
 — — — — — X. köt. 240 l. aranyfűzők s okm. példánnyal 1 frt. 80 kr.
 — — — — — XI. köt. 240 l. 1 frt. 88 kr.
 — — — — — XII. köt. 222 l. 1 frt. 70 kr.

A füzetek költsége és a együtt füzetek forrása.

MONUMENTA HUNGARICA HISTORICA. Magyar Történelmi Emlékek, egy-egy részben
 számból álló füzetek ára 10 frt. 60 kr., külön egy füzet ára 3 frt. 12 kr.

- | | | |
|----|-----------------------------------|--|
| 1. | 1. sz. Első osztály: Okmánytárak | I. köt. (Brüsseli Magyar Okmánytár I.) |
| | 2. sz. Második osztály: Írók | I. köt. (Sándor György Emlékiratja.) |
| | 3. — — — — — | II. (Verancsics Munkái I.) |
| | 4. — — — — — | III. (Verancsics Munkái II.) |
| 2. | 5. sz. Első osztály: Okmánytárak | II. köt. (Brüsseli Magyar Okmánytár II.) |
| | 6. sz. — — — — — | III. köt. (Brüsseli Magyar Okmánytár III.) |
| | 7. sz. — — — — — | IV. köt. (Brüsseli Magyar Okmánytár IV.) |
| | 8. sz. Második osztály: Írók | IV. köt. (Verancsics Munkái III.) |
| 3. | 9. sz. Második osztály: Írók | V. köt. (Verancsics Munkái IV.) |
| | 10. sz. Első osztály: Okmánytárak | V. köt. (Londoni Magyar Okmánytár I.) |
| | 11. sz. Második osztály: Írók | VI. köt. (Verancsics Munkái V.) |
| | 12. sz. Első osztály: Okmánytárak | VI. köt. (Árpád-kori új Okmánytár I.) |
| 4. | 13. sz. Második osztály: Írók | IX. köt. (Verancsics Munkái VI.) |
| | 14. sz. Első osztály: Okmánytárak | VII. köt. (Árpád-kori új Okmánytár II.) |
| | 15. sz. — — — — — | VII. köt. (Árpád-kori új Okmánytár III.) |
| | 16. sz. — — — — — | IX. köt. (Árpád-kori új Okmánytár IV.) |
| 5. | 17. sz. Második osztály: Írók | XV. köt. (Tótköny Imre Emléke.) |
| | 18. sz. — — — — — | VII. köt. (Hésházy, Mikó Ferenc.) |
| | 19. sz. — — — — — | XI. köt. (Apor Péter Minden Munkái.) |
| | 20. sz. — — — — — | XII. köt. (Brutus Magyar Históriaja I.) |
| 6. | 21. sz. — — — — — | X. köt. (Árpád-kori új Okmánytár V.) |
| | 22. sz. Első osztály: Okmánytárak | X. köt. (Verancsics Munkái VII.) |
| | 23. sz. Második osztály: Írók | X. köt. (Verancsics Munkái VII.) |
| | 24. sz. — — — — — | XVII. köt. (Ducal János Commentáriusai.) |

Sajtó alatt, részben sajtókészben:

Második osztály: Írók:


- VIII. köt. (Gyalai László; Simonok.)
 XIII. XIV. köt. (Brutus Magyar Históriaja, III. III.)
 XVI. köt. (Fergsch Ferenc Commentáriusai.)
 XVIII. köt. (Tótköny Imre Emléke.)

TÖRÖK-MAGYAR-KORI TÖRTÉNELMI EMLÉKEK. Első osztály: I. II. III.

(Okmánytár s Hódoltság történetéhez Magyarországon I. II.) XXX. 485 és 489 l. 8 frt.

MAGYAR LEVELES TÁR. I. köt. Négyzetes magyar írással 1501—1500. XX. sz. 120 l. 0 költ. táblával 4 frt.

ÖV-MUTATÓ Fejér György Okmánytárához, Kézssé által 40 kr.





B.D. 1919

